

國學基本叢書

陸放翁集

(二)

陸游著

商務印書館發行

書叢本基學國

集翁放陸

(二)

著游陸

行發館書印務商

# 陸放翁集

劍南詩稿

卷第一

別曾學士

兒時聞公名。謂在千載前。稍長誦公文。雜之韓杜編。夜輒夢見公。皎若月在天。起坐三歎息。欲見亡繇緣。忽聞高軒過。驩喜忘食眠。袖書拜轅下。此意私自憐。道若九達衢。小智妄鑿穿。所願瞻德容。頑固或少痊。公不謂狂疎。屈體與周旋。騎氣動原隰。霜日明山川。匏繫不得從。瞻望抱捐捐。晝石或十日。刻楮有三年。賤貧未卽死。聞道期華顛。他時得公心。敢不知所傳。

送仲高兄宮學秩滿赴行在

兄去游東閣。才堪直北扉。莫憂持橐晚。姑記乞身歸。道義無今古。功名有是非。臨分出苦語。不敢計從違。

題閤郎中溧水東臯園亭

省中地禁清。晝長侍史深。注薰籠香榮。名挽公公不住。東臯歸去栽花忙。鬢髮華髮映朱絨。同舍半已排雲翔。正如少陵入嚴幕。本自不用尙書郎。向令封侯佩金印。不然草詔直玉堂。萬鍾會作夢幻過。三徑空歎松菊荒。樂天十年履道宅。贊皇一夕平泉莊。公看富貴定何物。一笑乃復坐此妨。東臯樂哉日成趣。簪花起舞當自強。知公能容賤子狂。請賦式微之二章。

和陳魯山十詩以孟夏草木長遶屋樹扶疎爲韻

言語日益工。風節顧弗競。杞柳爲栝椹。此豈真物性。病夫背俗馳。梁甫時一詠。奈何七尺軀。貴賤視趙孟。

又

唐虞亦人耳。四海可高謝。哀哉斗升故。詔妄兩憑架。心明物自資。能整故能暇。會當棄人事。面壁度九夏。

又

大父昔在朝。騰上唯恐早。淡然清班中。灰寒而木槁。議論主中和。人才進耆老。至今下馬墳。不生刺人草。

又

櫻酪事已過。角黍配夏熟。尙憶少小時。綵縷繫腕玉。此生本幻戲。衰態轉眼足。三郎老無憐。始解歎絲木。

又

門無容車高。庭止旋馬廣。富貴固易耳。正恐卿慙長。時情競脂韋。家法獨醜髡。靜處看紛紛。枯槁勞俯仰。

又

至人貴其身。不使事物遶。捐身易富貴。明珠彈飛鳥。我願稱善人。題作墓上表。從來尺鷃樂。不羨飛鴻矯。

又

匆匆過三十。夢境日已蹙。誰知歎亡羊。但有喜得鹿。本來作何面。認此逆旅屋。逢人吹布毛。出世不忍獨。

又

杜門殊省事。百巧輸一粗。燒香淨掃地。袖手了朝暮。君看瓦搯手。端自勝金注。塵機早見貸。不待雞竿樹。

又

萬物備於我。本來無欠餘。寒儒可憐生。西抹復東塗。斯文如大廈。傾壞要力扶。犬子真鼠輩。辛苦賣子虛。

又

風花憐寂寞。起舞爲我娛。舉酒謝風花。吾道殊不疎。汝開何自有。汝落何自無。居然會此理。吾汝皆如如。

看梅絕句

梅花宜寒更宜陰。摩挲拄杖過溪尋。幽香著人索管領。不信如今鐵石心。

又

梅花樹下黃茆丘。古人尙能愛花不。月淡煙深聽牧笛。死生常事不須愁。

又

荒陂十畝浴鳧鴨。折葦枯蒲寒意深。何處得船滿載酒。醉時繫著古梅林。

又

一物不向胸次橫。醉中談謔坐中傾。梅花有情應記得。可惜如今白髮生。

又

老子舞時不須拍。梅花亂插烏巾香。尊前作劇莫相笑。我死諸君思此狂。

春晚簡陳魯山

春工我輩人。可許不待面。欲老更增奇。原野紅綠遍。向來苦摧傷。零雨雜飛霰。豈知袖此手。天定乃徐見。

吾齋萬花間。輕衫稱團扇。飛花點書冊。戲蝶遊几研。吾衰未忘情。小句亦情綯。持問陳元龍。試乞語一轉。  
寄酬曾學士學宛陵先生體。比得書云所寓席教僧舍。有陸子泉。每對之輒奉懷。

庭中下乾鵠。門外傳遠書。小印紅屈蟠。兩端黃蠟塗。開緘展矮紙。滑細疑卵膚。首言勞良苦。後問逮妻孥。中間勉以仕。語意極勤渠。字如老瘠竹。墨淡行疎疎。詩如古鼎篆。可愛不可摹。快讀醒人意。垢穢逢爬梳。細讀味益長。炙轂出膏腴。行吟坐臥看。廢食至日晡。想見落筆時。萬象聽指呼。亦知題詩處。綠井石髮麤。公閑計有客。煎茶置風爐。倘公無客時。濯纓亦足娛。井名本季疵。思人理豈無。居然及賤子。媿謝恩意殊。幾時得從公。舊學鋤荒蕪。古文講聲形。誤字辨魯魚。時時酌井泉。露芽奉瓢盂。不知公許否。因風報何如。

夜讀兵書

孤燈耿霜夕。窮山讀兵書。平生萬里心。執戈王前驅。戰死士所有。恥復守妻孥。成功亦邂逅。逆料政自疎。陂澤號飢鴻。歲月欺貧儒。歎息鏡中面。安得長膚腴。

二月二十四日作

棠梨花開社酒濃。南村北村鼓琴琴。且祈麥熟得飽飮。敢說穀賤復傷農。崖州萬里竄酷吏。湖南幾時起臥龍。但願諸賢集廊廟。書生窮死勝侯封。

送曾學士赴行在

二月侍燕觴。紅杏寒未拆。四月送入都。杏子已可摘。流年不貸人。俯仰遂成昔。事賢要及時。感此我心惻。欲書加餐字。寄之西飛翮。念公爲民起。我得怨乖隔。搖搖跋前旌。去去望車輓。亭郭鬱將暮。落日澹陂澤。

敢忘國士風。涕泣效臧獲。敬輸千一慮。或取二三策。公歸對延英。清問方側席。民瘼公所知。願言寫肝膈。向來酷吏橫。至今有遺孽。織羅士破膽。白著民碎魄。詔書已屢下。宿蠹或未革。期公作醫和。湯劑窮絡脉。士生恨不用。得位忍辭責。併乞謝諸賢。努力光竹帛。

霽夜觀月

雲重真愁無散時。可憐不奈一風吹。清輝如此那休得。誰誤虛空作許癡。

新夏感事

百花過盡綠陰成。漠漠爐香睡晚晴。病起兼旬疎把酒。山深四月始聞鶯。近傳下詔通言路。已卜餘年見太平。聖主不忘初政美。小儒惟有涕縱橫。

留題雲門草堂

小住初爲旬月期。二年留滯未應非。尋碑野寺雲生屨。送客溪橋雪滿衣。親滌硯池餘墨漬。臥香爐面散烟霏。他年遊宦應無此。早買漁蓑未老歸。

送韓梓秀才十八韻

束髮走場屋。始得從君遊。燈火都城夜。風雨湖上秋。追隨不隔日。巖壑窮探搜。摩挲石屋背。搖兀闔門舟。酒酣耳頰熱。意氣蓋九州。夜臥相蹋語。狂笑雜嘲謳。但恐富貴逼。肯懷貧賤憂。人事信難料。百戰竟不侯。我老農圃間。君落天南陬。相逢會稽市。感歎歲月遒。君從上都來。倘逢舊朋儔。我窮本天命。於人寧有求。但念侯君房。不知尙癡不。君聞拊手笑。怪我狂未瘳。共談平生舊。只欲苦死留。如何忽決去。病瘧送無由。

秋風墜桐葉。新霜犯貂裘。君聽馬蹄聲。中有千里愁。

送陳德邵宮教赴行在二十韻

相從何必早。白頭或如新。登門雖尙疎。數面自成親。昨者始見公。凜然鬚如銀。敗席留煑茗。寒廳無雜賓。平生事賢意。寸心渴生塵。樂哉得所從。貧病忘吟呻。恭惟大雅姿。信是邦國珍。廣文舊官長。二紀轉鴻鈞。恩仇快報復。禍福出笑嚬。同舍事容悅。腰佩玉麒麟。羣詖更得志。後來如積薪。於時公淡如。位屈道則伸。法宮親決事。收召極海濱。人才方雜沓。公仕益逡巡。欲以貴祝公。公豈慕要津。欲以窮託公。公豈私賤貧。頗欲述古誼。勸公勿愛身。此又公所存。豈待賤子陳。高颿泊江渚。歲晚風雨頻。願言添衣裘。寒陰能薄人。

朱子雲園中觀花

我鬢忽已白。君顏非復朱。花前一盃酒。不樂復何如。暮看枝上花。已覺不如早。富貴當及時。吾輩奈何老。我歌君起舞。竟日爲君留。安知花無情。不解替人愁。長安二三月。花滿上林中。祝君早得意。歸轡聽瓊瓏。酬妙湛閣梨見贈妙湛能某其師璘公蓋嘗與先君遊云

昔侍先君故里時。僧中最喜老璘師。高標無復鄉人識。妙寄惟應弟子知。山店煎茶留小語。寺橋看雨待幽期。可人不但詩超絕。玉子紋枰又一奇。

次韻魯山新居絕句

求得軒車心愧天。不如窮死卻陶然。君曾布衣尙可活。那有日興須萬錢。

又



短牆缺處插疎籬。巷劣容車堂對陂。天下有公殊可賀。坐中著我不妨奇。

寄陳魯山陳時調官都下

諸公貴人識面稀。胸中璀璨漫珠璣。即今舉手遮西日。應有流塵化素衣。舊學極知難少貶。吾儕持此欲安歸。夜來風雨空堂靜。忽憶燈前語入微。

又

天下無虞國論深。書生端合老山林。平生力學所得處。政要如今不動心。舊友幾年猶短褐。謫官萬里少來音。願公思此寬羈旅。靜勝炎曦豈易侵。

戲題江心寺僧房壁

史君千騎駐霜天。主簿孤舟冷不眠。也與史君同快意。臥聽鼓角大江邊。是夕新永嘉守亦宿此寺。

泛瑞安江風濤貼然

俯仰兩青空。舟行明鏡中。蓬萊定不遠。正要一颿風。

平陽驛舍梅花

江路輕陰未成雨。梅花欲過半沾泥。遠來不負東皇意。一絕清詩手自題。

度浮橋至南臺

客中多病廢登臨。聞說南臺試一尋。九軌徐行怒濤上。千艘橫繫大江心。寺樓鐘鼓催昏曉。墟落雲烟自古今。白髮未除豪氣在。醉吹橫笛坐榕陰。

出縣

匆匆簿領不堪論。出宿聊寬久客魂。稻壠牛行泥活活。野塘橋壞雨昏昏。槿籬護藥纔通徑。竹笕分泉自遍村。歸計未成留亦好。愁腸不用遠吳門。

還縣

霽色清和日已長。綸巾蕭散意差強。飛飛鷗鷺陂塘綠。鬱鬱桑麻風露香。南陌東村初過社。輕裝小隊似還鄉。哦詩忘卻登車去。枉是人言作吏忙。

雨晴遊洞宮山天慶觀坐間復雨

近水松篁鎖翠微。洞天宮殿對清暉。快晴似爲醪釀計。急雨還妨燕子飛。道士晝閑丹竈冷。山童曉出藥苗肥。拂床不用勤留客。我困文書自怕歸。

寄陳魯山正字

平生交遊中。陳子我所敬。初猶似豪舉。晚及抱淵靜。獨觀心地初。皎若虛室鏡。人知自渠事。道行君有命。青衫二十年。老色上鬚鬢。偶然預收召。瘦馬趁朝請。退食輒杜門。不省求捷徑。似聞石渠書。雌黃久未定。丁字猶恨曲。朋字竟須正。願君試思之。魚魯何足訂。

航海

我不如列子。神遊御天風。尙應似安石。悠然雲海中。臥看十幅蒲。彎彎若張弓。潮來湧銀山。忽復磨青銅。飢鷁掠船舷。大魚舞虛空。流落何足道。豪氣蕩肺胸。歌罷海動色。詩成天改容。行矣跨鵬背。弭節蓬萊宮。

海中醉題時雷雨初霽天水相接也

羈遊那復恨。奇觀有南溟。浪蹴半空白。天浮無盡青。吐吞交日月。頃刻戰雷霆。醉後吹橫笛。魚龍亦出聽。

溪行

蓬蘽鳴春雨。帆蒲掛暮烟。買魚尋近市。覓火就鄰船。愁臥醒還醉。灘行卻復前。長年殊可念。力盡逆風牽。

又

冒雨牽何急。爭風力不餘。逢人問墟市。計日買薪蔬。烟寺高旛出。山畚一老鋤。枕書醒醉裏。短髮不曾梳。

自來福州詩酒殆廢。北歸始稍稍復飲。至永嘉括蒼無日不醉詩。亦屢作此事。不可不記也。

尊酒如江綠。春愁抵草長。但令閑一日。便擬醉千場。柳弱風禁絮。花殘雨漬香。客遊還役役。心賞竟茫茫。

東陽道中

風欲烏帽送輕寒。雨點春衫作碎斑。小吏知人當著句。先安筆硯對溪山。

東陽觀醮籙

福州正月把離杯。已見醮籙壓架開。吳地春寒花漸晚。北歸一路摘香來。

送李德遠寺丞奉祠歸臨川

送騎擁東城烟帆如鳥輕。道行端有命。身隱更須名。肝食煩明主。胡沙暗舊京。臨分一襟淚。不獨爲交情。

送王嘉叟編修出佐南昌

玉殿求衣早。鸞臺退食遲。君看多故日。寧是棄言時。小作南州計。方觀急詔追。歸來上霄漢。莫遣此心移。

送王龜齡著作赴會稽大宗丞

有越踰千載。何人不宦遊。向來惟一范。真足壯吾州。高躅今誰繼。先生獨再留。登堂弔興廢。想像氣橫秋。

又

大將上兵符。軍容備掃除。恭惟陛下聖。方采直臣書。忽報分司去。還尋入幕初。宗藩雖舊識。莫遣得親疎。

送杜起莘殿院出守遂寧

羽檄聯翩晝夜馳。臣憂顧不在邊陲。軍容地密寧當議。陛下恩深不忍欺。白簡萬言幾慟哭。青編一傳可前知。平生所學今無負。未歎還鄉兩鬢絲。

和曾待制遊兩山

翰林碑立崔嵬上。待制詩題杳靄間。人天八萬四千塔。便合推爲第一山。

右題育王山明月堂

疎鐘迎客到溪亭。碧瓦朱欄相照明。想得松陰排萬衲。籃輿放處恰詩成。

右題天童山宿鷲亭

攀石捫蘿到更幽。玲瓏咫尺嬾窮搜。旁人不會當時意。爲欠門生作伴遊。

右題天童山更幽亭且以未到玲瓏爲恨

雨中出遊夜歸

小雨南山路。今朝思出遊。難從子規請。寧遣竹雞憂。野店寒饒柿。烟津晚喚舟。歸來對燈火。未恨溼衣裘。

謝李平叔郎中問疾

吏部朝回早，幽人病始蘇。過門迂問訊，欹枕聽傳呼。緣瘦重裁帽，因衰學染鬚。投詩發公笑，試想此形模。

聞武均州報已復西京

白髮將軍亦壯哉，西京昨夜捷書來。胡兒敢作千年計，天意寧知一日回。列聖仁恩深雨露，中興赦令疾風雷。懸知寒食朝陵使，驛路梨花處處開。

喜小兒輩到行在

阿綱學書蚓滿幅，阿繪學語鶯囀木。截竹作馬走不休，小車駕羊聲陸續。書窗浣壁誰忍噴，噉噉也復可憐人。卻思胡馬飲江水，敢道春風無戰塵。傳聞賊棄兩京走，列城爭爲朝廷守。從今父子見太平，花前飲水勿飲酒。

病起寄曾原伯兄弟

意象殊非昨，筋骸劣自持。衰如霜後木，愁抵盎中絲。風雪書來少，江山夢到遲。出門還惘惘，倚杖獨移時。

送湯岐公鎮會稽

吳越東西州，浙江限其中。黃旗高十丈，大舟凌虛空。都人送留守，郡吏迎相公。江心波濤壯，帳下鼓角雄。樂哉公何憾，廷論則未同。永懷前年秋，羣胡方嘯兇。閩左發薊北，戈船滿山東。舊盟顧未解，誰敢嬰其鋒。公時立殿上，措置極雍容。南荒竄驕將，京口起元戎。舊勳與宿貴，屏氣聽指蹤。規模一朝定，強虜終歸窮。當時謂易耳，未見回天功。及今始大服，咨嗟到兒童。天心佑社稷，主聖肖祖宗。旌節早來朝，笑談折遐衝。

周洪道學士許折贈館中海棠以詩督之

嫋嫋柔絲不自持。更禁日炙與風吹。仙家見慣渾閑事。乞與人間看一枝。

送七兄赴揚州帥幕

初報邊烽照石頭。旋聞胡馬集瓜州。諸公誰聽芻蕘策。吾輩空懷畎畝憂。急雪打窗心共碎。危樓望遠涕俱流。豈知今日淮南路。亂絮飛花送客舟。

閏二月二十日遊西湖

西湖二月遊人稠。鮮車快馬巷無留。梨園樂工教坊優。絲竹悲激雜清謳。追逐上下暮始休。外雖狂醒樂則不。豈如吾曹淡相求。酒肴取具非預謀。青梅苦筍助獻酬。意象簡樸足鎮浮。尙慚一官自拘囚。未免疋馬從兩驢。南山老翁亦出遊。百錢自挂竹杖頭。

劉太尉挽歌辭

羌胡忘覆育。師旅備非常。南服更旄節。中軍鑄印章。馳書諭燕趙。開府冠侯王。赫赫今何在。門庭冷似霜。

又

堅壁臨江日。人疑制敵疎。安知百萬虜。銳盡泱旬餘。智出常情表。功如定計初。云何媚公者。不置篋中書。

過林黃中食柑子有感學宛陵先生體

博士得黃柑。甚愛不忍擘。持獻太夫人。遠附海上舶。故山饒氛霧。可使酒盃窄。豈無荔枝好。壓飢恐不摘。相去三千里。無異娛旁側。乃知母子意。更遠未嘗隔。我昨往見君。從容弄書冊。藥分臘劑香。茶泛春芽白。

主意願未厭，筐篋自搜索。敢謂甘旨餘，亦及此下客。霜包纔三四，氣可壓千百。重是慈孝物，不敢吐其核。甘寒雖透齒，悲感已橫臆。半生無歡娛，初不爲溼阨。

玉牒所迎，駕望見周洪道舍人。

自卜河橋宅，清談喜屢陪。今年見騰蹕，不恨老氛埃。曉放宮門鑰，霜彫輦路槐。班回獨小立，爲待繡鞍來。

送梁諫議

湖海還朝白髮生，嬾隨年少事聲名。極知憂國人誰及，細看無心語自平。歸訪鄉人忘位重，乍辭言責覺身輕。籃輿避暑雲門寺，應過幽居聽水聲。游有菴居在雲門，流泉遶屋諫議舊所愛賞。

以石芥送劉韶美禮部劉比釀酒勁甚因以爲戲

古人重改陽城驛，吾輩欣聞石芥名。風味可人終骨體，尊前真見魯諸生。

又

長安官酒甜如蜜，風月雖佳嬾舉觴。持送盤蔬還會否，與公新釀鬪端方。

出都

重入修門甫歲餘，又攜琴劍返江湖。乾坤浩浩何由報，犬馬區區正自愚。緣熟且爲蓮社客，伴來喜對草堂圖。西廂屋了吾真足，高枕看雲一事無。

曾原伯屢勸居城中而僕方欲自梅山入雲門今日病酒偶得長句奉寄

借得僧房似釣船，兼旬散髮醉江天。酒能作病真如此，窮乃工詩卻未然。閑似白鷗雖自許，健如黃犢已

無緣秋高更欲移家去。先葺雲門屋數椽。

村居

富貴功名不擬論。且浮臃臃寄烟村。生憎快馬隨鞭影。寧作癡人記劍痕。樵牧相諳欲爭席。比鄰漸熟約論婚。晨春夜績吾家舊。正要遺風付子孫。

看山

小葺茆茨紫翠間。今年偷得半年閑。門前木落須霜曉。且看西南一角山。

夏夜泛舟書所見

山房猶復畏炎蒸。長掩柴門媿老僧。兩槳去搖東浦月。一龕回望上方燈。驚飛宿鳥時呼侶。騰起長魚有脫罾。夜半歸來步松影。真成赤脚踏層冰。

秋陰

陂澤秋容淡。郊原曉氣清。雨來鳩有語。社近燕無情。拄杖扶腰痛。漁舟照眼明。苦吟綠病輟。隨意或詩成。

盆池

門外江濤湧雪堆。埋盆作沼亦何哉。兒曹不解渠翁意。新脫風波嶮處來。

比從人覓酒皆酸薄戲作此詩

酒盡聊憑折簡求。不知人要博涼州。牆隅棄置空三歎。露下螢飛奈此秋。

買魚



臥沙細肋何由得。出水纖鱗卻易求。一夏與僧同粥飯。朝來破戒醉新秋。

又

兩京春齋論斤賣。江上鱸魚不直錢。斫脰擣齋香滿屋。雨窗喚起醉中眠。

秋雨

漫道秋來雨。那無一日晴。只供高枕臥。不放小窗明。書冊頻開闔。山瓢任濁清。長年諳世味。不是故逃名。

晨起偶題

城遠不聞長短更。上方鐘鼓自分明。幽居不負秋來睡。末路偏諳世上情。大事豈堪重破壞。窮人難與共功名。風爐歛鉢生涯在。且試新寒芋糝羹。

悲秋

烟草淒迷八月秋。荒村絡緯戒衣裳。道人大欠修行力。平地閑生爾許愁。

寄張真父舍人

諸公方袞袞。無地著斯人。萬里夔州守。中朝禁省臣。孤帆秋上峽。五馬曉班春。想見懷明主。登臨白髮新。

又

天上紫微省。鶯花繞直廬。逢時身鼎貴。憂國鬢先疎。顛顛元當棄。牽聯也得書。猶能下榻否。擬卜灑西居。

幽居

翳翳桑麻巷。幽幽水竹居。紉縫一獠婢。樵汲兩蠻奴。雨挾清砧急。籬懸野蔓枯。鄰村有鬻子。吾敢歎空無。

法寶璉師求竹軒詩

南軒竹色映谿光，不減吾州五月涼。猶恨秋來鷗鷺少，須君更爲築橫塘。

欲遊五峯不果往小詩寄瑩老

東來恨不見湯休，千首清詩儻許求。要與茶山燈下讀，莫令侍者作蠅頭。茶山老人謂曾待制。

謝王彥光提刑見訪并送茶

邇英帷幄舊儒臣，肯顧荒山野水濱。不怕客嘲輕薄尹，要令我識老成人。飄回鼓轉東城暮，酒冽橙香一

笑新。遙想解醒須底物，隆興第一壑源春。

送查元章赴夔州

柳色西門路，看公上馬時。亦知非久別，不奈自成悲。白髮劉賓客，青衫杜拾遺。分留端有待，剩賦竹枝詞。

逍遙

臺省諸公日造朝，放慵別駕媿逍遙。州如斗大真無事，日抵年長未易消。午坐焚香常寂寂，晨興署字亦

寥寥。時平更喜戈船靜，閑看城邊帶雨潮。

病中簡仲彌性唐克明蘇訓直

移疾還家暫曲肱，依然耐久北窗燈。心如澤國春歸雁，身是雲堂早過僧。細雨佩壺尋廢寺，夕陽下馬弔

荒陵。小留莫厭時追逐，勝社年來冷欲冰。三君皆有歸志故云。

送王景文

張公遂如此。海內共悲辛。逆虜猶遺種。皇天奪老臣。深知萬言策。不愧九原人。君近嘗奏策。風雨津亭暮。辭君淚滿巾。

送呂彥升參謀

楚塞蕭條久。宿師參謀承。詔上丹墀。苦言到口真。常發聖度如天。莫自疑。萬里寄聲長不達。一尊相屬豈前期。遙憐霜曉朝衣冷。深愧江城睡足時。

无咎郡齋燕集有詩末章見及敬次元韻

城樓畫角吹晚晴。梅花墮地草欲生。綺盤翠杓春滿眼。我胡不樂君將行。君歸吾黨共增氣。往往怪我衰涕橫。我來江干交舊少。見君不啻河之清。北風共愛地爐暖。西日同賞油窗明。微吟劇醉不知倦。坐閱漢牘逾周正。君文雄麗擅一世。凜凜武庫藏五兵。酸寒如我每自笑。顧辱刻畫爲虛聲。乃知好士如好色。遇合不必皆傾城。君方與世作水鏡。如此過許人將驚。千金敝帚有定價。周玉鄭鼠難強名。失言議罰不可緩。敬白府主浮金觥。君看失脚踏塵土。豈復毫髮餘詩情。自傷但似路旁埃。雨剝風摧供送迎。

次韻无咎別後見寄

平日盃行不解辭。長亭况是送君時。幾行零落僧窗字。何限流傳樂府詩。歸思恰如重醞酒。歡情略似欲殘葦。龍蛇飛動無由見。坐媿文園屬思遲。詩來彌月。乃能和答。故云。

晚泊慈姥磯下二首

山斷峭崖立。江空翠靄生。漫多來往客。不盡古今情。月碎知流急。風高覺笛清。兒曹笑老子。不睡待潮平。

慈姥磯頭月。纖纖照酒盃。素秋風露重。久客鬢毛催。宿鳥驚還定。飛螢闔復開。平生四方志。老去轉悠哉。

七月十四夜觀月

不復微雲滓。太清浩然風。露欲三更。開簾一寄平生快。萬頃空江著月明。

夜宿陽山磯。將曉大雨北風甚。勁俄頃行三百餘里。遂抵雁翅浦。

五更顛風吹急雨。倒海翻江洗殘暑。白浪如山潑入船。家人驚怖篙師舞。此行十日苦滯留。我亦蘆叢厭鳴榔。書生快意輕性命。十丈蒲帆百夫舉。星馳電騫三百里。坡隴聯翩雜平楚。船頭風浪聲愈厲。助以長笛槳鼉鼓。豈惟澎湃震山嶽。直恐瀕洞連后土。起看草木盡南靡。水鳥號鳴集洲渚。稽首龍公謝風伯。區區未禱煩神許。應知老去負壯心。戲遣窮途出豪語。

望江道中

吾道非邪來曠野。江濤如此去何之。起隨烏鵲初翻後。宿及牛羊欲下時。風力漸添帆力健。鶻聲常雜雁聲悲。晚來又入淮南路。紅樹青山合有詩。

秋夜讀書每以二鼓盡爲節

腐儒碌碌歎無奇。獨喜遺編不我欺。白髮無情侵老境。青燈有味似兒時。高梧策策傳寒意。疊鼓鼕鼕迫睡期。秋夜漸長飢作祟。一盃山藥進瓊糜。

往在都下時。與鄒德章兵部同居百官宅。無日不相從。僕來佐豫章。而德章亦謫高安。感事述懷。作歌奉寄。

巷南巷北秋月明。東家西家讀書聲。官閑出局各無事。冷落往往思同盟。出門相尋索一笑。亦或邂逅因俱行。黃中掀髯語激烈。韶美坐書縱橫。子充清言喜置酒。赤梨綠柿相扶擎。寒燈耿耿地爐暖。宮門風順聞疎更。故交一作霜葉散。外物已付秋毫輕。兩窮相遭世界有。我與鄒子俱南征。豫章高安本一郡。挂帆起柁無三程。簿書袞袞不少借。懷抱鬱鬱何由傾。明年君歸我亦去。早卜三畝開柴荆。軟紅舊路莫重蹋。二升脫粟同煨鑪。

寄答綿州楊齊伯右司

磊落人爲磊落州。滕王閣望越王樓。欲憑夢去直虛語。賴有詩來寬旅愁。我老一官書紙尾。君行千騎試遨頭。遙知小寄平生快。春酒如川炙萬牛。

送全州趙都曹

霜葉無停聲。脂車有行色。正悲南浦秋。又送清湘客。啼飢兒頰紅。待養親髮白。努力事上官。世路日已迫。

病中作

豫章瀕大江。氣候頗不令。孟冬風薄人。十室八九病。外寒客肺胃。下溼攻脚脛。俗巫醫不藝。嗚呼安託命。我始屏藥囊。治疾以清靜。幻妄消六塵。虛白全一性。三日體遂輕。成此不戰勝。長年更事多。苦語君試聽。

夜夢從數客雨中載酒出遊山川城闕極雄麗云長安也因與客馬上分韻作詩得遊字

有酒不謀州。能詩自勝侯。但須繩繫日。安用地埋憂。射雉侵星出。看花秉燭遊。殘春杜陵雨。不恨溼貂裘。去年余佐京口。遇王嘉叟。從張魏公督師過焉。魏公道免相。嘉叟亦出守蒲陽。近辱書報魏公已。

葬衡山感歎不已因用所遺拄頰亭詩韻奉寄

河亭挈手共徘徊。萬事寧非有數哉。黃閣相君三黜去。青雲學士一麾來。中原故老知誰在。南嶽新丘共此哀。火冷夜窗聽急雪。相思時取近書開。

自詠示客

衰髮蕭蕭老郡丞。洪州又看上元燈。羞將枉直分尋尺。寧走東西就斗升。吏進飽諳箝紙尾。客來苦勸摸牀稜。歸裝漸理君知否。笑指廬山古澗藤。廬山僧近寄藤杖甚奇。

醉中歌

吾少貧賤真臞儒。貪食嗜味老不除。折腰斂版日走趨。歸來聊以醉自娛。長餅巨榼羅盃盂。不須漁翁勸三閩。牛尾膏美如凝酥。貓頭輪困欲專車。黃雀萬里行頭顱。白鵝作鮓天下無。潯陽糖蟹徑尺餘。吾州之蕈尤嘉蔬。珍盤餽釘百味俱。不但項櫛與腹腴。悠然一飽自笑愚。顧爲口腹勞形軀。投劾行矣歸園廬。莫厭糲飯嘗黃菹。

寄陶茂安監丞

永州太守鬢毛殘。矍鑠猶能起據鞍。徵士雖思賦松菊。隱居未可挂衣冠。功名夢境元非實。歌舞山城且自寬。也勝鍾陵窮別駕。閑門無客遣憂端。

燒香

茹芝卻粒世無方。隨食江湖每自傷。千里一身身泛泛。十年萬事海茫茫。春來鄉夢憑誰說。歸去君恩未

敢忘一寸丹心幸無愧。庭空月白夜燒香。

寒食臨川道中

百卉千花了不存。墮溪飛絮看無痕。家人自作清明節。老子來穿綠暗村。日落啼鴉隨野祭。雨餘荒蔓上頽垣。道邊醉飽休相避。作吏堪羞甚乞墦。

上巳臨川道中

二月六夜春水生。陸子初有臨川行。溪深橋斷不得渡。城近臥聞吹角聲。三月三日天氣新。臨川道中愁殺人。纖纖女手桑葉綠。漠漠客舍桐花春。平生怕路如怕虎。幽居不省遊城府。鶴軀苦瘦坐長飢。龜息無聲惟默數。如今自憐還自笑。斂版低心事年少。儒冠未恨終自誤。刀筆最驚非素料。五更欹枕一悽然。夢裏扁舟水接天。紅蕖綠芰梅山下。白塔朱樓禹廟邊。

寄別李德遠

蕭蕭風雨臨川驛。邂逅連床若有期。自起挑燈貪夜話。疾呼索飯療朝飢。皆記前日相從時事。即今明月共千里。已占深林巢一枝。惜別自嫌兒女態。夢騎羸馬度芳陂。德遠所居名秣陂。

又

李侯不恨世賣友。陸子那須錢買山。出牧君當千里去。歸耕我判一生閑。中原亂後儒風替。黨禁興來士氣孱。復古主盟須老手。勉追慶曆數公閒。

初夏道中

桑間甚熟麥齊腰。鶯語惺惚野雉驕。日薄人家晒蠶子。雨餘山客買魚苗。豐年隨處俱堪樂。行路終然不自聊。獨喜此身強健在。又搖團扇著絺蕉。

示兒子

父子扶攜返故鄉。欣然擊壤詠陶唐。墓前自誓寧非隘。澤畔行吟未免狂。雨潤北窗看洗竹。霜清南陌課剝桑。秋毫何者非君賜。回首修門敢遽忘。

重五同尹少稷觀江中競渡

楚人遺俗閱千年。簫鼓喧呼鬪畫船。風浪如山蛟鱉橫。何心此地更爭先。

過玉山辱芮國器檢詳留語甚勤因寄此詩兼呈韓无咎右司

遼東歸老白襦裙。名字何堪遣世聞。便謂與公長契闊。不知留語故慙慙。詩章有便猶應寄。祿米無多切莫分。舊見檢詳俸甚薄。故有此戲。倘見右司煩說似。每因風月愴離羣。

隨意

隨意上漁舟。幽尋不預謀。清溪欣始泛。野寺憶前遊。豐歲雞豚賤。霜天柿栗稠。餘生知有幾。且置萬端憂。

寄龔實之正言

臺省諸公歲歲新。平生敬慕獨斯人。山林不恨音塵遠。夢寐時容笑語親。學道皮膚雖脫落。憂時肝膽尚輪囷。至和嘉祐須公了。乞尙升平作幸民。

遊山西村



莫笑農家臘酒渾，豐年留客足雞豚。山重水複疑無路，柳暗花明又一村。簫鼓追隨春社近，衣冠簡朴古風存。從今若許閑乘月，拄杖無時夜叩門。

觀村童戲溪上

雨餘溪水掠堤平，閑看村童戲晚晴。竹馬踉蹌衝淖去，紙鸞跋扈挾風鳴。三冬暫就儒生學，村人惟冬三月遣兒童入小學。千耦還從父老耕，識字粗堪供賦役。不須辛苦慕公卿。

雨霽出遊書事

十日苦雨一日晴，拂拭拄杖西村行。清溝泠泠流水細，好風習習吹衣輕。四鄰蛙聲已閣閣，兩岸柳色爭青青。辛夷先開半委地，海棠獨立方傾城。春工遇物初不擇，亦秀燕麥開蕪菁。薺花如雪又爛熳，百草紅紫那知名。小魚誰取置道側，細柳穿頰危將烹。欣然買放寄吾意，草萊無地蘇疲氓。

殘春

殘春醉著釣魚菴，花雨娛人落半巖。豈是天公無皂白，獨悲世俗異酸鹹。忘身似夢行當覺，談口如狂未易緘。已作沉舟君勿歎，年來何止閱千帆。

家園小酌

旋作園廬指顧成，柳陰已復著啼鶯。百年更把幾盃酒，一月元無三日晴。鷗鷺向人殊耐久，山林與世本無營。小詩漫付兒曹誦，不用韓公說有聲。

又

滿林春筍生無數。竟日鷓鴣來百回。衣上塵埃真一洗。酒邊懷抱得頻開。池魚往者憂奇禍。社櫟終然幸散材。世事紛紛心本懶。閉門豈獨畏嫌猜。

寄王嘉叟吏部

宿負煩公議。隆寬荷聖時。江湖真送老。藥餌且扶衰。撫事驚年往。懷人有夢知。敢嗟貧到骨。飲水誦君詩。  
嘉叟有漁隱堂詩。

夜讀隱書有感

平生志慕白雲鄉。俯仰人間每自傷。倦鶴摧頽寧望料。寒龜蹙縮且支牀。力探鴻寶尋奇訣。剩采青精試祕方。常鄙臞仙老山澤。要令仰首看飛翔。

上虞逆旅見舊題歲月感懷

胙臠爲家東復西。今朝破曉下前溪。青山缺處日初上。孤店開時鶯亂啼。倦枕不成千里夢。壞牆閑覓十年題。漆園傲吏猶非達。物我區區豈足齊。

舜廟懷古

雲斷蒼梧竟不歸。江邊古廟鎖朱扉。山川不爲興亡改。風月應憐感慨非。孤枕有時鶯喚夢。斜風無賴客添衣。千年回首消磨盡。輸與漁舟送落暉。

題十八學士圖

隋日昏隴東南傾。雷塘風吹草木腥。平時但忌黑色兒。不知乃有虬鬚生。晉陽龍飛雲滃滃。關洛萬里卽

日平東征歸來脫金甲。天策開府延豪英。琴書閑暇永清晝。簪履光彩明華星。高參伊呂列佐命。下者才氣猶嶢嶢。但餘一恨到千載。高陽繆公來竄名。老奸得志國幾喪。李氏誅徙連孤嬰。向令亟念履霜戒。危亂安得存勾萌。衆賢一佞禍尙爾。掩卷涕淚臨風橫。

統分稻晚歸

出裏一簞飯。歸收百把禾。勤勞解堪忍。餘暇更吟哦。歲惡增吾困。家貧賴汝多。村醪莫辭醉。羹芋學岷峨。  
是日作芋羹。

又

薄酒不自酌。夕陽須汝歸。橘包霜後美。豆莢雨中肥。路遠應加飯。天寒莫減衣。老懷憂自切。道眼看皆非。

衰病

衰病不浪出。閉門煙雨中。葦花添絮暖。葑火試爐紅。湖村采老葑。作火甚妙。仕宦螳窠夢。功名馬耳風。山翁但更事。人看作神通。

又

病除猶老健。雨止得冬晴。覓句嗟心在。鈔書試眼明。朝寒添布褐。晚步出柴荆。外慕終無益。兒曹且力耕。

霜風

十月霜風吼屋邊。布裘未辦一銖綿。豈惟飢索鄰僧米。真是寒無坐客氈。身老嘯歌悲永夜。家貧撐拄過凶年。丈夫經此寧非福。破涕燈前一粲然。

小酌

盤箸貧猶設。杯盂老更耽。宗文樹雞柵。靈照挈蔬籃。徑醉眼花亂。高眠鼻息酣。覺來寒日晚。落葉擁茆菴。

十月苦蠅

村北村南打稻忙。浮雲吹盡見朝陽。不宜便作晴明看。撲面飛蠅未退藏。

又

十月江南未擁爐。癡蠅擾擾莫嫌渠。細看豈是堅牢物。付與清霜爲掃除。

丫頭巖見周洪道以進士入都日題字

烏巾白紵蹋京塵。瑤樹瓊林照路人。西省歸來名蓋代。兩行墨色尙如新。

獨學

師友彫零身白首。杜門獨學就誰評。秋風棄扇知安命。小炷留燈悟養生。踵息無聲酣午枕。舌根忘味美晨烹。少年妄起功名念。豈信身閑心太平。黃庭經閑暇無事心太平。

霜月

枯草霜花白。寒窗月影新。驚鴉時繞樹。吠犬遠隨人。出仕讒銷骨。歸耕病滿身。世間輸壞衲。切莫勸冠巾。

寄黃龍升老

讀書萬卷裂儒衣。黃金可成棄不爲。快哉天馬不可羈。開口便呼臨濟兒。諸方蹴蹋莫支持。吾州一老偶得之。升嗣佛智裕公。閉門夜付僧伽黎。明日聲價羽檄馳。弟子不必不如師。黃龍所立尤瑰奇。空山鬼火

號狐狸。築屋千礎。食萬緇。癡人不解公遊嬉。嫉怒欲碎門前碑。世衰道喪士自欺。山林亦復踐駭機。長謠寄公公。試思吾輩救此當何施。

贈進賢劉令

簿領塵埃裏。超然見鳳麟。性疎忘顧忌。學大有經綸。正論雖頻接。高標豈易親。向來相識晚。吾黨欠斯人。

書室名可齋或問其義作此告之

得福常廉禍自輕。坦然無媿亦無驚。平生祕訣今相付。只向君心可處行。

寄酬楊齋伯少卿

楊卿人材金百鍊。岐公座上初識面。十年萬事不須說。猶喜歸來且強健。題詩想見初削瓜。寄到茆堂已歸燕。辭嚴意密敢輕讀。呼兒炷燈重把卷。卽今相望幾千里。何日蟬聯語忘倦。就令有使卽寄書。豈如無事長相見。



# 陸放翁集

劍南詩稿

卷第二

自笑

自笑平生醉後狂，千鍾使氣少年場。那知病葉先摧落，卻羨寒龜巧縮藏。藥物及時希老健，山家隨日了窮忙。凶年坐待新春麥，莫厭清吟雪夜長。

夜聞松聲有感

清晨放船落星石，大風吹颿如箭激。回頭已失廬山雲，卻上吳城觀落日。夜深龍歸擘祠門，入木數寸留爪痕。明朝就視心尚慄，腥風卷地雷霆奔。歸船買酒持自慰，性命平生驚屢戲。固知神怒有定時，波紋蹙作魚鱗細。如今衰病臥林垆，霜覆茆簷月滿庭。松聲驚破三更夢，猶作當時風浪聽。余丙戌七月自京口移官豫章，冒風濤自星子解舟，不半日至吳城山小龍廟。

十二月一日

病愈都忘老，晴和已似春。畦蔬青長甲，塘水綠生鱗。酒盃論交密，丹爐作夢新。窮居那敢恨，幸遠庾公塵。

又

東風吹斗柄，暖律變嚴凝。草色迷殘燒，溪流帶斷冰。兒書春日勝，女翦上元燈。莫笑蒲龕睡，山翁怯歲增。

春日

老夫一臥三山下，兩見城門送土牛。貧舍春盤還草草，暮年心事轉悠悠。湖光漲綠分煙浦，柳色搖金映市樓。藥餌及時身尙健，無風無雨且閑遊。

又

久拋朝幘懶重彈，華髮蕭然二寸冠。不恨淒涼侵晚境，猶能語笑向春盤。銀盃酒色家家綠，籬笠煙波處處寬。一片梅花無復在，卻嫌新煖換餘寒。

僧房假榻

過盡青山喚渡船，晚窗洗脚臥僧氈。剩償平日清游願，更結來生熟睡緣。吞啄漸稀如老鶴，鳴聲已斷似寒蟬。旁觀莫苦嘲癡鈍，此妙吾宗祕不傳。

聞雨

慷慨心猶壯，蹉跎鬢已秋。百年殊鼎鼎，萬事祇悠悠。不悟魚千里，終歸貉一丘。夜闌聞急雨，起坐涕交流。

休日有感

少年從宦地，休日喜無涯。坐上強留客，街頭旋買花。開軒催汛掃，脫帽共諠譁。村巷朋遊絕，逢春祇自嗟。

題徐子禮宗丞自覺齋

未俗紛紛只自謾，惟公肯向靜中觀。閒看此事從何得，正自它人著力難。茶熟松風生石鼎，香殘雲縷遶蒲團。江湖多少癡禪衲，踢破青鞵覓話端。



送張叔潛編修造朝

此士名高北斗南，眼中獨許我同參。匆匆卻作臨分恨，一月何曾笑二三。

又

簡牘清閒勝校讐，題詩應肯寄夔州。東廚羊美聊堪飽，北面鈴稀莫強愁。東廚密院府也。烹羊最珍。北面房行邊事，每聞鈴聲馳至，則知有警。

又

北窗銅碾破雲腴，捫腹翛然一事無。安用雁行排院吏，正須魚貫看胡奴。院吏視屬官倨甚，每軍中解降胡至，密院屬官先見之。

又

芒屨年來漸爛穿，閉門日日只高眠。今朝出送張夫子，借得南鄰放鴨船。

有感

雲崦重重不易尋，庖廚性命走山林。但令有月同幽夢，更用何人識苦心。流輩漸稀知死近，鬢毛無色覺愁侵。平生自許忘情者，頗怪燈前感慨深。

澗松

藥出山來爲小草，楸成樹後困長藤。澗松鬱鬱何勞歎，卻是人間奈廢興。

將赴官夔府書懷

病夫喜山澤。抗志自年少。有時緣龜飢。妄出丐鶴料。亦嘗廁朝紳。退懦每自笑。正如怯酒人。雖愛不敢釀。一從南昌免。五歲嗟不調。朝廷每哀矜。幙府誤辟召。終然斂孤迹。萬里遊絕徼。民風雜莫徠。封域近無詔。淒涼黃魔宮。峭絕白帝廟。又嘗聞此邦。野陋可嘲誚。通衢舞竹枝。譙門對山燒。浮生一夢耳。何者可慶弔。但愁癭紫紫。把鏡羞自照。豐民多瘦無者十財一二耳。

送芮國器司業

此心知我豈非天。雙鬢幡然氣浩然。曾見灰寒百僚底。真能山立萬夫前。洛城霜重聽宮漏。霽水雲深著釣船。拈起吾宗安樂法。人生何處不隨緣。

又

往歲淮邊虜未歸。諸生合疏論危機。人材衰靡方當慮。士氣崢嶸未可非。萬事不如公論久。諸賢莫與衆心違。還朝此段宜先及。豈獨遺經賴發揮。

春陰

春風浩蕩作春陰。弱燕歸來不自禁。白塔昏昏纔半露。青山淡淡欲平沉。裘茸細雨初驚溼。屐齒新泥忽已深。直怕樓高生客恨。不因病起倦登臨。

投梁參政

浮生無根株。志士惜浪死。雞鳴何預人。推枕中夕起。游也本無奇。腰折百僚底。流離鬢成絲。悲咤淚如洗。殘年走巴峽。辛苦爲斗米。遠衝三伏熱。前指九月水。回首長安城。未忍使萬里。袖詩叩東府。得拜求望履。

平生實易足。名幸污黃紙。但憂死無聞。功不挂青史。頗聞匈奴亂。天意殄蚩豕。何時嫺姚師。大刷渭橋恥。士各奮所長。儒生未宜鄙。覆甕草軍書。不畏寒墮指。

宿楓橋

七年不到楓橋寺。客枕依然半夜鐘。風月未須輕感慨。巴山此去尙千重。

晚泊

半世無歸似轉蓬。今年作夢到巴東。身遊萬死一生地。路入千峯百嶂中。鄰舫有時來乞火。叢祠無處不祈風。晚潮又泊淮南岸。落日啼鴉戍堞空。

金山觀日出

繫船浮玉山。清晨得奇觀。日輪擘水出。始覺江面寬。遙波盛紅鱗。翠靄開金盤。光彩射樓塔。丹碧浮雲端。詩人窘筆力。但詠秋月寒。何當羅浮望。湧海夜未闌。

弔李翰林墓

飲似長鯨快吸川。思如渴驥勇奔泉。客從縣令初何有。醉忤將軍亦偶然。駿馬名姬如昨日。斷碑喬木不知年。浮生今古同歸此。回首桓公亦故阡。桓溫冢亦在當塗。

雨中泊趙屯有感

歸燕羈鴻共斷魂。荻花楓葉泊孤村。風吹暗浪重添纜。雨送新寒半掩門。魚市人煙橫慘淡。龍祠簫鼓鬧黃昏。此身且健無餘恨。行路雖難莫更論。

黃州

局促常悲類楚囚。遷流還歎學齊優。江聲不盡英雄恨。天意無私草木秋。萬里羈愁添白髮。一帆寒日過黃州。君看赤壁終陳迹。生子何須似仲謀。

武昌感事

百萬呼盧事已空。新寒擁褐一衰翁。但悲鬢色成枯草。不恨生涯似斷蓬。煙雨淒迷雲夢澤。山川蕭瑟武昌宮。西遊處處堪流涕。撫枕悲歌興未窮。

夜思

露泣啼蠶草。潮生宿雁汀。經年寄孤舫。終夜託丘亭。楚澤無窮白。巴山何處青。四方男子事。不敢恨飄零。

哀郢

遠接商周祚最長。北盟齊晉勢爭強。章華歌舞終蕭瑟。雲夢風煙舊莽蒼。草合故宮惟雁起。盜穿荒冢有狐藏。離騷未盡靈均恨。志士千秋淚滿裳。

又

荊州十月早梅春。徂歲真同下阪輪。天地何心窮壯士。江湖從古著羈臣。淋漓痛飲長亭暮。慷慨悲歌白髮新。欲弔章華無處問。廢城霜露溼荆榛。

江陵道中作

山川雜吳楚。氣候接秋冬。水落魚可拾。霜清裘欲重。鄉遙歸夢短。酒薄客愁濃。白帝何時到。高吟醉臥龍。

石首縣雨中繫舟戲作短歌

庚寅去吳西適楚。秋晚孤舟泊江渚。荒林月黑虎欲行。古道人稀鬼相語。鬼語亦如人語悲。楚國繁華非昔時。章華臺前小家住。茆屋雨漏秋風吹。悲哉秦人真虎狼。欺侮六國囚侯王。亦知興廢古來有。但恨不見秦先亡。開窗酌汝一盃酒。等爲亡國秦更醜。驪山冢破已千年。至今過者無傷憐。

初寒

船尾寒風不滿旗。江邊叢祠常掩扉。行人畏虎少晨起。舟子捕魚多夜歸。茆葉翻翻帶宿雨。葦花漠漠弄斜暉。傷心到處聞砧杵。九月今年未授衣。

醉歌

老夫檣竿插蒼石。水落岸沙痕數尺。江南秋盡未搖落。櫛葉離離楓葉赤。楚人自古多悲傷。道傍行歌猶感激。野花碧紫亦滿把。澗果青紅正堪摘。客中得酒薄亦好。江頭爛醉真不惜。千古興亡在目前。鬱鬱關河含暝色。飢鴻垂翅掠舟過。此意與我同悽惻。三撫闌干恨未平。月明正照頽烏幘。

秋風

秋風吹客檣。節物歎遐方。歲事忽云暮。吾行殊未央。霜清漢水綠。日落楚山蒼。此去三巴路。無猿亦斷腸。

塔子磯

塔子磯前艇子橫。一窗秋月爲誰明。青山不減年年恨。白髮無端日日生。七澤蒼茫非故國。九歌哀怨有遺聲。古來撥亂非無策。夜半潮平意未平。

重陽

照江丹葉一林霜，折得黃花更斷腸。商略此時須痛飲，細腰宮畔過重陽。

早寒

沔鄂猶殘暑，荆巫已早寒。潦收灘正白，霜重葉初丹。節物元非惡，情懷自鮮歡。暮年更世事，唯有醉江干。

公安

地曠江天接，沙隕市井移。避風留半日，買米待多時。蝶冷停菰葉，鷗馴傍鱗枝。昔人勸業地，搔首歎吾衰。  
縣有呂子明舊城。

沙頭

游子行愈遠，沙頭逢暮秋。孫劉鼎足地，荆益犬牙州。鼓角風雲慘，江湖日夜浮。此生應袞袞，高枕看東流。

大寒出江陵西門

平明羸馬出西門，淡日寒雲久吐吞。醉面衝風驚易醒，重裘藏手取微溫。紛紛狐兔投深莽，點點牛羊散遠村。不爲山川多感慨，歲窮遊子自消魂。

江夏與章冠之遇別後寄贈

騎鶴仙人不可呼，一樽猶得與君俱。未應湖海無豪士，長恨乾坤有腐儒。壯歲光陰隨手過，晚途衰病要人扶。淒涼江夏秋風裏，況見新豐舊酒徒。

題江陵村店壁

青旆三家市。黃茆十里岡。蓬飛風浩浩。塵起日茫茫。馳騁多從獸。鉏耨少破荒。行人相指似。此路走襄陽。  
馬上

燈前薄飢陳鹽齏。帶睡強出行江隄。五更落月移樹影。十月清霜侵馬蹄。荒陂噓噓已度雁。小市喔喔初鳴雞。可憐萬里覓歸夢。未到故山先自迷。

水亭有懷

漁村把酒對丹楓。水驛憑軒送去鴻。道路半年行不到。江山萬里看無窮。故人草詔九天上。老子題詩三硤中。笑謂毛錐可無恨。書生處處與卿同。

移船

沙際舟銜尾。相依作四鄰。暮年多感慨。分路亦酸辛。折竹占行日。吹簫賽水神。無勞問亭驛。久客自知津。

將離江陵

暮暮過渡頭。旦旦走隄上。舟人與關吏。見熟識顏狀。癡頑久不去。常恐遭誚讓。昨日倒橋干。今日聯百丈。買薪備雨雪。儲米滿瓶盎。明當遂去此。障袂先側望。卽今孟冬月。波濤幸非壯。潦收出奇石。霧卷見疊障。地嶮多崎嶇。峽束少平曠。從來樂山水。臨老愈跌宕。皇天憐其狂。擇地令自放。山花白似雪。江水綠於釀。竹枝本楚些。妙句寄悽愴。何當出清詩。千古續遺唱。

六言

三巴亦有何好。萬里翩然獨尋。本意爲君說破。消磨夢境光陰。

江上

江上霜寒透客衣，閉窗羸臥不支持。羈孤形影真相弔，衰颯頭顱已可知。潦縮穩經行雨峽，竹疎賸見挂猿枝。清樽可置須勤醉，莫望功名老大時。

旅食

霜餘漢水淺，野迴朔風寒。炊黍香浮飯，烹蔬綠映盤。心安失粗糲，味美出艱難。惟恨虛捐日，無書得縱觀。

滄灘

百夫正譴助鳴鶻，舟中對面不得語。須臾人散寂無譁，惟聞百丈轉兩車。嘔嘔啞啞車轉急，舟人已在沙際立。霧斂蘆村落，照紅雨餘漁舍炊煙溼。故鄉回首已千山，上峽初經第一灘。少年亦慕宦遊樂，投老方知行路難。

松滋小酌

西遊六千里，此地最淒涼。騷客久埋骨，巴歌猶斷腸。風聲撼雲夢，雪意接瀟湘。萬古茫茫恨，悠然付一觴。

晚泊松滋渡口

此行何處不艱難，寸寸強弓且旋彎。縣近歡欣初得菜，江回徙倚忽逢山。繫船日落松滋渡，跋馬雲埋灑澗關。未滿百年均是客，不須數日待東還。

又

小灘拍拍拍鷗鷺飛，深竹蕭蕭杜宇悲。看鏡不堪衰病後，繫船最好夕陽時。生涯落魄惟耽酒，客路蒼茫自



詠詩莫問長安在何許。亂山孤店是松滋。

荆門冬夜

常飢龜老欲無腸。臥聽寒更自短長。香椀得閑聊作伴。酒盃因病頗相忘。有情窗罅恰通月。耐冷觴枝多得霜。歷盡風波知險阻。平生錯羨捕魚郎。

繫舟下牢溪游三游洞二十八韻

舊觀三峽圖。常謂非人情。意疑天壤間。豈有此崢嶸。畫師定戲耳。聊欲窮丹青。西游過沔鄂。莽莽千里平。昨日到峽州。所見始可驚。乃知畫非妄。卻恨筆未精。及茲下牢戍。峯嶂畢自呈。下入裂坤軸。高竈插青冥。角勝多列峙。擅美有孤撐。或如釜上飯。或如坐後屏。或如倨而立。或如喜而迎。或深如螺房。或疎如窗櫺。峨巍冠冕古。婀娜髻鬢傾。其間絕出者。虎搏蛟龍猶。崩崖凜欲墮。脩梁架空橫。懸瀑瀉無底。終古何時盈。幽泉莫知處。但聞珩珮鳴。怪怪與奇奇。萬狀不可名。久聞三游洞。疾走忘病嬰。竇穴初漆黑。偃僂捫壁行。方虞觸蟄蛇。類見一點明。扶接困僮奴。恍然出瓶罍。穹穹度屋寬。滴乳成微泓。題名歐與黃。雲蒸蒼蘚平。穿林走驚鷹。拂面逢飛隄。息倦盤石上。拾樵置茶鑪。長嘯答谷響。清吟和松聲。辭卑不堪刻。猶足寄友生。

三游洞前巖下小潭水甚奇取以煎茶

苔徑芒屨滑不妨。潭邊聊得據胡床。巖空倒看峯巒影。磻遠中含藥草香。汲取滿瓶牛乳白。分流觸石珉聲長。囊中日鑄傳天下。不是名泉不合嘗。

扇子峽山腹有草閣小亭極幽邃意其非俗人居也

絕境慰人心。誰家住玉岑。亂雲生翠竇。密雪灑青林。高閣臨空豁。孤亭隱邃深。定知非俗士。觸急不容尋。

蝦蟆碚

不肯爬沙桂樹邊。朶頤千古向巖前。巴東峽裏最初峽。天下泉中第四泉。齧雪飲冰疑換骨。掬珠弄玉可忘年。清游自笑何曾足。疊鼓琴琴又解船。

黃牛峽廟

三峽東江流。崖谷互吐納。黃牛不負重。雲表恣蹴蹋。吳船與蜀舸。有請神必答。誰憐馬遭刦。百歲創未合。施師浪奔走。烹飪陳酒榼。紛然餽神餘。羹飢爭嘍噉。空庭多落葉。日暮聲颯颯。奇文粲可辨。高古變籀雜。村女賣秋茶。簪花髻鬢。巫媿兒著背上。帖妥若在榻。山寒雪欲下。虎出門早闔。我行忽至此。臨風久嗚咽。

過夷陵適值祈雪與葉使君清飲談括蒼舊游既行舟中雪作戲成長句奉寄

巴楚夷陵酒最醇。使君風味更清真。少年恨不從豪飲。薄宦那知託近鄰。本擬笙歌娛病客。卻催雨雪惱行人。朝來凍手題詩寄。莫笑欹斜字不勻。

泊虎頭灘下

大舟已泊燈火明。小舟猶行聞鷓聲。虎頭崔嵬鹿角橫。人生實難君勿輕。

過東瀟灘入馬肝峽

書生就食等奔逃。道路崎嶇信所遭。船上急灘如退鷁。人緣絕壁似飛猱。口誇遠嶺青千疊。心憶平波綠一篙。猶勝溪丁絕輕死。無時來往駕艣艘。峽中小船謂之艣艘。

新安驛

孤驛荒山與虎鄰。更堪風雪暗南津。羈遊如此真無策。獨立悽然默愴神。木盞汲江人起早。銀釵簇髻女粧新。蠻風弊惡蛟龍橫。未敢全誇見在身。

秣歸醉中懷都下諸公示坐客

長謠爲子說天涯。四座聽歌且勿譁。蠻俗殺人供鬼祭。敗舟觸石委江沙。此身長是滄浪客。何日能爲飽暖家。坐憶故人多夢尺。書不敢到京華。

憩歸州光孝寺後有楚冢近歲或發之得寶玉劍佩之類

秣歸城畔蹋斜陽。古寺無僧晝閉房。殘珮斷釵陵谷變。苦茆架竹井閭荒。虎行欲與人爭路。猿嘯能令客斷腸。寂寞倚樓搔短髮。剝題新恨付巴娘。

飲罷寺門獨立有感

一邑無平土。邦人例得窮。淒涼遠嫁婦。顛顛獨醒翁。今古闌干外。悲歡酒醜中。三巴不搖落。搔首對丹楓。  
州有屈大夫及明妃祠。

泛溪船至巴東

谿船莫嫌迤。船迤始相宜。兩槳行何駛。重灘過不知。荒村寇相縣。破屋屈平祠。不奈新愁得。啼猿挂冷枝。

巴東遇小雨

暫借清溪伴釣翁。沙邊微雨溼孤蓬。從今詩在巴東縣。不屬灞橋風雪中。

又

西遊萬里亦何爲。欲就騷人乞棄遺。到此宛然詩不進。始知才分有窮時。

秋風亭拜寇萊公遺像

江上秋風宋玉悲。長官手自葺茅茨。人生窮達誰能料。蠟淚成堆又一時。

又

豪傑何心後世名。材高遇事卽崢嶸。巴東詩句澶州策。信手拈來盡可驚。

巴東令廡白雲亭

寇公壯歲落巴巒。得意孤亭縹緲間。常倚曲闌貪看水。不安四壁怕遮山。遺民雖盡猶能說。老令初來亦愛閑。正使官清貧至骨。未妨留客聽潺湲。

謁巫山廟兩廡碑版甚衆皆言神佐禹開峽之功而詆宋玉高唐賦之妄予亦賦詩一首

真人翳鳳駕蛟龍。一念何曾與世同。不爲行雲求弭謗。那因治水欲論功。翱翔想見虛無裏。毀譽誰知濁濁中。讀盡舊碑成絕倒。書生惟慣諂王公。

聞猿

瘦盡腰圍不爲詩。良辰流落自成衰。也知客裏偏多感。誰料天涯有許悲。漢塞角殘人不寐。渭城歌罷客將離。故應未抵聞猿恨。況是巫山廟裏時。

瞿唐行

四月欲盡五月來。峽中水漲何雄哉。浪花高飛暑路雪。灘石怒轉晴天雷。千艘萬舸不敢過。篙工柁師心膽破。人人陰拱待勢衰。誰敢輕行犯奇禍。一朝時去不自由。山腹空有沙痕留。君不見陸子歲暮來夔州。瞿唐峽水平如油。

入瞿唐登白帝廟

曉入大谿口。是爲瞿唐門。長江從蜀來。日夜東南奔。兩山對崔嵬。勢如塞乾坤。峭壁空仰視。欲上不可捫。禹功何巍巍。尙覩鑄鑿痕。天不生斯人。人皆化魚鼈。於時仲冬月。水各歸其源。灑灑訖中流。百尺呈孤根。參差層巔屋。邦人祀公孫。力戰死社稷。宜享廟貌尊。丈夫貴不撓。成敗何足論。我欲伐巨石。作碑累千言。上陳躍馬壯。下斥乘驟昏。雖慚豪偉詞。尙慰雄傑魂。君王昔玉食。何至歠雞豚。願言采芳蘭。舞歌薦清尊。

登江樓

已過瞿唐更少留。小船聊繫古夔州。瞿唐關。卽唐夔州也。簿書未破三年夢。杖屨先尋百尺樓。日暮雪雲迷峽口。歲窮畚火照關頭。野人不解徵官縛。尊酒應來此散愁。

雪中臥病在告戲作

面裂愁出門。指直但藏袖。誰云三峽熱。有此凜冽候。殷勤愧雪片。飛舞爲我壽。方驚四山積。已見萬瓦覆。豈惟寒到骨。遂覺疾在腠。地爐熾薪炭。噤坐連昏晝。梅花真強項。不肯落春後。俗人愛桃李。苦道太疎瘦。清芬終見賞。此事非速售。已矣吾何言。高枕聽簷溜。

雪晴

臘盡春生白帝城。俸錢雖薄勝躬耕。眼前但恨親朋少。身外元知得喪輕。日映滿窗松竹影。雪消竝舍鳥鳴聲。老來莫道風情減。憶向煙蕪信馬行。

玉笈齋書事

莫笑新霜點鬢鬚。老來卻得少工夫。晨占上古連山易。夜對西真五嶽圖。叔夜曾聞高士嘯。孔賓豈待異人呼。眉間喜色誰知得。今日新添火四銖。

又

雪霽茆堂鐘磬清。晨齋枸杞一杯羹。隱書不厭千回讀。大藥何時九轉成。孤坐月魂寒徹骨。安眠龜息浩無聲。剩分松屑爲山信。明日青城有使行。時傳道人欲歸青城。

記夢

夢裏都忘困晚途。縱橫草疏論遷都。不知盡挽銀河水。洗得平生習氣無。

瀼西

千載瀼西路。今年著腳行。匆匆衰已具。渺渺恨難平。絕壁猿啼雨。深枝鵲報晴。亦知憂吏責。未忍廢詩情。

山寺

籃輿送客過江村。小寺無人半掩門。古佛負牆塵漠漠。孤燈照殿雨昏昏。喜投禪榻聊尋夢。嬾爲啼猿更斷魂。要識人間盛衰理。岸沙君看去年痕。峽漲時水高數十丈。至冬盡落。

蹋磧

鬼門關外逢人日，蹋磧千家萬家出。竹枝慘戚雲不動，劍器聯翩日將夕。行人十有八九瘦，見慣何曾羞。顧影江邊沽酒沙，上臥峽口月出風吹醒。人生未死信難知，顛顛蘗州生鬢絲。何日畫船搖桂楫，西湖卻賦探春詩。

寒食

峽雲烘日欲成霞，灑水生紋淺見沙。又向蠻方作寒食，強持卮酒對梨花。身如巢燕年年客，心羨游僧處處家。賴有春風能領略，一生相伴遍天涯。

晚晴書事呈同舍以下十七首皆試院作

魚復城邊夕照紅，物華偏解惱衰翁。巴鴛有恨啼芳樹，野水無情入故宮。許國漸疎悲壯志，讀書多忘媿新功。因君共語增惆悵，京洛交遊欲半空。

鄉中每以寒食立夏之間省墳客蘗適逢此時悽然感懷

松陰繫馬啓朱扉，糗糒青紅正此時。守墓萬家猶有日，及親三釜永無期。詩成謾寫天涯感，淚盡何由地下知。富貴賤貧俱有恨，此生長廢蓼莪詩。

又

手持綠酒酌蒼苔，今歲何由疋馬來。清淚不隨春雨斷，孤吟欲和暮猿哀。皂貂破弊歸心切，白髮淒涼老境催。誓墓只思長不出，松門日日手親開。

試院春晚

病思蕭條掩綠樽。閑坊寂歷鎖朱門。故人別久難尋夢。遠客愁多易斷魂。漫漫晚花吹灤岸。離離春草上宮垣。此生飄泊何時已。家在山陰水際村。

倚闌

故山未敢說歸期。十口相隨又別離。小雨初收殘照晚。闌干西角立多時。

自詠

朝衣無色如霜葉。將奈雲安別駕何。鐘鼎山林俱不遂。聲名官職兩無多。低昂未免聞雞舞。慷慨猶能擊筑歌。頭白伴人書紙尾。只思歸去弄煙波。

午興

漸轉廊腰日。徐來峽口風。飡漿便北客。淖粥稱衰翁。槐晚纖纖綠。榴殘續續紅。責輕仍飽食。三歎愧無功。

風雨中望峽口諸山奇甚戲作短歌

白鹽赤甲天下雄。拔地突兀摩蒼穹。凜然猛士撫長劍。空有豪健無雍容。不令氣象少淳澹。常恨天地無全功。今朝忽悟始歎息。妙處元在煙雨中。太陰殺氣橫慘澹。元化變態含空濛。正如奇材遇事見。平日乃與常人同。安得朱樓高百尺。看此疾雨吹橫風。

夜坐庭中

人靜風寒慢更闌。露沾衣。暗窗飢鼠齧空廡。冷螢飛。歲月背人去。鄉閭何日歸。脫巾還感歎。殘髮不勝稀。

新蔬



黃瓜翠苜最相宜。上市登盤四月時。莫擬將軍春薺句。兩京名價有誰知。

初夏懷故山

鏡湖四月正清和。白塔紅橋小艇過。梅雨晴時插秧鼓。蘋風生處采菱歌。沉迷簿領吟哦少。淹泊蠻荒感慨多。誰謂吾廬六千里。眼中歷歷見漁蓑。

初夏新晴

曲徑泥新晚照明。小軒纔受一牀橫。翩翩乳燕穿簾影。蔌蔌新篁解籜聲。藥物屏除知病減。夢魂安穩覺心平。深居不恨無來客。時有山禽自贊名。

定拆號日喜而有作

小雨如絲落復收。悄無人語但鳴鳩。挽鬚預想諸兒喜。倒指猶爲五日留。滿案堆書惟引睡。侵天圍棘不遮愁。爲農父子長相守。誤計隨人學宦遊。

睡起時閉試院中已月餘矣

深閉重門謝簿書。日長添得睡工夫。水紋竹簟涼如洗。雲碧紗幮薄欲無。半吐山榴看著子。新來梁燕見將雛。夢回茗椀聊須把。自掃桐陰置瓦爐。

四月二十九日作

假館猶三日。還家甫四旬。昏眸雲霧隔。衰鬢雪霜新。尊酒雖慵近。病目止酒囊。詩却未貧。但愁門有客。流汗強冠巾。

苦熱

萬瓦鱗鱗若火龍。日車不動汗珠融。無因羽翮氛埃外。坐覺蒸炊釜甑中。石礪寒泉空有夢。冰壺團扇欲無功。餘威向晚猶堪畏。浴罷斜陽滿野紅。

拆號前一日作

飄零隨處是生涯。斷梗飛蓬但可嗟。稚子歡迎先入夢。從兵結束待還家。食眠屢失身多病。憂愧相乘髮易華。隔日寄聲爲薄具。石榴應有未開花。

暴雨

風怒欲掀屋。雨來如決隄。孤燈映窗滅。羈鳥就簷棲。暑令方炎赫。秋聲忽慘淒。傳聞漲江水。已斷灤東西。

西齋雨後

香椀灰深微炷火。茶鐺聲細緩煎湯。百年浮世幾人樂。一雨虛齋三日涼。簾外微風斜燕影。池邊殘照斂萱房。紗櫺石枕蕭然臥。付與今宵幽夢長。

急雨

陰雲屯硤口。急雨過城頭。白舫投沙峽。青帘捲市樓。漂搖爭闔戶。壅溢共疏溝。抽得驅蠅手。題詩慰旅愁。

晚晴聞角有感

暑雨初收白帝城。小荷新竹夕陽明。十年塵土青衫色。萬里江山畫角聲。零落親朋勞遠夢。淒涼鄉社負歸耕。議郎博士多新奏。誰致當時魯二生。

夏夜起坐南亭達曉不復寐  
風露青冥近九秋。脫巾扶杖冷颼颼。曲闌影外巴山月。畫角聲中楚塞愁。巢燕竝棲高棟穩。潛魚時躍小池幽。悠然坐待江城曉。紅日將昇碧霧浮。

夜登白帝城樓懷少陵先生

拾遺白髮有誰憐。零落歌詩遍兩川。人立飛樓今已矣。浪翻孤月尚依然。升沉自古無窮事。愚智同歸有限年。此意淒涼誰共語。夜闌鷗鷺起沙邊。

假日書事

萬里西來爲一飢。坐曹日日汗霑衣。但嫌憂畏妨人樂。不恨疎慵與世違。雕檻迎陽花併發。畫梁避雨燕雙歸。放懷始得閑中趣。下馬何人又叩扉。

林亭書事

吏退林亭夏日長。烏紗白紵自生涼。透簷密葉帷三面。覆水青萍錦一方。約束蠻僮收藥富。催呼稚子曬書忙。平生幽事還拈起。未覺巴山異故鄉。

又

期會文書日日忙。偷閑聊得臥方牀。花藏密葉多時在。風度疎簾特地涼。野艇空懷菱蔓滑。冰盆誰弄藕絲長。角聲喚覺東歸夢。十里平湖一草堂。峽中絕無菱藕。

遊臥龍寺

曉發魚復走瞿唐。沙頭喚渡倚胡牀。峒人爭趁五更市。我亦來追六月涼。殘星欲盡尙歷落。明河已淡餘蒼茫。翻翻林表鴉鵲語。渺渺煙邊鷗鷺行。過江走馬十五里。小寺殘僧真叢爾。投鞭入門爲一笑。僻陋稱雄有如此。君不見天童徑山金碧浮虛空。千衲梵唄層雲中。

久病灼艾後獨臥有感

白帝城高暮柝傳。幽窗搔首意蕭然。江邊雲溼初橫雁。牆下桐疎不庇蟬。計出火攻傷老病。臥聞鳶墮歎蠻煙。諸賢好試平戎策。斂退無心競著鞭。

秋晚病起

心靜病良已。愴然巾屨輕。灰深地爐煖。日出紙窗明。宿雨全消瘴。新霜賸得晴。井梧殊可念。無葉送秋聲。

秋思

魚復城邊逢雁飛。白頭羈客恨依依。遠遊眼底故交少。晚歲人間樂事稀。雲重古關傳夜柝。月斜深巷擣秋衣。官閑況是頻移疾。藥鼎熒熒臥掩扉。

一病四十日天氣遂寒感懷有賦

幽人病起鬢毛殘。硤口樓臺九月寒。暮角又催孤夢斷。早霜初染一林丹。鄉閭乖隔知誰健。懷抱淒涼用底寬。麴米春香雖可醉。灑西新橋尙餘酸。

登城

簿領無時了。登臨亦快哉。樓危壓城起。硤迤東江來。病瘴拋書帙。思鄉泥酒盃。天寒水盡落。灑瀨已崔嵬。

夔州重陽

夔州鼓角晚淒悲。恰是幽窗睡起時。但憶社醅按菊蕊。敢希朝士賜萸枝。山川信美吾廬遠。天地無情客鬢衰。佳日掩門君莫笑。病來紗帽不禁吹。

追懷曾文清公呈趙教授趙近嘗示詩

憶在茶山聽說詩。親從夜半得玄機。常憂老死無人付。不料窮荒見此奇。律令合時方帖妥。工夫深處卻平夷。人間可恨知多少。不及同君叩老師。

謝張廷老司理錄示山居詩

顛顛經年客瘴鄉。把君詩卷意差強。古人三語猶嗟賞。況是珠璣滿錦囊。

又

老覺人間萬事非。但思茆屋映疎籬。秋衾已是饒歸夢。更讀山居二首詩。

秋晴欲出城以事不果

古人已去不可回。今人日夜歸泉臺。浮生細看只此是。到死自苦何爲哉。矜名飾詐竟一世。忍寒觸熱忘其骸。不令金樽映翠杓。坐待白骨生蒼苔。清秋九月瘴如洗。白鹽千仞高崔嵬。荒庭落葉不可掃。惟有叢菊爭先開。灑西黃柑霜落爪。溪口赤梨丹染腮。熊肪玉潔美香飯。鮓鱸花糝宜新醅。南窗病起亦蕭散。甚欲往探城西梅。一官底處不敗意。正用此時持事來。

南窗

流落逢知少，疎慵近俗多。悶拈如意舞，狂叩唾壺歌。巴酒禁愁得，金丹奈老何。南窗好風月，聊復此婆娑。

遣興

酒量愁翻減，詩聲老轉低。日高羹馬齒，霜冷駕雞栖。已判功名迂，寧論簿領迷。賴無權入手，軟弱實如泥。

九月三十日登城門東望悽然有感

減盡腰圍白盡頭，經年作客向夔州。流離去國歸無日，瘴癘侵人病過秋。菊蕊殘時初把酒，病中久止酒。

秋末方能少飲，雁行橫處更登樓。蜀江朝暮東南注，我獨胡爲淹此留。

初冬野興

關北關南霜露寒，灑東灑西山谷盤。簾紋細細吹殘水，龜背時時出小灘。衰髮病來無復綠，寸心老去尙如丹。逆胡未滅時多事，卻爲無才得少安。

東屯呈同遊諸公

十月霜彫楓樹林，清溪白石稱幽尋。按行老子誅茆地，惆悵孤臣許國心。走馬平沙嫌路近，傳盃小閣喜寒侵。也思試索梅花笑，凍蕊疎疎欲不禁。

別王伯高

冷落何人肯見尋，斷絃塵匣愧知音。傾家釀酒猶嫌少，入海求詩未厭深。薄宦簿書常袞袞，中年光景易駸駸。香奩贈別非無意，共約跣趺看此心。

書驛壁

猿叫鋪前雪欲作，鬼門關頭路正惡。泥深三尺馬蹄弱，霜厚一寸客衣薄。朝行過棧暮渡笮，夜投破驛火煜燭。人生但要無媿怍，萬里竄身元不錯。

又

峽中山多甲天下，萬嶂千峯通一罅。峒民無地習耕稼，射麋捕虎連晝夜。女兒薄命天不借，青燈獨宿江邊舍。黎明賣薪勿悲吒，女生豈有終不嫁。

醉中到白崖而歸

醉眼朦朧萬事空，今年痛飲瀆西東。偶呼快馬迎新月，卻上輕輿御晚風。行路八千常是客，丈夫五十未稱翁。亂山缺處如橫線，遙指孤城翠靄中。

十二月十九日晚巫山送客歸，回望西寺小閣縹緲可愛。遂與趙郭二教授同遊，抵夜乃還楚鄉。偶得長句呈二君。

送客沙頭落日催，遙看重閣更同來。清尊與悶都傾盡，是日所攜酒俱飲盡。倦馬和詩總勒回，顛頓遠遊悲騎省。豪華前事記章臺，歸時燈火參差晚。自脫征衣拂帽埃。





# 陸放翁集

劍南詩稿

卷第三

飯三折鋪鋪在亂山中

平生愛山每自歎。舉世但覺山可玩。皇天憐之足其願。著在荒山更何怨。南窮閩粵西蜀漢。馬蹏幾歷天下半。山橫水掩路欲斷。崔嵬可陟流可亂。春風桃李方漫漫。飛棧凌空又奇觀。但令軍健能強飯。萬里只作遊山看。

小市

小市門前沙作堤。杏花雖落不霑泥。客心尙壯身先老。江水方東我獨西。暫憩軒窗仍汛掃。遠遊書劍亦提携。子規應笑飄零慣。故傍茆簷盡意啼。

酒無獨飲理

酒無獨飲理。常恨欠佳客。忽得我輩人。豈計晨與夕。少年事虛名。歲月駒過隙。自從老大來。一日亦可惜。糟丘未易辦。小計且千石。頽然置萬事。天地爲幕帟。人生如刀礪。磨盡要有日。不須荷鍤隨。況問幾兩屐。

畏虎

滑路滑如苔。澀路澀若梯。更堪都梁下。一雪三日泥。泥深尙云可。委身餓虎蹏。心寒道上跡。魄碎茆葉低。

常恐不自免，一死均豬雞。老馬亦甚畏，憊憊不敢嘶。吾聞虎雖暴，未嘗窺汝棲。孤行莫不止，取禍非排擠。彼讒實有心，平地生溝谿。哀哉馬新息，慧苴成珠犀。

戲題

走馬平欺刺繡坡，放船橫截亂絲渦。從來倚箇心平穩，遇險方知得力多。

蟠龍瀑布

遠望紛珠纓，近觀轉雷霆。人言水出奇，意使行人驚。人驚我何得，定非水之情。水亦有何情，因物以賦形。處高勢趨下，豈樂與石爭。退之亦隘人，強言不平鳴。古來賢達士，初亦願躬耕。意氣或感激，邂逅成功名。

題梁山軍瑞豐亭

我行都梁窘風雪，史君喜事能留客。瑞豐亭上一尊酒，渺渺郊原水初白。峽中地褊常苦貧，政令愈簡民愈淳。本來無事只畏擾，擾者才吏非庸人。都梁之民獨無苦，須晴得晴雨得雨。史君心愛稼如雲，時上斯亭按歌舞。歌闌舞罷史君醉，父老羅拜豐年賜。聖朝尙實抑虛文，縱產芝房非上瑞。

馬上

殘年流轉似萍根，馬上傷春易斷魂。烘煖花無經日蕊，漲深水過去年痕。迷行每問樵夫路，投宿時敲竹寺門。不信太平元有象，牛羊點點散煙村。

鄰山縣道上作

微雨晴時出驛門，亂鶯啼處過江村。挽花醉袖霑餘馥，迎日征鞍借小溫。客路一身真弔影，故園萬里欲

招魂鬢毛無色心猶壯。藉草悲歌對酒尊。

鄰水延福寺早行

化蝶方酣枕。聞雞又著鞭。亂山徐吐日。積水遠生煙。淹泊真衰矣。登臨獨惘然。桃花應笑客。無酒到愁邊。酒偶盡。市醕不可飲。

岳池農家

春深農家耕未足。原頭叱叱兩黃犢。泥融無塊水初渾。雨細有痕秧正綠。綠秧分時風日美。時平未有差科起。買花西舍喜成婚。持酒東鄰賀生子。誰言農家不入時。小姑畫得城中眉。一雙素手無人識。空村相喚看繅絲。農家農家樂復樂。不比市朝爭奪惡。宦遊所得真幾何。我已三年廢東作。

過廣安弔張才叔諫議

春風匹馬過孤城。欲弔先賢涕已傾。許國肺肝知激烈。照人眉宇尙崢嶸。中原成敗寧非數。後世忠邪自有評。歎息知人真未易。流芳遺臭盡書生。

果州驛

驛前官路堠檠檠。歎息何時送我歸。池館鶯花春漸老。窗扉燈火夜相依。孤鸞怯舞愁窺鏡。老馬貪行強受鞿。到處風塵常撲面。豈惟京洛化人衣。

留樊亭三日王覺民檢詳日攜酒來飲海棠下比去花亦衰矣

留落猶能領物華。名園又作醉生涯。何妨海內功名士。共賞人間富貴花。

又

石衛尉家錦步障，移在樊家園館中。醉到花殘呼馬去，聊將俠氣壓春風。

柳林酒家小樓

桃花如燒酒如油，緩轡郊原當出遊。微倦放教成午夢，宿醒留得伴春愁。遠途始悟乾坤大，晚節偏驚歲月遒。記取晴明果州路，半天高柳小青樓。

南池杜詩所謂安知有蒼池萬頃浸坤軸者，今已盡廢。

二月鶯花滿閬中，城南搔首立衰翁。數莖白髮愁無那，萬頃蒼池事已空。陂復豈惟民食足，渠成終助霸圖雄。眼前碌碌誰知此，漫走叢祠乞歲豐。池上有漢高帝廟。

唐長慶中南池新亭碑在漢高帝廟側，亭已失所在矣。

池廢新亭亦已無，遺碑半滅臥春蕪。文章綺靡雖非古，今代詞人不辦渠。

聞杜鵑戲作絕句

半世羈遊厭路岐，憑鞍日日數歸期。勞君樹杪丁寧語，似勸飢人食肉糜。

鼓樓鋪醉歌

書生迫飢寒，一飽輕三巴。三巴未云已，北首趨褒斜。匆匆出門去，裘馬不復華。短帽障赤日，烈風吹黃沙。俶裝先晨雞，投鞭後昏鴉。壯哉利閭間，崖谷何豁舒。地荒多牧卒，往往聞盧笳。我行春未動，原野今無花。稚子入旅夢，挽鬚勸還家。起坐不能寐，愁腸如轉車。四方丈夫事，行矣勿咨嗟。

登慧照寺小閣

少年富貴已悠悠。老大功名定有不。歲月消磨閱亭傳。山川遼邈弊衣裘。殺身有地初非惜。報國無時未免愁。局促每思舒望眼。雖非吾土強登樓。

春雨

江頭一夜雨。曉路無新花。我今爲陳人。感此重歎嗟。羲和挾兩曜。疾走不可遮。古今俛仰間。那暇惜物華。風雨中過龍洞閣。

飄然醉袖怒人扶。箇裏何曾有畏塗。卷地黑風吹慘澹。半天朱閣插虛無。闌邊歸鶴如爭捷。雲表飛仙定可呼。莫怪衰翁心膽壯。此身元是一枯株。

驛舍海棠已過有感

淒涼古驛官道傍。朱門沈沈春日長。暄妍光景老海棠。顛風吹花滿空廊。物生榮頓固其常。惜哉無與持一觴。遊蜂戲蝶空自忙。豈知美人在西廂。我雖已老猶能狂。竚立爲爾悲容光。盛時不遇誠可傷。零落逢知更斷腸。

籌筆驛有武侯祠堂

運籌陳迹故依然。想見旌旗駐道邊。一等人間管城子。不堪誰叟作降牋。

嘉川鋪遇小雨景物尤奇

一春客路厭風埃。小雨山行亦樂哉。危棧巧依青嶂出。飛花併下綠巖來。面前雲氣翔孤鳳。腳底江聲轉

疾雷堪笑書生輕性命。每逢險處更徘徊。

老君洞有石刻載唐明皇幸蜀見老君於此。

丹鳳樓頭語未終。崎嶇蜀道復相逢。太清宮闕俱煨燼。豈亦南來避賊鋒。

大安病酒留半日。王守復來招不往。送酒解醒因小飲。江月館。

江驛春醒半日留。更煩送酒爲扶頭。柳花漠漠嘉陵岸。別是天涯一段愁。

金牛道中遇寒食

乍換春衫一倍輕。況逢寒食十分晴。鶯穿驛樹惺惚語。馬過溪橋蹀躞行。畫柱綵繩喧笑樂。豔粧麗服角鮮明。誰知此日金牛道。非復當時鐵馬聲。紹興初虜大入。至金牛而遜。

曉發金牛

客枕何時穩。忽忽又束裝。快晴生馬影。新暖拆花房。沮水春流綠。嶓山曉色蒼。阿瞞狼狽地。千古有遺傷。  
自金牛以西。皆明皇幸蜀路。

山南行

我行山南已三日。如繩大路東西出。平川沃野望不盡。麥隴青青桑鬱鬱。地近函秦氣俗豪。鞦韆蹴鞠分朋曹。首稽連雲馬蹄健。楊柳夾道車聲高。古來歷歷興亡處。舉目山川尙如故。將軍壇上冷雲低。丞相祠前春日暮。國家四紀失中原。師出江淮未易吞。會看金鼓從天下。卻用關中作本根。

南鄭馬上作

南鄭春殘信馬行。通都氣象尙崢嶸。迷空遊絮憑陵去。曳線飛鳶跋扈鳴。落日斷雲唐闕廢。德宗詔山南  
比兩京。淡煙芳草漢壇平。近郊有韓信拜大將壇。猶嫌未豁胸中氣。目斷南山天際橫。城中望見長安南  
山。

和高子長參議道中二絕

梁州四月晚鶯啼。共憶扁舟罨畫谿。莫作世間兒女態。明年萬里駐安西。

又

豐年食少厭兒啼。覓得微官落五谿。大似無家老禪衲。打包還度棧雲西。

次韻張季長題龍洞

我昔謁紫皇。翳鳳騁虬龍。俯不見塵世。浩浩萬里空。謫墮尙遠遊。忽到漢始封。西望接蜀道。北顧連秦中。  
壯哉形勝區。有此蜿蜒宮。雷霆自鞶鞶。環玦亦瓏瓏。石屋如建章。萬戶交相通。來者各有得。盡取知無從。  
憑高三歎息。自古幾英雄。老我文字衰。揮毫看諸公。

次韻子長題吳太尉雲山亭

參謀健筆落縱橫。太尉清鑪賞快晴。文雅風流雖可愛。關中遺虜要人平。

送劉戒之東歸

去年三年恨未平。東城況復送君行。難憑魂夢尋言笑。空向除書見姓名。殘日半竿斜谷路。西風萬里玉  
關情。蘭臺粉署朝回晚。肯記麤官數寄聲。

周元吉蟠室詩

天下有廣居。非阿房。建章。寶錢日及月。闔闔陰與陽。山川坦然平。何者爲藩牆。孔公暨瞿聃。同坐此道場。哀哉。世日隘。肝膽分界疆。蹙縮戰蝸角。崎嶇走羊腸。周先早得道。所證非復常。小室古城隅。宛如野僧房。能容人天衆。雜沓來燒香。三萬二千人。各據獅子牀。實際正如此。切忌錯商量。須彌芥子話。今夕當舉揚。

送范西叔赴召

天涯流落過重陽。楓葉搖丹已著霜。衰病強陪蓮幕客。淒涼又送石渠郎。杜陵雁下悲徂歲。笠澤魚肥夢故鄉。便恐從今長隔闊。舊交新貴例相忘。

又

欲駕征車勸小留。南山南畔更逢秋。數聲過雁催行色。一盞昏燈話別愁。自昔文章關治道。卽今臺閣要名流。白頭尙作書癡在。賸乞朱黃與校讎。

寄鄧公壽

高標瑤樹與瓊林。靈府清寒出苦吟。海內中年求識面。江邊一見卽論心。紛紛俗子常成市。疊疊微言孰賞音。聞道南池梅最早。要君攜手試同尋。

簡章德茂

殊方邂逅豈無緣。世事多乖復悵然。造物無情吾輩老。古人不死此心傳。冷雲黯黯朝橫棧。紅葉蕭蕭夜滿船。箇裏約君同著句。不應輸與灞橋邊。



自三泉泛嘉陵至利州

日日遭途處處詩。書生活計絕堪悲。江雲垂地灘風急。一似前年上峽時。

木瓜鋪短歌

鼓樓坡前木瓜鋪。歲晚悲辛利州路。當車礪礪石如屋。百里夷途無十步。溪橋缺斷水齧沙。崖腹崩頽風拔樹。虎狼安尾擇肉食。狐狸豎毛啼日暮。豕丘短草聲窸窣。往往精靈與人遇。我生胡爲忽在此。正坐一饑忘百慮。五更出門寒裂面。半夜燎衣泥滿袴。妻孥八月離夔州。寄書未到今何處。餘年有幾百憂集。日夜朱顏不如故。卽今臺省盛諸賢。細思寧是儒冠誤。

夜抵葭萌惠照寺寓楊小閣

亭驛驅馳脾肉消。故山歸夢愈迢迢。夜行觸尉那能避。旦過隨僧不待招。雨後風雲猶慘澹。霜前草木已蕭條。衰遲事事非平日。醉裏題詩亦復聊。

太息宿青山鋪作

太息重太息。吾行無終極。冰霜迫殘歲。鳥獸號落日。秋砧滿孤村。枯葉擁破驛。白頭鄉萬里。墮此虎豹宅。道邊新食人。膏血染草棘。平生鐵石心。忘家思報國。卽今冒九死。家國兩無益。中原久喪亂。志士淚橫臆。切勿輕書生。上馬能擊賊。

又

淒淒復淒淒。山路我攀躋。僕病臥草間。馬困聲酸嘶。脫兔截道奔。窮猿上樹啼。崩湍一何哀。下落萬仞谿。

昏黑投孤戍。洗我衣上泥。下恩不可遷。大惑終身迷。仕宦十五年。曾不飽糖糲。客路少睡眠。月白聞號雞。欲行且復止。虎來茆葉低。

閬中作

殘年作客遍天涯。下馬長亭便似家。三疊淒涼渭城曲。數枝閑澹閬中花。襜褕授管相逢晚。理鬢熏衣一笑譁。俱是邯鄲枕中夢。墜鞭不用憶京華。

又

挽住征衣爲濯塵。閬州齋釀絕芳醇。鶯花舊識非生客。山水曾遊是故人。遨樂無時冠巴蜀。語音漸正帶咸秦。平生賸有尋梅債。作意城南看小春。

遊錦屏山謁少陵祠堂

城中飛閣連危亭。處處軒窗臨錦屏。涉江親到錦屏上。卻望城郭如丹青。虛堂奉祠子杜子。眉宇高寒照江水。古來磨滅知幾人。此老至今元不死。山川寂寞客子迷。草木搖落壯士悲。文章垂世自一事。忠義凜凜令人思。夜歸沙頭雨如注。北風吹船橫半渡。亦知此老憤未平。萬竅爭號泄悲怒。

仙魚鋪得仲高兄書

病酒今朝載臥輿。秋雲漠漠雨疎疎。閬州城北仙魚鋪。忽得山陰萬里書。

自閬復還漢中次益昌

北首褒斜又幾程。驕雲未放十分晴。馬經斷棧危無路。風掠枯茆颯有聲。季子貂裘端已弊。吳中菰菜正

堪烹朱顏漸改功名晚。擊筑悲歌一再行。

驛亭小憩遣興

淡日微雲共陸離。曲闌危棧出參差。老松臨道閱千載。杜宇號山連四時。漢水東流那有極。秦關北望不勝悲。郵亭下馬開孤劍。老大功名頗自期。

再過龍洞閣

天險龍門道。霜清客子遊。一筇緣絕壁。萬仞俯洪流。著腳初疑夢。回頭始欲愁。危身無補國。忠孝兩堪羞。

自笑

自笑謀生事事疎。年來錐與地俱無。平章春韭秋菘味。拆補天吳紫鳳圖。食肉定知無骨相。珥貂空自誑頭顱。惟餘數卷殘書在。破篋蕭然笑獠奴。

三泉驛舍

殘鐘斷角度黃昏。小驛孤燈早閉門。霜氣峭深摧草木。風聲浩蕩卷郊原。故山有約頻回首。末路無歸易斷魂。短髮蕭蕭不禁白。強排幽恨近清樽。

嘉川鋪得檄遂行中夜次小柏

黃旗傳檄趣歸程。急服單裝破夜行。肅肅霜飛當十月。離離斗轉欲三更。酒消頓覺衣裘薄。驛近先看炬火迎。渭水函關元不遠。著鞭無日涕空橫。

歸次漢中境上

雲棧屏山閱月遊。馬蹄初喜蹋梁州。地連秦雍川原壯。水下荆揚日夜流。遺虜孱孱寧遠略。孤臣耿耿獨私憂。良時恐作他年恨。大散關頭又一秋。

沔陽夜行

夜發沔陽驛。坡陁岡阜重。月斜欹帽影。霜重溼裘茸。野岸鳴枯葉。煙林度曉鐘。梁州明日到。一笑解衰容。

道中累日不肉食至西縣市中得羊因小酌

門外倚車轅。頹然就醉昏。棧餘羊絕美。壓近酒微渾。一洗窮邊恨。重招去國魂。客中無晤語。燈燼爲誰繁。

初離興元

夢裏何曾有去來。高城無奈角聲哀。連林秋葉吹初盡。滿路寒泥蹋欲開。笠澤決歸猶小憩。錦城未到莫輕回。炊菰斫膾明年事。卻憶斯遊亦壯哉。

自興元赴官成都

平生無遠謀。一飽百念已。造物戲饑之。聊遣行萬里。梁州在何處。飛蓬起孤壘。憑高望杜陵。煙樹略可指。今朝忽夢破。跋馬臨漾水。此生均是客。處處皆可死。劍南亦何好。小憩聊爾爾。舟車有通塗。吾行良未止。

書事

生長江湖狎釣船。跨鞍塞上亦前緣。雲埋廢苑呼鷹處。雪暗荒郊射虎天。醪酒芳醇偏易醉。胡羊肥美了無羶。揚州雖有東歸日。閉置車中定悵然。

雨中過臨溪古堠

道邊相送驛邊迎。水隔山遮似有情。歲晚無聊莫相笑。君方雨立我泥行。

南沮水道中

磴舍臨湍瀨。習船聚小潭。山形寒漸瘦。雪意暮方酣。久客情懷惡。頻來道路諳。家山空悵望。無夢到江南。

長木晚興

沮水嶠山名古今。聊將行役當登臨。斷橋煙雨梅花瘦。絕磡風霜槲葉深。未路清愁常袞袞。殘冬急景易駸駸。故巢東望知何處。空羨歸鴉解滿林。

遣興

貂裘破弊色淒涼。塞上歸來路更長。老驥嘶鳴常伏櫪。寒龜藏縮正支牀。彫零客路新霜鬢。掃灑先師舊草堂。九折阪頭休絕歎。世間何地不羊腸。

長木夜行抵金堆市

夜行長木村。重霧雜零雨。溼螢黏野蔓。寒犬吠雲塢。道壞交細泉。亭廢立遺堵。時時過農家。燈火照鳴杵。嗟予獨何事。無歲得安處。卽今窮谷中。性命寄豺虎。三更投小市。買酒慰羈旅。高詠東山詩。悵望懷往古。

赴成都泛舟自三泉至益昌謀以明年下三峽

詩酒清狂二十年。又摩病眼看西川。心如老驥常千里。身似春蠶已再眠。暮雪烏奴停醉帽。秋風白帝放歸船。飄零自是關天命。錯被人呼作地仙。

壬辰十月十三日自閬中還興元遊三泉龍門十一月二日自興元適成都復攜兒曹往遊賦詩

勝地惜輕別。短筇成後遊。門呀一境異。木落四山秋。野鷓翔深竇。蟠蛟擅古湫。棧危縈峭壁。橋迴跨奔流。白雨穿林至。腥風卷地浮。真成起衰病。不但洗孤愁。登陟知難再。吟哦爲小留。回頭卽萬里。雪滿戴谿舟。

予行蜀漢間道出潭毒關下每憩羅漢院山光軒今復過之悵然有感

棧路書事

危閣聞鈴馱。湍流見磴船。汲江人負盎。騎馬客蒙氈。梨美來秦地。橙香接楚天。癡頑殊耐事。隨處一欣然。

雪晴行益昌道中頗有春意

杜陵雁下歲將殘。疋馬西遊雪擁關。顛顛敢忘雙闕路。淹遲遍看兩川山。春回柳眼梅鬢裏。愁在鞭絲帽影間。安得黃金成大藥。爲人千載駐顏顏。

思歸引

善泅不如穩乘舟。善騎不如謹持轡。妙於服食。不如寡欲。工於揣摩。不如省事。在天有命。誰得逃。在我無求。直差易。散人家風。脫糾纏。煙葢雨笠。全其天。蕪絲老盡。歸不得。但坐長飢。須俸錢。此身不堪阿堵役。寧待秋風始投檄。山林聊復取熊掌。仕宦眞當棄雞肋。錦城小憩不淹遲。卽是輕舸下峽時。那用更爲麟閣夢。從今正有鹿門期。

誌公院在劍門東五里院東石壁間有若僧負杖者杖端髯有刀尺拂子之狀

江東爭奪纏妖祿。哀哉斯民亂方甚。錦幃老人蓋古佛。現身爲作大慈蔭。蕭翁八十尙兒癡。旛蓋鍾螺鬧中禁。當時此老默笑渠。大法棟梁身獨任。杖頭示人三轉語。開口喪身如飲鴆。紛紛放弑但可憐。何曾爲汝陳符讖。

劍門道中遇微雨

衣上征塵雜酒痕。遠遊無處不消魂。此身合是詩人未。細雨騎驢入劍門。

劍門關

劍門天設險。北鄉控函秦。客主固殊勢。存亡終在人。棧雲寒欲雨。關柳暗知春。羈客垂垂老。憑高一愴神。

劍門城北回望劍關諸峯青。人雲漢感蜀亡事慨然有賦。

丹芝行

自昔英雄有屈信。危機變化亦逡巡。陰平窮寇非難禦。如此江山坐付人。

劍山峨峨插穹蒼。千林萬谷蟠其陽。大丹九轉古所藏。靈芝三秀夜吐光。如火非火森有芒。朝陽欲升尙煌煌。何由斷取換肝腸。往駕素虬朝紫皇。

過武連縣北柳池安國院養泉試日鑄顧渚茶院有二泉皆甘寒傳云唐僖宗幸蜀在道不豫至此飲泉而愈賜名報國靈泉云

又

滴瀝珠璣翠壁間。遭時曾得奉龍顏。欄傾甃缺無人管。滿院松風晝掩關。

行殿淒涼迹已陳。至今父老記南巡。一泓寒碧無今古。付與閑人作主人。

又

我是江南桑苧家。汲泉閑品故園茶。只應碧缶蒼鷹爪。可壓紅囊白雪芽。日鑄貯以小瓶蠟。紙丹印封之。願渚貯以紅藍練囊。皆有歲貢。

宿武連縣驛

平日功名浪自期。頭顱到此不難知。宦情薄似秋蟬翼。鄉思多於春繭絲。野店風霜俶裝早。縣橋燈火下程遲。鞭寒熨手戎衣窄。忽憶南山射虎時。

初入西州境述懷

我無飛仙術。御氣周八極。寸步常依人。艱哉萬里役。自行劍關南。大道平如席。日高徐駕車。薄暮亦兩驛。及茲山愈遠。原野若加闢。茂樹冬不凋。寒花晚猶拆。昔我卜遠遊。至蜀龜輒食。弛裝有定處。嗚呼豈人力。頗傳岷山下。清淑無癘疫。士風尚豪舉。意氣喜遠客。薪米家可求。借書亦易得。思吳雖不忘。所願少休息。吾聞古達人。雅志在山澤。豈無及物心。但恨俗褊迫。攬德雖成留。引去常勇決。駭機滿人間。著腳無上策。

綿州魏成縣驛有羅江東詩云芳草有情皆礙馬好雲無處不遮樓戲用其韻

老夫乘輿忽西遊。遠跨秦吳萬里秋。尊酒登臨遍山寺。歌辭散落滿江樓。孤城木葉蕭蕭下。古驛灘聲瀟瀟流。未許詩人誇此地。茂林脩竹憶吾州。

卽事



渭水岐山不出兵。卻攜琴劍錦官城。醉來身外窮通小。老去人間毀譽輕。捫蝨雄豪空自許。屠龍工巧竟何成。雅聞嚙下多區芋。聊試寒爐玉糝羹。

青村寺

十年淹泊望修門。臨水登山幾斷魂。短鬢星星身欲老。小樓微月宿青村。

行綿州道中

三年客江峽。萬死脫魚鼈。平地從今始。窮塗敢復論。園畦棋局整。坡壠海濤翻。瘦憤應多恨。泥塗伏短轡。

越王樓

上盡江邊百尺樓。倚欄極目暮江秋。未甘便作衰翁在。兩脚猶堪蹋九州。

又

葡萄酒綠似江流。夜燕唐家帝子樓。約住管絃呼羯鼓。攜渠打散醉中愁。

東津

歲暮涪江水歸壑。白沙渺然石犖确。蜀天常燠少雪霜。綠樹青林不搖落。闌干詰曲臨官道。煙靄參差望城郭。打魚斫膾修故事。豪竹哀絲奉歡樂。樂莫樂於新相知。美人一笑回春姿。四方本是丈夫事。安用一生無別離。

東山

今日之集何佳哉。入關劇飲始此回。登山正可小天下。跨海何用尋蓬萊。青天肯爲陸子見。妍日似趣梅

花開有酒如涪綠可愛。一醉直欲空千疊。醅酥鵝黃出隴右。熊肪玉白黔南來。眼花耳熱不知夜。但見銀燭高花摧京華。故人死太半。歡極往往潛生哀。聊將豪縱壓憂患。鼓吹動地聲如雷。

綿州錄參軍廳觀姜楚公畫鷹少陵爲作詩者

我來訪古涪之濱。不辭百罔冀一真。走馬朝尋海樓館。斫膾夜醉魴魚津。越王高樓亦已換。俯仰今古堪悲辛。督郵官舍最卑陋。棟撓楹腐知幾春。歸然此壁獨亡恙。老槎勁翮完如新。向來劫火何自免。叱呵守護疑有神。妖狐九尾穴中國。共置不問如越秦。天時此物合致用。下韉指呼端在人。會當原野灑毛血。坐令萬里清煙塵。老眼還憂不及見。詩成肝膽空輪囷。

羅江驛翠望亭讀宋景文公詩

撲馬征塵拂不開。高亭欹帽一徘徊。蜀山地暖稀逢雪。閬歲春遲未見梅。陂水近人無鷺下。煙林藏寺有鐘來。宋公出牧曾題壁。錦段雖殘試剪裁。

鹿頭關過龐士元廟

士元死千載。淒惻過遺祠。海內常難合。天心豈易知。英雄今古恨。父老歲時思。蒼蘚無情極。秋來滿斷碑。

遊漢州西湖

房公一跌叢衆毀。八年漢州爲刺史。遠城鑿湖一百頃。島嶼曲折三四里。小菴靜院穿竹入。危樹飛樓壓城起。空濛煙雨媚松楠。顛倒風霜老葭葦。日月苦長身苦閑。萬事不理看湖水。向來愛琴雖一癖。觀過自足知夫子。畫船載酒凌湖光。想公樂飲千萬場。歎息風流今未泯。兩川名醞避鵝黃。鵝黃漢中酒名蜀中

無能及者

嚴君平卜臺

先生久已蛻氛埃。道上猶傳舊卜臺。乞得寒泉濯肝肺。真成萬里不虛來。  
臺後有大井名通仙井。相傳君平所渡。

梅花

家是江南友是蘭。水邊月底怯新寒。畫圖省識驚春早。玉笛孤吹怨夜殘。  
冷淡合教閑處著。清臞難遣俗人看。相逢剩作樽前恨。索笑情懷老漸闌。

拜張忠定公祠二十韻

張公世外人。與蜀偶有緣。天將靖蜀亂。生公在人間。厥初大盜興。樂禍迭相挺。  
天子輟玉食。貴臣擁戎旃。生殺出喜怒。死者常差肩。公曰此何哉。從之吾欺天。  
河流觸地軸。砥柱屹不遷。脅從盡縱捨。飛章交帝前。上意竟開悟。至仁勝兇殘。  
貴臣不極賞。追還黜其權。安危關社稷。豈惟蜀民全。後來有阿童。握兵事開邊。  
晚策睦州功。上公珥金蟬。勢張不可禦。北鄉挑幽燕。神京遂丘墟。迄今天步艱。  
時無忠定公。孰能折其奸。我來拜遺祠。喬木含蒼煙。死者不可作。愀然衰涕澗。  
憤切感虜禍。慷慨思公賢。春秋送迎神。誰爲歌此篇。

成都歲暮始微寒小酌遣興

革帶頻移紗帽寬。茶鑪欲熟篆香殘。疎梅已報先春信。小雨初成十月寒。  
身似野僧猶有髮。門如村舍強名官。鼠肝蟲臂元無擇。遇酒猶能罄一歡。

再賦梅花

老來愛酒賸狂顛。況復梅花到眼邊。不怕幽香妨靜觀。正須疎影伴癯仙。松筠共歎冰霜晚。桃李從教雨露偏。此去西湖八千里。破愁一笑得無緣。

登塔

冷官無一事。日日得閑遊。壯哉千尺塔。攝衣上上頭。眼力老未減。足疾新有瘳。幸茲濟勝具。俯仰隘九州。雪山西北橫。大江東南流。畫棟雲氣涌。鐵鐸風聲遒。旅懷忽惻愴。涕下不能收。十年辭象魏。萬里懷松楸。仰視去天咫。絕叫當聞不。帝閭守虎豹。此計終悠悠。

先主廟次唐貞元中張儼詩韻

猾賊挾至尊。天命矜在己。豈知高帝業。煌煌漢中起。

又

吳蜀本唇齒。悲哉乃連兵。盡銳下三峽。誰使復兩京。

又

洛陽化爲灰。棘生銅駝陌。討賊志不成。父老泣陵栢。廟在惠陵側。

睡起書事

京華豪飲酬千鍾。濯錦江邊怯酒濃。烈士壯心雖未減。狂奴故態有誰容。折梅著句聊排悶。閉戶焚香剩放慵。午枕如雷君莫怪。西風吹夢過吳松。

西郊尋梅

西郊梅花矜絕艷。走馬獨來看不厭。似羞流落蒙市塵。寧墮荒寒傍茆店。儵然自是世外人。過去生中差一念。淺鬢常鄙桃李學。獨立不容鶯蝶覘。山礬水仙晚角出。大是春秋吳楚僭。餘花豈無好顏色。病在一俗無由砭。朱欄玉砌渠有命。斷橋流水君何欠。嗟余相與頗同調。身客劍南家在剡。淒涼萬里歸無日。蕭颯二毛衰有漸。尙能作意晚相從。爛醉不辭盃盞灑。

分韻作梅花詩得東字

淺寒籬落清霜後。疎影池塘淡月中。北客同春俱稅駕。南枝與我兩飄蓬。從來遇酒千鍾少。此外評花四海空。惟恨廣平風味減。坐看徐庾擅江東。

宇文子友聞予有西郊尋梅詩以詩借觀次其韻

拾遺遺跡付緇郎。槁葉凝塵欲滿堂。已恨罇罍孤勝踐。更堪風雨病幽芳。蘭蓀千古有同調。蜂蝶一春空自忙。馬上得詩歸絕歎。故園三徑久成荒。

海棠范希元圖

誰道名花獨故宮。謂故蜀燕王宮。東城盛麗足爭雄。橫陳錦障闌干外。盡吸紅雲酒釀中。貪看不辭持夜燭。倚狂直欲擅春風。拾遺舊詠悲零落。瘦損腰圍擬未工。老杜不應無海棠詩。意其失傳爾。

簡南禪勤長老

官遊處處是君恩。歸去無期莫更論。眼正修行新有力。心空憂患已無根。鉢盂分我雲堂飯。拄杖敲君竹

院門屈宋向來堪一笑。故鄉何戀更招魂。

和譚德稱送牡丹

洛陽春色擅中州。檀暈鞮紅總勝流。顛顛劍南人不管。問渠情味似儂不。

又

吾生何拙亦何工。憂患如山一笑空。猶有餘情被花惱。醉搔華髮倚屏風。

初到蜀州寄成都諸友

流落天涯鬢欲絲。年來用短始能奇。無材藉作長閑地。有憑誰爲劇飲資。萬里不通京洛夢。一春最負牡丹時。巖巖報與諸公道。罨畫亭邊第一詩。

自蜀州暫還成都奉簡諸公

不染元規一點塵。行歌偶到錦江濱。淋漓詩酒無虛日。判斷鶯花又過春。客路柳陰初墮絮。還家梅子欲生仁。更須作意勤相過。要信年光屬散人。

摩訶池

摩訶古池苑。一過一消魂。春水生新漲。煙蕪沒舊痕。年光走車轂。人事轉萍根。猶有宮梁燕。銜泥入水門。  
蜀宮中舊泛舟入此池。曲折十餘里。今府後門雖已爲平陸。然猶號水門。

三月十七日夜醉中作

前年膾鯨東海上。白浪如山寄豪壯。去年射虎南山秋。夜歸急雪滿貂裘。今年摧頽最堪笑。華髮蒼顏羞

自照誰知得酒尙能狂。脫帽向人時大叫。逆胡未滅心未平。孤劍床頭鏗有聲。破驛夢回燈欲死。打窗風雨正三更。

嘉祐院觀壁間文湖州墨竹

石室先生筆有神。我來拂拭一酸辛。敗牆慘澹欲無色。老氣森嚴猶逼人。慣閱冰霜元耐久。恥隨兒女更爭春。紛紛可笑空摹擬。爾輩毫端萬斛塵。

春晚書懷

吹盡郊原萬點紅。燕梁考室亦忽忽。老來偏覺歲華速。客裏忽驚春事空。病有藥方傳肘後。嬾無詩句付囊中。歸心日夜隨江水。只欲東門覓短篷。入吳者皆自小東郭登舟。

又

經春淹泊錦官城。作箇歸期苦未成。老向軒裳增力量。病於風月減心情。官閒有味緣高臥。酒貴無憂爲細傾。憶探梅花如昨日。西齋榆莢與階平。

又

老客天涯心尙孩。惜春直欲挽春回。長繩縱繫斜陽住。右手難移故國來。暑近蚊雷先隱轡。雨前螳埽正崔嵬。茹芝卻粒終無術。萬事惟須付一盃。

偶憶萬州戲作短歌

峽中天下最窮處。萬州蕭條誰肯顧。去年正月偶過之。曾爲巴人三日住。南浦尋梅雪滿舟。西山載酒雲

生屨。至今夢聽竹枝聲。燈火紛紛驛前路。殘春猶客蜀江邊。陳迹回思一愴然。漸老定知歡漸少。明年還復憶今年。

驛舍見故屏風畫海棠有感

厭煩只欲長面壁。此心安得頑如石。杜門復出歎習氣。止酒還開慙定力。成都二月海棠開。錦繡裏城迷巷陌。燕宮最盛號花海。霸國雄豪有遺迹。猩紅鸚綠極天巧。疊萼重跗眩朝日。繁華一夢忽吹散。閉眼細思猶歷歷。憂樂相尋豈易知。故人應記醉中詩。夜闌風雨嘉州驛。愁向屏風見折枝。

思政堂東軒偶題

羈愁酒病兩無聊。小篆吹香已半消。喚起十年閩嶺夢。頽桐花畔見紅蕉。頽桐嘉州謂之百日紅。

荔枝樓小酌

碧瓦朱欄已半摧。強呼歌舞試樽罍。邦人莫訝心情嬾。新出鶯花海裏來。

又

病與愁兼怯酒船。已歌聞罷更悽然。此身未死長爲客。回首夔州又二年。

嘉陽官舍奇石甚富散棄無領略者予始取作假山因名西齋曰小山堂爲賦短歌

昔人何人愛巖壑。爲山未成儲犖确。散落支床壓酒槽。大或專車小拳握。幽人邂逅爲絕歎。脩綆趣取寒泉濯。峭峯幽竇相吐吞。翠嶺丹崖渺聯絡。石不能言意可解。問我胡爲憐寂寞。人間興廢自有數。昔棄何傷今豈樂。斯言妙矣子則陋。敢對石友辭罰爵。爲君寬作十日留。在眼使同眞著腳。



望雲樓晚興

小閱東南獨詠詩。此生終與世差池。夕陽明處蒼烟合。棲燕歸時畫角悲。人與江山均是夢。心非風月尙誰知。舊交幾歲音塵隔。三撫闌干有所思。

護國天王院故神霄玉清萬壽宮也。廢圮略盡。而規模尙極壯麗。過之有感。

大霄帝君神霄府。一日翼書行海窟。築宮奔走誰敢後。萬牛挽材山作礎。步虛夜半落雲間。玉磬漻漻鸞鶴舞。帝師丞相領使名。侍晨校籍紛如雨。洛陽臨淮小睥睨。御史立奏投裔士。從來桑門喜嘲競。舉國冠巾噤無語。古傳東海會揚塵。君看此地亦荆榛。霓旌仙仗恐遺堵。甃缺臺傾知幾春。牧兒驅牛鬪庭草。誰記劍佩來朝真。斜陽卻上笱輿去。溝水泠泠愁殺人。

登荔枝樓

平羌江水接天流。涼入簾櫳已似秋。喚作主人元是客。知非吾土強登樓。閑憑曲檻常忘去。欲下危梯更小留。公事無多廚釀美。此身不負負嘉州。薛能詩。不負嘉州只負身。

再賦荔枝樓

只道文書撥不開。未妨高處獨徘徊。山橫瓦屋披雲出。水自牂牁裂地來。暝入簾陰吹細雨。涼生樓角轉輕雷。癡頑也擬忘鄉國。不奈城頭暮角哀。

能仁院前有石像丈餘。蓋作大像時樣也。

江閣欲開千尺像。雲龕先定此規模。斜陽徙倚空三歎。嘗試成功自古無。



# 陸放翁集

劍南詩稿

卷第四

謁凌雲大像

出郭幽尋一笑新。徑呼艇子截煙津。不辭疾步登重閣。聊欲今生識偉人。泉鏡正涵螺髻綠。浪花不犯寶  
跌塵。一泉泓然正在鬢下。每歲漲水不能及佛足。始知神力無窮盡。丈六黃金果小身。觀無量壽經云。或  
現小身丈六八尺。

凌雲醉歸作

峨眉月入平羌水。歎息吾行俄至此。謫仙一去五百年。至今醉魂呼不起。玻璃春滿琉璃鍾。玻璃春眉州  
酒名。宦情苦薄酒興濃。飲如長鯨渴赴海。詩成放筆千觴空。十年看盡人間事。更覺麴生偏有味。君不見  
蒲萄一斗換得西涼州。不如將軍告身供一醉。

獨游城西諸僧舍

我是天公度外人。看山看水自由身。蘚崖直上飛雙屐。雲洞前頭岸幅巾。萬里欲呼牛渚月。一生不受庾  
公塵。非無好客堪招喚。獨往飄然覺更真。

西林院

陸放翁集 劍南詩稿 卷四

一

(六八九)

一邦盡對江邊像。試比西林總不如。院門對大像最正。羣玉蕭森開士宅。五雲飛動相君書。寺額五字唐相裴微書。道美可愛。磴危漸覺山爭出。屐響方驚閣半虛。安得棄官長住此。一盃香飯薦珍蔬。

聽事前紫薇花二本甚盛戲題絕句

紅藥紫薇西省春。從來惟慣對詞臣。問囚自是籠官分。無奈名花解笑人。

同何元立蔡肩吾至東丁院汲泉煮茶

一州佳處盡裴回。惟有東丁院未來。身是江南老桑苧。諸君小住共茶盃。

又

雪芽近自峨眉得。不減紅囊顧渚春。旋置風爐清樾下。它年奇事記三人。

癸巳夏旁郡多苦旱。惟漢嘉數得雨。然未足也。立秋夜三鼓雨。至明日晡後未止。高下霑足。喜而有賦。

有賦

畫簷鳴雨早秋天。不喜新涼喜有年。眼裏香秔三萬頃。寄聲父老共欣然。

又

五十衰翁髮半華。猶能把酒醉天涯。絲毫美政何曾有。惟把豐年贈漢嘉。

晚登望雲

一出修門又十年。蜚流多已珥金蟬。衰如蠹葉秋先覺。愁似鰥魚夜不眠。輦路疎槐迎駕處。苑城殘日泛湖天。君恩未報身今老。徙倚危樓一泫然。

又

晚來煙雨暗江干。烽火遙傳畫角殘。看鏡功名空自許。上樓懷抱若爲寬。青楓搖落新秋令。白髮淒涼舊史官。飽見少年輕宿士。可憐隨處強追歡。

立秋後十日風雨淒冷獨居有感

急雨鳴瓦溝。尖風入窗罅。紗籠耿青燈。寂寂新秋夜。誰言簿領中。乃復有此暇。稍繙書冊讀。已念灰火跨。那知是羈客。恍若在家舍。睡晚且熟眠。洗沐官有假。明日晦日也。

晦日西窗懷故山

今朝休日仍無客。茶罷西窗臥解衣。白髮已侵殘夢境。綠苔應滿舊漁磯。桃源雞犬塵凡隔。杜曲桑麻夢想歸。賴有小山聊慰眼。幽篁叢桂雨霏霏。

秋日懷東湖

小閣東頭罨畫池。秋來長是憶幽期。身如巢燕臨歸日。心似堂僧欲動時。病思羈懷惟付酒。西風落日更催詩。故知歲暮常多感。不獨當年宋玉悲。

又

罨畫池邊小釣磯。垂竿幾度到斜暉。青蘋葉動知魚過。朱閣簾開看燕歸。歲晚官身空自閔。途窮世事巧相違。邊州客少巴歌陋。誰與愁城略解圍。

小山之南作曲欄石磴繚繞如棧道戲作二篇

羈遊隨處得哦詩。掃溉軒窗每恨遲。已幻小山寬客恨。更添危磴作兒嬉。偶留塞上寧無數。徑返湖邊已有期。誰遣化工娛此老。幽花微拆綠苔滋。

又

吏退庭空剩得閑。一窗如在翠微間。半崖縈棧遊秦路。疊嶂生雲入剡山。真有巖居臨絕壑。但無漁艇繫寒灣。躋攀自苦君休笑。寸步何曾不險艱。

得成都諸友書勸少留嘉陽戲作

一坐五十日。癡頑良可哀。新涼爲醉地。少訟作慵媒。市柳風煙慘。汀蘋歲月催。遠官從漫浪。垂老嬾低回。  
市柳汀蘋皆屬唐安。

道院

四壁長苔痕。經旬掩綠樽。雨聲清夢境。燈影伴吟魂。搖落悲徂歲。漂流憶故園。擬騷無傑語。千古愧湘沅。  
醉中感懷

早歲君王記姓名。只今顛顛客邊城。青衫猶是鷓鴣行。舊白髮新從劍外生。古戍旌旗秋慘淡。高城刁斗夜分明。壯心未許全消盡。醉聽檀槽出塞聲。

玻瓈江眉州共飲亭。蓋取東坡共飲玻瓈江之句。追懷舊遊。戲作以補西州樂府。

玻瓈江水千尺深。不如江上離人心。君行未過青衣縣。妾心先到峨眉陰。金罇共釀不知曉。月落煙渚天橫參。車輪無角那得住。馬蹄不方何處尋。空憑尺素寄幽恨。縱有綠綺誰知音。愁來只欲掩屏睡。無奈夢

斷聞疎磬，古樂府安得雙車輪。一夜生四角。唐人詩云：長安塵土中，馬蹄圓重重。馬蹄不方，何處認郎蹤。

### 夜思

蒼顏華髮久低摧，歎息何堪歲月催。殘暑已隨團扇去，新涼還傍短檠來。月痕澹澹侵苔砌，雲葉蕭蕭覆水臺。簿領沉迷無日了，試憑詩思洗氛埃。

### 雨夜懷唐安

歸心日夜逆江流，官柳三千憶蜀州。小閣簾櫳頻夢蝶，平湖煙水已盟鷗。螢依溼草同爲旅，雨滴空階別是愁。堪笑邦人不解事，區區猶借陸君留。蜀人舊語，謂唐安有三千官柳，四千琵琶。溼螢依草，沒梅宛陵詩。

### 迎詔書

憶瞻鬢仗省門前，扇影鞭聲下九天。寂莫嘉州迎詔處，忽聞鼓吹却悽然。

### 秋夜遣懷

江雲傍簷山雨細，羈客空堂臥荒翳。心如秋燕不安巢，迹似春萍本無柢。官身奔走何時定，病眼蒙籠惟欲閉。壯遊不復記墜鞭，夜語誰能懷擁髻。詩情已減但微吟，酒戒漸堅纔小啜。從今更擬著幽禪，半世佞真誤計。

### 送客至江上

陸放翁集 劍南詩稿 卷四

多事經旬不出城。今朝送客此閑行。郊原遠帶新晴色。人語中含樂歲聲。天際斂雲山盡出。江流收漲水初平。故園社友應惆悵。五歲無端棄耦耕。

雨中至西林寺

胸中荆棘費鉏耰。正藉幽尋暫解紛。不盡長江來畫玉。半空飛閣對凌雲。昏昏橫靄憑軒見。杳杳疎鐘隔岸聞。珍重山僧迎客意。螭奩一縷起微熏。小軒下臨羊江發源自大渡河。

休日登花將軍廟小樓

林間縹緲出層樓。欄角蒼茫萬頃秋。曾是胸中著雲夢。不妨此地少遲留。

深居

作吏難堪簿領迷。深居聊復學幽棲。病來酒戶何妨小。老去詩名不厭低。零落野雲寒傍水。霏微山雨晚成泥。自憐甫里家風在。小摘殘蔬遠廢畦。

秋夜獨醉戲題

弊袍羸馬遍天涯。恰似伶優著處家。社甕嫩醅初泛蟻。寒缸殘燼自成花。幽窗照影烏巾折。醉手題詩淡墨斜。莫恨久爲峨下客。江湖歸去得雄誇。

感事

清班曾見六龍飛。晚落天涯遠日畿。邊月空悲新雪鬢。京塵猶染舊朝衣。江山壯麗詩難敵。風物蕭條醉絕稀。賴有東湖堪吏隱。寄聲籬菊待吾歸。



醉鄉

醉鄉卜築亦佳哉。但苦無情白髮催。癡欲煎膠黏日月。狂思入海訪蓬萊。辭巢歸燕先秋去。泣露幽花近社開。莫惜傾家供作樂。古人白骨有蒼苔。

夜讀岑嘉州詩集

漢嘉山水邦。岑公昔所寓。公詩信豪偉。筆力追李杜。常想從軍時。氣無玉關路。公詩多從戎。西邊時所作。至今蠶簡傳。多昔橫槊賦。零落財百篇。崔嵬多傑句。工夫刮造化。音節配韶護。我後四百年。清夢奉巾屨。晚途有奇事。隨牒得補處。羣胡自魚肉。明主方北顧。誦公天山篇。流涕思一遇。

次韻師伯渾見寄

眉山漢嘉東西州。估船日日到津頭。不得講書一行字。倚遍臨江百尺樓。黃鐘大呂忽復見。繡段英瑤何足酬。願約青神王夫子。來醉萬景作中秋。

社前一夕未昏輒寢中夜乃得寐

祠事當行懼不任。未昏強臥擁孤衾。三更自笑元無睡。萬事從來忌有心。簷角河傾秋耿耿。牀頭蟲語夜悒悒。若耶溪上蘋花老。倦枕何人聽越吟。

晚雨

蕭瑟度橫塘。霏微映繚牆。壓低塵不動。灑急土生香。聲入楸梧碎。清分枕簟涼。回頭忽陳迹。簷角挂斜陽。

社日

百穀登場酒滿卮。神林簫鼓晚清悲。蟬依疎柳長言處。燕委空巢大去時。幼學已忘那用忌。鄉俗小兒女。社日忌習業。微豐自樂不須醫。古謂社酒治聾。傷心故里雞豚集。父老逢迎正見思。

夜雨感懷

老來每惜歲崢嶸。幾爲巴歌判宿醒。白帝草生時入夢。錦官花重更關情。簾疎夜雨侵燈暈。枕冷秋風遞角聲。定許何時理歸棹。酒狂猶解賦蕪城。

八月二十二日嘉州大閱

陌上弓刀擁寓公。水邊旌旆卷秋風。書生又試戎衣窄。山郡新添畫角雄。郡舊止角四枝。近方增如式。早事樞庭虛畫策。晚遊幕府媿無功。草間鼠輩何勞磔。要挽天河洗洛嵩。

九月六夜夢中作笑詩覺而忘之明日戲追補一首

吾家笑疾自士龍。我才雖卑笑則同。紛紛世事何足計。盡付撫掌掀髯中。清樽可醉風月好。虛空萬象皆絕倒。問君此笑是喜不。道得老夫輸一籌。

重九會飲萬景樓

粲粲黃花手自持。登高聊答此佳時。纖雲不作看山祟。斗酒聊寬去國思。落日樓臺頻徙倚。西風鼓笛倍淒悲。彭城戲馬平生意。強爲巴歌一解頤。是日作竹枝歌舞。

久客書懷

行役飽看山。沉綿剝得閑。忘憂緣落魄。耐老爲癡頑。射虎臨秦塞。騎驢入蜀關。芳洲蘭可佩。幽磴桂堪攀。

效乃聲饒楚。陳陶句帶蠻。嘉州帶袁董。諸蠻悠然長自遣。故里幾時還。

初報嘉陽除官還東湖有期喜而有作

塞上經秋幾醉醒。羈愁減盡鬢邊青。烽傳八詔登樓看。歌奏三巴忍淚聽。好語忽聞還印綬。歸心先已繞林垌。呼兒結束從今日。鵲語燈花故有靈。累夕燈有花。今早鵲聲遠舍。皆紀實事。

聞勾龍司戶會客山亭送酒榖及橄欖并簡諸同僚

東山如高人。吾輩豈易見。君獨不出門。終日與相面。陰晴煙雨月。朝暮知幾變。聞君交不瀆。冠佩未嘗燕。弛張要有時。一笑山未譴。高秋得佳日。折簡喚諸彥。風流非俗飲。歌舞參筆硯。但恨五日尹。阻造三語掾。余方臥疾清樽遣。分似霜果亦可薦。爛醉君勿辭。光景真掣電。

九月十六日夜夢駐軍河外遣使招降諸城覺而有作

殺氣昏昏橫塞上。東竝黃河開玉帳。晝飛羽檄下列城。夜脫貂裘撫降將。將軍櫪上汗血馬。猛士腰間虎文韞。階前白刃明如霜。門外長戟森相向。朔風卷地吹急雪。轉盼玉花深一丈。誰言鐵衣冷徹骨。感義懷恩如挾纊。腥臊窟穴一洗空。太行北嶽元無恙。更呼斗酒作長歌。要遣天山健兒唱。

何元立示九日詩臥病累日乃能次韻

何郎戲寫菊花秋。落筆縱橫豈易酬。豪士乃能爲老伴。寓公那得稱遨頭。早衰不耐危亭冷。夜冷憑誰滯翁亭。欄杆得疾數日。獨臥空驚畫角愁。病起尙思尋宿約。一樽從子醉東樓。

成都行

倚錦瑟。擊玉壺。吳中狂士遊成都。成都海棠十萬株。繁華盛麗天下無。青絲金絡白雪駒。日斜馳遣迎名姝。燕脂褪盡見玉膚。綠鬢半脫嬌不梳。吳綾便面對客書。斜行小草密復疎。墨君秀潤瘦不枯。風枝雨葉筆筆殊。月浸羅幃清夜徂。滿身花影醉索扶。東來此歡墮空虛。坐悲新霜點鬢髮。易求合浦千斛珠。難覓錦江雙鯉魚。

聞虜亂有感

前年從軍南山南。夜出馳獵常半酣。玄熊蒼兕積如阜。赤手曳虎毛毵毵。有時登高望鄆杜。悲歌仰天淚如雨。頭顱自揣已可知。一死猶思報明主。近聞索虜自相殘。秋風撫劍淚汎瀾。雒陽八陵那忍說。玉座塵昏松柏寒。儒冠忽忽垂五十。急裝何由穿袴褶。羞爲老驥伏櫪悲。寧作枯魚過河泣。古樂府枯魚詩云。枯魚過河泣。何時復還入。作書與魴鱖。相教謹出入。

醉歌

我飲江樓上。闌干四面空。手把白玉船。身遊水精宮。方我吸酒時。江山入胸中。肺肝生崔嵬。吐出爲長虹。欲吐輒復吞。頗畏驚兒童。乾坤大如許。無處著此翁。何當呼青鸞。更駕萬里風。

初寒

江路常逢雨。山城早得寒。蘭凋初解佩。菊老尙加餐。嘉陽有崇蘭。以八九月盛開。節物知何負。情懷自鮮歡。浮生看已熟。不必夢邯鄲。

木山

枯楠千歲遭風雷，披枝折幹吁可哀。輪囷無用天所赦，秋水初落浮江來。嵌空宛轉若耳鼻，峭瘦拔起何崔嵬。珠宮貝闕留不得，忽出洲渚知誰推。書窗正對雲洞啓，叢菊初傍幽篁栽。是間著汝頗宜稱，摩挲朝暮真千回。天公解事雨十日，洗盡泥滓滋莓苔。一丘一壑吾所許，不須更慕明堂材。

### 寒夜遣懷

臨觴本不飲，憂多自成醉。四方行萬里，不見埋憂地。憶昔入京都，寶馬搖香鬢。酣飲青樓夜，歌聲在半空。去日不可挽，華髮忽垂頰。娟娟峨眉月，相對作淒冷。月落照空牀，不寐聽寒釐。早知憂隨人，何用去故鄉。

### 嘉陽絕無木犀偶得一枝戲作

久客紅塵不自憐，眼明初見廣寒仙。只饒籬菊同時出，尙占江梅一著先。重露溼香幽徑曉，斜陽烘蕊小窗妍。何人更與蒸沉水，金鴨華燈惱醉眠。

### 雨後登西樓獨酌

老覺人間無一欣，強尋高處看歸雲。天空列幃開圖畫，水落寒江學篆文。四海道途行泰半，百年光景近中分。交遊賴有麴生在，正向愁時能策勳。

### 喜晴

西風吹雨冷淒淒，道上行人白晝迷。聊抉重雲取朝日，未容嘉穀臥秋泥。年豐郡府疏文檄，蠻遁邊亭息鼓鼙。寄語農家莫遊惰，冬閑正要飽鉏犁。

### 曉出城東

渺渺長江下估船。亭亭孤塔隱蒼煙。不堪異縣蕭條地。更遇初寒慘澹天。巾褐已成歸有約。箠瓢未足去無緣。包羞強索侏儒米。豪舉何人記少年。

寶劍吟

幽人枕寶劍。殷殷夜有聲。人言劍化龍。直恐興風霆。不然憤狂虜。慨然思遐征。取酒起酌劍。至寶當潛形。豈無知君者。時來自施行。一匣有餘地。胡爲鳴不平。

十月一日浮橋成以故事宴客凌雲

陰風吹雨白晝昏。誰掃雲霧升朝曦。三江水縮獻洲渚。九頂秀色欲塞門。西山下竹十萬箇。江面便可馳車轍。巷無居人亦何怪。釋釋未來看空山村。竹枝宛轉秋猿苦。桑落激澗春泉渾。衆賓共醉忘燭跋。一徑卻下綠雲根。走沙人語若潮卷。爭橋炬火如星繁。肩輿睡兀到東郭。空有醉墨留衫痕。十年萬事俱變滅。點檢自覺惟身存。寒燈夜永照耿耿。臥賦長句招羈魂。

聞王嘉叟訃報有作

嗚呼嘉叟今信死。哭君寢門淚如水。我初入都不妄交。傾倒如君數人耳。籠燈蹋雪夜相過。劇論懸河駭鄰里。地爐燂栗美芻豢。石鼎烹茶常醪醴。上書去國何勇決。作詩送君猶壯偉。十年偶復過都門。君方草制西垣裏。鬢鬚班白面骨生。心頗疑君遽如此。西來例不候達官。每欲寄聲中輒止。隻雞絮酒縱有時。雙魚素書長已矣。生前客屢紛滿戶。身後人情薄於紙。懸知海內莆陽公。謂陳丞相獨念遺孤爲經紀。

出城至呂公亭按視修堤

翠靄橫山澹日昇。孤亭聊借曲欄憑。霜威漸重江初縮。農事方休役可興。重阜護城高歷歷。千夫在野築登登。寓公僅踵前人迹。伐石西山恨未能。西州築堤織竹貯江石。不三年輒壞。意謂如吳中取大石鑿成。則可支久異日當有辦此者。

### 登樓

從來好境遍人間。無奈勞生自欠閑。江近時時吹白雨。樓高面面看青山。歌聲哀怨傳三硤。行色淒涼帶百蠻。嘉陽近諸蠻。流落愛君心未已。夢魂猶綴紫宸班。

### 醉中作

晚途豪氣未低摧。一飲猶能三百盃。爛爛目光方似電。駒駒鼻息忽如雷。

### 又

駕鶴孤飛萬里風。偶然來憩大峨東。持盃露坐無人會。要看青天入酒中。

### 又

曾賜琳腴白玉京。狂歌起舞蜀人驚。却騎黃鶴橫空去。今夕垂虹醉月明。

### 又

畫角三終夜未闌。醉憑飛閣喜天寬。月明滿地江風急。吹落幽人紫綺冠。

### 觀大散關圖有感

上馬擊狂胡。下馬草軍書。二十抱此志。五十猶耀儒。大散陳倉間。山川鬱盤紆。勁氣鍾義士。可與共壯圖。

坡陁咸陽城。秦漢之故都。王氣浮夕靄。宮室生春蕪。安得從王師。汛掃迎皇輿。黃河與函谷。四海通舟車。士馬發燕趙。布帛來青徐。先常營七廟。次第畫九衢。偏師縛可汗。傾都觀受俘。上壽大安宮。復如正觀初。丈夫畢此願。死與螻螻殊。志大浩無期。醉膽空滿軀。

嘉州守宅舊無後圃因農事之隙爲種花築亭觀甫成而歸戲作長句

吾州山水西州冠。正欠雄樓并傑觀。奇峯秀嶺待彈壓。明月清風須判斷。三峨舊不到郡齋。創爲詩人供几案。煙雲舒卷水墨圖。草木青紅錦繡段。一時冠蓋共登臨。百年父老俱驚惋。縈回舞袖試弓彎。宛轉歌聲學珠貫。佳人蜂蝶爭遶鬢。上客龍蛇看揮翰。寓公雖作一月留。梅發東湖歸思亂。兒戲聊成此段奇。陳迹應留後人歎。明朝艇子泝平羌。卻伴謫仙遊汗漫。

連日扶病領客殆不能支枕上懷故山偶成

已強迂疎假印章。更扶衰病主盃觴。功名已判初心負。豪俠都無故態狂。靜覺此身猶外物。嬾思與世永相忘。清泉白石生來事。曲几明窗味最長。

余往與宇文叔介同客山南今年叔介客死臨安十月十一日夜忽夢相從取架上書共讀如平生讀未竟忽辭去留之不可曰欲歸校藥方既覺泫然不能已因賦此詩

羈魂顛顛遠相尋。髭斷肩寒帶苦吟。歸校藥方緣底事。知君死抱濟時心。

金錯刀行

黃金錯刀白玉裝。夜穿窗扉出光芒。丈夫五十功未立。提刀獨立顧八荒。京華結交盡奇士。意氣相期共



生死千年史策恥無名。一片丹心報天子。爾來從軍天漢濱。南山曉雪玉嶙峋。嗚呼楚雖三戶能亡秦。豈有堂堂中國空無人。

言懷

蘭碎作香塵。竹裂成直紋。炎火熾岷岡。美玉不受焚。孤生抱寸志。流離敢忘君。釀桂餐菊英。潔齋三沐熏。孰云九關遠。精意當徹聞。捐軀誠有地。賈勇先三軍。不然齋恨死。猶冀揚清芬。願乞一棺地。葬近要離墳。

十月十九日與客飲忽記去年此時自錦屏歸山南道中小獵今又將去此矣

去年縱獵韓壇側。玉鞭自探南山雪。今年痛飲蜀江邊。金盃卻吸峨眉月。竹枝歌舞新教成。淒怨傳得三巴聲。城頭築觀出雲雨。峨眉正與闌干平。酒酣詩就擲盃去。醉蹋玻璃江上路。懸知幽磻斷橋邊。已有梅花開半樹。

冬日

短景忽忽過。新寒疊疊來。客遊聊戲耳。世事亦悠哉。綠動連村麥。香吹到處梅。錦城花柳窟。歸去看春回。

十月十四夜月終夜如晝

月從海東來。徑尺鎔銀盤。西行到峨眉。玉宇萬里寬。幽人耿不寐。弄影清夜闌。五城十二樓。縹緲香霧間。不知何仙人。亭亭倚高寒。欲語不得往。悵望冰雪顏。叩頭僮見哀。容我躡素鸞。掬露以爲漿。屑玉以爲餐。泠泠漱齒頰。皓皓濯肺肝。逝將從君遊。人間苦無歡。

下元日五更詣天慶觀寶林寺

朝罷琳宮謁寶坊。強扶衰疾具簪裳。擁裘假寐籃輿穩。夾道吹煙樺炬香。樓外曉星猶磊落。山頭初日已蒼涼。鳴騶應有高人笑。五斗驅君早夜忙。

梅花

老厭紛紛鮮歡。愛花聊復客江干。月中欲與人爭瘦。雪後偷憑笛訴寒。野艇幽尋驚歲晚。紗巾亂插醉更闌。尤憐心事淒涼甚。結子青青亦帶酸。

又

月地雲階暗斷腸。知心誰解賞孤芳。相逢只怪影亦好。歸去始驚身染香。渡口耐寒窺淨綠。橋邊凝怨立昏黃。與卿俱是江南客。剩欲尊前說故鄉。

又

玄冥行令肅冰霜。牆角疎梅特地芳。屑玉定煩修月戶。堆金難買破天荒。了知一氣環無盡。坐笑千林凍欲僵。力量世間誰得似。挽回歲律放春陽。

又

折得名花伴此翁。詩情恰在醉魂中。高標不合塵凡有。尤物真窮造化功。霧雨更知仙骨別。鉛丹那悟色塵空。前身姑射疑君是。問道端須順下風。

西園

半掩朱門蘚徑斜。翠屏繡谷忽谿斜。高高下下天成景。密密疎疎自在花。江近夕陽迎宿鷺。林昏殘角促

歸鴉吾舟已繫津南岸。喚客猶能一笑譁。

胡無人

鬚如蝟毛磔。面如紫石稜。丈夫出門無萬里。風雲之會立可乘。追奔露宿青海月。奪城夜躡黃河冰。鐵衣度磧雨颯颯。戰鼓上隴雷憑憑。三更窮虜送降款。天明積甲如丘陵。中華初識汗血馬。東夷再貢霜毛鷹。羣陰伏。太陽昇。胡無人。宋中興。丈夫報主有如此。笑人白首蓬窗燈。

公無渡河聞雅安守溺死於嘉陵江代其家人作

大莫大於死生。親莫親於骨肉。河不可憑兮。非有難知。言之不從兮。繼以痛哭。望雲九井兮。白浪嵯峨。剗肝瀝血兮。不從奈何。秋風颯颯兮。紙錢投波。從公於死兮。下飽蛟鼉。

長門怨

寒風號有聲。寒日慘無暉。空房不敢恨。但懷歲暮悲。今年選後宮。連娟千蛾眉。早知獲譴速。悔不承恩遲。聲當徹九天。淚當達九泉。死猶復見思。生當長棄捐。

長信宮詞

憶年十七兮。初入未央。獲侍步輦兮。恭承寵光。地寒祚薄兮。自貽不祥。讒言乘之兮。皇靈日彰。禍來嵯峨兮。勢如壞牆。當伏重誅兮。鼎耳劍鋸。長信雖遠兮。匪棄路旁。歲給絮帛兮。月賜稻粱。君舉玉食兮。犀箸誰嘗。君御朝衣兮。誰進熏香。婕妤才人兮。儼其分行。千秋萬歲兮。永奉君王。妾雖益衰兮。尚供蠶桑。願置繭館兮。糾織玄黃。欲訴不得兮。仰呼蒼蒼。佩服忠貞兮。之死敢忘。

銅雀妓

武王在時教歌舞。那知淚灑西陵土。君已去兮妾獨生。生何樂兮死何苦。亦知從死非君意。偷生自是慙天地。長夜昏昏死實難。孰知妾死心所安。

得韓无咎書寄使虜時宴東都驛中所作小閨

大梁二月杏花開。錦衣公子乘傳來。桐陰滿第歸不得。金轡玲瓏上源驛。上源驛中搥畫鼓。漢使作客胡作主。舞女不記宣和粧。廬兒盡能女真語。書來寄我宴時詩。歸鬢知添幾縷絲。有志未須深感慨。築城會據拂雲祠。唐中受降城在拂雲祠。

曉坐

低枕孤衾夜氣存。披衣起坐默忘言。瓶花力盡無風墮。爐火灰深到曉溫。空囊時時聞鼠齧。小窗一一送鴉翻。悠然忽記幽居日。下榻先開水際門。

斷碑歎興元姚節度園以折碑爲石筍。文猶可識。蓋梁蕭懿墓碑。簡文爲太子時撰。書法道美可愛。

二蕭同起南蘭陵。正如文叔與伯升。至今人悲大蕭死。齋恨不見梁家興。崇崇之陵久爲谷。豈惟羣盜分珠玉。斷碑槎牙棄道邊。文字班班猶可讀。剝剝苔蘚一悽然。俯仰人間幾變遷。世人作碑君勿哂。千載園林須石筍。

夜行至平羌憩大悲院

憶昨遊天台，夜投石橋宿。水聲亂人語，炬火散山谷。穿林有鶯鶻，截道多奔鹿。今夕復何夕，此境忽在目。蒼茫陂十里，清淺溪數曲。微霜結裘茸，落葉拂帽屋。下馬憩村寺，頽然睡清熟。覺來窗已白，殘燈猶煜煜。

迂益帥馬上作

蜀酒歌

漢州鵝黃鸞鳳雛，不鷲不搏德有餘。眉州玻璃天馬駒，出門已無萬里塗。病夫少年夢清都，曾賜虛皇碧琳腴。文德殿門晨奏書，歸局黃封羅百壺。十年流落狂不除，遍走人間尋酒壚。青絲玉瓶到處酤，鵝黃玻璃一滴無。安得豪士致連車，倒瓶不用杯與盃。琵琶如雷聒坐隅，不愁渴死老相如。

十一月八日夜燈下對梅花獨酌累日勞甚頗自慰也

奔走人間無已時，夜窗喜對出塵姿。移燈看影憐渠瘦，掩戶留香笑我癡。冷豔照杯欺麴蘖，孤標逼硯結冰澌。本來難入繁華社，莫向春風怨不知。

醉後草書歌詩戲作

朱樓矯首隘八荒，綠酒一舉累百觴。洗我堆阜崢嶸之胸次，寫爲淋漓放縱之詞章。墨灑初若鬼神怒，字瘦忽作蛟螭僵。寶刀出匣揮雪刃，大舸破浪馳風檣。紙窮擲筆霹靂響，婦女驚走兒童藏。往時草檄喻西域，颯颯聲動中書堂。余嘗草丞相魯公以下與夏國主書於政事堂一收朝跡忽十載，西掠三巴窮夜郎。山川荒絕風俗異，賴有酒美猶能狂。醉中自脫頭上幘，綠髮未許侵微霜。人生得喪良細事，孰謂老大多

悲傷。

古藤杖歌

我有古藤杖。天矯蛟龍形。生於峭壁絕磳上。乃是會稽山陰之蘭亭。歷吳入楚上巴硤。北遊直看秦山青。夜飛或隨暴雨去。旦歸常帶流漉腥。與子扶攜各老大。勿復狡獪誇神靈。愔愔從此常倚壁。聽我夜誦黃庭經。

歲晚書懷

殘歲堂堂去。新春鼎鼎來。夢移鄉國近。酒挽壯心回。暖律初催柳。晴光併上梅。東湖有歸日。衰抱得頻開。已遣人迎新守。

累日倦甚不能觴客睡起戲作

粉闌紅蕪罨俎薄。不如止酒得安眠。無心已破浮生夢。有力聊輕造化權。脫髮滿梳真老矣。斷香縈几故愴然。晚知古佛中邊語。正合蒙莊內外篇。

種花

西園作戲喚春回。桃李陰陰三萬栽。不是無心看開遍。錦江煙柳待歸來。時將還成都。

雨中登樓望大像

去年寒雨中。騎驢度劍閣。今年當此時。臥聽邊城柝。巍巍千尺像。與我兩寂寞。交遊閱四海。此老差可託。但當頻自省。諸惡誓莫作。時時一憑高。相望要不作。桑間戒三宿。堅坐豈渠樂。却應輸老夫。新春買芒屨。

迎赦呈王志夫李德孺師伯渾

平明置騎傳詔函。帝意欲與東皇參。青城回仗國人喜。金雞啣赦天恩覃。吾君愛民靡不到。黃紙字密如吳蠶。紀元故事極用九。聖政盡美方登三。赦書改明年元。嗟余久已去魏闕。夢想豹尾猶麋麋。過郊一月方拜赦。始知身落天西南。歡呼已怪衰病愈。蹈舞更覺春風酣。何當與子歸共載。二月起柁江如藍。

冬日

幸是元無了事癡。偷閑聊復學兒嬉。午窗弄筆臨唐帖。夜几研朱勘楚詞。山暖已無梅可折。江清猶有蟹堪持。舊交乖隔音塵斷。安得歌呼共一卮。蜀中惟嘉州有蟹。

雨中睡起

礫礫寒禽無定棲。纖纖小雨欲成泥。松鳴湯鼎茶初熟。雪積爐灰火漸低。一氣推移均野馬。百年蒙覆等醯雞。青山黃葉蘭亭路。憶喚鄰翁共架犁。

十二月初一日得梅一枝絕奇戲作長句今年於是四賦此花矣

高標已壓萬花羣。尚恐嬌春習氣存。月兔擣霜供換骨。湘娥鼓瑟爲招魂。孤城小驛初飛雪。斷角殘鐘半掩門。盡意端相終有恨。夜寒皴玉倩誰溫。

無題

畫閣無人晝漏稀。離悰病思兩依依。釵梁雙燕春先到。箏柱羈鴻暖不歸。迎得紫姑占近信。裁成白紵寄征衣。晚來更就鄰姬問。夢到遼陽果是非。

快晴

地闢天開斗柄回。今朝紅日遍池臺。新陽蘇醒春前柳。輕暖醫治雪後梅。瓦屋螺青披霧出。錦江鴨綠抱山來。衰翁也逐兒童喜。旋撥文書近酒盃。

獨坐

巾帽欹傾短髮稀。青燈照影夜相依。窮邊草木春遲到。故國湖山夢自歸。茶鼎松風吹謾謾。香奩雲縷散。翻翻羸驢敢復和鑿望。只願連山苜蓿肥。

十二月十一日視築隄

江水來自蠻夷中。五月六月聲摩空。巨魚穹龜牙鬚雄。欲取闐市爲龍宮。橫隄百丈臥霧虹。始誰築此東平公。今年樂哉適歲豐。吏不相倚勇赴功。西山大竹織萬籠。船舸載石來亡窮。橫陳屹立相疊重。置力尤在水廟東。我登高原相其衝。一盾可受百箭攻。蜿蜿其長高隆隆。截如長城限羗戎。安得椽筆記始終。插江石崖堅可礮。

題龍鶴菜帖東坡先生元祐中與其里人史彥明主簿書云新春龍鶴菜羹有味舉箸想復見憶邪

先生直玉堂。日羞太官羊。如何夢故山。曉枕春蔬香。春蔬尙云爾。況我舊朋友。萬里一紙書。殷勤問安否。先生高世人。獨恨不早歸。坐令龍鶴菜。猶愧首陽薇。

春愁曲客話成都戲作



慮義至今三十餘萬歲。春愁歲歲常相似。外大瀛海環九洲。無有一洲無此愁。我願無愁但歡樂。朱顏綠鬢常如昨。金丹九轉徒可聞。玉兔千年空擣藥。蜀姬雙鬢姘姘嬌。醉看恐是海棠妖。世間無處無愁到。底事難過萬里橋。

荀秀才送蠟梅十枝奇甚爲賦此詩

與梅同譜又同時。我爲評香似更奇。痛飲便判千日醉。清狂頓減十年衰。色疑初割蜂脾蜜。影欲平欺鶴膝枝。插向寶壺猶未稱。合將金屋貯幽姿。

離嘉州宿平羌

初挈囊衣宿水村。蕭然一掃舊巢痕。本來信手忘工拙。卻爲無心少怨恩。自笑遠遊諧馬上。已營小築老雲根。淡煙疎雨平羌路。便恐從今入夢魂。

瑞草橋道中作

經年簿書無少暇。款段今朝欣一跨。瑞草橋邊水亂流。青衣渡口山如畫。老翁醉著看龍鍾。小婦出窺聞姪姪。荒坡吹笛晚呼牛。古路倚梯晨采柘。殘花零落不禁折。香草丰茸如可藉。郵亭慈竹筍穿籬。野店蒲萄枝上架。功名垂世端有數。利欲昏心喜乘罇。羈窮自笑豈人謀。閒放每欲從天借。草根蟲語祇自悲。風裏逢征安稅駕。祖師補處浣花村。會傍清江結茆舍。

遊修覺寺

上蓋蒼崖百級梯。詩囊香椀手親攜。山從飛鳥行邊出。天向平蕪盡處低。花落忽驚春事晚。樓高剩覺客

魂迷興闌掃榻禪房臥。清夢還應到剡溪。

晚步湖上

雲薄漏春暉。湖空弄夕霏。沾泥花半落。掠水燕交飛。小倦聊扶策。新晴旋減衣。幽尋殊未已。畫角喚人歸。

暮春

忙裏偷閑慰晚途。春來日日在東湖。凭欄投飯看魚隊。挾彈驚鴉護雀雛。俗態似看花爛熳。病身能鬪竹清癯。一樽是處成幽賞。風月隨人不用呼。

池上醉歌

我欲築化人中天之臺。下視四海皆飛埃。又欲造方士入海之舟。破浪萬里求蓬萊。取日挂向扶桑枝。留春挽回北斗魁。橫笛三尺作龍吟。腰鼓百面聲轉雷。飲如長鯨海可竭。玉山不倒高崔嵬。半酣脫幘髮尚綠。壯心未肯成低摧。我妓今朝如花月。古人白骨生蒼苔。後當視今如視古。對酒惜醉何爲哉。

四月五夜見螢

蜀州官居富水竹。四月螢火遶梁飛。流年迫人不相貸。客子倦遊何日歸。

塞上曲

三尺鐵如意。一枝玉馬鞭。笑把出門去。萬里行無前。當道何崔嵬。云是玉門關。方當置屯守。征人何時還。馬色如雜花。鎧光若流水。肅肅不敢譁。遙望但塵起。日落戍火青。煙重塞垣紫。回首五湖秋。西風開芙蓉。夜聞塔鈴及泉聲。

山泉瀉幽竇。塔鈴搖天風。清音無時盡。靜夜尤惚瓏。嗟我走紅塵。市聲聒欲聾。多生耳杻業。賴此一洗空。  
夢騎白鳳凰。佩玉朝珠宮。覺來撫枕歎。月滿草堂中。



# 陸放翁集

劍南詩稿

卷第五

曉歎

一鴉飛鳴窗已白。推枕欲起先歎息。翠華東巡五十年。赤縣神州滿戎狄。主憂臣辱古所云。世間有粟吾得食。少年論兵實狂妄。諫官劾奏常竄殛。不爲孤囚死嶺海。君恩如天豈終極。容身有祿愧滿顏。滅賊無期淚橫臆。未聞含桃薦宗廟。至今銅駝沒荆棘。幽并從古多烈士。悒悒可令長失職。王師入秦駐一月。傳檄足定河南北。安得揚鞭出散關。下令一變旌旗色。

苦筍

藜藿盤中忽眼明。駢頭脫襖白玉嬰。極知耿介種性別。苦節乃與生俱生。我見魏徵殊媚嫵。約束兒童勿多取。人才自古要養成。放使干霄戰風雨。

月下作

池上迎微風。柏間蹋涼月。冷然醉夢醒。一洗煩惱熱。嗟予世外人。火食常嘔噎。易求雲表露。難覓太古雪。況欲試祕方。瓊漿和玉屑。俛首居俗間。愁若鷹在韉。惟茲服月芒。比歲稍得訣。但令天無雲。豈復計圓缺。玉鈞定誰挂。冰輪了無轍。詩成獨高詠。靈府炯澄澈。

又

畏暑不巾襪。步月櫺短筇。瘦身髮鬢髻。顧影如孤松。徑幽螢闔開。池漲魚唵鳴。飛泉穿北垣。珠玉相撞舂。東湖更奇絕。百畝銀初鎔。但能抱琴往。絕恨欠鶴從。重露傾荷盤。微風墮芙蓉。歡言美清夜。縹緲吹疎鐘。空中飛仙人。粲然冰雪容。笑我老塵世。不記瑤臺逢。

小宴

洗君鸚鵡盃。酌我蒲萄醅。冒雨鶯不去。過春花續開。英雄漫青史。富貴亦黃埃。今夕湖邊醉。還須秉燭回。

小閣納涼

侵牀月白病全蘇。掠面風清酒欲無。渺渺塘陰下鷗鷺。蕭蕭秋意滿菰蒲。縱輸煙渡橫孤艇。也勝京塵暗九衢。莫遣良工更摹寫。此詩端是臥遊圖。

晨雨

揮汗驅蚊廢夜眠。清晨一雨便翛然。涼生池閣衣巾爽。潤入園林草木鮮。青蕩雲腰開鬪茗。翠盃玉液取寒泉。飯餘一枕華胥夢。不怪門生笑腹便。

湖上筍盛出戲作長句

織織穿苔璫。瑁簪按行日夜待。成林養渠百尺干。霄氣見我平生及物心。剩插藩籬憂玉折。豫期風雨聽龍吟。明年又徙囊衣去。誰與平安報好音。

雨後集湖上

野水交流自滿畦。芳池新漲恰平堤。花藏密葉多時在。鶯占高枝盡日啼。繡袂寶幫催結束。金尊翠杓共提攜。白頭自喜能狂在。笑褻蠻牋落醉題。

過大蓬嶺度繩橋至杜秀才山莊

度筇臨千仞。梯山躡半空。溼雲朝暮雨。陰壑古今風。亭觀參差見。闌干詰曲通。柳空叢篠出。松偃翠蘿蒙。負籠銀釵女。鉏畚鶴髮翁。何由有餘俸。小築此山中。

宿杜氏晨起遇雨

怪藤十圍蔽白日。老木千尺干青霄。水泛夏灘竹作舫。陸行跨空繩繫橋。陰陰古屋精靈語。慘慘江雲蛟鱉驕。吾道非耶行至此。諸公正散紫宸朝。

翠園院

曉入翠園寺。擁門千萬峯。山空鳥自命。林茂鹿相從。嫋嫋風中筇。昏昏雲外鐘。將歸興未盡。清嘯倚長松。

野飯

蕙實炊明珠。苦筍饌白玉。輪囷斷區芋。芳辛采山藪。山深少鹽酪。淡薄至味足。往往八十翁。登山逐奔鹿。可憐城南社。零落依澗曲。面餘作詩瘦。趨拜尚不俗。杜氏自譜。以爲子美下峽留一子守澗花舊業。其後避成都亂。徙眉州大壩。或徙大蓬云。病夫益倦遊。頗願老窮谷。是家吾所慕。食菜如食肉。時能喚鄰里。小甕酒新漉。何必懷故鄉。下箸厭雁鶩。

化成院

翠圍至化成。七里幾千盤。肩輿掀溜淖。歎息行路難。緣坡忽入谷。蜿蜒蒼龍蟠。孤塔插空起。雙柁當夏寒。飛屐到上方。漸覺所見寬。前山橫一几。稻陂白漫漫。肥僧大腰腹。呀喘趨迎官。走疾不得語。坐定汗未乾。高人遺世事。跣趺穴蒲團。作此望塵態。豈如返巾冠。日落聞鹿鳴。感我平生歡。客遊殊未已。芳歲行當闌。

慈雲院東閣小憩

橫閣院東偏。翛然拂榻眠。香濃煙穗直。茶嫩乳花圓。巖倚團團柱。筒分細細泉。憑誰爲題版。榜作小壺天。遊靈鷲寺堂中僧闕然。獨作禮開山。定心尊者尊。唐人有問法者。輒點胸示之時。號點點和尚。半世吳松理釣絲。蜀山著腳豈前知。雲堂已散三三衆。卯塔空尋點點師。戴雪數峯臨峭絕。浮花一水舞淪漪。寺西望雪山下臨桃源。勞生未盡能重到。應掃流塵讀此詩。

桃源

木缺橋橫一徑微。斷煙殘靄晚霏霏。十年倦客明雙眼。五月遊人換夾衣。翠峽束成寒練靜。蒼崖濺落素蛟飛。爾來自笑癡頑甚。著處吟哦不記歸。

白塔院時小雨初霽

冷翠千竿玉。浮嵐萬幅屏。凭欄避微雨。挈笠遇歸僧。殘日明樓角。屯雲擁塔層。溪山屬閑客。隨意倚枯藤。

急雨

炎炎赤日當空燒。籀書圍坐如居窩。黑雲壓簷忽岩曉。急雨鼎來風駕潮。彈壓旱氣蘇枯焦。祝融退聽不敢驕。父老歌舞看稻苗。殺雞買酒更相邀。我亦巾褐涼蕭蕭。酒醒點滴聞梧蕉。珍簟不御扇能搖。安用萬



里登凌歊。

東湖新竹

插棘編籬謹護持。養成寒碧映淪漪。清風掠地秋先到。赤日行天午不知。解籜時聞聲簌簌。放梢初見葉離離。官閑我欲頻來此。枕簟仍教到處隨。

睡起試茶

笛材細織含風漪。蟬翼新裁雲碧帷。端谿硯璞斲作枕。素屏畫出月墮空江時。朱欄碧甃玉色井。自候銀餅試蒙頂。門前剝啄不嫌渠。但恨此味無人領。

五月五日蜀州放解榜第一人楊鑑具慶下孤生愴然有感

甲午五月之庚寅。淵魚躍起三江津。震雷霹靂雨夜達。晨我知決定非凡鱗。人生富貴不逮親。萬鍾五鼎空酸辛。少年得祿羞常珍。調節滋味躬饗薪。徹食奉盥授輓巾。此樂豈復論賤貧。嗟我不孝負鬼神。俯仰二紀悲如新。仕宦空飽息與嬾。左右供養無復辰。子行射策對楓宸。綵衣楚楚暎華紳。沂江亟歸娛老人。切勿著意長安春。

病酒新愈獨臥蘋風閣戲書

用酒驅愁如伐國。敵雖摧破吾亦病。狂呼起舞先自困。閉戶垂帷真廟勝。今朝屏事臥湖邊。不但心空兼耳靜。自燒沉水淪紫筍。聊遣森嚴配堅正。紫筍蒙頂之上者。其味尤重。追思昨日乃可笑。倚醉題詩恣豪橫。逝從屈子學獨醒。免使曹公怪中聖。

神君歌謁英顯廟作

泰山可爲礪東海可揚塵。惟有壯士志。死生要一伸。我夢神君自天下。威儀奕奕難具陳。飛龍駕車不用馬。訶前殿後皆鬼神。奇形詭狀密如魚鱗。鱗鱗鬩鬩爭扶車輪。黑轟白旄其來無垠。黃霧紫氛合散輪囷。考錄魍魎號呼吟。呷約束蛟螭。天矯服馴。後車百兩載美人。巾禱鮮麗工笑顰。金尊翠杓溢芳醇。琵琶箜篌飾怪珍。世間局促常悲辛。神君歡樂千萬春。嗚呼生不封侯死廟食。丈夫豈得抱志長默默。

讀胡基仲舊詩有感

少日飛騰翰墨場。暮年相見尙昂藏。沈沙舟畔千帆過。剪翮籠邊百鳥翔。訪古每思春竝轡。說詩仍記夜連牀。匆匆去日多於髮。不獨悲君亦自傷。

夏日湖上

烏帽筠枝散客愁。不妨胥史雜沙鷗。迎風枕簟平欺暑。近水簾櫳探借秋。茶竈遠從林下見。釣筒常向月中收。江湖四十餘年夢。豈信人間有蜀州。

對酒歎

鏡雖明不能使醜者妍。酒雖美不能使悲者樂。男子之生。桑弧蓬矢射四方。古人所懷何磊落。我欲北臨黃河觀禹功。犬羊腥羶塵漠漠。又欲南適蒼梧弔虞舜。九疑難尋眇聯絡。惟有一片心可受。生死託千金。輕擲重意氣。百舍孤征赴然諾。或攜短劍隱紅塵。亦入名山燒大藥。兒女何足顧。歲月不貸人。黑貂十年弊。白髮一朝新。半酣耿耿不自得。清嘯長歌裂金石。曲終四座慘悲風。人人掩淚無人色。

病後暑雨書懷

髮毛蕭颯疾初平。雲物輪囷氣未清。水漲小亭無路到。雨多幽草上牆生。窗昏頓減讎書課。屋老時聞墮瓦聲。止酒亡聊還自笑。少年豪飲似長鯨。

雨聲

暑氣滿天地。薄暮加煩促。清風吹急雨。集我北窗竹。竹聲蕭蕭固自奇。況得雨聲相發揮。令人忽憶雲門寺。半夜長松墮雪時。

同何元立賞荷花追懷鏡湖舊遊

少狂欺酒氣吐虹。一笑未了千觴空。涼堂下簾人似玉。月色冷冷透湘竹。三更畫船穿藕花。花爲四壁船爲家。不須更踏花底藕。但嗅花香已無酒。花深不見畫船行。天風空吹白紵聲。雙槳歸來弄湖水。往往湖邊人已起。卽今憔悴不堪論。賴有何郎共此尊。紅綠疎疎君勿歎。漢嘉去歲無荷看。

小樓

吾州近在西山麓。雪山萬仞臨冰谷。小樓森森閱三伏。清簾疎簾對碁局。肌膚淒凜起芒粟。肝肺嶮巖疊瓊玉。香泉向夕初罷浴。桐竹生風吹細縠。九衢憧憧車擊轂。黃塵赤日汗可掬。還家欲休客陸續。借與此詩令一讀。

怡齋

東湖仲夏草樹荒。屋古無人亭午涼。萱房微呀不見日。筍籜自解時吹香。野藤蟠屈入窗罅。溼菌扶疎生

屋梁跨溝數椽最幽翳。漲水及檻雨敗牆。靜涵青蘋舞藻荇。閑立白鷺浮鴛鴦。芙蓉雖瘦亦瀾漫。照眼翠蓋遮紅粧。水紋珍簾欲卷卻。團團素扇嬾復將。天風忽送塔鈴語。喚覺清夢遊瀟湘。

龍湫歌

環湫巨木老不花。齋淪千尺龍所家。爪痕入木欲數寸。觀者心掉不敢譁。去年大旱綿千里。禾不立苗麥垂死。林神社鬼無奈何。老龍欠伸徐一起。隆隆之雷浩浩風。倒卷江水傾虛空。鱗間出火作飛電。金蛇夜掣層雲中。明朝父老來賽雨。大巫吹簫小巫舞。祠門人散月娟娟。龍歸抱珠湫底眠。

月夕

我昔隱天台。夜半遊句曲。弄月過垂虹。萬頃一片玉。煙艇起菱唱。水風吹釣絲。更欲小徙倚。恐失初平期。今年遊青城。三十六峯巒。白雲反在下。使我毛骨寒。天如玻璃鍾。倒覆溼銀海。素壁行其間。草木盡光彩。姮娥顧我笑。手撫玉兔兒。莫怪世人生白髮。秋風桂老欲無枝。

蒸暑思梁州述懷

宣和之末予始生。遭亂不及遊司并。從軍梁州亦少慰。土脉深厚泉流清。季秋巔谷浩積雪。二月草木初抽萌。夏中高涼最可喜。不省舉手驅蟲蠹。藏冰一出賣滿市。玉璞堆積寒崢嶸。柳陰夜臥千駟馬。沙上露宿連營兵。胡笳吹墮漾水月。烽燧傳到山南城。最思出甲成秦隴。戈戟徹夜相摩聲。兩年劍南走塵土。肺熱煩促無時平。荒池昏夜蛙閣閣。食案白日蠅營營。何時王師自天下。雷雨瀕洞收櫟槍。老生衰病畏暑溼。思卜鄠杜開柴荆。

湖上晚歸

地僻多幽事。官閑慰古心。晚花藏密葉。新筍補疎林。碩果畦丁獻。芳醪稚子斟。碧雲遮日盡。歸路更蕭森。

秋聲

人言悲秋難爲情。我喜枕上聞秋聲。快鷹下韝爪皆健。壯士撫劍精神生。我亦奮迅起衰病。唾手便有擒胡興。弦開雁落詩亦成。筆力未饒弓力勁。五原草枯芻菹空。青海蕭蕭風卷蓬。草罷捷書重上馬。卻從鸞駕下遼東。

觀小孤山圖

江平風不生。鏡面渺千里。軻峨萬斛舟。遠望一點耳。大孤江中央。四面峭插水。小孤特奇麗。丹翠凌雲起。重樓邃殿神之家。帳中美人粲如花。遊人徒倚欄干處。俊鶻橫江東北去。

飲酒

陸生學道欠力量。胸次未能和盎盎。百年自笑足悲歡。萬事聊須付酣暢。有時堆阜起崢嶸。大呼索酒澆使平。世間豈無道師與禪老。不如閉門參麴生。朋舊年來散如水。惟有鐙杓同生死。一日不見令人愁。晝夜共處終無尤。世言有毒在麴蘖。腐腸穿腸凝血脈。人生適意卽爲之。醉死愁生君自擇。

北窗梧葉坐間落四五有感

高梧一葉脫。便覺秋不遠。晨起髮滿梳。吾衰孰云晚。古來追電足。歷塊或小蹠。金鼓噪陳間。此任豈驚蹇。女子則多怨。丈夫當自反。默觀憂患機。推見生死本。山林嫌獨往。臺省亦竟竟。會稽歸去來。臯橋住差穩。

神山歌

吾聞海中五神山。其根戴以十五鼈。一朝六鼈被釣去。岱輿員嶠沉洪濤。尙餘三山巋然在。當時不沒爭秋毫。如何蓬萊又已淺。忽見平地生藜蒿。伏羲追今幾萬歲。世事如火煎油膏。娶妻不敢待翁命。治水無暇憐兒號。避讒奔楚僅得免。歷聘返魯終不遭。老聃關尹亦又死。人實危脆無堅牢。有口惟可飲醇醪。手惟可持霜螯。勿令他人復笑汝。後有萬世來滔滔。

久雨

昏昏風雨暗東湖。恰似梅黃四月初。高樹送聲驚客枕。小池分溜入清渠。飛蛟屏迹知何在。團扇生塵已暗疎。須信西遊有奇事。今年三伏夜觀書。

古意

緦足飼飢鷹。鷹飽意未平。伏櫪豈不安。老驥終悲鳴。士生固欲達。又懼徒富貴。素願有未伸。五鼎淡無味。茅屋秋雨漏。稻陂春水深。長歌傾濁酒。舉世不知心。

自唐安之成都

出門猶苦雨。度壑喜新晴。日正車無影。風高蓋有聲。疎疎稚苗立。鬱鬱晚桑生。宿醉行猶倦。無人爲解醒。

度笮江原縣

翩翩翻翻作受風。行人疾走緣虛空。回觀目眩浪花上。小跌身裹蛟涎中。汗沾兩握色如菜。數乘此險私自怪。九折元非叱馭行。千金空犯垂堂戒。此身老大足悲傷。歲歲天涯憶故鄉。安得畫船明月夜。滿川歌

吹入盤間，盤間姑蘇二門名。

故袍

青衫猶是國工裁，破篋塵侵手自開。莫笑渾如霜葉闌，兩朝曾見聖君來。

寓寶相有作

掃地鏡面清，燒香雲氣潤。道人敬愛客，危坐目不瞬。童子髡兩髦，經禪亦精進。我來願同龕，歡喜無少吝。臨堂坐夜分，佛燈看墮燼。清晨爽如秋，攝衣相問訊。道在氛埃表，此語其殆信。永愧小阮高，超然棄鬚鬢。  
從子綽棄其婦爲僧廬山。

寓驛舍予三至成都皆館于是

閑坊古驛掩朱扉，又憇空堂綻客衣。九萬里中鯤自化，一千年外鶴仍歸。遠庭數竹饒新筍，解帶量松長舊圍。惟有壁間詩句在，暗塵殘墨兩依依。

題宇文子友所藏薛公鶴

仙人騏驥絕世稀，卵生凡禽似而非。宮保妙筆窮化機，縞衣玄裳真令威。千年華表聊一歸，回首幸脫乘軒譏。喙吞不恨菰米微，從吾曹遊安得肥。

宴西樓

西樓遺跡尙豪雄，錦繡笙簫在半空。萬里因循成久客，一年容易又秋風。燭光低映珠幃麗，酒暈徐添玉頰紅。歸路迎涼更堪愛，摩訶池上月方中。

月中歸驛舍六月十四日

歲歲常爲錦水行。驛前雙堦慣逢迎。草深閑院蟲相語。人靜空廊月自明。病起酒徒嘲小戶。才衰詩律媿長城。何時卻泛耶溪路。臥聽菱歌四面聲。

江濱池醉歸馬上作

久住西州似宿緣。笙歌叢裏著華顛。每嗟相見多生客。卻憶初來尙少年。迎馬綠楊爭拂帽。滿街丹荔不論錢。浮生何處非羈旅。休問東吳萬里船。

離成都後卻寄公壽子友德稱

蕭條常閉爵羅門。點檢朋儕幾箇存。吾道將爲天下裂。此心難與俗人言。逢時尙可還三代。掩卷何由作九原。寄語龜城舊交道。新涼殊憶共清尊。

晨至湖上

劍南無劇暑。長夏更宜人。啼鳥常終日。幽花不減春。荷香浮綠酒。藤露落烏巾。莫作天涯想。翛然夢裏身。

又

園古逢秋好。身閑與嬾宜。空堂賞疎豁。重閣望參差。竹粉有新意。松風含古姿。低回慙祿米。官事少於詩。

池上見魚躍有懷姑熟舊遊

雨過回塘漲碧漪。幽人閑照角巾欹。銀刀忽裂圓波出。宛似姑溪晚泊時。

六月二十五日曉出郊



劍南作客歲再淹。正如病翼遭糲黏。短衣射虎性所樂。不耐齷齪垂車幘。今晨偶出得一快。欣然意若脫楚鉗。曉星已疎更磊磊。殘月欲盡猶纖纖。雞鳴已與夜漏斷。鴉起似逐朝陽暹。揚鞭走馬忘老慙。自笑狂疾何由砭。

作雨不成終夜極涼時去立秋五日也

雲映星芒澹。風闌雨腳回。體輕知病去。氣爽喜秋來。疎放拋烏帽。歌呼覆綠盃。東歸定何日。灑灑欲崔嵬。

池上晚雨

烏紗白葛一枝筇。罨畫池邊遡晚風。雲葉初生高樹外。雨聲已到亂荷中。憑闌頓覺氛埃遠。回首方知暑毒空。閱世萬端惟小忍。何人更事似衰翁。

五十

五十未名老。無如衰疾何。肺肝空激烈。顏鬢已蹉跎。夜宴看長劍。秋風舞短蓑。此身如砥柱。猶足閱頽波。

記夢

夢泛扁舟禹廟前。中流拂面風冷然。樓臺縹緲知幾疊。雲物點綴多餘妍。蓮房芡實采無主。漁歌菱唱聲滿川。夢中了了知是夢。卻恐燕語來驚眠。弄橈顧謂共載客。乖離不記經幾年。卽今相逢兩幻質。轉盼變滅如飛煙。斯言未竟客大笑。人生寓世豈獨堅。元章嘉叟君所見。一別丹旌俱翩翩。君知夢覺本無異。勿爲畫翹流饑涎。我慙俛首夢亦斷。尙覺細浪鳴船舷。

凭欄

蟬嘒晚尤壯，鴉栖久未安。不成浮舴舢，故作凭欄干。露重傾荷蓋，風尖蹙芙蓉。新秋動歸思，更覺五湖寬。

聽琴

疎簾曲檻蘋風涼，細腰美人藕絲裳。綠藤水文穿矮牀，玉指纖纖彈履霜。高林鶯囀日正長，幽澗泉鳴夜未央。哀思不怨和而莊，有齊淑女禮自防。世人但惑青樓倡，琵琶箜篌雜胡羌。試聽一曲醒汝狂，文姬指法傳中郎。

秋思

烈日炎天欲不禁，喜逢秋色到園林。雲陰映日初蕭瑟，露氣侵簾已峭深。衰髮凋零隨槁葉，苦吟淒斷雜疎砧。鴈來不得中原信，撫劍何人識壯心。

醉書

似閑有俸錢，似仕無簿書。似長免事任，似屬非走趨。病能加餐飯，老與酒不疎。婆婆東湖上，幽曠足自娛。時時喚客醉，小閣臨紅蕖。釣魚斫銀絲，擘荔見玉膚。檀槽列四十，遺聲傳故都。豈惟豪兩川，自足誇東吳。但恨詩不進，榛荒失耘耰。何當掃纖黠，傑作追黃初。

樊氏莊龜泉

曳尾穹龜不負圖，一泓寒碧照庭除。醉中只合長來此，臥聽蠻童放轆轤。

書懷

楚澤巴江兩鬢殘，夕陽又是倚闌干。敢言日與長安遠，惟恨天如蜀道難。客枕五更歸夢短，新詩千首後

人看青簾白舫何時發。醉聽琵琶興已闌。唐安絃索爲兩川冠。

又

西風蕭瑟晚吹衣。又見亭臯木葉飛。已是中年頻作惡。更堪秋日送將歸。時何守還青城。黃塵顏鬢無人識。青史功名與願違。彊把一盃還徑醉。羈懷何必不依依。

秋思

大面山前秋笛清。細腰宮畔暮灘平。吳橋楚棹動歸思。隴月巴雲空復情。萬里風塵舊朝士。百年鉛槧老書生。水村漁市從今始。安用區區海內名。

又

巢燕成歸秋景奇。頗容老子醉哦詩。山晴更覺雲含態。風定閑看水弄姿。痛飲何由從次道。竝遊空復憶安期。天涯又作經年客。莫對青銅恨鬢絲。

又

西風吹葉滿湖邊。初換秋衣獨慨然。白首有詩悲蜀道。清宵無夢到鈞天。迂疎早不營三窟。流落今寧直一錢。把酒未妨餘興在。試憑絲管饒流年。

東園晚步

久客天涯憶故園。強名官寺只衡門。秋桐蠹遍無全葉。古柳吹斜出半根。痛飲每思尊酒窄。微官空羨布衣尊。何時定下三巴去。思臥孤舟聽斷猿。

秋夜讀書戲作

別駕生涯似蠹魚，簡編垂老未相疎。也知賦得寒儒分，五十燈前見細書。

太平花花出劍南，似桃四出千百包。駢萃成朵，天聖中獻至京師，仁宗賜名太平花。

扶牀踉蹌出京華，頭白車書未一家。宵旰至今勞聖主，淚痕空對太平花。

日暮至湖上

籃輿晚繞湖，樂此新秋涼。粉落竹方老，紅凋荷更香。天宇無纖雲，仰視鴻鵠翔。小樓久不登，撫檻悲慨慷。浮生寄一夢，共盡無彭殤。況我數月客，轉眼促去裝。顧作兒女態，裴徊惜流光。簷角迎夜月，林間送斜陽。四年已五遷，終歲常遑遑。安得一茆屋，歸老樵風旁。會稽山南有溪名樵風，其上卽若耶。

秋興

無處逢秋不黯然，驛前斜日渡頭煙。吟肩雅與寒驢稱，歸夢頻爭社燕先。百歲猶穿幾兩屐，千詩不及一囊錢。故應身世如團扇，已向人間耐棄捐。

秋色

一段淒涼傍酒盃，中年剩作楚囚哀。迢迢似伴明河出，慘慘如隨落照來。客路半生常淚眼，鄉關萬里更危臺。蓼汀荻浦江南岸，自入秋來夢幾回。

秋聲

蕭騷拂樹過中庭，何處人間有此聲。漲水雨餘晨放閘，騎兵戰罷夜還營。閑憑曲几聽雖久，彊撫哀絃寫

不成。若退涼生君勿喜。一年光景又崢嶸。

觀長安城圖

許國雖堅鬢已斑。山南經歲望南山。橫戈上馬嗟心在。穿壑環城笑虜孱。孱者言虜穿壑三重環長安城。日暮風煙傳隴上。秋高刁斗落雲間。三秦父老應惆悵。不見王師出散關。

雨中作

方驚歲更端。不覺秋已孟。雖云暑毒埃。無奈風雨橫。荷空湖面闊。葉脫樹枝勁。百卉亦已衰。非復昔華盛。遊子老忘歸。一榻臥衰病。欲談無客來。向壁弄塵柄。

夜讀了翁遺文有感

秋雨蕭蕭夜不眠。挑燈開卷意凄然。吾曹自欲期千載。世論何曾待百年。當日公卿笑迂闊。卽今河洛汚腥羶。陰陽消長從來事。玩易深知屢絕編。公有易傳。

雷

君不見冬月雷。深藏九地底。寂默如寒灰。紛紛槁葉木。盡脫蠢蠢蟄。戶蟲爭坯。堅冰積雪一朝盡。風搖天邊斗柄回。雷聲卻擘九地出。殷殷似挾春俱來。魚龍振鱗熟睡醒。桃李一笑韶顏開。候耕老農喜欲舞。掀泥百草知誰催。惟嗟婦女不解事。深屋揜耳藏嬰孩。吾聞陰陽有常數。非時動靜皆爲菑。無人爲報阿香道。時來何至勞卿推。

龍眠畫馬

陸放翁集 劍南詩稿 卷五

國家一從失西陲。年年買馬西南夷。瘴鄉所產非權奇。邊頭歲入幾番一作數皮。崔嵬瘦骨帶火印。離立欲不禁風吹。圉人太僕空列位。龍媒汗血來何時。李公太平官京師。立仗慣見渥洼姿。斷縑歲久墨色暗。逸氣尙若不可羈。賞奇好古自一癖。感事憂國空餘悲。嗚呼安得毛骨若此三千疋。銜枚夜度桑乾磧。

秋夜池上作

短髮飈飈病骨輕。臨池閑看露荷傾。月明何與浮雲事。正向圓時故故生。

秋雨

西山雲千重。東園泥一尺。可憐牆下路。十日無履迹。空庭桐葉盡。古甃土花碧。坐懷江湖間。病鴈溼羽翮。寒窗向人青。衰髮垂頰白。孤吟更不寐。聊伴候蟲噴。

臥病

人生寓一氣。血脉日夜流。秋毫或壅隔。百體若相仇。嗟子少多艱。衣食拙自謀。方寸叢百慮。如箭集射侯。奔走連數歲。呻吟劇茲秋。生死亦何有。成壞同一漚。胡爲不自愛。森然起戈矛。一笑衆妄滅。霜天鷹睨鞫。呼兒屏藥囊。吾疾今其瘳。

夢入禪林有老宿方陞座或云通悟禪師也

塵埃車馬何憧憧。驪頭鼠目厭安庸。樂哉夢見德人容。巍巍堂堂人中龍。舉頭仰望太華峯。攝衣欲往路無從。忽然夢斷難再逢。空記說法聲如鐘。

蜀州大閱八月二十七日

曉東戎衣一悵然。五年奔走遍窮邊。平生亭障休兵日。慘澹風雲閱武天。戍隴舊遊真一夢。渡遼奇事付他年。劉琨晚抱聞雞恨。安得英雄共著鞭。

放懷亭獨立有感

葦叢枯倒蓼花紅。小立東湖更向東。委肉本知居几上。翦翎何恨著籠中。一笻信脚乾坤迤。百榼澆愁寵辱空。誰道窮途知舊少。此心念念與天通。

九月三日同呂周輔教授遊大邑諸山

大邑知名杜叟詩。山中仍值菊花時。節旄落盡羈臣老。髀肉生來壯士悲。豪舉每嫌盃綠淺。癡頑頗怪鬢絲遲。廣文別乘官俱冷。相伴寬爲五日期。

次韻周輔道中

山靈喜我馬蹄聲。正用此時秋雨晴。日淺風斜江上路。蘆花也似柳花輕。

又

從來重九如寒食。天氣微陰正自佳。莫問茱萸賜朝士。一尊隨處有黃花。

憩黃秀才書堂

吾生如虛舟。萬里常泛泛。終年厭作客。著處思繫纜。道邊何人居。花竹頗閑淡。門庭淨如拭。窗几光可鑑。堂上滿架書。朱黃方點勘。把茅容卜鄰。老死更誰憾。

夜宿鵲鳴山 山蓋張天師學道之地。事與史合。

西遊萬里已關天。采藥名山亦宿緣。老柏干霄如許壽。幽花泣露爲誰妍。苔黏石磴捫蘿上。燈耿雲房掃榻眠。安得仙翁索米術。一生留此弄寒泉。索米謂五斗米法。

次韻周輔霧中作

一日籃輿十過溪。丹萸黃菊及佳時。端居恐作他年恨。聯轡聊成此段奇。側磴下臨重澗黑。亂雲高出—峯危。何時關輔胡塵靜。大華山頭更下期。

山中得長句戲呈周輔并簡朱縣丞

鶴鳴山空無鶴來。青霞嶂深天壁開。千巖角逐互吞吐。一峯拔起矜崔嵬。日光微漏潭見底。青霞嶂碧玉潭。皆霧中佳處。水氣上薄雲成堆。幽禽飛鳴報客至。奇樹璀璨知誰栽。花藤怪蔓白晝暗。奔猿落狖無時哀。路窮尙躡一千級。忽見密竹藏樓臺。共言神僧昔住此。至今光景如天台。檜筇負笠出復沒。喜動婦人驚提孩。高人何至作狡獪。無乃翫世聊相談。不然學道窮實際。詎捨正大崇奇環。儒林丈人學擅世。餘事尙壓蔡與崔。名山未死可再到。此士一失難重陪。贊府摘山事如織。擺撥領客何奇哉。境幽神愴不可住。歸倩玉手傳金盃。朱君有侍兒。許爲客出。

擣藥鳥霧中有此鳥鳴聲清絕。正如杵藥。

白髮無情日日生。散愁聊復作山行。幽禽似欲朝衰病。故學禪房杵藥聲。

出山

出山似與高人別。回首時時一悵然。它日再來緣要熟。遍題名性綠巖邊。



平雲亭大邑

滿榼芳醪何處傾。金龜背上得同行。天垂綠野三邊盡。雲與朱闌一樣平。煙樹微茫疑誤墨。風松蕭瑟有新聲。黃花未吐無多恨。也勝湘纍拾落英。

高秋亭大邑

三日山中醉復醒。徑歸回首愧山靈。從今惜取觀書眼。長看天西萬疊青。

九日小疾不出

病厭追遊嬾舉觴。今年閉戶作重陽。香煙裊裊閑縈几。書卷紛紛靜滿牀。斜日更增秋慘淡。黃花應怪客淒涼。長安光景還如昨。誰醉城南杜曲旁。昔官都下每以九日遊西湖諸寺。

九日試霧中僧所贈茶

少逢重九事豪華。南陌雕鞍擁鈿車。今日蜀州生白髮。瓦爐獨試霧中茶。

我有美酒歌

我有美酒起自斟。勸君一卮爲君吟。素衣未遂京塵化。綠鬢已受吳霜侵。三巴塗路何嶽崕。五溪霧潦多毒淫。虎豹夜嘯裂崖谷。魑魅晝出矜山林。身如槁葉墮幽穿。窅窅何啼千尺深。無因剖胸出此心。一寸孤忠天實臨。

次韻師伯渾見寄

窮鄉久客易消魂。短髮秋來白幾分。夢泛扁舟鏡湖月。身騎瘦馬劍關雲。萬釘寶帶知何用。九轉金丹幸

有聞欲與先生同此計。會營茅舍近江濱。伯渾隱龍山。僕亦有結茅蓁津之意。

自江源過雙流不宿徑行之成都

斷筇飄飄挂渡頭。臨江立馬喚漁舟。少城已破繁華夢。老境聊尋汗漫遊。斜日驛門雙堠立。早霜風葉一林秋。詩材滿路無人取。準擬歸驂到處留。

過綠楊橋

過縣東馳十里遙。行吟不覺度谿橋。磴輪激水無時息。酒旆迎風盡日搖。半掩店門燈煜煜。橫穿村市馬蕭蕭。秦吳萬里行幾遍。莫恨尊前綠鬢凋。

五鼓自簇橋入府

曉月有餘光。秋樹無濃影。野煙浩無際。陂路行愈永。堰聲何澎湃。露氣正淒冷。忽然客愁破。更覺詩律整。昔人千載意。忙裏一笑領。山林豈難歸。吾計自不猛。

客多福院晨起

萬鯨傳響徹修廊。喚起衰翁曉夢長。萬事可憐隨日出。一生常是伴人忙。馳驅深厭交飛蓋。息偃何時靜炷香。四到錦城身愈老。更堪重入少年場。

雨中出謁歸晝臥

宿雨盈車轍。秋風漲帽幫。愛閑惟兀兀。應俗苦紛紛。病眼添花暈。醜顏散纈紋。歸來炷香臥。窗底看微雲。

長歌行

人生不作安期生。醉入東海騎長鯨。猶當出作李西平。手梟逆賊清舊京。金印煌煌未入手。白髮種種來無情。成都古寺臥秋晚。落日偏傍僧窗明。豈其馬上破賊手。哦詩長作寒螿鳴。興來買盡市橋酒。大車磊落堆長餅。哀絲豪竹助劇飲。如鉅野受黃河傾。平時一滴不入口。意氣頓使千人驚。國讎未報壯士老。匣中寶劍夜有聲。何當凱還宴將士。三更雪壓飛狐城。

夜食炒栗有感。漏舍待朝。朝士往往食此。

齒根浮動歎吾衰。山栗炮燂療夜飢。喚起少年京輦夢。和寧門外早朝來。

秋夜懷吳中

秋夜挑燈讀楚辭。昔人句句不吾欺。更堪臨水登山處。正是浮家泛宅時。巴酒不能消客恨。蜀巫空解報歸期。灞橋煙柳知何限。誰念行人寄一枝。

遊三井觀

三井久知名。暇日偶一訪。棟宇壞欲盡。基址尙閎壯。畫牆皆國工。煙雲儼天仗。旌旄亞戈戟。佩玉雜弓鞬。太古實傑作。筆落九天上。吳生名擅世。睥睨未肯讓。規模遠有考。意象豪不放。最奇老癯仙。骨立神愈王。石恪雖少怪。用筆亦跌宕。兩姝淡蛾眉。非復火食狀。塵埃久侵蝕。風雨無蓋障。好事未易逢。寧能久亡恙。雍洛劫火餘。妙迹盡凋喪。斯遊恐難繼。佇立增悄愴。

仙遊閣

張公一去二百載。傑閣依然橫靄中。徒倚看碑仍看畫。時聞柏子落秋風。

寓居小菴纒表丈戲作

早衰甚畏寒。颼颼厭空館。登閣望東菴。亭亭長一繖。欣然願暫寓。竹底門可款。外看磔蝟毛。仰視覆鵝卵。席纒置錐地。牖若窺天管。瓦爐香不去。菅寢衾易暖。頗疑漁菴結。又類土室竅。家具止囊衣。弛擔著亦滿。客來勿嗤陋。老我善用短。猶能設胡牀。相喚共茗椀。

送華師從劍州張祕書之招

三年相伴錦江頭。一日翩然不可留。官冷蓬門無客戀。時清劍閣有僧遊。關山默數來時路。風月懸知別後愁。禪版經龕有餘暇。頻登高處望西州。

# 陸放翁集

劍南詩稿

卷第六

江上對酒作

把酒不能飲。苦淚滴酒觴。醉酒蜀江中。和淚下荆楊。樓櫓壓溢口。山川蟠武昌。石頭與鍾阜。南望鬱蒼蒼。戈船破浪飛。鐵騎射日光。胡來卽送死。詎能犯金湯。汴洛我舊都。燕趙我舊疆。請書一尺檄。爲國平胡羌。

自嘲

華子中年百事忘。嵇生仍坐嬾爲妨。病於榮宦冥心久。老向端閑得味長。對客欲談還憤憤。讀書纔過已茫茫。青纈帳暖黃紬穩。聊借東菴作睡鄉。

暮歸馬上作

石筍街頭日落時。銅壺閣上角聲悲。不辭與世終難合。惟恨無人麤見知。寶馬俊遊春浩蕩。江樓豪飲夜淋漓。醉來剩欲吟梁父。千古隆中可與期。

臨別成都帳飲萬里橋贈譚德稱

成都城南萬里橋。蘆根蘋末風蕭蕭。暎花碾草鈿車小。駐坡驀潤青驄驕。入門翠徑絕窈窕。臨水飛觀何崑嶠。判無功名著不朽。惟仗詩酒寬亡聊。迎霜早已足雉兔。微冷使欲思狐貂。喜看縷脰暎盤箸。恨欠斫

蟹加橙椒。坐中譚侯天下士。龍馬毛骨矜超遙。烏犀白紵謫仙樣。但可邂逅不可招。今年一戰馘餘子。風送六翮凌青霄。美人再拜乞利市。醉墨飛落生蛟縮。我衰於世百無用。十年不趁含元朝。華纓肯傍蕭颯鬢。寶帶那束龍鍾腰。祝君好去事明主。日望分喜來漁樵。遊談引類亦細事。寄酒且解相如消。

夜宿二江驛

雞鳴原前風折樹。夜到雙流雨如注。樺皮溼透點不明。旋設篝爐燎衣袴。重城回首一夢散。錦障氈車渺無處。新聲猶傍耳邊來。殘酒半隨風力去。飛觴縱飲亦何樂。憤憤不堪長閉戶。丈夫要爲國平胡。俗子豈識吾所寓。

涉白馬渡慨然有懷

我馬顧影嘶。忽涉白馬津。雖非黃河上。撫事猶悲辛。太行之下吹虜塵。燕南趙北空無人。袁曹白戰相持處。犬羊堂堂自來去。

瑞草橋

柘葉颺颺雪意驕。檐頭雙兔遇歸樵。宿醒未解題詩嬾。虛過風流瑞草橋。

將之榮州取道青城

倚天山作海濤傾。看遍人間兩赤城。青城山一名赤城。而天台之赤城乃予舊遊。自笑年年隨宦牒。不如處處說閑行。草痕沙際猶餘綠。楓葉霜餘已帶頽。歸去還堪咤兒輩。錦囊三十六崢嶸。

丈人觀

黃金篆書扁朱門。夾道巨竹屯蒼雲。崖嶺劃若天地分。千柱耽耽壓其垠。纓冠肅謁丈人君。廣殿空庭吹寶熏。摩挲畫橋手爲戰。異哉山苑與土殖。物怪鑿鑿冠丘墳。仙人佩玉雜輓盼。手整貂冠最不羣。欲去不忍恨日曛。道翁采藥晝夜勤。松根茯苓獲兼斤。人之植立彊骨筋。狗杞羣吹聲狺狺。山爐小飢吹幽芬。朱顏不飲常自醺。我亦宿誦五千文。一念之差隨世紛。逝將從翁走如麋。隱書祕訣何由聞。

題丈人觀道院壁

斷香浮月磬聲殘。木影如龍布石壇。偶駕青鸞塵世窄。閑吹玉笛洞天寒。奇香滿院晨炊藥。異氣穿巖夜浴丹。却笑飛仙未忘俗。金貂猶著侍中冠。孫太古畫范長生作舉手整貂蟬像。神氣尤奇逸。

宿上清宮

九萬天衢浩浩風。此身真是一枯蓬。盤蔬采掇多靈藥。閣道攀陲出半空。累盡神仙端可致。心虛造化欲無功。金丹定解幽人意。散作山椒百炬紅。夜中山谷火煜然。俗謂聖燈。意古藏丹所化也。

自上清延慶歸過丈人觀少留

再到蓬萊路欲平。却吹長笛過青城。空山霜葉無行迹。半嶺天風有嘯聲。細棧跨雲縈峭絕。危橋飛柱插澄清。玉華更控青鸞住。要倚欄干待月明。玉華樓名。

長生觀觀月

碧天萬里月正中。清夜弭節長生宮。廣寒忽墮人間世。但怪步虛聲散瑤臺空。四山沉沉萬籟寂。天矯髯龍舞娛客。弭貂老仙期不來。獨倚欄干吹玉笛。道人不怕九霄寒。銀闕冰壺處處看。天台四萬八千丈。明

年照我扶藜杖。

儲福觀店玉真公主修真之地。

路轉屏風疊。雲藏帝子家。窮幽行碎确。息倦倚槎牙。綠蘚封茶樹。清霜折藥花。世無勾漏令。誰此養丹砂。

龍門洞

我來香積寺。清晨歷龍門。孤峯撐蒼昊。大壑裂厚坤。古穴吹腥風。峭壁挂爪痕。水浮石楠花。崖絡菖蒲根。橫策意未厭。褰裳探其源。絕境豈可名。恨我詩語煩。須臾蒼雲合。使恐白雨飜。東走得平野。萬里扶桑暾。

布金院

萬里西來了宿緣。憑鞭欹帽過年年。山寒院落開爐月。霜重郊原斲芋天。淺碧鱗鱗人度徇。長空杳杳鳥衝煙。夜投蕭寺清無寐。樓角三更月滿川。

離堆伏龍祠觀孫太古畫英惠王像

岷山導江書禹貢。江流蹴山山爲動。嗚乎秦守信豪傑。千年遺迹人猶誦。決江一支漑數州。至今禾黍連雲種。孫翁下筆開生面。爰肇高冠摩屋棟。徒木遺風雖峭刻。取材尙足當世用。寥寥後世豈乏人。尺寸未施讒已衆。要官無責空賦祿。軒蓋傳呼真一閔。奇勳偉績曠世無。仁人志士臨風慟。我遊故祠九頓首。夜遇神君了非夢。披雲激電從天來。赤手騎鯨不施鞚。

登灌口廟東大樓觀岷江雪山

我生不識柏梁建章之宮殿。安得鞬冠侍遊宴。又不及身在滎陽京索間。撰甲橫戈夜酣戰。胸中迫隘思



遠遊。沂江來倚岷山樓。千年雪嶺闌邊出。萬里雲濤坐上浮。禹迹茫茫始江漢。疏鑿功常九州半。丈夫生世要如此。齋志空死能無歎。白髮蕭條吹北風。手持卮酒酌江中。姓名未死終磊磊。要與此江東注海。

郫縣道中思故里

衰髮不勝簪。馳驅豈復堪。客魂迷劍外。歸思滿天南。江路灘聲壯。雲停雪意酣。空懷小叢碧。細酌破吳柑。

宿江原縣東十里張氏亭子未明而起

寸廩驅人卒歲勞。一官坐失布衣高。劍南十月霜猶薄。江上五更雞亂號。孤枕擁衾尋短夢。青燈照影著征袍。客愁相續無時斷。那得并州快剪刀。

戲詠西州風土

衍沃綿千里。融和被四時。蠶叢角歌吹。石室盛書詩。綠樹藏漁市。清江遶佛祠。吾行更堪樂。載酒上驀頭。

宿彭山縣通津驛大風鄰園多喬木終夜有聲

木欲靜。風不止。子欲養。親不留。夜誦此語涕莫收。吾親之沒今幾秋。尙疑捨我而遠遊。心冀乘雲反故丘。再拜奉觴陳膳羞。陶盎治米聲叟叟。木飢炊麩香浮浮。茅蓋屑桂調甘柔。稚釐煮臠長魚臠。夜敷枕席視衾綯。晨起熏籠進衣裘。哀樂此志終莫酬。有言不聞九泉幽。北風歲晚號松楸。哀哉萬里爲食謀。

眉州郡燕大醉中間道馳出城宿石佛院

玻璃春作江水清。紫玉簫如雛鳳鳴。漏聲不聞看燧燭。俠氣未減欺飛觥。單車萬里信有數。二年三過寧忘情。釵頭玉茗妙天下。坐上見白山茶格韻高絕。瓊花一樹真虛名。酒酣忽作檀公策。問道絕出東關城。

清歌未斷去已遠。回首樓堞空崢嶸。貂裘狐帽醉走馬。陌上應有行人驚。徑投野寺睡正美。魚鼓忽報江天明。

雙柏

雙柏屹相向。剛嚴如巨人。龍吟風雨夕。山立雪霜晨。閱世易成古。剝心不復春。扶顛要力量。歲晚莫全身。

戊卒說沉黎事有感

亭障曾無閱歲寧。頻聞夷落犯王靈。孤城月落冤魂哭。百里風吹戰血腥。瘴重厭看茅葉赤。春殘不放柳條青。焦頭爛額知何補。弭患從來貴未形。

平羌道中望峩眉山慨然有作

白雲如玉城。翠嶺出其上。異境忽墮前。心目久蕩漾。別來二百日。突兀善亡恙。飛仙遙舉手。喚我一稅鞅。此行豈或使。屏迹事幽曠。何必故山歸。更破萬里浪。

次韻何元立都曹贈行元立用陳後山送蘇公詩韻

嘉榮東西川。此別不爲遠。徘徊凌雲寺。決去未遽忍。登高望故人。煙樹參差見。懸知今日夢。不隔重城鍵。平生相從意。百年有未滿。結巢青城雲。期子在歲晚。

次韻楊嘉父先輩贈行

貞元舊朝士。太學老諸生。半世不偶諧。殘年正飄零。危坐但愁悲。一笑黃河清。佳客如晨星。俗子如春萍。奇哉今日事。諸賢送東征。吸酒盃當空。絕詩筆勿停。明發復白髮。君聽馬蹄聲。

入榮州境

一起一伏黃茅岡。崔嵬破丘狐兔藏。炯炯寒日清無光。單單終日行羊腸。村落聚看如驚塵。亦有銀釵伏短牆。黃旗飄飄鼓其鏗。畫角鳴咽吹斜陽。長筒汲井熬雪霜。轆轤咿啞官道傍。渺然孤城天一方。傳者或云古夜郎。其民簡朴士甚良。千里鬱爲詩書鄉。閉閣掃地焚清香。老人處處是道場。

井研道中

窮冬景方促。下嶺路微平。地瘦竹無葉。風乾茅有聲。客遊空自入。歸計與誰評。尙喜長亭下。雲穿夕照明。

賴牟鎮早行

孤燈照影聽初雞。攪轡情懷倍慘悽。雪作未成雲意鬧。茅荒無際客魂迷。觸寒手指藏猶裂。畏嶮圖書棄不攜。老去有文無賣處。等閑題遍蜀東西。

初到榮州

亂山缺處城樓呀。雙旗蕭蕭晚吹笳。煙深綠桂臨絕壑。霜落殘瀨鳴寒沙。廢臺已無隱士嘯。遺宅上有高人家。鈴齋下榻約僧話。松陰枕石放吏衙。盃羹最珍慈竹筍。餅水自養山薑花。地爐堆獸熾石炭。瓦鼎號蜩秋煎茶。少年遠遊無百里。一飢能使行天涯。豈惟慣見蓬婆雪。直恐遂泛星河槎。故巢肯作兒女戀。異境會向鄉閭誇。一盃徑醉幘自墮。燈下髮影看髮髿。

城上

雙雙黃犢臥斜陽。葉葉丹楓著早霜。沙水自鳴如有恨。野花無主爲誰芳。鞞筒味醎愁濡甲。巴曲聲悲怯

斷腸。賴有生平管城子，不妨驅使答風光。

又

濯錦豪華夢不通，歸然孤疊亂山中。行歌滿道知人樂，露積連村見歲豐。萬瓦新霜掃殘瘴，一林丹葉換青楓。鵝黃名醞何由得，且醉盃中琥珀紅。榮州酒赤而勁甚，鵝黃，廣漢酒名。

西樓夕望

夜郎城裏歎途窮，賴有西樓著此翁。溪鳥孤飛寒靄外，野人參語夕陽中。蒼天可恃何曾老，白髮緣愁却未公。俗態十年看爛熟，不如留眼送歸鴻。

醉中懷眉山舊遊

勁酒少和氣，哀歌無歡情。故鄉不敢思，登高望錦城。錦城那得去，髣髴慕頤路。遙知尊前人，指我題詩處。我雖流落夜郎天，遇酒能狂似少年。想見東郊攜手日，海棠如雪柳飛綿。漢嘉術者袁牧童謂予明年春分後當還西州。

登城望西崦

登城望西崦，數家斜照中。柴荆晝亦閉，乃有太古風。慘淡起炊煙，寂歷下釣筒。土瘦麥苗短，霜重桑枝空。恐是種桃人，或有采芝翁。何當宿樓上，月明照夜春。

甲午十一月十三夜夢右臂踊出一小劍長八九寸有光既覺猶微痛也

少年學劍白猿翁，曾破浮生十歲功。玉具挂頤誰復許，蒹葭彈鋏老猶窮。牀頭忽覺蛟龍吼，天上方驚牛

斗空此夢怪奇君記取。佩刀猶得世三公。

齋中夜坐有感

荒山爲城溪作壕。風鼓巨木聲翻濤。鷓鴣乘屋彈不去。狐狸欺人怒豎毛。雨來紅鶴更可惡。爭巢一似嬰兒號。城孤屋老草木茂。正坐人少此輩豪。急呼五百具畚鍤。欲掀窟穴窮腥臊。忽然語罷却自笑。殘年何至與汝麀。浣花江色綠如黛。春波灩灩浮輕舸。行當繫纜柳陰下。仰聽鶯語傾香醪。

晚登橫溪閣

樓鼓聲中日又斜。憑高愈覺在天涯。空桑客土生秋草。野渡虛舟集晚鴉。瘴霧不開連六詔。俚歌相答帶三巴。故鄉可望應添淚。莫恨雲山萬疊遮。

又

犖确坡頭筇竹枝。西臨村路立多時。賣蔬市近還家早。煮井人忙下麥遲。榮多鹽井。秋冬收薪。茅取急。病客情懷常怯酒。山城老景盡供詩。晚來試問愁多少。只許高樓橫笛吹。

昭德堂晚步

笑喚枯筇踢夕陽。探春聊作靜中忙。高枝鵲語如相命。幽徑梅開祗自香。苔蝕斷碑驚世換。鐘來廢寺覺城荒。謫仙未必無遺恨。老欠題詩到夜郎。

龍洞在榮州東南一里許

峭崖磨天如立壁。枿根橫走松倒植。呀然一岫驚倒人。空洞坡陁三百尺。幽陰宜爲異物託。角爪痕存猶

可識。想當蟠蛰未奮時。腥風逼人雲觸石。一朝偶爲旱歲起。卷海作雨飛霹靂。向來伊呂正如此。莘渭千年有遺迹。我欲酌酒招蜿蜒。安用辛苦常行天。太平海內多豐年。歸來故祠聽管絃。

客中夜寒戲作長謔

孤翁癡鈍如寒蠅。霜夕不瞑愁嚴凝。寢衣觸體起芒粟。鼻息噓潤成冰凌。瑟瑟數嚴譙鼓。耿耿獨看幽窗燈。支牀龜老共夜永。號月雞冷同晨興。白狐紫貂了不暖。何況蜀錦共吳綾。靜思忽得安樂法。人生所欠絮與繒。十年一袷尙可過。不信請視匡山僧。

高齋小飲戲作

梅花又發鬼門關。坐覺春風萬里寬。荔子陰中時縱酒。竹枝聲裏彊追歡。丁年漢使殊方老。子夜吳歌昨夢殘。白帝夜郎俱不惡。兩公補處得憑欄。予五年間自夔客榮。

太液黃鵠歌有引

漢始元元年春二月。黃鵠下建章宮太液池中。公卿上壽。賜諸侯王列侯宗室金錢。子夜讀漢書追作歌一首。

建章宮裏春風寒。太液水生池面寬。中人馳奏黃鵠下。龍旗豹尾臨池看。芹香藻暖鵠得意。左右從官呼萬歲。須臾傳詔宴公卿。驩聲如雷動天地。時平宮省遊樂多。黃鵠刷羽涵恩波。小臣珥筆龍墀下。願繼前朝天馬歌。

自唐安徙家來和義出城迎之馬上作

身如林下僧。處處常寄包。家如梁上燕。歲歲旋作巢。豈惟人所憐。顧影每自嘲。眼看佳山水。不得結把茅。造物困豪傑。如視餓虎哮。要令出精神。感激使叫嘷。頗思投筆去。走馬盤雲旛。三更冒急雪。大戰梁楚郊。

乙未元日除夕得制司檄催赴官

五十人間老大身。更堪從此數新春。琴琴漏鼓催窗色。急急文書動驛塵。病後光陰常自惜。客中節物爲誰新。壯心只向郵亭盡。自揣頭顱莫問人。

別榮州正月十日

浮生歲歲俱如夢。一枕輕安亦可人。偶落山城無事處。暫還老子自由身。嘯臺載酒雲生屨。仙穴尋梅雨墊巾。使恐清遊從此少。錦城車馬漲紅塵。嘯臺在富義門外一里。號孫登嘯臺。雙溪王氏有石穴。黃太史勝曰地仙洞。

聞仲高從兄計

去國萬里遊。發書三日哭。久矣吾已衰。哀哉公不淑。寄書墨未乾。玉立在我目。天高鬼神惡。生世露電速。丹心抱忠貞。白首悲放逐。九關不可叫。百身何由贖。文章果何罪。一斥獨不復。上壽阿母前。悔不早碌碌。

夏日過摩訶池

烏帽翩翩白紵經。摩訶海上試閑行。淙潺野水鳴空苑。寂歷斜陽下廢城。縱轡迎涼看馬影。袖鞭尋句聽蟬聲。白頭散吏元無事。却爲興亡一愴情。

早行

禔馬踐槐影。紗籠吹蠟香。憑鞭尋斷夢。側帽受微涼。病骨更疎放。衰懷罷激昂。道邊雙石荀。笑我伴人忙。

天申節前三日大聖慈寺華嚴閣燃燈甚盛遊人過於元夕

萬瓦如鱗百尺梯。遙看突兀與雲齊。寶籬風定燈相射。綺陌塵香馬不嘶。星隕半空天宇靜。蓮生陸地客心迷。歸途細踏槐陰月。家在花行更向西。予官居在花行距寺數里。

喜雨五月二十二日

黃塵赤日欲忘生。一夜新涼滿錦城。雨急驟增車轍水。泥深漸壯馬蹄聲。蚊蠅斂迹知無地。燈火於人頓有情。市遠雞豚不須問。小畦稀甲已堪烹。

夜聞浣花江聲甚壯

浣花之東常笮橋。奔流齧橋橋爲搖。分洪初疑兩蛟舞。觸石散作千珠跳。壯聲每挾雷雨橫。巨勢潛借鼉鼉驕。夢回聞之坐太息。鐵衣何日東征遼。銜枚度磧沙颯颯。盤礪斷隴風蕭蕭。不然投檄徑歸去。短篷臥聽錢塘潮。

暑行憩新都驛

細細黃花落古槐。江臯不雨轉輕雷。長空烏破蒼煙去。落日人從綠野來。散策意行尋水石。脫巾高臥避氛埃。羈遊未羨端居樂。看月房湖又一回。

早發新都驛

喔喔江村雞。迢迢縣門漏。河漢縱復橫。繁星明如晝。愛涼趣上馬。未曉閱兩堠。高林起宿鳥。絕澗落驚狖。



寺樓插蒼煙。沙泉瀉幽竇。我行忽萬里。坐歎關河溜。官如廣文冷。面作拾遺瘦。今年盍歸哉。勿落春雁後。  
謁諸葛丞相廟。彌牟八陳原上。

漢中四白天所命。老賊方持太阿柄。區區梁益豈足支。不忍安坐視異姓。遺民亦知王室在。閨位那干天  
統正。公雖已沒有神靈。猶假賊手誅鍾鄧。前年我過沔陽祠。再拜奠俎衰淚迸。潔齋請作送迎詩。精忠大  
義神其聽。

自漢州之金堂過沈氏竹園小憩坐間微雨

修修萬竹壓康莊。碧玉椽圍一尺彊。雪節煙梢誰暇賞。馬蹄車轍可憐忙。帽邊忽墮吹香句。肘後舊傳醫  
俗方。更覺清遊天所惜。坐來飛雨度橫塘。

自小雲頂上雲頂寺

素衣雖成緇。不爲京洛塵。躍馬上雲頂。欲呼飛仙人。飛仙不可呼。野僧意甚真。煎茶清樹下。童子拾墮薪。  
我少本疎放。一出但坐貧。縛袴屬素韉。哀哉水雲身。此地雖暫寓。失喜忘吟呻。故溪歸去來。歲晚思鱸蓴。  
馬上微雨

三日觸毒暑。衣垢背汗浹。今日殊蕭然。涼雨吹醉頰。瘦松無橫枝。蠹竹少全葉。渚蓮乃可念。泫泣如放妾。  
豈惟人意適。我馬亦振鬣。遠村有歸人。清溪爭晚涉。

彌牟鎮驛舍小酌

郵亭草草置盤盂。買果煎蔬便有餘。自許白雲終醉死。不論黃紙有除書。角巾雨墊蟬聲外。細葛含風日

落初行遍天涯身尚健。却嫌陶令愛吾廬。

遊彌牟菩提院庭下有凌霄藤附古楠其高數丈花已零落滿地

絳英翠蔓亦佳哉。零亂空庭瑪瑙盃。遍雨新花天有意。定知閑客欲閑來。佛經云。天風吹萎花。更雨新好者。

樓上醉歌

我遊四方不得意。陽狂施藥成都市。大瓢滿貯隨所求。聊爲疲民起憔悴。瓢空夜靜上高樓。買酒捲簾邀月醉。醉中拂劍光射月。往往悲歌獨流涕。剗却君山湘水平。斫却桂樹月更明。太白詩。剗却君山好。平鋪湘水流。老杜詩。斫却月中桂。清光應更多。丈夫有志苦難成。修名未立華髮生。

伏日獨遊城西

幕府重來老令威。山川良是昔人非。癡兒已遣了官事。伏日元知當早歸。避熱幽花房自斂。迎秋高樹葉先飛。論詩敢補先師處。僭拂江頭舊釣磯。

五鼓送客出城馬上作

夜漏餘十刻。涼颼如九秋。灘聲聒酒醒。月色照人愁。落魄悲孤宦。龍鍾怯遠遊。此生那可料。六歲劍南州。

寓舍書懷

借得茅齋近竹橋。羈懷病思兩無聊。春從豆蔻梢頭老。日向檇菴窗上消。叢竹曉兼風力橫。高梧夜挾雨聲驕。書生莫倚身常健。未盡凌煙鬢已凋。

夜登城樓

天上何蒼蒼。四序浩旋斡。異哉今年熱。炊爨不可活。夜分睡復起。搖箠腕欲脫。彊登城西樓。月露渺空闊。憑欄弄清影。涼颼入蕉葛。溼螢沾草根。驚鷓起木末。亦知難久留。襟袍資一豁。人事迭廢興。天理交予奪。羲和不停馭。去若弦上筈。此熱會常衰。歲晚備裘褐。

試茶

蒼爪初驚鷹脫鞵。得湯已見玉花浮。睡魔何止避三舍。歡伯直知輸一籌。日鑄焙香懷舊隱。谷籬試水憶西遊。銀餅銅碾俱官樣。恨欠纖纖爲捧甌。

成都大閱

千步毬場爽氣新。西山遙見碧嶙峋。令傳雪嶺蓬婆外。聲震秦川渭水濱。旗脚倚風時弄影。馬蹄經雨不霑塵。屬橐縛袴毋多恨。久矣儒冠誤此身。

書懷

萬里馳驅坐一飢。自憐無計脫塵鞵。身留幕府還家少。眼亂文書把酒稀。客路更逢秋色晚。故山空有夢魂歸。芋羹豆飯元堪飽。錯用人言恨子威。

遊大智寺

脫髮紛滿梳。衰顏不堪照。百年忽已半。去日如過燒。平生功名心。上馬無燕趙。爾來閱世故。萬事驚錯料。豈無舊朋儔。聯翩半廊廟。誰能伴此老。泝峽聽猿叫。錦城得數公。意氣如再少。偷閑訪野寺。繫馬追一笑。

新糟厭玉狸。畏酒亦復醜。古股黜黠豪。壞壁冠佩肖。摩挲宋公詩。句法歎高妙。正如霓裳曲。零落得遺調。歸途繚長堤。掠面霜氣峭。佳遊不可忘。落筆君勿誚。

看月睡晚戲作

香火課夙興。風月留晚睡。直言散吏閑。亦未盡無事。舊聞雲臺翁。高枕閱塵世。至今青嶂間。鼻息亂松吹。平生寡嗜好。所願究此味。千年一欠伸。笑看巖花墜。

成都書事

劍南山水盡清暉。濯錦江邊天下稀。煙柳不遮樓角斷。風花時傍馬頭飛。茱萸筍似稽山美。斫脍魚如笠澤肥。客報城西有園賣。老夫白首欲忘歸。

又

大城少城柳已青。東臺西臺雪正晴。鶯花又作新年夢。絲竹常聞靜夜聲。廢苑煙蕪迎馬動。清江春漲拍堤平。尊中酒滿身彊健。未恨飄零過此生。

雙溪道中

曉山笮橋門。天低日未曛。綠陂寒淡淡。白霧遠昏昏。古路亂車轍。行人驚雁羣。征塗不須厭。蓬轉本無根。

牛飲市中小飲呈坐客

牛飲橋頭小市東。店門繫馬一尊同。已能自置功名外。尙欲相期意氣中。褐擁紫茸迎曉日。酒醺紅浪醉春風。從今共約無疎索。竹外梅花欲惱公。

自警

乳烹佛粥遽如許。菜簇春盤行及時。草木欣欣渠得意。乾坤浩浩我何私。懷材所忌多輕用。學道當從不自欺。旦暮置規君勿怪。修身三省自先師。

午寢

眼澀朦朧不自支。欠伸常恨到牀遲。庭花著雨晴方見。野客敲門去始知。灰冷香煙無復在。湯成茶椀徑須持。頽然却自嫌疏放。旋了生涯一首詩。

白髮

我生實多遭。九折行晚途。憂傷日熏心。驚見頰與顱。稍生秋風時。競出寒雨餘。星星初尚稀。鱗鱗不可除。昔如春柳妍。今作霜蓬枯。蓬枯有再綠。念我豈得如。平昔樂方外。固與功名疏。投躡三歎息。金丹豈無書。

明日午睡至莫復次前韻

酒力醺然入四支。華胥稅駕不應遲。殘年已覺衰難強。萬事無如睡不知。幸有琴書供枕藉。安能冠帶更支持。紅爐過盡灰如雪。獨守青燈坐畫詩。

醉中長歌

闌干斗柄搖天東。人間一夜回春風。注桃染柳歲相似。惟我衰顏非昔紅。可憐逢春不自感。更欲使氣驚兒童。煙郊射雉錦臆碎。水亭供餼金盤空。歸穿南市萬人看。流星突過連錢驄。高樓作歌醉自寫。墨光燭焰交長虹。人生未死貴適意。萬里作客元非窮。故人夜直金鑾殿。僊臥獨聽宮門鐘。

對酒

扇邊生怕庾公塵。索笑來遊錦水濱。四野雲齊初釀雪。一枝梅動已催春。綠尊有味能消日。白髮無情不貸人。商略此生何所恨。太平時得自由身。

入日飲昭覺

天涯羈旅逢人日。病起消搖集寶坊。雪水初融錦江漲。梅花半落綠苔香。家山松桂年年長。幕府文書日日忙。自笑餘生有幾許。一菴借與得深藏。

上元前一日

異縣客遊久。今年春事遲。峭寒增酒價。微雨惱燈期。老態人未覺。孤愁心自知。停車呼病婦。強出伴諸兒。

上元

細細香塵暗六街。魚鱗淺碧暮雲開。新粧褰幕全身見。誤馬隨車一笑回。酒醺頓忘風力峭。夜長猶恨漏聲催。京華舊侶彫零盡。短鬢成絲心未灰。

又

病起衰顏非昔紅。偷閑聊與少年同。一規寒玉挂樓角。千點華星來坐中。久戍遺民雖困弊。承平舊鎮尙繁雄。歸時瘦馬崔嵬影。定有遊人笑此翁。

喜譚德稱歸

少鄙章句學。所慕在經世。諸公薦文章。頗恨非素志。一朝落江湖。爛熳得自恣。討論極王霸。事業窺莘渭。

孔明景略間，却立頗眦睨。從人無一欣，對食有三喟。譚侯信豪雋，可共不朽事。天涯再相見，握手更投淚。欲尋西郊路，斗酒傾意氣。浩歌君和我，勿作尋常醉。

春感

少時狂走西復東，銀鞍駿馬馳如風。眼看春去不復惜，只道歲月來無窮。初遊漢中亦未覺，一飲尚可傾千鍾。又魚浪藉漾水濁，獵虎蹴蹋南山空。射棚命中萬人看，毬門對植雙旗紅。華堂却來弄筆硯，新詩醉草誇坐中。劍關南山纔幾日，壯氣摧縮成衰翁。雪霜蕭颯已滿鬢，蛟龍鬱屈空蟠胸。鄰園杏花忽爛熳，推枕強起隨遊蜂。遙看百匝幾歎息，吹紅洗綠行恩恩。暮年逢春尚有幾，常恐春去尋無踪。青錢三百幸可辦，且判爛醉酤鄴筒。

春晴暄甚遊西市施家園

稅駕名園半日留，遊絲飛蝶晚悠悠。驟暄不爲海棠計，長晝只添鸚鵡愁。老去自驚詩酒減，客中偏覺歲時遒。東風好爲吹歸夢，著我松江弄釣舟。

花時遍遊諸家園

看花南陌復東阡，曉露初乾日正妍。走馬碧雞坊裏去，市人喚作海棠顛。

又

爲愛名花抵死狂，只愁風日損紅芳。綠章夜奏通明殿，乞借春陰護海棠。

又

翩翩馬上帽簷斜。盡日尋春不到家。偏愛張園好風景。半天高柳臥溪花。

又

花陰掃地置清尊。爛醉歸時夜已分。欲睡未成欹倦枕。輪囷帳底見紅雲。

又

宣華無樹著啼鶯。惟有摩訶春水生。故老能言當日事。直將宮錦裹宮城。

又

枝上猩猩血未晞。尊前紅袖醉成圍。應須直到三更看。畫燭如椽爲發輝。

又

重萼丹砂品最高。可憐寂寞棄蓬蒿。曾當車載金錢去。買取春歸亦足豪。小東門外有千葉朱砂海棠一株。奇麗絕代。在荒圃中。人罕見者。

又

絲絲紅萼弄春柔。不似疎梅只慣愁。常恐夜寒花索寞。錦茵銀燭按涼州。

又

飛花盡逐五更風。不照先生社酒中。輸與新來雙燕子。脚泥猶得帶殘紅。今年二月二日社。而海棠已過。

又

海棠已過不成春。絲竹淒涼鎖暗塵。眼看燕脂吹作雪。不須零落始愁人。



曉過萬里橋

曉出錦江邊，長橋柳帶煙。豪華行樂地，芳潤養花天。擁路看欹帽，窺門笑墜鞭。京華歸未得，聊此送流年。

自合江亭涉江至趙園

政爲梅花憶兩京，海棠又滿錦官城。鴉藏高柳陰初密，馬涉清江水未生。風掠春衫驚小冷，酒潮玉頰見微頰。殘年飄泊無時了，腸斷樓頭畫角聲。

春晴

一庭舞絮鬪身輕，百尺遊絲弄午晴。靜喜香煙縈曲几，臥驚玉子落紋枰。新春易失遽如許，薄宦忘歸何似生。安得一船東下峽，江南江北聽鶯聲。



# 陸放翁集

劍南詩稿

卷第七

題明皇幸蜀圖

天寶政事何披猖，使典相國胡奴王。  
弄權楊李不足怪，阿瞞手自裂紀綱。  
八姨富貴尙有理，何至詔書襲五郎。  
天寶末，下詔雪張易之兄弟，盧龍賊騎已洶洶。  
丹鳳神語猶琅琅，人知大勢危纍卵。  
天稔奇禍如崩牆，臺省諸公獨耐事。  
歌詠功德卑，虞唐一朝殺氣橫。  
天末正馬西奔，幾不脫，向來諂子知幾人。  
賊前稱臣草間活，劍南萬里望秦天。  
行殿春寒聞杜鵑，老臣九齡不可作。  
魚蠹蛛絲金鑑篇。

春寒連日不出

海棠花入燕泥乾，梅子枝頭已帶酸。  
老去嬾尋年少夢，春分不減社前寒。  
著書敢望垂千載，嗜酒猶須隱一官。  
正是閑時無客過，小庭斜日倚闌干。

馬上偶成

城南城北紫遊韁，盡日閑行看似忙。  
刺水離離葛葉短，連村漠漠豆花香。  
夕陽有信催殘角，春草無情上繚牆。  
我亦人間倦遊者，長吟聊復愴興亡。

夜宴

陸放翁集 劍南詩稿 卷七

一

(七六一)

酒浪搖春不受寒。燭花垂燼忽堆盤。山川路邈人將老。絲管聲迢夜向闌。四海交朋更聚散。百年光景雜悲歡。自憐病眼猶明在。更把名花半醉看。是夕得范希元家晚海棠數枝繁麗一城所無。

觀音院讀壁間蘇在廷少卿兩小詩次韻

揚鞭暮出錦官城。小院無僧有月明。不信道人心似鐵。隔城猶送擣衣聲。

又

老去癡頑不受鑄。姓名身後更須傳。世間商略無歸處。只合長齋繡佛前。

錦亭

天公爲我齒頰計。遣飲黃甘與丹荔。又憐狂眼老更狂。令看廣陵芍藥蜀海棠。周行萬里逐所樂。天公於我元不薄。貴人不出長安城。寶帶華纓真汝縛。樂哉今從石湖公。大度不計雙丞顰。夜宴新亭海棠底。紅雲倒吸玻璃鍾。琵琶絃繁腰鼓急。盤鳳舞衫香霧浮。春醪凸盞燭光搖。素月中天花影立。遊人如雲環玉帳。詩未落紙先傳唱。此邦句律方一新。鳳閣舍人今有樣。

晚起

新晴窗日弄春妍。幌小屏深意自便。長恨病多妨痛飲。却緣客少得安眠。雛鷺故故啼簷角。飛絮翩翩墮枕前。欲著衣裳還嬾起。重尋殘夢一悠然。

雨

映空初作繭絲微。掠地俄成箭鏃飛。紙帳光遲鏡曉夢。銅鑪香潤覆春衣。池魚鱗鱗隨溝出。梁燕翩翩接

翅歸。惟有落花吹不去。數枝紅溼自相依。

春晚書懷

萬里西遊爲覓詩。錦城更付一官癡。脫巾灑酒從人笑。拄笏看山頗自奇。疎雨池塘魚避釣。曉鶯窗戶客爭碁。老來怕與春爲別。醉過殘紅滿地時。

出朝天門繚長堤至劉侍郎廟由小西門歸

曉從北郭過西城。十里沙堤似席平。澹日向人供帽影。微風傍馬助鞭聲。歡情寂寂隨年減。俗事紛紛逐日生。到處每求佳水竹。晚途牢落念歸耕。

夜分讀書有感

光陰百歲已中分。擬結茅茨老白雲。萬里誰憐新臥疾。九重猶記舊能文。枕邊得句題屏壁。馬上看山隔帽氈。終恨無勞糜廩粟。夜窗聊策讀書勳。

中夜聞大雷雨

雷車駕雨龍盞起。電行半空如狂矢。中原腥羶五十年。上帝震怒初一洗。黃頭女真撼魂魄。面縛軍門爭請死。已聞三箭定天山。何啻積甲齊熊耳。捷書馳騎奏行宮。近臣上壽天顏喜。閣門明日催賀班。雲集千官摩劍履。長安父老請移蹕。願見六龍臨渭水。從今身是太平人。敢憚安西九千里。

春殘

石鏡山前送落暉。春殘回首倍依依。時平壯士無功老。鄉遠征人有夢歸。苜蓿苗侵官道合。蕪菁花入麥

畦稀倦遊自笑摧頹甚。誰記飛鷹醉打圍。

武擔東臺晚望

顛顛西窗已一翁。登高意氣尙豪雄。關河霸國興亡後。風月詩人醉醒中。病起頓驚雙鬢改。春歸一掃萬花空。欄邊徙倚君知否。直到吳天目未窮。

行武擔西南村落有感

騎馬悠然欲斷魂。春愁滿眼與誰論。市朝遷變歸蕪沒。澗谷銜舄互吐吞。一徑松楠遙見寺。數家雞犬自成村。最憐高冢臨官道。細細煙莎遍燒痕。有大家高數丈旁又一冢差小莫知何代人也俗號太子墓

小飲房園

宦遊到處卽忘家。況得閑身管物華。疎索故人緣病酒。折除厚祿爲看花。泥新高棟初巢燕。萍匝荒池已集蛙。斟酌人生要行樂。燈前起舞落烏紗。

飯昭覺寺抵暮乃歸

身墮黃塵每慨然。攜兒蕭散亦前緣。聊憑方外巾盂淨。一洗人間匕箸羶。靜院春風傳浴鼓。畫廊晚雨溼茶煙。潛光寮裏明窗下。借我消搖過十年。

自芳華樓過瑤林莊

春晚江邊草過腰。雨餘樓下水平橋。名花未落如相待。佳客能來不費招。欄角峭風羅袖薄。柳陰斜日玉驄驕。此身醉死元關命。敢笑聞雞趁早朝。

書懷

詩不能工浪得窮。幾年袞袞看諸公。摧頽已作驥伏櫪。留滯敢嫌船逆風。消日劇棊疎竹下。送春爛醉亂花中。倚樓看鏡俱癡絕。贏取煙蓑伴釣翁。

遊東郭趙氏園

清晨呼馬出。馭吏請所之。錦城浩如海。我亦無與期。有花卽入門。莫問主人誰。下馬據胡床。傲睨忘訶譏。人言白頭翁。胡爲尙兒癡。老翁故不癡。借花發吾詩。詩句帶花香。東風不敢吹。徘徊雙蛺蝶。許汝鼻端知。

卜居

盡歷人間行路難。老來要覓數年閑。供家米少因添鶴。買宅錢多爲見山。池面紋生風細細。花根土潤雨斑斑。借春乞火依鄰里。剩釀村醪約往還。

又

南浮七澤弔沉湘。西泝三巴掠夜郎。自信前緣與人薄。每求寬地寄吾狂。雪山水作中濡味。蒙頂茶如正焙香。儻有把茅端可老。不須辛苦念還鄉。

馬上

春殘馬上意。佺偃縱轡微。吟過數坊。綠樹成帷。連藥市。清流如帶繞毬場。城荒鼓角增悲壯。苑廢雲煙尙莽蒼。堪笑年來向詩嬾。還家古錦只空囊。

夜登江樓

陸放翁集 劍南詩稿 卷七

五

(七六五)

平生胸中無滯留。曠然獨與造物遊。天風駕我周寓縣。夜半忽過江邊樓。樓前茫茫天地闊。萬頃月浸空江秋。雲階無塵鸞鶴舞。玉笛裂石魚龍愁。肺肝澄澈納瀛氣。毛髮慘慄臨寒流。世間回首真一夢。誰能更念酬恩讎。

書歎

早得虛名翰墨林。謝歸忽已歲時侵。春郊射雉朝盤馬。秋院焚香夜弄琴。病酒閉門常兀兀。哦詩袖手久悒悒。浮沉不是忘經世。後有仁人識此心。

三月一日府宴學射山

北出昇仙路。少東據鞍自笑老。從戎百年身世酣歌裏。千古功名感慨中。天遠僅分山鬢髯。霧收初見日曠曠。橫空我欲江湖去。誰借冷然禦寇風。

對酒

閑愁如飛雪。入酒卽消融。好花如故人。一笑盃自空。流鶯有情亦念我。柳邊盡日啼春風。長安不到十四載。酒徒往往成衰翁。九環寶帶光照地。不如留君雙頰紅。

題直舍壁

文書那得廢哦詠。羞作羣兒了事癡。付與後人評此老。一丘一壑過元規。

遊園覺乾明祥符三院至暮

成都再見春事殘。雖名閑官實不閑。門前車馬鬧如市。案上文檄高於山。有時投鐺輒徑出。略似齊客偷



秦關日斜僕夫已整駕。顧景欲駐愁嘲訕。豈知今朝有此樂。放浪一笑開衰顏。抽身黃塵烏帽底。得意翠木清泉間。裘裳危磴窮犖确。洗耳古澗聽淙潺。豈惟頓覺宇宙廣。政爾一散腰脚頑。似聞青城縹緲處。待我歸綴仙官班。俊鷹解條卽萬里。豈比倦翼方知還。

遊合江園戲題

朱朱白白池臺間。好風妍日開未殘。我來覓醉苦草草。常恨不如花意閑。山雞飛起亂花落。下上青林穿翠壑。世間動步卽有拘。常恨不如禽意樂。人言功名恐不免。我願徜徉娛歲晚。熟計淫書理白魚。何如縱獵牽黃犬。成都四郊如砥平。安得雙韉馳出城。輕飛塵起望不見。從騎尋我鳴鶻聲。

三月十六日作

石筍街西風景幽。醉眠萬事付悠悠。倦遊我已七年客。促駕春無三日留。枝上蝶稀紅藥老。舍中蠶起綠桑柔。功名墮甌誰能問。羞作飢鷹夜掣鞴。

食齋

日日思歸飽蕨薇。春來薺美忽忘歸。傳誇真欲嫌荼苦。自笑何時得瓠肥。

又

采采珍蔬不待畦。中原正味壓蓴絲。挑根擇葉無虛日。直到開花如雪時。

又

小著鹽醃助滋味。微加薑桂發精神。風爐歛鉢窮家活。妙訣何曾肯授人。

次韻范文淵

簞瓢氣已壓膏粱。不傍朱門味更長。細看高人忘寵辱。始知吾輩可憐傷。巖扃勾漏新丹竈。香火匡廬古道場。剩欲與君堅此約。它年八十鬢眉蒼。近有術者言僕壽過八十。

題醉中所作草書卷後

胸中磊落藏五兵。欲試無路空崢嶸。酒爲旗鼓筆刀槊。勢從天落銀河傾。端溪石池濃作墨。燭光相射飛縱橫。須臾收卷復把酒。如見萬里煙塵清。丈夫身在要有立。逆虜連盡行當平。何時夜出五原塞。不聞人語聞鞭聲。

登子城新樓遍至西園池亭

狂夫無計奈狂何。何況登臨逸興多。千疊雪山連滴博。一支春水入摩訶。吟餘騎省霜侵鬢。釣罷玄真雨滿蓑。遂虜榆關期尙遠。不妨隨處得婆娑。

小疾謝客

小疾深居不喚醫。消搖更覺勝平時。癡人未害看周易。名士真須讀楚辭。綠徑風斜花片片。畫廊人靜雨絲絲。晚來頓覺清羸甚。自置篝爐煮粟糜。

歸耕

隨牒人間鬢欲疎。歸耕且復補東隅。飯炊地碓新春米。衣拆天吳舊繡圖。有圃免煩官送菜。叩門翻喜吏徵租。不愁問字無來客。惟欠揚雄宅一區。

聞孫巖老挂冠歎仰之餘輒賦長句

聖賢在世龍行天。出處何至爲物牽。後人競作駒伏轅。未死奄奄如九泉。郭孫公者山澤仙。巖巖玉骨寒。入肩哦詩調苦亂。嚙蟬。燥墨瘦字醜不妍。諸公好之挽使前。六丁力盡山嶷然。奏書告老不待年。脫手徑上峴山巔。吾儕一官自糾纏。俛首鞭箠不自憐。彊欲作詩誦公賢。事偉辭卑難並傳。

松驥行

驥行千里亦何得。垂首伏櫪終自傷。松閱千年棄澗壑。不如殺身扶明堂。士生抱材願少試。誓取燕趙歸君王。閉門高臥身欲老。聞雞相蹴涕數行。正令啾嚶死牀簀。豈若橫身當戰場。半酣浩歌聲激烈。車輪百轉盤愁腸。

遣興

鶴料無多又掃空。今年真是浣花翁。放教綠酒關身事。留得朱顏在鏡中。挾彈園林芳徑雨。投竿窗檻小溪風。癡頑自笑歸何日。家在東吳更向東。

野意

小東門外曳筇枝。白葛烏紗自一奇。閑客逍遙無吏責。茂陰清潤勝花時。茶經每向僧窗讀。菰米仍於野艇炊。使覺眼邊歸路近。鏡湖禹廟見參差。

雨中登安福寺塔俗謂之黑塔

平生喜登高。醉眼無疆界。北顧極幽并。東望跨海岱。喟然撫手歎。從古幾成敗。英雄如過鳥。城郭但遺塊。

今朝上黑塔。千里曠無礙。忽驚風霆掣。坐覺天地晦。急雨挾龍腥。溽暑爲摧壞。皇天念蟠鬱。令我寄一快。那知書生狂。自倚心眼大。更思駐潼關。黃河看如帶。

過野人家有感

縱轡江臯送夕暉。誰家井臼映荆扉。隔離犬吠窺人過。滿箔蠶飢待葉歸。吳人直謂桑日葉。世態十年看爛熟。家山萬里夢依稀。躬耕本是英雄事。老死南陽未必非。

幽居晚興

借鉏斲藥喜微香。汲井澆花趁晚涼。胸次何曾橫一物。尊前尙欲笑千場。錦江秋雨芙蓉老。笠澤春風杜若芳。歸去自佳留亦樂。夢中何處是吾鄉。

飯保福

筵雨雲低未放晴。閉門作病憶閑行。攝衣丈室參耆宿。曳杖長廊喚弟兄。飽飯卽知吾事了。免官初覺此身輕。歸來更欲誇妻子。學煮雲堂芋糝羹。

觀華嚴閣僧齋閣下自四月初至七月末日飯僧數千人

拂劍當年氣吐虹。喑鳴坐覺朔庭空。早知壯志成癡絕。悔不藏名萬衲中。

閑中偶題

楚澤巴山歲歲忙。今年睡足向禪房。只知閑味如茶永。不放羈愁似草長。架上漢書那復看。牀頭周易亦相忘。客來拈起清談麈。且破西窗半篆香。

又

久矣雲衢斂羽翰。退飛更覺一枝安。七千里外新閑客。十五年前舊史官。花底清歌春載酒。江邊明月夜投竿。癡頑直爲多更事。莫怪胸懷抵死寬。

病中戲書

五十忽過二流年。消壯心。避人便小疾。移竹喜微陰。洗甕閑籜酒。焚香靜斲琴。鏡中青鬢在。切莫遣愁侵。

又

微疾饒餘災。時須藥裏開。禽驚杵聲去。蜂認蜜香來。閉戶知長日。全生幸散材。晚涼幽興動。彊到竹邊回。

又

食筍動衰疾。清羸逾兩旬。藥囊隨臥起。詩句雜吟呻。架足書籤蠹。窗凝酒榼塵。免從官乞假。且喜是閑身。

病起書懷

病骨支離紗帽寬。孤臣萬里客江干。位卑未敢忘憂國。事定猶須待闔棺。天地神靈扶廟社。京華父老望和鑾。出師一表通今古。夜半挑燈更細看。

又

酒酣看劍凜生風。身是天涯一秃翁。捫蝨劇談空自許。聞雞浩歎與誰同。玉關歲晚無來使。沙苑春生有去鴻。人壽定非金石永。可令虛死蜀山中。

寺樓月夜醉中戲作

素壁徐升天宇閑。連峯積雪蒼茫間。樓臺是處可見月。無此嶢嶢羣玉山。

又

水精盞映碧琳腴。月下泠泠看似無。此酒定從何處得。判知不是文君壚。

又

海山縹緲玉真妃。貪看冰輪不肯歸。樓上三更風露冷。旋圍步障換羅衣。

晚過五門

五門路四月。乳鴉啼綠樹。閑遊但喜日初長。薄暑始知春已去。樓頭風高舞雙旗。畫角聲中日還暮。馬蹄特特無斷時。老盡行人路如故。

躬耕

莫笑躬耕老蜀山。也勝菜把仰園官。喚回癡夢塵機息。空盡閑愁酒地寬。無復短衣隨李廣。但思微雨過蘇端。十年世事茫如海。輸與閑人靜處看。

晚興

老病愁趨畫戟門。天教高臥浣花村。山林獨往雜屠釣。世界皆空誰怨恩。禪祕要經言觀空之法。自一城一國一世界。至三千大千世界皆空。千卷蠹書忘歲月。一尊濁酒信乾坤。興來倚杖清江上。斷角疎鐘正斂昏。

夏夜大醉醒後有感

少時酒隱東海濱。結交盡是英豪人。龍泉三尺動牛斗。陰符一編役鬼神。客遊山南夜望氣。頗謂王師當入秦。欲傾天上河漢水。淨洗關中胡虜塵。那知一旦事大繆。騎驢劍閣霜毛新。卻將覆甌草檄手。小詩點綴西州春。素心雖願老巖壑。大義未敢忘君臣。雞鳴酒解不成寐。起坐肝膽空輪囷。

合江夜宴歸馬上作

零露中宵溼綠苔。江郊縱飲亦荒哉。引盃快似黃河瀉。落筆聲如白雨來。纖指醉聽箏柱促。長檠時看燭花摧。頭顱自揣應虛死。馬上長歌寄此哀。

齋居書事

慵養金丹換鬢鬚。微霜正要稱清癯。平生風露充蟬腹。到處雲山寄鶴軀。道室焚香勤守白。虛窗點易靜研朱。自知世事難諧偶。不待幽人夜見呼。

午夢

苦愛幽窗午夢長。此中與世暫相忘。華山處士如容見。不覓仙方覓睡方。

江濱池納涼

雨過荒池藻荇香。月明如水浸胡牀。天公作意憐羈客。乞與今年一夏涼。

晚步

屏居無俗事。薄暮行溪園。斷續風蟬噪。俯仰露葉翻。月出照西壁。參差見蒼痕。新沐嬾不櫛。清冷入髮根。臨流揮羽扇。對月傾芳尊。寄謝南昌尉。何必隱市門。

姚將軍靖康初以戰敗亡命建炎中下詔求之不可得後五十年乃從呂洞賓劉高尚往來名山  
有見之者予感其事作詩寄題青城山上清宮壁間將軍儻見之乎

造物困豪傑意將使有爲功名未足言或作出世資姚公勇冠軍百戰起西陲天方覆中原殆非一木支  
脫身五十年世人識公誰但驚山澤間有此熊豹姿我亦志方外白頭未逢師年來幸廢放儻遂與世辭  
從公遊五嶽稽首餐靈芝金骨換綠髓欽然松杪飛

客自鳳州來言岐雍間事悵然有感

表裏山河古帝京逆胡數盡固當平千門未報甘泉火萬耦方觀渭上耕前日已傳天狗墮去年十一月  
天狗墮長安聲甚大今年寧許佛狸生會須一洗儒酸態獵罷南山夜下營

席上作

綠波畫漿浣花船清簟疎簾角黍筵一幅葛巾林下客百壺春酒飲中仙散懷絲管繁華地寄傲江湖浩  
蕩天浮世升沉何足計丹成碧落珥貂蟬青城山中有孫太古畫碧落侍中范長生舉手整貂蟬像特妙

水亭偶題

涼榭閑拈玉笛吹十年疎放負明時溝中木斷誰曾問空裏蓬征自不知金井梧桐生晝寂綠池蘋藻弄  
風漪人生行樂從來事此理何須更細推

避暑江上

苦惡厭城市初夜臨江湍風從西山來頗帶積雪寒堰聲靜尤壯噴薄如急灘頓遠車馬喧更覺衣裳單



斷岸吐缺月恨不三更看。且隨螢火歸。城扉欲橫關。

夏白紵并序

古有四時白紵。亦有止作一時者。丙申五月在成都。烈暑可畏。戲作夏白紵二首。

雲母屏薄望如空。水精簾疎不礙風。美人獨立何所似。白玉芙蓉秋水中。素綃細織冰蠶縷。清寒不受人間暑。晚來浴罷綠窗閑。自把新詩教鸚鵡。

又

翔鸞矯矯離風塵。眼明見此絕代人。紗窗弄筆消永日。臨得黃庭新逼真。飛樓縹緲今何夕。月與玉人同一色。下簾不爲九霄寒。自要玲瓏看團壁。

久旱忽大雨涼甚小飲醉眠覺而有作

暑雨蕭蕭滴夜長。曉窗探借九秋涼。金荷淺酌閑傳酒。銀葉無煙靜炷香。舒雁且爲賒死計。鳴鳩便欲策勳忙。散人亦未全無事。枕藉琴書滿一牀。

明日開霽益涼復得長句

睡起東窗照眼明。朝陽爛熳作新晴。已聞雨斷空階滴。更覺風從細葛生。蛺蝶飛來停酒榼。石榴飄落糝棋枰。四時好處閑方覺。不枉今年住錦城。

夜讀東京記

海東小胡辜覆冒。敢據神州竊名號。幅員萬里宋乾坤。五十一年讎未報。煌煌藝祖中天業。東都實宅神

明隩。卽今犬豕穴宮殿。安得旄頭下除掃。寶玉大弓久不獲。臣子義敢忘巨盜。景靈太廟威神在。北鄉慟哭猶可告。壯士方當棄軀命。書生詎忍開和好。孤臣白首困西南。有志不伸空自悼。

感事

青鬢當時映綠衣。堯功曾預記巍巍。玄都春老人何在。華表天高鶴未歸。流輩凋疎情話少。年光遲暮壯心違。倚樓不用悲身世。倦鶴無風亦退飛。

書歎

三代藏寶器。世守參河圖。埋湮則已矣。可使列市區。文章有廢興。蓋與治亂符。慶曆嘉祐間。和氣扇大鑪。數公實主盟。渾灑配典謨。開闢始歐王。舊畬逮曾蘇。大駕初渡江。中原皆避胡。吾猶及故老。清夜陪坐隅。論文有脈絡。千古著不誣。俯仰四十年。綠髮霜蓬枯。孤生尊所聞。秉節不敢渝。久幽士固有。速售理則無。世方亂珉玉。吾其老江湖。

睡起

睡味清酣鼻息輕。碧幮文簟喜涼生。片雲過處失簾影。急雨來時聞瓦聲。索虜尙憑三輔險。散關未下九天兵。白頭漫倚詩豪在。手掣鯨魚意未平。

飯罷碾茶戲書

江風吹雨暗衡門。手碾新茶破睡昏。小餅戲龍供玉食。今年也到浣花村。

夢遊山水奇麗處。有古宮觀云雲臺觀也。

神遊忽到雲臺宮。太華彩翠明秋空。曲廊下闕白蓮沼。小閣正對青蘿峯。林間突兀見古碣。雲外縹緲聞疎鐘。褐衣紗帽瘦如削。遺像恐是希夷翁。窮搜未遍忽驚覺。半窗朝日初曛曛。卻思巖然五千仞。可使常墮胡塵中。小臣昧死露肝膈。願屈鑾駕臨崑崙。何當真過此山下。百尺嫋嫋龍旗風。

月下醉題

黃鵠飛鳴未免飢。此身自笑欲何之。閉門種菜英雄老。彈鋏思魚富貴遲。生擬入山隨李廣。死當穿冢近要離。一樽彈醉南樓月。感慨長吟恐過悲。

野外劇飲示坐中

悲歌流涕遣誰聽。酒隱人間已半生。但恨見疑非節俠。豈忘小忍就功名。江湖舟楫行安往。燕趙風塵久未平。飲罷別君攜劍起。試橫雲海翦長鯨。

與青城道人飲酒作

君不見太傅晚歲具海舟。歸欲極意東山遊。翰林偶脫夜郎謫。大醉賦詩黃鶴樓。兩公窮達何足道。同是逸氣橫清秋。我無一事行萬里。青山白雲聊散愁。有酒不換西涼州。無酒不與鸚鵡裘。不作王猛傲睨坐捫蝨。不作寧戚悲歌起飯牛。五雲覆鼎金丹熟。笙鶴飄然戲十洲。

銅壺閣望月

銅壺閣上看明月。身在千尋白銀闕。十年肺渴今夕平。皓然胸次堆冰雪。恨無仙掌出雲表。更取墜露和玉屑。夜闌三歎下危梯。明日人間火雲熱。

連日得雨涼甚有作

九淵龍起跨蒼茫。聊爲西州洗亢陽。曉看空濛知歲稔。夜聞點滴覺心涼。紗幮不下蚊蠅靜。焙火微溫書  
畫香。睡足何須雲夢澤。如雷鼻息撼鄰牆。

待青城道人不至

我亦從來薄世緣。偶然采藥到西川。慵追萬里騎鯨客。且伴千年化鶴仙。金鼎養丹瞰海日。玉壺取酒醉  
江天。朝來坐待方平久。讀盡黃庭內外篇。

劍客行

我友劍俠非常人。袖中青蚺生細鱗。騰空頃刻已千里。手決風雲驚鬼神。荆軻專諸何足數。正晝入燕誅  
逆虜。一身獨報萬國讎。歸告昌陵淚如雨。

夜宴卽席作

宣華輦路牧羊牛。摩訶龍池草茫茫。宮殿犁盡餘繚牆。南風遠吹禾黍香。草間白骨橫秋霜。何山喚起醜  
一觴。癡人走死聲利場。我獨感此惜流光。蘋花開時風榭涼。美人縹緲如鸞翔。堯年舜日樂未央。非子之  
故爲誰狂。

宿沱江彌勒院

雨足陂塘溢。庭空草樹荒。衰年愁客路。野寺憩衣囊。蛙吹喧孤枕。蚊雷動四廊。青燈照無寐。寂寞數更長。  
學射道中感事

學射山前宿雨收。籃輿咿軋自生愁。得閑何惜傾家釀。漸老真須秉燭遊。道廢尙書猶乞米。時來校尉亦封侯。自憐白首能豪在。車轍何因遍九州。

遊學射觀次壁間詩韻

走遍人間鬢尙青。爾來樂事滿餘齡。傍潭秋爽鉏甘菊。登嶽春暄采茯苓。閑倚松蘿論劍術。靜臨窗几勘丹經。嚴光本是逃名者。安用天文動客星。

昇仙橋遇風雨大至憩小店

觸熱真疑墮。火灰雨如飛。鏃亦佳哉。空江魚鼈從龍起。平野雷霆擁馬來。正怪橫吹屋茅盡。俄聞下擊澗松摧。晚來日漏風猶急。臥看柴扉闔復開。

龍挂

成都六月天大風。發屋動地聲勢雄。黑雲崔嵬行風中。凜如鬼神塞虛空。霹靂迸火射地紅。上帝有命起伏龍。龍尾不卷曳天東。壯哉雨點車軸同。山摧江溢路不通。連根拔出千尺松。未言爲人作年豐。偉觀一洗芥蒂胸。

芳華樓夜宴

射虎將軍老不侯。尙能豪縱醉江樓。笙歌雜沓娛清夜。風露高寒接素秋。少日壯心輕玉塞。暮年幽夢墮滄洲。人間清絕沅湘路。常笑靈均作許愁。

遣興

老子從來薄宦情。不辭落魄錦官城。生前猶著幾兩屐。身後更須千載名。樓外雪山森曉色。井邊風葉戰秋聲。一尊尚有臨邛酒。卻爲無憂得細傾。邛州宇文吏部餉酒絕佳。

六月九日夜步月至朝真觀

朝斗真人有舊祠。追涼老子曳筇枝。從來步月難爲客。此夕聽琴合有詩。竹院沉沉聞漏永。玉繩耿耿看星移。慙慙更作重來約。迨及冰輪未缺時。

十日夜月中馬上作

身遊碧海跨鯨魚。心似寒冰貯玉壺。衣溼三更清露墜。眼明萬里片雲無。橫空孤鶴曾相識。散髮飛仙定可呼。老向人間無復意。逝將從此謁清都。

百歲

百歲紛紛易白頭。一年鼎鼎又清秋。壯心空似驥伏櫪。病骨敢懷狐首丘。屠釣論交成酒隱。山林高臥得天遊。莫悲晚節功名誤。卽死猶堪贈醉侯。

獨飲醉臥比覺已夜半矣戲作此詩

澤畔元非慕獨醒。散人一飲費經營。也知世少蘇司業。安得官如阮步兵。醉著面顏驚少壯。澆餘胸次失崢嶸。更闌莫厭殘燈火。臥聽空廊絡緯聲。

蒙恩奉祠桐柏

少年曾綴紫宸班。晚落危途九折艱。罪大初聞收郡印。恩寬俄許領家山。羈鴻但自思煙渚。病驥寧容著

帝閑回首。觚稜渺何處。從今常寄夢魂間。

和范待制月夜有感

榆枋正復異。鵬飛等是垂。頭受鬪。坐客笑談嘲遠志。故人書札寄當歸。醉思葦菜黏篙滑。饑憶鱸魚墜。釣肥誰遣貴人同。此感夜來風月夢苔磯。

和范待制秋興

策策桐飄已半空。啼螿漸覺近房櫳。一生不作牛衣泣。萬事從渠馬耳風。名姓已甘黃紙外。光陰全付綠尊中。門前剝啄誰相覓。賀我今年號放翁。

又

睡臉餘痕印枕紋。秋衾微潤覆爐熏。井桐搖落先霜盡。衣杵淒涼帶月聞。佛屋紗燈明小像。經奩魚蠹蝕真文。身如病驥惟思臥。誰許能空萬馬羣。

又

山澤沉冥氣尚豪。鬢絲未遽歎蕭騷。已忘海運鯤鵬化。那計風微燕雀高。萬里客魂迷楚峽。五更歸夢隔胥濤。故知有酒當勤醉。自古寧聞死可逃。

和范待制秋日書懷二首游自七月病起蔬食止酒故詩中及之

閑窗貝葉對旁行。不覺城笳報夕陽。嗜酒步兵猶未達。拂衣司諫亦成忙。室無摩詰持花女。囊有娑婆等價香。欲與衆生共安隱。秋來夢不到鱸鄉。陳文惠公松江詩云西風斜日鱸魚鄉。傳本或誤作香字。張文

潛書辨之。

又

故人無字寄相思。敢向窮途怨不知。老病已全惟欠死。貪嗔雖斷尙餘癡。數莖雪鬢江湖遠。九轉金丹日月遲。畬粟山苗俱可飽。明年東去隱峨眉。



# 陸放翁集

劍南詩稿

卷第八

遊學射山遇景道人

肩輿適青郊。飛屐登翠麓。餘霜未泫瓦。晨日初掛木。推門覓黃冠。避客似奔鹿。雖無與晤語。清坐意亦足。豈知逢此士。曠度超世俗。欣然同一笑。齒頰粲冰玉。探囊贈奇草。甘香勝芍菊。試臨清鏡照。衰髮森已綠。出門恣幽討。老仙有遺躅。丹竈雖已空。藥丸遍山谷。嗟予迫遲暮。冠蓋厭追逐。結茅遠人境。此計亦已熟。若人真我友。玉字當共讀。客來不知處。雞犬望雲屋。

城東醉歸深夜復呼酒作此詩

冬夜走馬城東回。追風逐電何雄哉。五門鼓動燈火鬧。意氣忽覺如章臺。歸來脫靴靴滿霜。月明如水浸野堂。梅花滿手不可負。催熾獸炭傳清觴。書生所懷未易料。會與君王掃燕趙。只愁漸老不禁寒。臥載輜車君勿笑。

融州寄松紋劍

十年學劍勇成癖。騰身一上三千尺。術成欲試酒半酣。直躡丹梯削青壁。青壁一削平無蹤。浩歌卻過蓮花峯。世人仰視那得測。但怪雪刃飛秋空。老胡畏誅奉約束。假息漁陽連上谷。願聞下詔遣材官。恥作腐

儒常碌碌。

歲晚

歲晚城隅車馬稀。偷閑聊得掩荆扉。征蓬滿野風霜苦。多稼連雲雁鷺肥。報國有心空自信。結茅無地竟安歸。浣花道上人誰識。華表千年老令威。

玉京行觀煉丹作。

玉京清都奉紫皇。赤明開皇劫茫茫。有路坦如馳康莊。惜哉背之趨死鄉。絳陵朱兒朝吐光。森然箭簇攢玉牀。潔齋山棲祓不祥。朝餐夕食芝朮香。縹囊囊笈出祕方。日精月華鍊陰陽。爐開沐浴時日良。清夜玉杵聞琳房。服之刀圭換肝腸。三十六帝參翺翔。下視一笑爭奪場。紫紫枯冢壓北邙。

步出萬里橋門至江上

久坐意不懌。掩卷聊出遊。一筇吾事足。安用車與騶。浮生了無根。兩踵蹋百州。常憶航巨海。銀山卷濤頭。一日新雨霽。微茫見流求。在福州泛海東望見流求國。西行亦足快縱獵。南山秋騰身刺猛虎。至今血濺裘。命薄每自笑。校尉略已侯。短劍隱市塵。浩歌醉江樓。頗疑屠博中。可與共奇謀。丈夫等一死。滅賊報國讎。徙倚萬里橋。寒日墮前洲。

晚步

院荒有古意。僧少無人聲。徘徊楠陰下。賞此落日明。著書亦何急。寂寞身後名。今年復止酒。歌舞陳空甍。不如且消搖。出門隨意行。看竹入廢園。望江上高城。纖纖素月出。靄靄蒼煙橫。此夕當復奇。縱山吹玉笙。

數日寒頓減頗有春意感懷賦短歌

微陰寒不力。破臘春暗動。林梢報梅白。水際聞鳥嘒。羈鴻漸整翮。一一勞目送。應憐飛蓬客。猶作浣花夢。平生江淮間。裘馬事豪縱。豈知老畏死。齋鉢受蔬供。忍饑每自笑。小飲未敢痛。何以慰寂寥。臥聽壓春甕。

春愁

春愁茫茫塞天地。我行未到愁先至。滿眼如雲忽復生。尋人似瘴何由避。客來勸我飛觥籌。我笑謂客君罷休。醉自醉。倒愁自愁。愁與酒如風馬牛。

歲暮感懷

征塵十載暗戎衣。虛負名山采藥期。少日覆甕曾草檄。即今橫槊尙能詩。昏昏殺氣秋登隴。颯颯飛霜夜出師。會有英豪能共此。鏡中未用歎吾衰。

梅花

冰崖雪谷木未芽。造物破荒開此花。神全形枯近有道。意莊色正知無妄。高堅政要飽憂患。放棄何遑愁荒遐。移根上苑亦過計。竹籬茅屋真吾家。平生自嫌亦自許。妙處可識不可誇。金樽翠杓未免俗。篝火爲試江南茶。

寺居夙興

閑居無一事。睡少自夙興。空庭翠霧合。高樹紅日昇。曳杖透四廊。悄然不逢僧。廚煙俄漠漠。魚鼓亦登登。晨粥香滿堂。梁肉坐可憎。匡山在何許。吾將買行滕。

萬里橋江上習射

坡隴如濤東北傾。胡牀看射及春晴。風和漸減雕弓力。野迥遙聞羽箭聲。天上撓槍端可落。草間狐兔不須驚。丈夫未死誰能料。一箇他年下百城。

關山月

和戎詔下十五年。將軍不戰空臨邊。朱門沉沉按歌舞。廐馬肥死弓斷弦。戍樓刁斗催落月。二十從軍今白髮。笛裏誰知壯士心。沙頭空照征人骨。中原干戈古亦聞。豈有逆胡傳子孫。遺民忍死望恢復。幾處今宵垂淚痕。

出塞曲

佩刀一刺山爲開。壯士大呼城爲摧。三軍甲馬不知數。但見動地銀山來。長戈逐虎祁連北。馬前曳來血丹臆。卻回射雁鴨綠江。箭飛雁起連雲黑。清泉茂草下程時。野帳牛酒爭淋漓。不學京都貴公子。唾壺塵尾事兒嬉。

戰城南

王師出城南。塵頭暗城北。五軍戰馬如錯繡。出入變化不可測。逆胡欺天負中國。虎狼雖猛那勝德。馬前嗚咿爭乞降。滿地縱橫投劍戟。將軍駐坡擁黃旗。遣騎傳令勿自疑。詔書許汝以不死。股栗何爲汗如洗。

讀書

面骨嶢鬢髮欲疎。退藏只合臥蝸廬。自嫌尙有人間意。射雉歸來夜讀書。

又

歸老寧無五畝園。讀書本意在元元。燈前目力雖非昔。猶課蠅頭二萬言。時方讀小本通鑑。

晚過保福

堂靜僧閑普請疎。爐紅氈暖放參餘。蓮花池上容投社。椰子身中悔著書。茶試趙坡如潑乳。芋來犀浦可專車。放翁一飽真無事。擬伴園頭日把鉏。

偶過浣花感舊遊戲作

憶昔初爲錦城客。醉騎駿馬桃花色。玉人攜手上江樓。一笑鈎簾賞微雪。寶釵換酒忽徑去。三日樓中香未滅。市人不識呼酒仙。異事驚傳一城說。至今西壁餘小草。過眼年光如電掣。正月錦江春水生。花枝缺處小舟橫。閑倚胡牀吹玉笛。東風十里斷腸聲。

夜讀唐諸人詩多賦烽火者因記在山南時登城觀塞上傳烽追賦一首

我昔遊梁州。軍中方罷戰。登城看烽火。川迴風裂面。青燧竝駱谷。隱翳連鄠縣。月黑望愈明。雨急滅復見。初疑雲罅星。又似山際電。豈無酒滿尊。對此不能嚙。低頭媿虎韞。零落白羽箭。何時復關中。卻照甘泉殿。

平明出小東門觀梅

知心多別離。慰眼易零落。東風吹梅花。爛漫照城郭。晴日千堆雪。偏宜馬上看。逢迎無幾日。不惜犯春寒。明年花發時。我在兩京道。花香固無盡。我亦未遽老。脫帽髮如漆。看花心未灰。平戎那得妨。持酒會有詩。傳劍外來。

寺居睡覺

虛窗寂寂夜三更。燈斂殘光避月明。  
老嫗只貪春睡美。媿聞童子誦經聲。

又

心地安平曉夢長。忽聞魚鼓動修廊。  
披衣起坐清羸甚。想像雲堂炷粥香。  
僧雜菜餌之屬作粥名炷粥。

樓上醉書

丈夫不虛生世間。本意滅虜收河山。  
豈知蹭蹬不稱意。八年梁益凋朱顏。  
三更撫枕忽大叫。夢中奪得松亭關。  
中原機會嗟屢失。明日茵席留餘潛。  
益州官樓酒如海。我來解旗論日買。  
酒酣博塞爲歡娛。信手梟盧喝成采。  
牛背爛爛電目光。狂殺自謂元非狂。  
故都九廟臣敢忘。祖宗神靈在帝旁。

醉題

裘馬清狂錦水濱。最繁華地作閑人。  
金壺投箭消長日。翠袖傳盃領好春。  
幽鳥語隨歌處拍。落花鋪作舞時茵。  
悠然自適君知否。身與浮名若箇親。

初春出遊

春風初來滿刁州。江水照人如潑油。  
犢車芳草南陌頭。家家傾貲事遨遊。  
萬里橋西繫黃驢。爲君一登散花樓。  
半年長齋廢觥籌。興來忽典千金裘。  
小桃婀娜弄芳柔。紅蘭茁芽滿春洲。  
壚邊女兒不解愁。鬪草纔罷還藏鈎。  
可憐世人自拘囚。盎中乾坤舞蜉蝣。  
百年苦短去日遒。問君安用萬戶侯。

芳華樓夜飲

春風射雉苑城旁。走馬還來入醉鄉。夜暖酒波搖燭焰。舞回粧粉鑠花光。浮生一笑常難必。此樂它年未易忘。莫作五陵豪俠看。奚奴歸路有詩囊。

又

結客追遊亦樂哉。城南城北古池臺。香生赭汗連錢馬。光溢金船撥雪醅。難覓長繩磨日住。且憑羯鼓喚花開。一春政使渾無事。醉到清明得幾回。

東門外遍歷諸園及僧院觀遊人之盛

馬上哦詩畫醉鞭。東城南陌去翩翩。微風盛水魚鱗浪。薄日烘雲卵色天。隔屋鳩鳴閑院落。爭門花簇小輜軒。病來久已疎杯酌。春物撩人又破禪。

城東馬上作

古寺名園處處行。翩然南陌復東城。手柔弓燥獵徒喜。耳熱酒酣詩興生。月似有情迎馬見。鶯如相識向人鳴。摩挲病眼還三歎。猶擬中原看太平。

又

割鮮藉草醉春醪。仰看鳴鶻百尺高。杜老何妨希稷契。孔明本自陋袁曹。邊頭插羽無傳檄。篋裏盤鴟有舊袍。寄語長安衆年少。妓圍不似獵圍豪。

丁酉上元

突兀毬場錦繡峯。遊人女士擁千重。月離雲海飛金鏡。燈射冰簾掣火龍。信馬隨車紛醉俠。賣薪買酒到

耕農今年自笑真衰矣。但覺憑鞍睡思濃。

又

鼓吹連天沸五門。燈山萬炬動黃昏。美人與月正同色。客子折梅空斷魂。寶馬暗塵思輦路。釣船孤火夢江村。古來漫道新知樂。此意何由可共論。

又

放翁也入少年場。一笑燈前未欲狂。翠袖成圍欺月冷。氈車爭道覺塵香。蠻酥點綴春風早。楚餌留連夜漏長。結騎莫辭侵曉色。昔人萬里看西涼。

後陵永慶院在大西門外不及一里。蓋王建墓也。有二石幢。猶當時物。又有太后墓。琢石爲人馬。甚偉。

陵闕淒涼俯舊邦。恨流衰衰似長江。穿殘已歎金烏盡。缺落空餘石馬雙。攬飯飢烏占寺鼓。避人飛鼠上經幢。阿和乳臭崇韜耄。堪笑昏童束手降。

小飲趙園

少年結騎厭追歡。漸老方知一笑難。邂逅偶能成午醉。登臨未覺怕春寒。高林橫靄丹青幅。亂蝶爭花錦繡團。滿眼風光索彈壓。酒盃須似蜀江寬。

和范舍人書懷

歲月如奔不可遮。卽今楊柳已藏鴉。客中常欠尊中酒。馬上時看檐上花。末路淒涼老巴蜀。少年豪舉動



京華天魔久矣先成佛。多病維摩尙在家。

和范舍人病後二詩末章兼呈張正字

放衙元不爲春醒。澹蕩江天氣未清。欲賞園花先夢到。忽聞簷雨定心驚。香雲不動熏籠暖。蠟淚成堆斗帳明。關隴宿兵胡未滅。祝公垂意在尊生。

又

士生不及慶曆初。下方元祐當勿疎。請看蛟龍得雲雨。豈比烏雀馴階除。舍人起視北門草。學士歸著東觀書。劍外老農亦吐氣。釀酒畦花常晏如。

江路見杏花

我行浣花村。紅杏紅於染。數樹照南陂。一林藏北嶼。雖慚嶺梅高。繁麗豈易貶。雨絲飛復止。雲葉低未斂。似嫌風日緊。護此燕脂點。身閑得縱觀。無語吾所歎。

夜聞雨聲

高簷夜雨瀉淋漓。起擁寒衾旋炷香。春事豈堪頻破壞。客愁不可復禁當。長餅磊落輸輶釀。輕騎聯翩報海棠。著意物華君莫笑。世間得喪更茫茫。

海棠

十里迢迢望碧雞。一城晴雨不曾齊。今朝未得平安報。便恐飛紅已作泥。

又

蜀地名花擅古今，一枝氣可壓千林。譏彈更到無香處，常恨人言太刻深。

張園海棠

洛陽春信久不通，姚魏開落胡塵中。揚州千葉昔曾見，已歎造化無餘功。西來始見海棠盛，成都第一推燕宮。池臺掃除凡木盡，天地眩轉花光紅。慶雲墮空不飛去，時有絳雪縈微風。蜂蝶成團出無路，我亦狂走迷西東。此園低樹猶三丈，錦繡卻在青天上。不須更著刀尺裁，乞與齊奴開步障。

登劍南西川門感懷

自古高樓傷客情，更堪萬里望吳京。故人不見暮雲合，客子欲歸春水生。瘴癘連年須藥石，退藏無地著柴荆。諸公勉畫平戎策，投老深思看太平。

和范舍人永康青城道中作

風驅雨壓無浮埃，驂驪千騎東方來。勝遊公自輩王謝，淨社我亦追宗雷。巉山樓上一徙倚，如地始闢天初開。廓然眼界三萬里，山一蟻垤水一杯。世間幻妄幾變滅，正自不滿吾曹哈。丈夫本願布衣老，達士詎畏蒼顏催。君看神君歲食羊，四萬處處棄骨高。成堆西山老翁飽松麩，造物賦予何遼哉。

宿上清宮

永夜寥寥憩上清，下聽萬壑度松聲。星辰頓覺去人近，風雨何曾敗月明。是夕山下風雨絕，頂月明達曉。早歲文辭妨至道，中年憂患博虛名。一菴儻許西峯住，常就巢仙問養生。上官道人巢居山中。

登上清小閣

樓觀參差倚晚晴。偶然信脚得閑行。欲求靈藥換凡骨。先挽天河洗俗情。雲作玉峯時特起。山如翠浪盡東傾。何因從此橫空去。笙鶴飄然過洛城。

小憩長生觀飯已遂行

清絕長生觀。再遊疑後身。人間空石劫。物外自壺春。道士青精飯。先生烏角巾。回頭增悵望。倦馬撲征塵。

新津小宴之明日欲遊修覺寺以雨不果呈范舍人

風雨長亭話別離。忍看清淚濕燕脂。酒光搖蕩歌雲暖。不似西樓夜宴時。

又

新津渡頭船欲開。山亭準擬把離盃。不如意事十八九。正用此時風雨來。

眉州驛舍睡起

平生百無能。一嬾每自喜。胡爲八年間。逐食走萬里。身如盤汞轉。心似爐丹死。事君未免媿。富貴不如已。雨餘古驛涼。晝寐無錯履。澹然得高臥。睡思極清美。心平了無夢。驚寤何自起。尙嫌漆園蝶。肯作南柯蟻。斜陽生木影。龍蛇滿窗紙。煎茶儻已熟。一笑問童子。

送范舍人還朝

平生嗜酒不爲味。聊欲醉中遺萬事。酒醒客散獨悽然。枕上屢揮憂國淚。君如高光那可負。東都兒童作胡語。常時念此氣生癭。況送公歸觀明主。皇天震怒賊得長。三年胡星失光芒。旄頭下掃在旦暮。嗟此大議知誰當。公歸上前勉畫策。先取關中次河北。堯舜尙不有百蠻。此賊何能穴中國。黃扉甘泉多故人。定

知不作白頭新。因公併寄千萬意。早爲神州清虜塵。

過魚蛇市小寺

六月苦多雨。肩輿走江村。過市居人集。陟險兵子喧。日暎休野寺。汛掃開北軒。霧氣如蒼虬。天矯出洞門。溪清見白石。糾結菖蒲根。游魚去甚健。投餌棄不吞。嗟予獨何爲。貪祿忘故園。馳驅不自恤。面有風沙痕。俯仰二十年。竟孤明主恩。寄謝衆君子。努力蘇元元。

眉州作

扁舟久不泛蟆津。常恐黃塵解汚人。爛醉破除千日懣。予不至眉山三年矣。狂吟判斷四州春。此行自成都歷永康唐安至眉山。汀洲漸歎蘋花老。風露初嘗荔子新。便欲騎鯨東海去。騰游未忍別峨岷。

過修覺山不果登覽

前日泛江時。雨昏失南山。今日迎我馬。鬢髻擁髻鬟。白塔映朱閣。間見青林間。問我豈忘之。揚鞭亟西還。西還亦聊爾。行矣來憑欄。擾擾紅塵中。豈無一日閑。會復賡此詩。大書榜其顏。但恐厄風雨。清游天所慳。

青城縣會飲何氏池亭贈譚德稱

赤日黃塵行路難。青城縣裏得偷閑。十年去國悲霜鬢。六月登樓望雪山。醉客千言猶落筆。美人斗酒未醺顏。憑誰喚住譚夫子。更與徘徊水石間。

題菴壁

偶向城南卜草廬。二年浪迹寄樵漁。大牀獨臥豪猶在。萬衆橫行策竟疎。清濁戲分春甕酒。朱黃閑勘夜

窗書衰顏安用頻看鏡。日日元知有不如。

幽居

殊方飄泊向誰論。小住僧廬亦所欣。得飽罷揮求米帖。愛眠新著毀茶文。摘蔬籃小露清露。斷藥鉏輕帶溼雲。從此生涯足幽事。宦遊虛用半生勤。

又

剡曲故廬歸未得。慙從地主借茅茨。桃花春水夢不到。菰菜秋風心自知。強健猶穿幾兩屐。榮華正似一鈎絲。此心炯炯無人會。煙雨蒼茫獨立時。

浣花女

江頭女兒雙髻丫。常隨阿母供桑麻。常戶夜織聲啾啞。地爐豆豉煎土茶。長成嫁與東西家。柴門相對不上車。青裙竹笥何所嗟。插髻燦燦牽牛花。城中妖姝臉如霞。爭嫁官人慕高華。青驪一出天之涯。年年傷春抱琵琶。

七月八日馬上作

溝水浸新月。街槐生碧煙。明河七夕後。倦馬五門前。小市燈初鬧。高樓鼓已傳。賦詩寬客恨。哦罷卻淒然。

江樓

急雨洗殘瘴。江邊閑倚樓。日依平野沒。水帶斷槎流。擣紙荒村晚。呼牛古巷秋。腐儒憂國意。此際入搔頭。

夜登小南門城上

曳杖上江城。清宵破二更。月回高樹影。風壯急灘聲。野艇魚罾舉。優場炬火明。湖塘正如此。回首億柴荆。  
予故山在鏡湖之南。

野步至青羊宮偶懷前年嘗劇飲於此

錦官門外曳枯筇。此地天教著放翁。萬事元無工拙處。一官已付有無中。擎雲柏樹瘦蛟立。繞郭江流清鏡空。欲把酒盃終覺嬾。緩歌曾醉落花風。

月夜江濱池納涼

微逕荒城曲叢祠。野水邊月能從我醉。風欲駕人仙。靜看黏螢草。遙聞采芡船。熱官那有此。留滯莫尤天。

華亭院僧房

半闔朱門見綠苔。幽花仍傍小山開。劍南七月暑未退。明日更攜棋簞來。

又

悠悠馬上困思茶。休歇僧房到日斜。殿背無人綠錢滿。小盆零落珊瑚花。

乾明院觀畫

唐年蘭若占閑坊。名畫蕭條半在亡。簌簌疎篔常似雨。陰陰古屋自生涼。人門疊鼓初催講。喚馬斜陽欲滿廊。顯晦熟思真有數萬金。奇跡棄頽懸院中有黃筌花竹幾二十壁。多已壞矣。

登城

我登少城門。四顧天地接。大風正北起。號怒撼危堞。九衢百萬家。樓觀爭岌嶭。臥病氣壅塞。放日意頗愜。

永懷河洛間。煌煌祖宗業。上天祐仁聖。萬邦盡臣妾。橫流始靖康。趙魏血可蹀。小胡寧遠略。爲國恃剽劫。自量勢難久。外很中已懼。籍民備勝廣。陞戟畏荆聶。誰能提萬騎。大呼去聲擁馬鬣。奇兵四面出。快若霜掃葉。植旗朝受降。馳驛夜奏捷。豺狼一朝空。狐兔何足獵。遺民世忠義。泣血受汗脅。繫箭射我詩。往檄五陵俠。

秋日登仙遊閣

馬蹄連早暮。車塵細如霧。誰知此路邊。高閣下風馭。頗傳秋月夕。語笑聯杖屨。始知仙與人。混迹無異處。我來想鸞鶴。稽首祈一顧。飛仙不可見。惟與白雲遇。白雲如有情。傍我欄角住。借問何山來。雲驚卻飛去。

自詠

華髮蕭蕭居士身。江頭風雨折烏巾。無人問字尤宜嬾。有吏徵租未是貧。薄宦僮來難倚仗。舊交漸少每酸辛。敲門且復尋僧話。要結他生物外因。

雜詠

青羊宮中竹暗天。白馬廟畔柏如山。琴尊處處可消日。車馬紛紛自欠閑。

又

石犀廟壖江已回。陵谷一變吁可哀。卽今禾黍連雲處。當日帆檣隱映來。

又

微風翻翻芋葉白。落日漠漠稻花香。出門縱轡何所詣。萬里橋南追晚涼。

又

世事盛衰誰得知。惠陵煙草掩柴扉。陵邊人家叢竹裏。燈火喧呼迎婦歸。

大醉歸南禪。弄影月下。有作。

昔我變姓名。釣魚散花洲。有船不用楫。江急聽自流。卽今客錦城。醉過百花樓。天風吹笳輿。快若凌空遊。月露浩無際。指點隘九州。君看塵土中。頗有此樂不。題詩碧玉簡。飛仙相答酬。酒醒墮何處。樓臺海山秋。訪楊先輩不遇。因至石室。

訪客客已去。追涼成獨行。衣冠嚴漢殿。草木拱秦城。古甃蒼苔滑。空庭落日明。出門還懍恍。列屋打碑聲。  
糖東卽石經堂。

病酒戲作

新秋風月佳。數夕破酒戒。飲少輒醉眠。衰早頗自怪。高春未離枕。眩轉疑屋壞。家人具雞豚。熟視不能嘔。尙無千里尊。敢覓鏡湖蟹。一盃苦蕒齋。價直娑婆界。

訪昭覺老

久矣耆年罷送迎。喜聞革履下堂聲。遊山笑我慕直去。過夏憐君太瘦生。庭際楠陰凝晝寂。牆頭鵲語報秋晴。功名已付諸賢了。長作閑人樂太平。

晝臥

秋暑侵人氣力微。燒香高枕掩齋扉。弄姿野曠晴猶斂。作態江雲晚未歸。身外極知皆夢事。世間隨處有



危機。故山松菊今何似。晚矣淵明悟昨非。

晚步江上

萬里橋邊帶夕陽。隔江漁市似清湘。山林獨往吾何恨。車馬交流渠自忙。高柳陰中扶拄杖。平沙穩處據胡牀。故人京國無消息。安得相攜共此涼。

夜坐

大風橫吹斗柄折。迅雷下擊山壁裂。放翁閉戶寂不聞。楞嚴卷盡燈花結。

夜行

紅藤拄杖扶衰病。村北村南破夜行。閑繞長堤逐螢火。戲臨荒沼問鼃聲。倦遊但有筇筴興。久客真諳襪襪情。安得故人同一醉。三更城上看河傾。

悲秋

一拋蓑笠雪溪舟。八載梁州復益州。纔破繁華海棠夢。又驚搖落井梧秋。曉班無復趨行殿。晚境惟思老寢丘。病肺經旬疎酒盞。愁來惟是上南樓。

城北青蓮院方丈壁間有畫燕子者過客多題詩予亦戲作二絕句

一雙掠水燕來初。萬點飛花社雨餘。辛苦成巢君勿笑。從來吾亦愛吾廬。

又

明窗短壁拂蛛絲。常是江邊送客時。留滯錦城生白髮。不如巢燕有歸期。

睡起

閑身喜午睡。睡起日猶早。茂竹青入簷。幽花紅出草。苔錢亦滿砌。護惜不忍掃。宦情本自疎。此地可忘老。

天涯

天涯到處自生愁。游子征塵暗弊裘。燈火青檠五門夜。風煙索莫二江秋。帝城漫誦新詩句。客路難逢舊輩流。送老把茅須早決。此生何止四宜休。

暇日行城上同行追不能及

疾步登城殊未衰。欣然一笑擲筇枝。正當閑似白鷗處。不減健如黃犢時。秋野煙雲橫慘淡。暮天樓閣倚參差。高吟醉舞忘歸去。乞與丹青畫怪奇。

感秋

西風繁杵擣征衣。客子關情正此時。萬事從初聊復爾。百年彊半欲何之。畫堂蟋蟀怨清夜。金井梧桐辭故枝。一枕淒涼眠不得。呼燈起作感秋詩。

雙流旅舍

孤市人稀冷欲冰。昏昏一盞店家燈。開門拂榻便酣寢。我是江南行腳僧。

又

西風黃葉滿江村。瘦馬來穿渡口雲。動地傳呼逢醉尉。誰何禁殺故將軍。

又

每因髀肉歎身閑。聊欲勤勞鞍馬間。黑稍黃旗端未免。會衝風雪出榆關。

早行至江原

喔喔鳴雞促起程。翻翻飛鷺導孤征。節旄盡落歸猶遠。帶眼頻移瘦自驚。小市蕭條黃葉滿。斷橋零落綠苔生。居人猶復多愁思。何況天涯倦客情。

安仁道中

千古臨邛路。飄然偶獨遊。病身那迫老。遠客更禁秋。水退橋未葺。渡閑船自流。飛騰付年少。回首思悠悠。

又

三驛未爲遠。衰翁愁出門。貪程多卒卒。失睡每昏昏。天大圍平野。江回隔近村。何時有餘俸。小築占雲根。

八月十四夜三叉市對月

去年看月籌邊樓。雲罅微光如玉鉤。主人不樂客歎息。清歌空送黃金舟。今年看月三叉市。纖雲不作良宵祟。素娥命駕洗客愁。我亦傾杯邀共醉。風露萬里方渺然。冰輪無轍行碧天。盈盈耿耿意無盡。月不忍落人忘眠。一言欲報廣寒殿。茅簷華屋均相見。明年萬事不足論。但願月滿人常健。

豐橋旅舍作

我本山林人心期。在塵表。出門消底物。兩屨萬事了。羣兒何足愠。爲爾常悄悄。今朝山中路。更喜相識少。三叉市人醉爭席。豐橋逆旅留饋食。小婦梳髻高一尺。梭聲札札當戶織。

文君井

落魄西州泥酒盃。酒酣幾度上琴臺。青鞋自笑無羈束。又向文君井畔來。  
相如琴臺在成都城中。文君井在邛州。相傳爲卓氏故宅。

白鶴館夜坐

竹聲風雨交。松聲波濤翻。我坐白鶴館。燈青無晤言。廓然心境寂。一洗吏卒喧。  
袖手哦新詩。清寒媿雄渾。屈宋死千載。誰能起九原。中間李與杜。獨招湘水魂。自此競摹寫。幾人望其藩。  
蘭苕看翡翠。煙雨啼青猿。豈知雲海中。九萬擊鵬鷖。更闌燈欲死。此意與誰論。

南津勝因院亭子

南江平無風。如鏡新拂拭。漁舟不點破。潏潏千頃碧。闌干西北角。雲散山爭出。  
陂陁競南走。翠入窗戶窄。江山不世情。作意娛此客。豈無尊中酒。豪飲非宿昔。  
明當還成都。塵土埋馬跡。後巖在眼中。飛去無羽翼。  
後巖在鳳凰山後七八里。山水尤奇絕。

登邛州譙門門三重其西偏有神仙張四郎畫像張蓋隱白鶴山中

浮雲在腳底。千里在眼邊。攀躋忽至此。倚柱眩欲顛。車馬細如螻。紛紛衢路間。  
嗟汝何爲者。馳驅窮歲年。我本澹蕩人。此心實愛閑。向來出處際。不媿咫尺天。  
風吹哦詩聲。十里搖西山。懸知老仙翁。爲我一粲然。

書寓舍壁

天與癡頑不解愁。未埋病骨且閑遊。山於拄杖橫時看。路到芒屨破處休。  
初擬燒丹住南嶽。卻因學劍客西州。秋風巾褐添蕭爽。又作臨邛十日留。

又

落佩頽冠慣放慵。經旬寓館古臨邛。西偏取路橫穿竹。北向開門倒看松。醉後蹇驢歸薄暮。閑來支枕睡高春。鶴鳴山谷曾遊處。剩欲扶犁學老農。鶴鳴一名鶴鳴在邛之大邑縣。

次韻使君吏部見贈時欲遊鶴山以雨止

蟆頤江上約同行。白鶴峯前辱寄聲。青史功名男子事。後堂歌舞故人情。午甌誰致葉家白。春甕旋撥郎官清。登覽不嫌鳩喚雨。十年芒屨慣山程。

西巖翠屏閣

把酒孤亭半日留。西巖獨擅鶴山秋。也知絕境終難賦。且喜閑身得縱遊。鶻起危巢時磔磔。鹿鳴深澗暮呦呦。人生適意方爲樂。甲第朱門祗自囚。

幽居院

久墮塵沙裏。幽尋始此行。侵雲千嶂合。披草一僧迎。薜潤泉時滴。崖傾竹倒生。登高忽平曠。回首失崢嶸。老矣猶孤客。歸哉念耦耕。結廬殊未定。此地頗關情。

中溪

散人無俗事。日日山中行。今朝中溪寺。妙絕不可名。幽處萬木合。忽然千頃平。綠黛染晴嶂。白雲如玉城。巖花勸小酌。天風吹獨醒。雖無九臯鶴。奇哉此松聲。我如折翼鵬。回盡九萬程。脫屣擲拄杖。於此餞餘生。天台院有小閣下臨官道予爲名曰玉霄

竹輿衝雨到天台。綠樹陰中小閣開。勝作玉霄君會否。要知散吏按行來。予所領崇道觀。蓋在天台山中。玉霄峯下。

山中小雨得宇文使君簡問嘗見張仙翁乎戲作一絕

張仙挾彈知何往。清嘯穿林但可聞。拾得鐵丸無處用。爲君打散四山雲。張四郎常挾彈。視人家有災疾者。輒以鐵丸擊散之。

雨中山行至松風亭忽澄霽

煙雨千峯擁髻鬟。忽看青嶂白雲間。卷藏破墨營丘筆。卻展將軍著色山。

贈宋道人

我不如昔人騎鶴上九天。玉簡奏事虛皇前。平生齋養氣纔全。兩腳馳走輕如煙。烏道懸崖忽飛騫。戲擲短劍聲鏗然。轉盼跳下千仞淵。已復取劍升層巔。猿猴俊鶻爭後先。飢食松花掬飛泉。金骨綠髓漸凝堅。口哦七字黃庭篇。西來欲訪挾彈仙。丹經劍訣更精研。嗟哉一失五百年。作詩付子勿妄傳。

自山中泛舟歸郡城

我呼小艇浮南津。落日亂山銜半輪。背船雙鷺低掠水。下灘峭風冷逼人。中流回望始太息。煙中白塔高嶙峋。適從彼來忽在此。老夫拄杖捷有神。尉曹堆盤笠澤膾。秀才瀉榼中山春。豈惟外物不挂眼。醉後兀爾忘吾身。朝冠行卽挂神武。買犢遂欲耕峨眉。金丹自喜日日長。白髮未許年年新。擁橋炬火遠已闌。歸舍睡息清而勻。明朝笑謂同載客。有腳莫踏東華塵。

次韻宇文使君山行

城中望西山，爽氣固可致。不如山中行，衣屨染濃翠。使君資高逸，鐵馬奏橫吹。平郊何曠蕩，修竹亦清閤。既聞蘇門嘯，遂挹浮丘袂。似嫌太清絕，開宴盡主意。戲留楚臺雲，寶曆鬪姿媚。珠貫按歌聲，泉湧發詩思。歸來殊不倦，吏牘闕千紙。卻笑江左人，把酒輒遺事。下客亦未衰，尙可提萬騎。安能學胡公，危苦寄鶴翅。仙人胡安學，道西巖跨鶴上昇。山以此得名。

同王無玷羅用之訪臨邛道士墓

樂天詩句本嘲談，那有人從碧海來。五百年間逢好事，披榛來訪此崔嵬。

登太平塔

我從平地來，忽寄百尺巔。眼力與脚力，初不減少年。漸高山愈出，杳杳浮雲煙。舉手捫參旗，日月磨螳旋。天風忽吹衣，便欲從此仙。且復下梯去，著書未終篇。

中夜投宿修覺寺

陸走崔嵬水下瀧，客中更復客它邦。晚離方井雲藏市，夜渡新津火照江。人語紛紛投野寺，牀敷草草寄僧窗。五更風雨妨歸夢，臥看殘燈吐半缸。

絕勝亭

蜀漢羈遊歲月侵，京華乖隔少來音。登臨忽據三江會，飛動從來萬里心。地勝頓驚詩律壯，氣增不怕酒盃深。一琴一劍白雲外，揮手下山何處尋。

雲谿觀竹戲書二絕句

氣蓋冰霜勁有餘。江邊見此列仙癯。清寒直入人肌骨。一點塵埃住得無。

又

溪光竹色兩相宜。行到溪橋竹更奇。對此莫論無肉瘦。閉門可忍十年飢。

九月十日如漢州小獵於新都彌牟之間投宿民家

適從邛州歸。又作漢州去。天低慘欲雪。遊子悲歲暮。十年辭京國。疋馬厭道路。野火炎高岡。江雲暗空戍。角弓寒始勁。霜鶻飢更怒。邂逅成小獵。尺箠聊指呼。北連武侯祠。南並稚子墓。合圍蹙窮鹿。設伏截狡兔。壯哉帶箭雉。耿介死不顧。吾寧暴天物。戰法因得寓。黃昏過民家。休馬燎裘袴。割鮮盛燔炙。毛血灑庭戶。老姥亦復奇。汛掃邀我駐。丈夫儻未死。千金酬此遇。

獵罷夜飲示獨孤生

客途孤憤只君知。不作兒曹怨別離。報國雖思包馬革。愛身未忍貨羊皮。呼鷹小獵新霜後。彈劍長歌夜雨時。感慨卻愁傷壯志。倒瓶濁酒洗餘悲。

又

關輔何時一戰收。蜀郊且復獵清秋。洗空狡穴銀頭鶻。突過重城玉腕騶。賊勢已衰真大慶。士心未振尙私憂。一樽共講平戎策。勿爲飛鳶念少游。

又



白袍如雪寶刀橫。醉上銀鞍身更輕。帖草角鷹掀兔窟。憑風羽箭作鷗鳴。關河可使成南北。豪傑誰堪共死生。欲疏萬言投魏闕。燈前攬筆涕先傾。

自廣漢歸宿十八里草市

月黑叩店門。燈青坐牀簀。飯麤雜沙土。菜瘦等草棘。泰然均一飽。未覺異玉食。我豈兒女哉。口腹爲怨德。古人恥懷祿。不仕當力穡。從今扶犁手。終老謝翰墨。

東郊飲村酒大醉後作

丈夫無苟求。君子有素守。不能垂竹帛。正可死隴畝。邯鄲枕中夢。要是念所有。持枕與農夫。亦作此夢否。今朝櫟林下。取醉村市酒。未敢羞空囊。爛熳詩千首。

九月十八夜夢避雨叩一僧院有老宿年八十許邀留甚勤若舊相識者夢中爲賦此詩

畫簷急雨傾高秋。夜投丈室燈幽幽。耆年擁毳雪滿頭。拂拭牀敷邀我留。離硯戲擲香出喉。蓬蓬結成蒼玉毬。蠻童揭簾侍者憂。觸散香煙常罰油。

秋晚登城北門

幅巾藜杖北城頭。卷地西風滿眼愁。一點烽傳散關信。兩行雁帶杜陵秋。山河興廢供搔首。身世安危入倚樓。橫槊賦詩非復昔。夢魂猶繞古梁州。



# 陸放翁集

劍南詩稿

卷第九

秋興

成都城中秋夜長。燈籠蠟紙明空堂。高梧月白繞飛鵲。衰草露溼啼寒螿。堂上書生讀書罷。欲眠未眠偏斷腸。起行百匝幾歎息。一夕綠髮成秋霜。中原日月用胡曆。幽州老酋著柘黃。滎河溫洛底處所。可使長作旃裘鄉。百金戰袍鷓鴣盤。三尺劍鋒霜雪寒。一朝出塞君試看。且發寶雞暮長安。

夜飲

引劍酣歌亦壯哉。要君共覆手中盃。秋鴻陣密橫江去。暮角聲酣戰雨來。莫恨皇天無老眼。請看白骨有青苔。中年倍覺流光速。行矣西郊又見梅。

暮秋

時序中年速。風霜客路長。孤愁巴月白。清夢楚山蒼。燈暗秋銜壁。鐘疎夜殷床。端居有微祿。不敢恨殊方。

又

萬里歸無策。八年淹此留。羞蒙子公力。寧倦長卿遊。聽雨瀟湘夜。飛鷹鄴杜秋。更須論富貴。此計亦悠悠。

夜雨有感

北風吹雨暗江郊。十月僧廬旋補苴。病馬敢希三品料。驚禽聊借一枝巢。少時諸老爭求識。晚歲殊方罕定交。閉戶不妨新得趣。丹經盈篋手親抄。

道室

一室冷如冰。人疑在定僧。手稱丹竈火。紗護佛龕燈。食減形雖槁。心虛氣自凝。平生坐忘論。字字欲銘膺。

飯罷戲作

南市沽濁醪。浮蠶甘不壞。東門買彘骨。醃醬點橙醃。蒸雞最知名。美不數魚蟹。輪囷犀浦芋。磊落新都菜。欲廣老饕賦。畏破頭陀戒。況予齒日疎。大嚼敢屢嘍。杜老死牛豕。千古懲禍敗。閉門餌朝霞。無病亦無債。

初冬夜宴

絲管紛紛燭滿堂。梟盧擲罷夜飛觴。帷犀風定歌雲暖。香獸煙濃漏箭長。泛菊已成前日夢。探梅又續去年狂。醉歸自笑摧頹甚。冷逼貂裘怯曉霜。

冬夜醉歸復小飲

野外歸來晚。空庭露氣新。乍晴雲妬月。多病酒欺人。倚杖行吟久。投盃起舞頻。早梅消息動。春事漸關身。

病酒述懷

閑處天教著放翁。草廬高臥筇橋東。數莖白髮悲秋後。一醜青燈病酒中。李廣射歸關月墮。劉琨嘯罷塞雲空。古人意氣憑君看。不待功成固已雄。

數日暄妍頗有春意。予閑居無日不出遊戲作

小春花蕾索春饒。已有暄風入紫貂。村路雨晴鳩婦喜。射場草綠雉媒嬌。苑邊結客飛金勒。樓上誰家弄玉簫。莫怪夕陽歸獨後。早梅喚我度谿橋。蜀宣華苑在摩訶池上。

遣興

蒼舊日凋謝將如此。老何漣拈如意舞。狂叩唾壺歌郡縣。輕民力封疆恃虜和。功名莫看鏡。吾意已蹉跎。

趙將軍并序

客爲予言靖康建炎間。關中奇士趙宗印者。提義兵擊虜。有衆數千。所向輒下。虜不敢當。會王師敗於富平。宗印知事不濟。大慟於王景略廟。盡以金帛散其下。被髮入華山。不知所終。予感其事。爲作此詩。

我夢遊太華。雲開千仞青。擘山瀉黃河。萬古仰巨靈。往者禍亂初。氛祲於太寧。豈無臥雲龍。一起奔風霆。時事方錯謬。三秦盡羶腥。山河銷王氣。原野失大刑。將軍散髮去。短劍斷茯苓。定知三峯上。爛醉今未醒。

江樓醉中作

淋漓百榼宴江樓。秉燭揮毫氣尚遒。天上但聞星主酒。人間寧有地埋憂。生希李廣名飛將。死慕劉伶贈醉侯。戲語佳人頻一笑。錦城已是六年留。退之詩云。越女一笑三年留。

曳策遊房園作

慈竹蕭森拱廢臺。醉歸曳策一徘徊。紛紛落日牛羊下。黯黯長空霰雪來。三峽猿催清淚落。兩京梅傍戰塵開。客懷已是淒涼甚。更聽城頭畫角哀。

謁漢昭烈惠陵及諸葛公祠宇

雨止風益豪。雪作雲不動。淒涼漢陵廟。衰草臥翁仲。畫妓空笙竽。土馬闕羈鞅。壤沃黃犢耕。柏密幽鳥哢。尚想忠武公。身任社稷重。整整渭上營。氣已無岐雍。少須天意定。破賊寧患衆。興亡信有數。星隕事可痛。陵邊四五家。茆竹居接棟。手鞞紙上箔。居民皆以造紙爲業。酷熟酒鳴甕。雖嗟生理微。亦足追飢凍。劉葛固雄傑。閱世均一夢。論高常近迂。才大本難用。九原不可作。再拜臨風慟。

遙夜

遙夜雨聲急。惜惜窗戶幽。開編堯舜在。得句鬼神愁。同俗愚儒臯。容身壯士羞。燈殘不成睡。曉角動南樓。

遠遊

遠遊行復歲華新。嬾學劉郎問大鈞。一點不蒙稽古力。十分合作臥雲身。苦寒與酒頓增價。小雨爲梅先辟塵。擬佩一壺江路去。花邊醉墮白綸巾。

大雪歌 累日作雪竟不成戲賦此篇

長安城中三日雪。潼關道上行人絕。黃河鐵牛僵不動。承露金盤凍將折。虬鬚豪客狐白裘。夜來醉眠寶釵樓。五更未醒已上馬。衝雪卻作南山遊。千年老虎獵不得。一箭橫穿雪皆赤。擎空爭死作雷吼。震動山林裂崖石。曳歸擁路千人觀。觸體作枕皮蒙鞍。人間壯士有如此。胡不來歸漢天子。

簡譚德稱

幼輿骨相稱山巖。自要閑遊不避讒。錦里先生爲老伴。玉霄散吏是頭銜。探春苑路花箋帽。看月江樓酒

滿衫惟恨題詩無逸氣。媿君陣馬與風颿。

排悶

世事何知與願違。十年高臥看羣飛。獵圍花市無人問。漁艇煙村有夢歸。銀燭焰長搖酒浪。寶刀佩穩壓戎衣。君看白首寒窗客。俠氣縱橫亦未非。

夜意

名姓人誰記。形骸老漸侵。酒慳停劇飲。詩退負高吟。雨隔疎更斷。雲藏古院深。衰遲常兀兀。惆悵少年心。

又

心清知睡少。氣定覺神凝。但有一無媿。何妨百不能。燈昏如隔霧。研冷欲生冰。兀爾遺身世。東窗待日升。

又

瘴地晨霜薄。郊墟暮雨昏。啼螿如有恨。微火解相溫。末路真無策。孤忠敢自言。輪囷肝膽在。白首倚乾坤。

玉局觀拜東坡先生海外畫像

商周去不還。盛哉漢唐宋。蘇公本天人。謫墮爲世用。太平極嘉祐。珠玉始包貢。公車二千牘。字字爰飛動。氣力倒犀象。律呂諧鸞鳳。天驥西極來。矯矯不受鞿。飛騰上臺閣。廢放落雲夢。至寶不侵蝕。終亦老侍從。晚途遷海表。萬里天宇空。豈惟騎鯨魚。遂欲跨螭螭。心空物莫撓。氣老筆愈縱。糝糠郊祀歌。遠友清廟頌。我生雖後公。妙句得吟諷。整衣拜遺像。千古尊正統。

心太平菴余取黃庭語名所寓室

天下本無事。庸人擾之耳。胸中故湛然。忿欲定誰使。本心倘不失。外物真一螻。困窮何足道。持此端可死。空齋夜方中。窗月淡如水。忽有清磬鳴。老夫從定起。

訪客至西郊

撼撼敗葉飛。黯黯寒雲低。村墟與市里。觸目一慘淒。今日病體輕。駕言適城西。丹柿滿野店。青帘出江隄。獵騎載雉兔。樵擔懸鷄雞。居人各自得。使我念故谿。故谿不敢說。況復朝金閨。傷哉鬻雪翁。歲晚猶牧羝。下愚不自還。大惑終身迷。君恩何由報。力耕愧黔黎。

得都下八月書報蒙恩收鉉州

鳳城書到錦江邊。故里歸期愈渺然。掌上山川初入夢。壺中日月尙經年。方輪落落難推轂。倦馬駸駸怕著鞭。未佩魚符無吏責。看花且作拾遺顛。戊期尙在明年冬

晚起

寶劍捐書絕世緣。掩關高枕送流年。久從道士學踵息。誰管門生嘲腹便。化蝶飛時嗟昨夢。睡蛇去後喜安眠。欠伸看起東窗日。也似金鑾過八軛。

又

學道逍遙心太平。幽窗鼻息撼牀聲。柳花無蒂蠻氈煖。龜甲有紋繪帳明。候起兒童陳盥櫛。笑衰人客闌柴荆。此生睡足無餘念。安用元戎報五更。

江樓吹笛飲酒大醉中作



世言九州外，復有大九州。此言果不虛，僅可容吾愁。許愁亦常有，許酒吾酒釀。盡銀河流，酌之萬斛瓊。瓊舟酣宴五城十二樓，天爲碧羅幕。月作白玉鉤，織女織慶雲。裁成五色裘，披裘對酒難爲客。長揖北辰相獻酬，一飲五百年。一醉三千秋，卻駕白鳳驂。班虬下與麻姑戲，玄洲錦江吹笛餘。一念再過劍南應，小留。

晚登子城

江頭作雪雪未成，北風吹雲如有營。驅車出門何所詣，一放吾目登高城。城中繁雄十萬戶，朱門甲第何崢嶸。錦機玉工不知數，深夜窮巷聞吹笙。國家自從失河北，煙塵漠漠暗兩京。胡行如鬼南至海，寸地尺天皆苦兵。老吳將軍獨護蜀，坐使井絡無檣槍。名都壯邑數千里，至今不聞戎馬聲。安危自古有倚伏，相持默默非敵情。棘門灞上勿兒戲，犬羊豈憚渝齊盟。

夙興出謁

嗜酒狂無敵，居家嬾有餘。苦寒愁手版，美睡付肩輿。覓句吟哦慣，逢人省識疎。亦知歸去好，無地著蝸廬。

十一月三日過升仙橋作

早過升仙不暇炊，橋邊買甃療朝飢。紛紛滿座誰能識，大似新豐獨酌時。

又

鬩手金鞭天馬駒，冰河雪谷笑談無。只言燕趙多奇士，豈必書生盡腐儒。

又

橋邊沙水綠蒲老，原上煙蕪黃犢閑。老子真成興不淺，憑鞍歸夢遶家山。

遣興

蓬壺舊隱已微茫。浪迹紅塵樂未央。縱酒山南千日醉。看花劍外十年狂。新詩刻燭驚詞客。駿馬追風戲鞠場。要是世間男子事。不須臺省競飛翔。

草堂拜少陵遺像

清江抱孤村。杜子昔所館。虛堂塵不掃。小徑門可款。公詩豈紙上。遺句處處滿。人皆欲拾取。志大才苦短。計公客此時。一飽得亦罕。阨窮端有自。寧獨坐房琯。至今壁間像。朱綬意蕭散。長安貂蟬多。死去誰復算。

青羊宮小飲贈道士

青羊道士竹爲家。也種玄都觀裏花。微雨晴時看鶴舞。小窗幽處聽蜂衙。藥爐宿火熒熒煖。醉袖迎風獵獵斜。老我一官真漫浪。會來分子淡生涯。

夜寒

清夜焚香讀楚詞。寒侵貂褐歎吾衰。輕冰滿研風聲急。忽記山陰夜雪時。

又

斗帳重茵香霧重。膏粱那可共功名。三更騎報河冰合。鐵馬何人從我行。

書懷

武擔山上望京都。誰記黃公舊酒壚。宿負本宜輸左校。寬恩猶聽補東隅。一官漫浪行將老。萬卷縱橫只自愚。甫里松陵在何許。古人投劾爲專鱸。

記夢

烏巾白紵憶當年。抵死尋春不自憐。顛顛劍南雙鬢改。夢中猶上暗門船。

又

團臍霜蟹四腮鱸。樽俎芳鮮十載無。塞月征塵身萬里。夢魂也復醉西湖。

醉中出西門偶書

古寺閑房閉寂寥。幾年耽酒負公朝。青山是處可埋骨。白髮向人羞折腰。末路自悲終老蜀。少年常願從征遼。醉來挾箭西郊去。極目寒蕪雉兔驕。

訪客不遇

風急斜吹帽。泥深亂濺衣。杜門常畏罵。訪客卻空歸。老馬舉蹄懶。枯槐無葉飛。馳驅幾時了。散髮憶苔磯。

劍客行

世無知劍人。太阿混凡鐵。至寶棄泥沙。光景終不滅。一朝斬長鯨。海水赤三月。隱見天地間。變化豈易測。國家未滅胡。臣子同此責。浪迹潛山海。歲晚得劍客。酒酣脫匕首。白刃明霜雪。夜半報讎歸。斑斑腥帶血。細讎何足問。大恥同憤切。臣位雖卑賤。臣身可屠裂。誓當函胡首。再拜奏北闕。逃去變姓名。山中餐玉屑。故蜀別苑在成都。西南十五六里梅。至多有兩大樹。天矯若龍。相傳謂之梅龍。予初至蜀。嘗爲作詩。自此歲常訪之。今復賦一首。丁酉十一月也。

昔年曾賦西郊梅。茫茫去日如飛埃。卽今衰病百事懶。陳迹未忘猶一來。蜀王故苑犁已遍。散落尙有千

雪堆珠樓玉殿一夢破。煙蕪牧笛遺民哀。兩龍臥穩不飛去。鱗甲脫落生莓苔。精神最遇雪月見。氣力苦戰冰霜開。羈臣放士耿獨立。淑姬靜女知誰媒。摧傷雖多意愈厲。直與天地爭春回。蒼然老氣壓桃李。笑我白髮心尙孩。微風故爲作嫵媚。一片吹入黃金罍。

閑意

柴門雖設不曾開。爲怕人行損綠苔。妍日漸催春意動。好風時捲市聲來。學經妻問生疎字。嘗酒兒斟澀盃。安得小園寬半畝。黃梅綠李一時栽。

飲罷夜歸

老病畏多酌。退閑愁夜行。市燈疎欲盡。樓月澹初生。露冷莎蛩咽。天高塞雁征。歸來差自喜。擁被聽疎更。

江亭冬望

霜落江清水見魚。偶來徙倚草亭孤。雪天黯淡常如晚。煙樹微茫直欲無。下澤乘車終碌碌。上方請劍漫區區。擬將疎逸消豪氣。尋罷酒徒尋獵徒。

大風登城

風從北來不可當。街中橫吹人馬僵。西家女兒午未粧。帳底爐紅愁下牀。東家喚客宴畫堂。兩行玉指調絲簧。錦繡四合如垣牆。微風不動金猊香。我欲登城望大荒。勇欲爲國平河湟。才疎志大不自量。西家東家笑我狂。

書雨

仲冬候始寒。內夜天正黑。雨來挾風助。吼擊不遺力。聲如拔高山。勢若伐強國。初憂老柏折。遂恐石筍踣。乾坤本無心。百神各效職。蛟龍鬪歲暮。豪橫理莫測。農功幸已成。龍怒亦會息。屋漏何足言。袖手姑默默。

一笑

半醉微吟不怕寒。江邊一笑覺天寬。莫愁艇子急衝雨。何遜梅花頻倚闌。萬事任從皮外去。百年聊作夢中觀。放翁縱老狂猶在。倒盡金壺燭未殘。

歲晚懷鏡湖舊隱慨然有作

公府還家鬢未秋。鏡湖南畔決歸休。讀書精舍豈輕出。采藥名山成遠遊。白墮興來猶小醉。青精材足更何求。俗間毀譽惟堪笑。常隘韓公咎斗牛。

華髮

華髮蕭蕭老蜀關。倦飛可笑不知還。人生只似駒過隙。世事莫驚雷破山。光景半銷樽酒裏。英豪或隱博徒間。車帷閉置真何樂。書劍飄然未厭閑。

歎息

國家圖籙合中興。歎息吾寧粥飯僧。賣劍買牛衰可笑。壞裳爲袴老猶能。曉過射圃雲藏壘。夜讀兵書雨灑燈。安得龍媒八千騎。要令窮虜畏飛騰。

冬至

歲月難禁節物催。天涯回首意悲哀。十年人向三巴老。一夜陽從九地來。上馬出門愁斂版。還家留客強

傳杯探春漫道江梅早盤裏酥花也鬪開

城南尋梅得

老子今年嬾賦詩風光料理鬢成絲青羊宮裏春來早初見梅花第一枝

又

黯淡江天雪欲飛竹籬數掩傍苔磯清愁滿眼無人說折得梅花作伴歸

又

青煙漠漠暗西村問訊梅花置一尊冷淡生涯元不惡卻嫌歌吹合江園成都故事合江園官梅開及五

分即府尹領客來遊

又

籬邊細路竹間庵一段風流擅劍南吾國以香爲佛事客來試向鼻端參

書歎

歷盡危塗井與參鬢毛飽受雪霜侵平生不可俗子眼後世誰知吾輩心河洛方行胡正朔山林虛度醉  
光陰浩歌未闕先投枕衰病常憂感慨深

感興

少小遇喪亂妄意憂元元忍飢臥空山著書十萬言賊亮負函貸江北煙塵昏奏記本兵府大事得具論  
請治故臣罪深絕衰亂根言疎卒見棄袂有血淚痕爾來十五年殘虜尙遊魂遺民淪左袵何由雪煩冤

我髮日益白，病骸寧久存。常恐先狗馬，不見清中原。

又

高帝王蜀漢，天下豈易圖。幡然用其鋒，項羽不支梧。嗟余昔從戎，久戍南鄭墟。登高望夕烽，咫尺咸陽都。羣胡本無政，剽奪常自如。民窮訴蒼天，日夜思來蘇。連年況枯旱，關輔尤空虛。安得節制帥，弓刀肅馳驅。父老上牛酒，善意不可孤。諸將能辦此，機會無時無。

暮冬夜宴

官機錦茵金蹙鳳，舞娃釵墮雙鬟重。寶爐三尺香吐霧，畫燭如椽風不動。主人愛客情無已，箏聲未斷歌聲起。亦知百歲等朝露，使恐一歡成覆水。爐紅酒綠春爲回，坐上梅花連夜開。堂前咫尺異氣候，冰合平池霜壓階。

枕上

枕上三更雨，天涯萬里遊。蟲聲憎好夢，燈影伴孤愁。報國計安出，滅胡心未休。明年起飛將，更試北平秋。

謁石犀廟

閑過石犀祠，登堂一歎秋。江回陵谷變，碑斷市朝非。有王蜀時修廟碑銘荒圃連寒壠，斜陽映夕霏。興亡俱昨夢，惆悵跨驢歸。

江上散步尋梅偶得三絕句

小園風月不多寬，一樹梅花開未殘。剝啄敲門嫌特地，緩拖藤杖隔籬看。

又

鐘殘小院欲消魂。漠漠幽香伴月痕。江上人家應勝此。明朝更出小南門。萬里橋門一名小南門。

又

小南門外野人家。短短疎籬繚白沙。紅稻不須鸚鵡啄。清霜催放兩三花。

漣漪亭賞梅

判爲梅花倒玉卮。故山幽夢憶疎籬。寫真妙絕橫窗影。徹骨清寒蘸水枝。苦節雪中逢漢使。高標澤畔見湘纍。詩成怯爲花拈出。萬斛塵襟我自知。

芳華樓賞梅

素娥竊藥不奔月。化作江梅寄幽絕。天工丹粉不敢施。雪洗風吹見真色。出籬藏塢香細細。臨水隔煙情脈脈。一春花信二十四。縱有此香無此格。放翁年來百事惰。唯見梅花愁欲破。金盞列置春滿屋。寶髻斜簪光照坐。百榼淋漓玉墜飛。萬人辟易銀鞍過。不惟豪橫壓清臞。聊爲詩人洗寒餓。

浣花賞梅

老子人間自在身。插梅不惜損烏巾。春回積雪層冰裏。香動荒山野水濱。帶月一枝低弄影。背風千片遠隨人。石家樓上貪吹笛。肯放朝朝玉樹新。

蜀苑賞梅

十里溫香撲馬來。江頭遠見去年梅。喜開剩欲邀明月。愁落先教掃綠苔。跌宕放翁新醉墨。淒涼廢苑舊



歌臺盛衰自古無窮事。莫向昆明歎劫灰。

大醉梅花下走筆賦此

閉門坐歎息。不飲輒千日。忽然酒興生。一醉須一石。檐頭花易老。旗亭酒常窄。出郊索一笑。放浪謝形役。把酒梅花下。不覺日既夕。花香襲襟袂。歌聲上空碧。我亦落烏巾。倚樹吹玉笛。人間奇事少。頗謂三觴敵。酒闌江月上。珠樹挂寒壁。使疑從此仙。朝市長掃迹。醉歸亂一水。頓與異境隔。終當騎梅龍。海上看春色。  
梅龍。蓋蜀苑中故物也。

之廣都憩鐵像院

歲暮天苦寒。風雨復乘之。道邊得古寺。欣然具晨炊。瘦樹立中庭。斷蔓絡短籬。小僧爲設爐。童子燒稿枝。坐令手足柔。髭間失冰澌。敬禮龕中像。盡讀廡下碑。少年志四方。故里了不思。晚知行路難。更覺遊子悲。一官始巴樊。剡曲歸何時。置之勿復道。爛醉忘天涯。

廣都江上作

微波不搖江。纖雲不行天。我來倚杖立。天水相澄鮮。平遠望不盡。日落自生煙。梅花耿獨立。雪樹明前川。好風吹我衣。春色已粲然。東村聞酒美。買醉上漁船。

宿龍華山中寂然無一人方丈前梅花盛開月下獨觀至中夜

梅花如高人。枯槁道愈尊。君看空谷豈。比倚市門。我來整冠佩。潔齋三沐熏。亦思醉其下。燕嬌恐濱君。敬抱綠綺琴。玄酒挹古罇。月明流水閑。一洗世濁昏。摸寫香與影。計君已厭聞。老我少傑思。尙喜非陳言。

次韻張季長正字梅花

倚橋臨水似催詩。戲伴鵝黃上柳絲。萬里西湖驚斷夢。二年東閣憶幽期。游讐官唐安。插瓶直欲連全樹。簪帽憑誰揀好枝。一味淒涼君勿歎。平生初不願春知。

次韻季長見示

倚遍南樓十二欄。長歌相屬寓悲歡。空懷鐵馬橫戈意。未試冰河墮指寒。成敗極知無定勢。是非元自要徐觀。中原阻絕王師老。那敢山林一枕安。

廣都道中呈季長

天上石渠郎。能來伴楚狂。風霜朝並轡。燈火夜連牀。江水不勝綠。梅花無賴香。劇談那得住。出處要平章。看梅歸馬上。戲作

平明南出笮橋門。走馬歸來趁未昏。漸老更知閑有味。一冬強半在梅村。

又

本爲梅花判痛飲。卻嗅梅香消宿醒。日欲落時始上馬。青羊宮前開發更。

又

一點不雜桃李春。一水隔斷車馬塵。恨不來爲清夜飲。月中香露溼烏巾。

又

江路疎籬已過清。月中霜冷若爲情。不如折向金壺貯。晝燭銀燈看到明。

又

江郊車馬滿斜暉。爭趁南城未闔扉。要識梅花無盡藏。人人襟袖帶香歸。

別後寄季長

俗子俗到骨。一揖已溷人。不知此曹面。何處得許塵。我非作崖壑。汝自不可親。道途逢使君。令我生精神。頓增江山麗。更覺風月新。對牀得晤語。傾倒夜達晨。亟起忘縛袴。小醉或墮巾。繚出錦城南。問訊江梅春。煎茶憩野店。喚船截煙津。淒涼弔廢苑。蕭散誇閑身。暮歸度略約。月出水鱗鱗。思君去已遠。此會何由頻。

中夜對月小酌

今夕復何夕。素月流清輝。徘徊入我堂。化作白玉墀。栖鳥滿高樹。空庭結煙霏。可憐如許景。早眠人不知。我幸與周旋。一醉那得辭。整我接羅巾。掛我翡翠卮。清愁不可耐。三嗅梅花枝。

客愁

騎馬出門無所詣。端居正爾客愁侵。蒼顏白髮入衰境。黃卷青燈空苦心。天下極知須雋傑。書生何恨死山林。消磨未盡胸中事。梁甫時時尚一吟。

詩酒

酒隱凌晨醉。詩狂徹旦歌。憫憐蝸左角。嘲笑螳南柯。風月隨長笛。江湖入短蓑。平生會心處。最向漆園多。

道室夜意

寒泉漱酒醒。午夜誦仙經。茶鼎聲號蚓。香盤火度螢。齋心守玄牝。閉目得黃寧。寄語山中友。因人送茯苓。

道室晨起

紙帳晨光透。山爐宿火燃。雞鳴猶喔喔。鴉起已翩翩。形槁寒巖木。心凝古澗泉。何須更臨鏡。斷是一癯仙。

城南王氏莊尋梅

澗池積槁葉。茆屋圍疎籬。可憐庭中梅。開盡無人知。寂莫終自香。孤貞見幽姿。雪點滿綠苔。零落尙爾奇。我來不須晴。微雨正相宜。臨風兩愁絕。日暮倚筇枝。

遊萬里橋南劉氏小園

佳園寂無人。滿地梅花香。閑來曳拄杖。臘月日已長。朱橋架江面。欄影搖波光。奇哉小垂虹。夢破鱸魚鄉。汀鷺一點白。煙柳千絲黃。便欲喚釣舟。散髮歌滄浪。可憐隔岸人。車馬日夜忙。我歸門復掩。寂歷挂斜陽。過笮橋道中龍祠小留

江邊龍廟何年作。白浪花中插朱閣。朝暾漸上宿霧收。春氣已動晨霜薄。我來倚欄一悵然。蘆花滿空如柳綿。安得身爲雙白鷺。飛上灘頭卻飛去。

道上見梅花

載酒房湖風日美。探梅喜折一枝新。今朝忽向街頭見。萬萼千跗俗卻春。

倚樓

減盡朱顏白髮新。高樓徙倚默傷神。未酬馬上功名願。已是人間老大身。太史周南方臥疾。拾遺劍外又逢春。一杯且爲江山醉。百萬呼盧迹已陳。

寄王季夷

平生吾子最知心。巴隴飄零歲月侵。萬里喜聞身尙健。五更惟有夢相尋。插花意氣狂如昨。中酒情懷病至今。共約暮年須強飯。天台廬阜要登臨。

丁酉除夕

浮生過五十。光景如飛鴻。寒暑倏仰間。四序忽已終。殊方感飄泊。晚境嗟龍鍾。桃符與爆竹。嬾復隨兒童。不寐非守歲。燕坐夜過中。氣定神自凝。海日何曛曛。豈惟三彭逃。坐覺六入空。徂年勿惆悵。閱世方無窮。正月二日晨。出大東門。是日府公宴移忠院。

小飲落梅下戲作送梅一首

成都春事早。開歲已暄妍。燈尾傳盃後。遨頭出郭前。爭門金驪裹。滿野繡輜軒。白髮花邊醉。何妨似少年。零落梅花不自由。斷腸容易付東流。與人又作經年別。問月應知此夜愁。已是狂風卷平野。更禁橫笛起危樓。何時小雪山陰路。處處尋香繫釣舟。

立春

鬢毛蕭颯寸心灰。生怕新年節物催。幸是身閑朝睡美。忽聞鼓吹打春回。

初春出遊戲作

綠窗百舌喚春眠。問柳尋花意已便。京洛化衣無夢去。邯鄲觀伎有詩傳。銅壺閣下閑欹帽。石鏡坊前戲墜鞭。酒隱人間君勿誚。定勝山澤作臞仙。

初春遣興。始於志退休而終於倦倦許國之忠亦臣子大義也。

爛熟思來怕熱官。退飛心地喜輕安。捨魚正可取熊掌。食肉何須知馬肝。放眼柳梢初暗動。褪花梅子已微酸。典衣剩作江頭醉。莫謂天涯苦鮮歡。

又

大隱悠悠未棄官。俸錢雖薄卻心安。人方得意矜蝸角。天豈使予爲鼠肝。佳日劇棊忘旅恨。短衣馳射壓儒酸。小桃楊柳爭時節。載酒江頭罄一歡。

又

白髮淒涼故史官。十年身不到長安。卽今天末弔形影。何日上前傾肺肝。孤憤書成詞激烈。五噫歌罷意辛酸。此懷欲說無人共。安得相攜素所歡。

予年十六始識葉晦叔於西湖。上後二十七年。晦叔之弟聲叔來爲臨邛守。相遇於成都。晦叔沒久矣。訪其遺文略無在者。乃賦此詩。

故人零落久山丘。誰記京華第一流。曹霸揮毫空萬馬。庖丁投刃解千牛。相逢夢境何勞記。追想清言未免愁。雷電取將遺稿盡。他年虛有茂陵求。

初春探花有作

燈山昨夢歎忽忽。使恐新春過眼空。千縷未搖官柳綠。一梢初放海棠紅。金羈絡馬閑遊處。彩筆題詩半醉中。流落天涯何足道。年年常策探花功。

遊諸葛武侯書臺

沔陽道中草離離。臥龍往矣空遺祠。當時典午稱猾賊。氣喪不敢當王師。定軍山前寒食路。至今人祠丞相墓。松風想像梁甫吟。尙憶幡然答三顧。出師一表千載無。遠比管樂蓋有餘。世上俗儒寧辦此。高臺當日讀何書。

觀花

我遊西川醉千場。萬花成圍柳著行。紅錦地衣舞霓裳。翠帟繡袂天寶粧。清歌一發無留觴。嫋嫋餘聲縈杏梁。黃金絡馬照路光。自護鞿羅觀海棠。搜奇選勝日夜忙。不惟燕宮碧雞坊。暮歸奚奴負錦囊。路人爭看放翁狂。

張園觀海棠

朝陽照城樓。春容極明媚。走馬蜀錦園。名花動人意。嚴粧漢宮曉。一笑初破睡。定知夜宴歡。酒入妖骨醉。低鬟羞不語。困眼嬌欲閉。雖豔無俗姿。太息真富貴。結束吾方歸。此別知幾歲。黃昏廉纖雨。千點裏紅淚。月夕

醉從東郭歸。散髮臨前楹。呼僮淨埽地。勿使斲月明。庭空臥松影。蒼迴送鐸聲。鐘斷心境寂。露下毛髮清。出門碧霧合。九陌無人行。坐令錦官城。化作白玉京。

夜飲卽事

天涯久客我何堪。聊喜燈前得縱談。磊落金盤薦糖蟹。纖柔玉指破霜柑。燭圍寶馬人將起。花墜紗巾酒

正酣更作茶甌清絕夢。小窗橫幅畫江南。

夜宴賞海棠醉書

便便癡腹本來寬。不是天涯強作歡。燕子歸來新社雨。海棠開後卻春寒。醉誇落紙詩千首。歌費纏頭錦百端。深院不聞傳夜漏。忽驚蠟淚已堆盤。

二月十六日賞海棠

常年春半花事竟。今年春半花始盛。衰翁不減少年狂。走馬直與飛蝶競。妍華有露洗愈明。纖弱無風搖不定。莫放飄零作紅雨。剩看倩笑臨粧錦。溪梅枯槁墮巖谷。山杏輕浮真妾媵。欲誇絕豔不勝說。縱欠濃香何足病。華燈銀燭搖花光。翠杓金船豪酒興。夜闌感事獨淒然。繁枝空折誰堪贈。

卽席

解鞅名園眼倍明。殷勤翠袖勸飛觥。海棠紅杏欲無色。蛺蝶黃鸝俱有情。去日不留春漸老。歸舟已具客將行。倦遊短髮無多綠。生怕尊前唱渭城。

東歸有日書懷

萬里橋邊白版扉。三年高臥謝塵鞿。半窗竹影碁僧去。滿棹蘋風釣伴歸。看鏡已添新雪鬢。聽雞重拂舊朝衣。故人零落今無幾。華表空悲老令威。

眉州披風榭拜東坡先生遺像

蜿蜒回顧山有情。平鋪十里江無聲。孕奇蓄秀當此地。鬱然千載詩書城。高臺老仙誰所寫。仰視眉宇寒



崢嶸百年醉魂吹不醒。飄飄風袖筇枝橫。爾來逢迎厭俗子。龍章鳳姿我眼明。北扉南海均夢耳。謫墮本  
自白玉京。惜哉畫史未造極。不作散髮騎長鯨。故鄉歸來要有日。安得春江變酒從公傾。



# 陸放翁集

劍南詩稿

卷第十

訪青神尉解借景亭蓋山谷先生舊遊也

造朝下白帝，弔古遊青神。城頭三間屋，聊得岸我巾。元祐太史公，世寧有斯人。瘴煙侵玉骨，老作宜州民。至今杖屨地，來者猶酸辛。密竹翦已空，喬木亦半薪。陂池獨渺然，中有鷗鷺馴。人生能自足，一尉可終身。三歎下城去，振掩春江津。

舟過玉津

玻璃江上送殘春，疊鼓催飄過玉津。蜀苑鶯花初破夢，巴山風月又關身。幅巾久已忘朝幘，短劍惟思隱市塵。莫倚諸公容此老，西曹那許吐車茵。

敘州

畫船衝雨入戎州，縹緲山橫杜若洲。須信時平邊堠靜，傳烽夜夜到西樓。州治西樓

又

文章何罪觸雷霆，風雨南谿自醉醒。八十年間遺老盡，壞堂無壁草青青。無等院山谷故居

又

陸放翁集 劍南詩稿 卷十

一

(八三三)

楚梅吳檣又遠遊。浣花行樂夢西州。千尋鐵鎖還堪恨。空鎖長江不鎖愁。鎮江亭。

瀘州使君巖在城南一里深。三丈有泉出其左。音中律呂木龍巖。相距亦里許。黃太史所嘗遊憩也。

雲間刁斗過邊州。沙際丘亭艤客舟。漲水方憂三峽險。短筇猶作兩巖遊。蛟龍矯矯擎雲起。琴筑泠泠繞榻流。未死人生誰料得。會來攜客試茶甌。

南定樓遇急雨

行遍梁州到益州。今年又作度瀘遊。江山重複爭供眼。風雨縱橫亂入樓。人語朱離逢峒獠。棹歌欸乃下吳舟。天涯住穩歸心嬾。登覽茫然卻欲愁。

夜泊合江縣月中小舟謁西涼王祠

懸瀑雪飛舞。奇峯玉嶙峋。搖碎一江月。來謁西涼神。我雖不識神。知是山水人。不敢持笏來。衽褐整幅巾。出我囊中香。羞我南谿蘋。杯湛玻璃春。盤橫水精鱗。出門意愉悅。煙波浩無津。安得結茆地。與神永爲鄰。

風順舟行甚疾戲書

昔者遠戍南山邊。軍中無事酒如川。呼盧喝雉連暮夜。擊兔伐狐窮歲年。壯士春蕪臥白骨。老夫晨鏡悲華顛。可憐使氣尙未減。打鼓順流千斛船。

舟中對月

百壺載酒遊凌雲。醉中揮袖別故人。依依向我不忍別。誰似峨眉半輪月。月窺船窗挂淒冷。欲到渝州酒

初醒江空裊裊釣絲風。人靜翩翩葛巾影。哦詩不睡月滿船。清寒入骨我欲仙人間更漏不到處。時有沙禽背船去。

漁翁

江頭漁家結茆廬。青山當門畫不如。江煙淡淡雨疎疎。老翁破浪行捕魚。恨渠生來不讀書。江山如此一句無。我亦衰遲慚筆力。共對江山三歎息。

涪州道中

遠客喜歸路。清遊逾昔聞。雨添山翠重。舟壓浪花分。洛叟經名世。張侯勇冠軍。郡境有伊川先生故居。及張益德祠。懷人不可覩。袖手對爐熏。

涪州

古壘西偏曉繫舟。倚欄搔首思悠悠。欲營丹竈竟無地。地產丹砂不見荔枝空遠遊。官道近江多亂石。人家避水半危樓。使君不用勤留客。瘴雨蠻雲我欲愁。太守招飲辭不往。

北巖有程正叔先生祠堂

艤船涪州岸。攜兒北巖遊。搖櫂橫大江。褰裳躡高樓。雨昏山半失。江漲地欲浮。老矣寧再來。爲作竟日留。烏帽程丈人。閉戶本好修。駭機一朝發。議罪至竄投。黨禁久不解。胡塵暗神州。修怨以稔禍。哀哉誰始謀。小人無遠略。所懷在私讎。後來其鑑茲。賦詩識巖幽。

平都山忠州豐都縣

名山近江步，蠟屐得閑行。奔鹿衝人過，藏丹徹夜明。唐碑多斷蝕，梁殿半欹傾。洞口雲常湧，蒼牙柏再榮。行逢負籠客，臥聽送船聲。乞我誅卯地，靈苗得共烹。

忠州禹廟

古郡巴蠻國，空山夏禹祠。鴉歸暗庭柏，巫拜薦江離。草蔓青緣壁，苔痕紫滿碑。欲歸頻悵望，回棹夕陽時。

忠州醉歸舟中作

耿耿船窗燈火明，東樓飲罷恰三更。不堪酒渴兼消渴，起聽江聲雜雨聲。垂首道塗悲驥老，滿懷風露覺蟬清。蘭亭禹廟山如畫，安得飄然送此生。

雨中遊東坡

木蓮花下竹枝歌，歡意無多感慨多。更恐他年有遺恨，曉來衝雨上東坡。

龍興寺弔少陵先生寓居

中原草草失承平，戍火胡塵到南京。扈蹕老臣身萬里，天寒來此聽江聲。以少陵詩考之，蓋以秋冬間寓此州也。寺門聞江聲甚壯。

遊萬州岑公洞岑公隋時人居此二十年得道仙去

大業征遼發閩左，軍興書檄煎膏火。此時也復有閑人，自引巖泉拾山果。後六百歲吾來遊，洞中正夏淒如秋。乳石床平可坐臥，水作珠簾月作鈎。十年神遊八極表，浮名坐覺秋豪小。試問岑公迎我不，鶴飛忽下青松杪。

萬州放船過下巖小留

畫船四月滿旗風。飲散匆匆鶴首東。醉裏偏憐江水綠。意中已想荔枝紅。斷碑零落莓苔遍。幽澗淙潺路約通。一疋寧無好東絹。憑誰畫此碧玲瓏。

白帝泊舟

客路閑無事。津亭爽有餘。峽江春漲減。灩岸夜燈疎。老矣孤舟裏。依然十載初。倦遊思稅駕。更覺愛吾廬。

醉中下瞿唐峽中流觀石壁飛泉

吾舟十丈如青蛟。乘風翔舞從天下。江流觸地白鹽動。灩澦浮波真一馬。主人滿酌白玉盃。旗下畫鼓如春雷。回頭已失灩西市。奇哉一削千仞之蒼崖。蒼崖中裂銀河飛。空裏萬斛傾珠璣。醉面正須迎亂點。京塵未許化征衣。

暮次秣歸

朝披南陵雲。夕揖建平樹。啼鴉隨客橋。落日滿孤戍。惡灘不可說。石芒森如鋸。浪花一丈白。吹沫入窗戶。是身初非我。底處著憂怖。酒酣一枕睡。過盡鮫鱔怒。欣然推枕起。曳杖散予步。殷勤沙際柳。記我維舟處。

歸州重五

鬪舸紅旗滿急湍。船窗睡起亦閑看。屈平鄉國逢重五。不比常年角黍盤。屈平祠在州東南五里歸鄉沱。盍平故居也。

屈平廟

委命仇讎事可知。章華荆棘國人悲。恨公無壽如金石。不見秦嬰係頸時。

楚城

江上荒城猿鳥悲。隔江便是屈原祠。一千五百年間事。只有灘聲似舊時。

新灘舟中作三峽新灘尤險今已平矣

江路桃花浪已生。新灘穩過失崢嶸。九年行半九州地。三峽歸無三日程。繫纜便增筇杖興。倚窗時聽棹歌聲。衰遲未覺詩情減。又羨吳牋賦楚城。

舟出下牢關

大舸凌驚濤。飛度青玉峽。虛壁雲濛濛。陰洞風颯颯。拂天松蓋偃。入水山脚插。炎曦忽摧破。亭午手忘筆。懸知今夜喜。月白宿沙夾。曠哉七澤遊。盟鷗不須歆。

峽口夜坐

三峽至此窮。兩壁猶峭立。估船無時行。婦盍有夜汲。風生樹影動。月碎水流急。草根綴微露。螢火飛熠熠。吾行已四旬。纔抵楚西邑。浩歌散鬱陶。還舟覺衣溼。

峽州甘泉寺

江上甘泉寺。登臨擅一州。山亭喜無恙。老子得重遊。灘急常疑雨。林深欲借秋。歸途更清絕。倚杖喚漁舟。

峽州東山

十年不踏東山路。今日重爲放浪行。老矣判無黃鵠舉。歸哉惟有白鷗盟。新秧刺水農家樂。修竹環溪客



眼明已駕巾車仍小駐。綠蘿亭下聽鶯聲。

江上觀月

暗浪衝舟鞚。鞞聲夷陵城下正三更。十分傾酒禁風力。一點無雲祟月明。久坐不知衣露溼。浩歌時有水禽驚。詩成莫駕長鯨去。自是虛皇白玉京。

初發夷陵

雷動江邊鼓吹雄。百灘過盡失途窮。山平水遠蒼茫外。地闢天開指顧中。俊鶻橫飛遙掠岸。大魚騰出欲凌空。今朝喜處君知否。三丈黃旗舞便風。

舟中夜坐

風露浩無際。星河淡欲傾。遙知並船客。聞我詠詩聲。水鳥橫江去。漁舟背月行。神清不成寐。隱几待窗明。

初到荊州

萬里泛仙槎。歸來鬢未華。蕭蕭沙市雨。淡淡渚宮花。斷岸添新漲。高城咽晚笳。船窗一樽酒。半醉落烏紗。

醉歸

持酒江頭到夕霏。愁城頓覺解重圍。澄波宜月移船看。醉面使風走馬歸。末路已驚添白髮。故人頻報上黃扉。彊隨官簿真成嬾。乞我吳松舊釣磯。

出遊

萬里崎嶇蜀道歸。荊州非復壯遊時。行吟自怪詩情減。坐睡人驚酒量衰。卷地風號雲夢澤。黏天草映伏

波祠一枝藤杖平生事。擊鼓開帆未恨遲。

大堤

日晚大堤行。莽然千里平。天低垂曠野。風壯撼高城。列肆居茶估。連營宿戍兵。纍纍北門堠。淚盡望神京。  
荊州距東都纔十七八程。

阻風

沙市三日風。萬鼓鳴船頭。欲去不得發。臥對青燈幽。聽兒誦離騷。可以散我愁。微言入孤夢。悅與屈宋遊。  
睡起銅瓶響。欣然喚茶甌。吾道無淹速。風伯非所尤。

初發荊州

淋漓牛酒起。檣干健艫飛。如插羽翰。破浪乘風千里快。開頭擊鼓萬人看。鵲聲不斷朝陽出。旗脚微舒宿雨乾。堪笑塵埃洛陽客。素衣如墨據征鞍。

泊公安縣

秦關蜀道何遼哉。公安渡頭今始回。無窮江水與天接。不斷海風吹月來。船窗簾捲螢火鬧。沙渚露下蘋花開。少年許國忽衰老。心析椳樓長笛哀。

劉郎浦夜賦

平生遠遊心。睥睨萬里窄。今年下三巴。放浪浮七澤。菰蒲無遠近。但覺風索索。浪高星辰溼。天碧河漢白。十年散醉髮。未易著朝幘。守符倘可乞。來作瀟湘客。

小雨極涼舟中熟睡至夕

舟中一雨掃飛蠅。半脫綸巾臥翠藤。清夢初回窗日晚。數聲柔艣下巴陵。

岳陽樓

身如病鶴短翅翎。雨雪飄灑號沙汀。天風忽吹不得住。東下巴峽泛洞庭。軒皇張樂雖已矣。此地至今朝百靈。雄樓岌業鎮吳楚。我來舉手捫天星。帆檣纔放已隱隱。雲氣亂入何冥冥。鼃鼃出沒蛟鱗橫。浪花遮盡君山青。黃衫仙翁喜無恙。袖劍近到城南亭。眼前俗子敗人意。安得與翁同醉醒。

再賦一絕

江風吹雨濯征塵。百尺闌干爽氣新。不向岳陽樓上醉。定知未可作詩人。

乘大風發巴陵

雪濺浪方作。翠颭山欲浮。奇哉萬頃湖。著我十丈舟。三老請避風。叱去非汝憂。神物識忠信。壯士憎滯留。擊鼓催挂帆。揮手別岳州。仰視羣鷗翔。下闢百怪囚。衡湘清絕地。恨不從此遊。聊須百斛酒。往醉庾公樓。

通濟口

朝發嘉魚縣。晚泊通濟口。睡起喜微涼。船窗一盃酒。長魚吹浪聲。恐人巨鼃露背浮。齰淪今夕風。生月復暗。寄語舟人更添纜。

醉書

青草渡頭波接天。山翁吟嘯自悠然。朝餐偶過賣魚市。晚泊時逢迎荻船。投老未除游俠氣。平生不作俗

人緣一樽酌罷玻璃酒。高枕窗邊聽雨眠。偶餘眉州酒一樽。獨酌逢醉。

南樓

十年不把武昌酒。此日闌邊感慨深。舟楫紛紛南復北。山川莽莽古猶今。登臨壯士興懷地。忠義孤臣許國心。倚杖黯然斜照晚。秦吳萬里入長吟。

黃鶴樓

手把仙人綠玉枝。吾行忽及早秋期。蒼龍鬬角歸何晚。黃鶴樓中醉不知。江漢交流波渺渺。晉唐遺迹草離離。平生最喜聽長笛。裂石穿雲何處吹。

頭陀寺觀王簡栖碑有感

舟車如識喜身閑。獨訪遺碑草棘間。世遠空驚閬陵谷。文浮未可敵江山。老僧西逝新成塔。舊守東歸正掩關。笑我驅馳竟安往。夕陽飛鳥亦知還。庚寅過武昌。與太守張之彥遊。累日。時頭陀有老僧持律精苦。

夜熱

觸熱行萬里。煩促詎可論。泊船鄂州步。終日如炮燔。搖扇腕欲脫。揮汗白雨翻。推枕再三起。散髮臨前軒。秋近更漏長。天旱星宿繁。甘澍何時來。太息憂元元。鄂州頗閔雨。

舟中偶書

孝子西遊萬里回。江行長夏亦佳哉。晝眠初起報茶熟。宿酒半醒聞雨來。漢口船開催疊鼓。淮南帆落亞高桅。四方本是丈夫事。白首自憐心未灰。

燈下讀書

少年喜書策，白首意未足。幽窗燈一點，樂處超五欲。而況黃州路，小雨漁村宿。蕭蕭兼葭聲，爲我洗暑毒。琅然誦經史，少倦兒爲續。何必效萊公，長夜醉畫燭。

泊三江口

遲明離武昌，薄暮次黃岡。勿言觸熱行，一雨三日涼。北窗荻蕭蕭，南窗江茫茫。玄雲一池墨，碧綫半篆香。尙無車馬塵，況復爭奪場。徐行勿挂帆，此樂殊未央。

自雪堂登四望亭因歷訪蘇公遺迹至安國院

我醉飛屐登孱顏，拄杖出沒風煙間。三山葱蘢鮫鱗靜，九關肅穆虎豹閑。幾年金骨煉綠髓，此日始得窮躋攀。老仙歸侍紫皇案，空有野水流淙潺。蜿蜒翠阜圍綠野，似嶺非嶺山非山。向來龍蛇滿雪壁，雷電下取何時還。名花亦已天上去，居人指似題詩處。九十一翁不識公，我抱此恨知無窮。定惠院已廢，海棠亦不復在。安國老僧景滋年九十一，自言東坡去黃後四年方生。

月下步至臨臯亭

芒鞋踏松陰，迨此船未發。清遊豈無伴，三友風露月。山川鬱盤紆，鷗鷺浩滅沒。當年老先生，想像散醉髮。浮生等昨夢，久已埋玉骨。吾儕幸彊健，何事拘簪笏。

發黃州泊巴河遊馬祈寺

南望武昌山，北望齊安城。楚江萬頃綠，著我畫舫橫。雲帆不須挂，鼙鼓不須鳴。淡然隱曲几，山水相逢迎。

疎雨漏薄日，非陰亦非晴。晚泊巴河市，小陌聞屐聲。紫髯刑馬地，一怒江漢清。中原今何如，感我白髮生。

舟行蘄黃間雨霽得便風有感

天青雲白十分晴，帆飽舟輕盡日行。江底魚龍貪晝睡，淮南草木借秋聲。好山縹緲何由住，華髮蕭條只自驚。莫怪時人笑疎嬾，宦情元不似詩情。

南烹

十年流落憶南烹，初見鱸魚眼自明。堪笑吾宗輕許可，坐令羊酪借尊羹。

泊蘄口泛月湖中

炎天倦長路，月夕泛平湖。晃漾披銀闕，清寒住玉壺。釣絲縈藻荇，蓬艇入菰蒲。自別蜻蜓浦，斯遊十載無。

予故廬在蜻蜓港東南，暑月常與客泛舟至中夜。

初見廬山

從軍憶在梁州日，心擬西征草捷書。鐵馬但思經太華，布帆何意拂匡廬。計謀落落知誰許，功業悠悠定已疎。尚喜東林尋舊社，月明清露溼芙蕖。

六月十四日宿東林寺

看盡江湖千萬峯，不嫌雲夢芥吾胸。戲招西塞山前月，來聽東林寺裏鐘。遠客豈知今再到，老僧能記昔相逢。虛窗熟睡誰驚覺，野碓無人夜自舂。

舟過小孤有感

小孤山畔峭帆風。又見煙鬟縹緲中。萬里客經三峽路。千篇詩費十年功。未嘗滿箸蒲芽白。先看堆盤鱸  
縷紅。商賈人生爲何事。一棹從此入空濛。

雁翅夾口小酌

墟煙淡將散。江雨細欲無。回風吹衣襟。晴光滿菰蒲。隱几樂此時。清和如夏初。犬吠船丁歸。小市得美蔬。  
歡言酌清醪。侑以案上書。雖云泊江渚。何異歸林廬。

長風沙

江水六月無津涯。驚濤駭浪高吹花。鷗聲已出雁翅浦。荻夾喜入長風沙。長風自古三巴路。檣竿參差雜  
煙樹。南船北船各萬里。淒涼小市相依住。歌呼雜沓燈火明。黃昏風死浪亦平。勞苦舟師剩沽酒。安穩明  
朝到池口。

泛小舟姑熟溪口

姑溪綠可染。小艇追晚涼。棹進破樹影。波動搖星芒。荻深漁火明。風遠水草香。尙想錦袍公。醉眼隘八荒。  
破陔青山冢。斷碣臥道旁。悵望不可逢。乘雲遊帝鄉。溪東南卽青山太白墓。

明日再遊又賦

舟中如甑炊。端坐畏暍死。未能踏增冰。且復呼艇子。纖纖新月低。玉鈎沈野水。微風生蘋末。塵抱眞一洗。  
可憐黃山塔。突兀暮煙裏。依然十年前。看我行萬里。兩槳且勿搖。橫舟小灘尾。得詩偶長吟。宿鷺爲驚起。

過采石有感

短衣射虎早霜天。歎息南山又七年。唾手每思雙羽箭。快心初見萬樓船。平波漫漫看浮馬。一作深鳥高  
柳陰陰聽亂蟬。明日重尋石頭路。醉鞍誰與共聯翩。

將至金陵先寄獻劉留守

梁益羈遊道阻長。見公便覺意差彊。別都王氣半空紫。大將牙旗三丈黃。江面水軍飛海鶴。帳前羽箭射  
天狼。歸來要了涪溪頌。莫笑狂生老更狂。

登賞心亭

蜀棧秦關歲月遒。今年乘興卻東遊。全家穩下黃牛峽。半醉來尋白鷺洲。黯黯江雲瓜步雨。蕭蕭木葉石  
城秋。孤臣老抱憂時意。欲請遷都涕已流。

夜泊龍廟回望建康有感

我醉行水上。身輕如飛煙。魚龍互悲嘯。伴我夜不眠。羽扇揮浮雲。月挂牛斗間。河漢橫復斜。風露方浩然。  
坡陁石頭城。寂莫七百年。世事感予懷。竦身入青天。

將至京口

臥聽金山古寺鐘。三巴昨夢已成空。船頭坎坎回帆鼓。旗尾舒舒下水風。城角危樓晴靄碧。林間雙塔夕  
陽紅。銅瓶愁汲中濡水。不見茶山九十翁。頃在京口。嘗取中濡水寄曾文清公。

荆谿館夜坐

河漢無聲天正青。三三五五滿天星。草根冷露黏濕螢。幽人岸巾坐津亭。憶下瞿唐浮洞庭。陽臺繫船夢



娉婷朱門重重夜不扃。四山猿鳥啼青冥。人生無蒂風中萍。幸我夢斷狂已醒。繡鞵金絡帶萬釘。何如故山鋤茯苓。

沂谿

射的峯前禹廟東。短篷三扇臥衰翁。閑攜清聖濁賢酒。重試朝南暮北風。水落痕留紅蓼節。雨來聲滿綠蒲叢。衝煙莫作匆匆去。擬看溪丁下釣筒。

歸雲門

萬里歸來值歲豐。解裝鄉墅樂無窮。飯炊飽雨湖菱紫。箴絡迎霜野柿紅。壞壁塵埃尋醉墨。孤燈餅餌對鄰翁。微官行矣闔山去。又寄千巖夢想中。

月下自三橋泛湖歸三山

素壁初升禹廟東。天風爲我送孤篷。山橫玉海蒼茫外。人在冰壺縹緲中。茅舍燈青聞吠犬。蘋汀煙淡見驚鴻。白頭尙耐清寒在。安得終年伴釣翁。

懷成都十韻

放翁五十猶豪縱。錦城一覺繁華夢。竹葉春醪碧玉壺。桃花駿馬青絲鞵。鬪雞南市各分朋。射雉西郊常命中。梅士臂立綠條鷹。佳人袍畫金泥鳳。椽燭那知夜漏殘。銀貂不管晨霜重。一梢紅破海棠回。數蕊香新早梅動。酒徒詩社朝暮忙。日月匆匆迭賓送。浮世堪驚老已成。虛名自笑今何用。歸來山舍萬事空。臥聽糟牀酒鳴瓮。北窗風雨耿青燈。舊遊欲說無人共。

湖村秋曉

劍閣秦山不計年，卻尋剡曲故依然。盡收事業漁舟裏，全付光陰酒棹邊。平野曉聞孤唳鶴，澄湖秋浸四垂天。九關虎豹君休問，已向人間得地仙。

夜夢與宇文子友譚德稱會山寺若餞子行者明日黎明得子友書感歎久之乃作此詩

夜夢集山寺，二三佳友生。相顧慘不樂，若有千里行。在門僕整駕，臨道騶嘶鳴。我友顧謂我，天寒戒晨征。遲速要當到，徐驅勿貪程。丁寧及藥餌，依依有餘情。鄰鐘忽驚覺，鴉飈窗欲明。作詩謝我友，有使頻寄聲。

寒夜

小隱謝城市，新寒尋褐袍。秋燈依壁暗，夜雨挾風豪。俗自隨時異，身寧與世塵。殘年更何事，持蟹酌松醪。

偷閑

老向人間未拂衣，偷閑聊喜息塵機。丹楓斷岸秋來早，淡日孤村客到稀。偶憶雪溪攜鶴去，卻從雲肆買羹歸。酒徒莫笑生涯別，久矣淵明悟昨非。

冬夜聞雁有感

從軍昔戍南山邊，傳烽直照東駱谷。軍中罷戰壯士閑，細草平郊恣馳逐。洮州駿馬金絡頭，梁州毬場日打毬。玉杯傳酒和鹿血，女真降虜彈箜篌。大呼拔幟思野戰，殺氣當年赤浮面。南遊蜀道已低摧，猶據胡牀飛百箭。豈知蹭蹬還江邊，病臂不復能開弦。夜聞雁聲起太息，來時應過桑乾磧。

書懷

愁向東華蹋軟紅。暫歸舊隱樂無窮。石池洗藥涓涓水。漁艇投竿嫋嫋風。盡日醉醒菱唱裏。鄰家來往竹陰中。何須列戟長安第。四面雲山擁此翁。

湖中暮歸

弄楫漁舟水濺衣。興闌卻傍柳邊歸。風平別浦沈新月。日落前村鎖夕霏。乍起鷺行橫野去。欲栖鴉陣暗天飛。詩情自合江湖老。敢恨功名與願違。

題齋壁

茸得湖邊屋數椽。茅齋低小竹窗妍。墟煙寂歷歸村路。山色蒼寒釀雪天。性懶杯盤常偶爾。地偏雞犬亦翛然。早知栗里多幽事。虛走人間四十年。

新葺門屋

林棲四壁空。百事從簡易。缺籬寒未補。幽戶夜不閉。東偏欲廣屋。厚費敢輕議。設關力可具。稚子請遂事。呀然兩竹扉。寧復志容駟。西山正當前。浩蕩納空翠。下臨漁樵路。橫鎖風月地。惟愁俗客來。剝啄驚午睡。吾廬

吾廬雖小亦佳哉。新作柴門斷綠苔。拄杖每闌歸鶴入。釣船時帶夕陽來。墟煙隔水霏霏合。籬菊凌霜續續開。千里安期那可得。笑呼鄰父共傳杯。

冬夜泛舟有懷山南戎幕

釣船東去掠新塘。船迳蓬低露蘂香。十里澄波明白石。五更殘月伴清霜。飄飄楓葉無時下。嫋嫋菱歌盡

意長誰信梁州當日事。鐵衣寒枕綠沉槍。

夢至成都悵然有作

春風小陌錦城西。翠箔珠簾客意迷。下盡牙籌閑縱博。刻殘畫燭戲分題。紫氍毹暖帳中醉。紅叱撥驕花外嘶。孤夢淒涼身萬里。令人憎殺五更雞。

又

宦途元不羨飛騰。錦里豪華壓五陵。紅袖引行遊玉局。華燈圍坐醉金繩。階前汗血洮河馬。架上霜毛海國鷹。世事轉頭誰料得。一官南去冷如冰。

月夕

開戶滿庭雪。徐看知月明。微風入叢竹。復作雪來聲。俗塵不待掃。凜然肝肺清。村深無漏鼓。鶴唳報三更。將入閩夜行之雲門

東鷺並偏門。籃輿兀睡昏。紡燈穿壁罅。吠犬鬪籬根。久客悲行役。清愁怯夢魂。餘生猶幾出。回首付乾坤。山中觀殘菊追懷眉山師伯渾

空山菊花瘦如棘。傾倒滿地枝三尺。陰風冷雨不相貸。爛草蒼苔共狼藉。人雖委棄渠自香。詎必泛酒登華堂。君不見仁人志士窮死眉山陽。空使後世傳文章。

自雲門之陶山肩輿者失道行亂山中有茅舍小塘極幽邃求見主人不可意其隱者也

陂池幽處有茅堂。井臼蕭條草樹荒。小鴨怯波時聚散。病蔬傷蠹半青黃。童兒衝雨收魚網。婢子聞鐘上

佛香。我亦暮年思屏迹。數椽何計得連牆。

冬夜聽雨戲作

少年交友盡豪英。妙理時時得細評。老去同參惟夜雨。焚香臥聽書齋聲。

又

遶簷點滴如琴筑。支枕幽齋聽始奇。憶在錦城歌吹海。七年夜雨不曾知。

適閩

春殘猶看少城花。雪裏來嘗北苑茶。未恨光陰疾駒隙。但驚世界等河沙。功名塞外心空壯。詩酒樽前髮已華。官柳弄黃梅放白。不堪倦馬又天涯。

欲行雨未止

幽幔依燈影。空階送雨聲。暫歸仍客路。投老倍鄉情。眼澀書難讀。心搖夢易驚。病多常怕醉。酒盡卻思傾。  
此作陳下瓜麴釀成奇絕。屬病瘍不敢取醉小啜而已。

翠蔓扶疎采擷忙。麴生系出古淮陽。踢成明月團團白。釀作新鵝淡淡黃。醅甕秋淒驚凜冽。糟牀夜注愛淋浪。西齋幽事新成譜。首爲高人著此方。酒方昔得之胡基仲。

大雨中離三山宿天章寺

苦雨催寒不肯晴。晚來餘勢更縱橫。雲如山壞長空黑。風似潮回萬木傾。要借關河供遠眼。不辭泥淖困初程。解衣一笑僧窗下。幾兩青鞋了此生。

早飯干溪蓋于吉故居也

劍外歸來席未溫。南征浩蕩信乾坤。峯回內史曾遊地。竹暗仙人舊隱村。白髮孤翁鉏麥壟。茜裙小婦闢  
籬門。行行莫動鄉關念。身似流槎豈有根。

贈楓橋化城院老僧

老宿禪房裏。深居罷送迎。爐紅豆蕤火。糝白芋魁羹。毳衲年年補。紗燈夜夜明。門前霜半寸。笑我事晨征。  
雙橋道中寒甚

裂面霜風快似鎌。重重裘袴晚仍添。梅常官道香撩客。山逼籃輿翠入簾。男子坐爲衣食役。年光常向道  
途淹。古來共說還家樂。豈獨全軀畏楚鉗。

行牌頭奴寨之間皆建炎末避賊所經也

今朝霜薄風氣和。霽色滿野行人多。沙平水淺木葉下。搖櫂渡口生微波。建炎避兵奔竄地。誰料白首重  
經過。四十餘年萬事改。惟有青嶂高嵯峨。安得西國葡萄酒。滿酌南海鸚鵡螺。侑以吳松長絲之玉鱠。送  
以邯鄲綺齒之清歌。向來喪亂汝所記。大地凜凜憂干戈。偶然不死到老大。爲底苦惜朱顏酡。

早發奴寨

暖徹衣篝蠟炬明。鄰雞喔喔促殘更。丈夫雖有四方志。客子終悲千里行。月落龍蛇蟠木影。山空風雨起  
灘聲。上車莫恨晨霜冷。又得脩途一日晴。

題繡川驛

繡川池閣記曾遊。落日欄邊特地愁。白首卽今行萬里。淡煙依舊送孤舟。歸心久負鱸魚膾。春色初回杜若洲。會買一蓑來釣雨。憑誰先爲謝沙鷗。

夜行宿湖頭寺

臥載籃輿黃葉村。疎鐘杳杳隔谿聞。清霜十里伴微月。斷雁半行穿亂雲。去國不堪心破碎。平戎空有膽輪囷。泗濱樂石應如舊。誰勒中原第一勳。

衢州道中作

耿耿孤忠不自勝。南來清夢遶觚稜。驛門上馬千峯雪。寺壁題詩一硯冰。疾病時時須藥物。衰遲處處少交朋。無情最恨寒沙雁。不爲愁人說杜陵。

過靈石三峯

奇峯迎馬駭衰翁。蜀嶺吳山一洗空。拔地青蒼五千仞。勞渠蟠屈小詩中。

又

曉日曛曛雪未殘。三峯傑立插雲間。老夫合是征西將。胸次先收一華山。

宿仙霞嶺下

吾生真是一枯蓬。行徧人間路未窮。暫聽朝雞雙闕下。又騎羸馬萬山中。重裘不敵晨霜力。老木爭號夜谷風。切勿重尋散關夢。朱顏改盡壯圖空。連日風霜可畏。自去梁州未嘗有此寒也。

道中病瘍久不飲酒至魚梁小酌因賦長句

我行浦城道。小疾屏杯酌。癯疥何足言。亦復妨作樂。此身會常壞。百歲均電雹。胡爲過自惜。憊臥困鍼烙。未嘗膾喻唱。況敢烹郭索。今朝寓空驛。窗戶寒寂寞。悠然忽自笑。頓解貪愛縛。紅燭映綠樽。奇哉萬金藥。宿魚梁驛五鼓起行有感。

憶從南鄭客成都。身健官閑一事無。分騎霜天伐狐兔。張燈雪夜擲梟盧。百憂忽墮新衰境。一笑難推舊酒徒。投宿魚梁溪遠屋。五更聽雨擁篝爐。

又

少時談舌坐生風。管葛奇才自許同。閉戶著書千古計。變名學劍十年功。酒醒頓覺狂堪笑。睡起方知夢本空。它日故人能憶我。葛仙磯畔覓漁翁。若耶溪有葛仙公釣磯。

夢藤驛

倦馬投孤驛。一峯青壓門。蕭條秋浦路。荒陋夜郎村。地瘴霜常薄。林深日易昏。百年常作客。排悶近清樽。

又

又入千山去。真成萬里行。今年自成都。八千餘里赴行在。又千餘里入閩。履霜常早駕。秉炬或宵征。古驛怪藤合。荒陂羣鴈鳴。客中常少睡。歸夢若爲成。

梅花絕句

空谷佳人洛浦仙。洗粧真態更嬋娟。廣平莫倚心如鐵。撩起清愁又破禪。

又



月中疎影雪中香。只爲無言更斷腸。曾與詩翁定花品。一丘一壑過姚黃。曾文清公嘗問予梅與牡丹孰勝。予以此答。

又

折得梅花愧滿顏。文書堆案正如山。輸君一覺翛然夢。長在清泉白石間。

又

濯錦江邊憶舊遊。纏頭百萬醉青樓。如今莫索梅花笑。古驛燈前各自愁。

又

蜀王小苑舊池臺。江北江南萬樹梅。只怪朝來歌吹鬧。園官已報五分開。成都合江園蓋故蜀別苑。梅最盛。自初開。監官日報。府報至開五分。則府主來宴。遊人亦競集。

又

湖上梅花手自移。予所居在山陰鏡湖。小橋風月最相宜。主人歲歲常爲客。莫怪幽香怨不知。

又

吾州古梅舊得名。雲蒸雨瀆綠苔生。一枝只好僧窗看。莫售千金入鳳城。古梅枝幹皆苔蘚。都下甚貴重之。

又

探春歲歲在天涯。醉裏題詩字半斜。今日溪頭還小飲。冷官不禁看梅花。

又

池館登臨雪半消。梅花與我兩無聊。青羊宮裏應如舊。腸斷春風萬里橋。

又

今年真負此花時。醉帽何曾插一枝。漸老情懷多作惡。不堪還作送梅詩。去年在成都嘗賦詩送梅。

# 陸放翁集

劍南詩稿

卷第十一

對酒

識字記姓名。擊劍一人敵。孫吳相斫書。了解亦何益。不如黃金罍。澌澌春波碧。欣然對之笑。未飲愁已釋。白頭生黑絲。蒼顏桃李色。金丹空九轉。正恐無此力。朝飲續五斗。暮飲髡一石。寄謝采芝翁。無爲老青壁。

遣興

西州落魄九年餘。濯錦江頭已結廬。誰遣徑歸朝鳳闕。不令小住奉魚書。余將赴樊道。被命東歸。塵埃眯目。詩情盡。疾病侵人。酒興疎。寄語鶯花。休入夢。世間萬事。有乘除。

建安雪

建谿官茶天下絕。香味欲全須小雪。雪飛一片茶不憂。何況蔽空如舞鷗。銀瓶銅碾春風裏。不枉年來行萬里。從渠荔子腴玉膚。自古難兼熊掌魚。

雪晴至後園

病扶藤杖覓殘梅。牢落情懷怕酒盃。約束園丁勤灑掃。新年作意待春來。

又

寶馬東風擁犢車。碧雞坊裏擅豪華。南來強作尋春夢。何處如今更有花。

開元暮歸

白髮書生不自珍。天涯又作宦遊身。谿橋煙淡偏宜晚。野寺花遲未覺春。日暖登山思謝屐。病餘瀟酒負陶巾。茹芝卻粒平生事。回首巖扉一愴神。寺在紫芝山下。

書懷

濯錦江頭成昨夢。紫芝山下又新年。久因多病疎雲液。近爲長齋進玉筵。啼鳥傍簷春寂寂。飛花掠水晚翩翩。支離自笑生涯別。一炷爐香繡佛前。

遊鳳凰山

窮日文書有底忙。幅巾蕭散集山堂。一樽病起初浮白。連焙春遲未過黃。坐上清風隨塵柄。歸途微雨發松香。臨溪更覓投竿地。我欲時來小作狂。

園中雜書

蕭蕭慈竹鳥呼風。宛似山光小閣東。剩欲杖藜尋昨夢。更添紅綻綠陰中。山光閣在潭毒關下。

又

北窗看鏡意淒然。夢斷梁州已七年。獵獵綵旗春日晚。不堪花外見鞦韆。山南鞦韆最盛。巷陌處處有之。

又

筍生密密復疎疎。來看偏宜曉雨餘。乞與人間作圖畫。幅巾短褐小籃輿。

又

殘花委地筍掀泥。香奩詩囊到處攜。幽夢欲成誰喚覺。半窗斜日鷓鴣啼。

烹茶

麴生可論交。正自畏中聖。年來衰可笑。茶亦能作病。噎嘔廢晨飧。支離失宵暝。是身如芭蕉。寧可與物競。兔甌試玉塵。香色兩超勝。把玩一欣然。爲汝烹茶竟。

病中久止酒有懷成都海棠之盛

碧雞坊裏海棠時。彌月兼旬醉不知。馬上難尋前夢境。樽前誰記舊歌辭。日窮落日橫千嶂。腸斷春風把一枝。說與故人應不信。茶煙禪榻鬢成絲。

北齋

新竹侵幽幔。疎蓮散遠汀。研朱朝點易。搗蘖夜潢。一作橫經。巖壑知心賞。琴樽樂性靈。會當煩太史。一奏少微星。

出塞曲

千騎爲一隊。萬騎爲一軍。朝踐狼山雪。暮宿榆關雲。將軍羽箭不虛發。直到祈連無雁羣。鼙鼓春雷收陣鼓。蜿蜒驚蛇射生弩。落蕃遺民立道邊。白髮如霜淚如雨。褫魄胡兒作窮鼠。競裹胡頭改胡語。陣前乞降馬前舞。檄書夜入黃龍府。

思故山

千金不須買畫圖。聽我長歌歌鏡湖。湖山奇麗說不盡。且復爲子陳吾廬。柳姑廟前魚作市。道士莊畔菱爲租。一彎畫橋出林薄。兩岸紅蓼連菰蒲。陂南陂北鴉陣黑。舍西舍東楓葉赤。正當九月十月時。放翁艇子無時出。船頭一束書。船後一壺酒。新釣紫鰕魚。旋洗白蓮藕。從渠貴人食萬錢。放翁癡腹常便便。暮歸稚子迎我笑。遙指一抹西村煙。

送錢仲耕修撰

姑熟溪邊識勝流。十年重見豈人謀。自應客路難爲別。不是陽關作許愁。僂直公看鼇禁月。倦遊我夢鏡湖秋。殷勤爲報中朝舊。睡足平生是建州。

建寧重五

霏微入戶黃梅雨。磊落堆盤碧筒黍。病來一滴不飲酒。但嗅菖蒲作端午。人生忽忽東逝波。白頭奈此節物何。去年已作歸州客。今年建州更愁絕。歸州猿吟鳥啼裏。屈沱醉歸詩滿紙。屈沱蓋屈原故居。楚人謂江之別流爲沱。卽今憶此那可得。西望歸州三歎息。

雨晴至園中

入夏經月雨。園路久已荒。今朝偶一到。蒿艾如人長。豈惟鼃黽豪。頗覺蜂蝶狂。悵然懷故山。舍東百本桑。迨此積雨餘。枝葉沃以光。父老適相遇。藉草揮一觴。一觴頽然醉。笑語相扶將。賦詩示兒子。此樂未易忘。

夏日

微風過中庭。庭樹颯有聲。穿簾徐入座。巾屨有餘清。

又  
展畫發古香，弄筆娛晝寂。是中亦何好，使我喜忘食。

又

呼兒整吾駕，駕言返林廬。可使臨老眼，常親吏文書。

發書畫還故山戲書

昨日遺畫笥，今日發書籠。空齋惟一牀，窗影亂風竹。平生鑽故紙，夙好老尤篤。奇哉掃除盡，蟬蛻三萬軸。豈惟息煩心，亦足養病目。從渠襤褸生，自獻公車牘。

白髮

白髮千莖綠鬢稀，臥看鷓鴣刺天飛。平生竊鄙貢公喜，故里但思陶令歸。清坐了無書可讀，近盡遺書笥。歸殘年賴有拂堪依，君看世事皆虛幻，屏酒長齋豈必非。

懷譚德稱

譚子文章舊有聲，幾年同客錦官城。江樓列炬千鍾飲，花市聯鞍一字行。人世絕知非昨夢，天真堪笑博浮名。空齋獨夜蕭蕭雨，枕上詩成夢不成。

客思

千里關山道路賒，可憐客子費年華。杯觴盡豔紅燒酒，風露盈盈紫笑花。孤月有情來海嶠，雙魚無信到天涯。此生那得常飄泊，歸臥東溪弄釣車。

又

兩鬢星星久倦遊。淒涼況復寓南州。未甘蟋蟀專清夜。已歎梧桐報素秋。綺語安能敵生死。熱官正欲快恩讎。空堂飽作東歸夢。夢泊嚴灘月滿舟。舟行還山陰道出七里灘。

建安遣興

建安酒薄客愁濃。除卻哦詩事事慵。不許今年頭不白。城樓殘角寺樓鐘。

又

錦城重到歎無期。忽憶書臺步月時。白浪黏天鮫鱗橫。夢中識路亦何爲。

又

今歲清詩欠百篇。強尋筆硯意茫然。秋風有句君知否。合在嚴光釣瀨邊。

又

古今清絕沅湘路。臥想蒲帆十幅開。不是避人思遠適。肺肝塵土要詩才。

又

綠沈金鎖少時狂。幾過秋風古戰場。夢裏都忘閩嶠遠。萬人鼓吹入平涼。

又

刺虎騰身萬目前。白袍濺血尙依然。聖時未用征遼將。虛老龍門一少年。

病起偶到復菴



經句羸臥怯登臨。偶憶東菴試一尋。新竹初成迷棧路。菴後依古城有小棧百步。斷雲不散抱城陰。陂池綠靜龜魚樂。亭館蒼涼草樹深。欲把一盃無奈嬾。病來觸目動歸心。

前有樽酒行

虛堂雨過生涼颼。勸君一醉君勿辭。去年不知今歲事。明年萬事今得知。舊時扶牀同戲兒。還鄉問訊令人悲。冢丘累累在者誰。紙錢雨濕抱樹枝。君去六十有幾時。更望七十何其癡。求師學道亦已遲。謝客努力從鴟夷。

又

綠酒盎盎盈芳樽。清歌嫋嫋留行雲。美人千金織寶裙。水沈龍腦作燎焚。問君胡爲慘不樂。四紀妖氛暗幽朔。諸人但欲口擊賊。茫茫九原誰可作。丈夫可爲酒色死。戰場橫屍勝牀第。華堂樂飲自有時。少待擒胡獻天子。

遊南塔院

小破文書夢。閑成杖履遊。澗幽泉激激。院靜竹修修。病骨涼如洗。歸心浩莫收。船輕不載石。一葉亂沙鷗。

感懷

半年建安城。士友闕還往。出門每太息。還舍猶愴怳。有酒誰與傾。得句空自賞。疎直觸人情。低回泚吾頰。豈無佳山水。正爾寄夢想。何當載親朋。煙浦搖兩槳。

雨夜

一雨遂通夕。安眠失百憂。窗扉淡欲曉。枕簟凜生秋。晝燭爭碁道。金尊數酒籌。依然錦城夢。忘卻在南州。

夜坐偶書

衰髮蕭疎雪滿簪。暮年光景易駸駸。已甘身作溝中斷。不願人知爨下音。病鶴摧頽分薄俸。悲蛩斷續和微吟。向來誤有功名念。欲挽天河洗此心。

長歌行

人生宦遊亦不惡。無奈從來宦情薄。既不能短衣射虎在南山。又不能鬪雞走馬宴平樂。惟有釣船差具問君。胡爲不歸去。片雲雨暗玉筍峯。斜日人爭石旗渡。渡頭酒壚堪醉眠。白酒醞鱸魚。鮮菰米如珠。炊正熟。尊羹似酪。不論錢。翁唱菱歌兒舞。權醉耳。那知朝市鬧。城門幾度送迎官。睡擁亂葦呼未覺。

雨夜不寐觀壁間所張魏鄭公砥柱銘

疾風三日橫吹雨。竹倒荷傾可憐汝。空堂無人夜向中。臥看牀前燭花吐。壯懷耿耿誰與論。檣床老龜不能語。世間豈無一好漢。叱咤暗鳴氣吞虜。壁間三丈砥柱銘。真觀太平如更覩。何當鼓吹渡河津。下馬觀碑馳馬去。

客談荊渚武昌慨然有作

去歲出蜀初東遊。峨眉大扁下荊州。便風轉頭五百里。吟嘯已在黃鶴樓。戲拈鐵笛吹出塞。水涵月落魚龍愁。明朝喧傳古仙過。碧玉帶束黃綈裘。豈知一官自桎梏。簿書期會無時休。豐城寶劍已化久。我自吐氣冲斗牛。洞庭四萬八千頃。蟹舍正對蘆花洲。速脫衣冠挂神武。散髮爛醉垂虹秋。

書懷

青城結雲巢。擬住三千年。御風偶南遊。萬里棲素煙。翠裘綠玉杖。白日凌青天。招呼方瞳翁。邂逅烏爪仙。朝詠陰陽歌。暮誦道德篇。玉童持碧簡。笙鶴來翩翩。海邊武夷山。小留賞宿緣。火食非所樂。巾褐常儵然。清時未免出。頗息世俗傳。行矣秋風高。去采玉井蓮。

平生

平生涉世似虛舟。不著胸中一點愁。已用浮雲看富貴。肯緣華屋歎山丘。戴溪寒釀千峯雪。嚴瀨聲酣七里秋。好景人間隨處有。未埋白骨且閑遊。

自詠

遊戲人間歲月多。癡頑將奈此翁何。放開繩箠牛初熟。照破乾坤鏡未磨。日落苔磯閑把釣。雨餘蓬舵亂堆蓑。明朝不見知何處。又向江湖醉踏歌。

池亭夜賦

池上小亭幽。清宵秉燭遊。荷盤時瀉露。螢火早知秋。有感歲時速。無聲河漢流。殊方不堪住。歸夢繞滄洲。

雨夜偶書

高臥空堂風雨來。更闌頻看燭花摧。新涼蕭爽秋期近。多病侵尋老境催。萬事極知終變滅。一官那得久低回。床頭幸有楞伽在。更炷爐香手自開。

思歸

平生無宦情。方外久浪迹。往來梁益間。一笑頗自得。花穠錦城酒。月白瞿唐笛。咿啞下江舫。跌宕登山屐。巴東煙雨秋。渭上風雪夕。至今客枕夢。萬里不能尺。誰知建安城。觸目非夙昔。冥冥瘴霧細。泚泚蠻江碧。出門無交朋。嗚呼吾何適。歸哉故山路。詎必須暖席。

客懷

客懷耿耿向誰語。世事茫茫空自知。堅坐癩窮牛渚怪。倦遊何恨雁門騎。眼前客共一盃酒。身後人傳千首詩。報與故交當賀我。計歸猶及菊花時。

伏中官舍極涼戲作

盡障東西日。洞開南北堂。漏從閑處永。風自遠來涼。客愛炊菰美。僧誇淪茗香。曉來秋色起。肅肅滿筠牀。夢與劉韶美。夜飲樂甚。

死生契闊十年餘。欲話交情涕已濡。夢裏偶同清夜宴。醉中猶攬故人鬚。岸巾談笑今誰記。滿腹詩書只自愚。我亦與公同此病。早收身世老江湖。

暑夜

毒暑彌三伏。微涼起二更。月窗風竹亂。煙渚露荷傾。寂寞借書讀。清羸扶杖行。無功耗官廩。太息負平生。

客意

山行曳杖水擎舟。走遍茫茫禹畫州。蝴蝶夢魂常是客。芭蕉身世不禁秋。早因食少妨高臥。晚憶茶甘作遠遊。龍焙一嘗端可去。無心更爲荔枝留。

夜香

投老誤乘傳，竊食慙無功。清夜一炷香，實與天心通。忤物雖至愚，許國猶孤忠。一念倘自欺，百年寧有終。上帝職造化，生殺操至公。稽首矢此心，其敢累兒童。

柴懷叔殿院世綵堂

卷服貂冠世間有，榮悴紛紛翻覆手。不如御史老萊衣，世綵堂中奉春酒。北斗爲觴山作豆，鳳竹鸞絲太中壽。今年宗祀降恩綸，太中拜前公拜後。嗚呼人誰無父母，盛事有及公家否。萬鍾苦晚三釜薄，人生此恨十八九。我欲殺青書孝友，愧非太史馬牛走。聖朝若遣采詩官，尙可爲公圖不朽。

月夜

小醉初醒月滿牀，玉壺銀闕不勝涼。天風忽送荷香過，一葉飄然憶故鄉。

雙清堂夜賦

陸子病少間，獨臥谿上堂。人靜魚自躍，風定荷更香。素月行中天，流螢失孤光。歸鳥飛有聲，度此十里塘。嗟我獨何事，遲暮客異鄉。太息搔短髮，起視夜未央。

采蓮

蘸水朱扉不上關，采蓮小舫夜深還。一樽何處無風月，自是人生苦欠閑。

又

雲散青天挂玉鉤，石城艇子近新秋。風鬟霧鬢歸來晚，忘卻荷花記得愁。

又

帝青天映麴塵波。時有遊魚動綠荷。回首家山又千里。不堪醉裏聽吳歌。

橋南納涼

曳杖來追柳外涼。畫橋南畔倚胡牀。月明船笛參差起。風定池蓮自在香。半落星河知夜久。無窮草樹覺城荒。碧筒莫惜頽然醉。人事還隨日出忙。

芒屨

芒屨一雙青。筇枝九節輕。登山猶健在。投檄太遲生。滿意竹風冷。入懷溪月明。清秋故不遠。回首憶蓴羹。

荔子絕句

驛騎星馳亦快哉。筠籠露濕手親開。不應相與無平素。曾忝戎州刺史來。

又

放翁遊蜀十年回。病眼茫茫每嬾開。怪底酒邊光景別。方紅江綠一時來。

官舍風興

朝陽淡淡挂窗櫺。桐葉無風忽自零。不復扶頭傾白墮。但知臨日養黃寧。新蔬帶露來幽圃。脩綆飛泉灑廣庭。一出文書又圍繞。正應高臥盡頽齡。

書懷

功名富貴兩茫茫。惟有躬耕策最長。吏牘沈迷妨養疾。囊衣結束待還鄉。洲中未種千頭橘。宅畔先栽百

本桑書寄子公吾自嬾故人不是總相忘。

風月

老來苦無伴。風月獨見知。未嘗費招呼。到處相娛嬉。披襟萬里快。弄影三更奇。淋漓蜀苑酒。散落江樓詩。狂歌撼山川。醉墨飛蛟螭。聊將調俗子。更遣半生疑。

大將出師歌

將軍北伐辭前殿。恩詔催排苑中宴。紫陌驚塵中使來。青門立馬羣公餞。繡旗雜沓三十里。畫鼓敲鏗五千面。行營暮宿咸陽原。滿朝太息傾都羨。天聲一震胡已亡。捷書奕奕如飛電。高秋不閉玉關城。中夜罷傳青海箭。可汗垂泣小王號。不敢跳奔那敢戰。山川圖籍上有司。張掖酒泉開郡縣。還朝策勛兼將相。詔假黃鉞調金鉉。丈夫未遇誰得知。昔日新豐笑貧賤。

婕妤怨

妾昔初去家。鄰里持車箱。共祝善事主。門戶望寵光。一入未央宮。顧盼偶非常。穉齒不慮患。傾身保專房。燕婉承恩澤。但言日月長。豈知辭玉陛。翩若葉隕霜。永巷雖放棄。猶慮重誘傷。悔不侍宴時。一夕稱千觴。妾心剖如丹。妾骨朽亦香。後身作羽林。爲國死封疆。

移疾

朝來移疾臥虛堂。暫屏文書日更長。鷗鷺近人情漸熟。簾櫳欲雨意先涼。紗巾自照清池影。蕊笈閑銷古篆香。莫恨微霜侵綠鬢。爲渠歇盡少年狂。

病中懷故廬

我家山陰道。湖山淡空濛。小屋如舴艋。出沒煙波中。天寒橘柚黃。霜落穉稷紅。祈蠶簫鼓鬧。賽雨雞豚空。又魚有竭作。刈麥無遺功。去年一月留。行役嗟匆匆。今年歸興動。艤舟待秋風。社飲可欠我。寄書約鄰翁。夏夜不寐有賦

急雨初過。天宇濕。大星磊落。纔數十。飢鶻掠蒼飛磔磔。冷螢墮。水光熠熠。丈夫無成。忽老大。箭羽凋零。劍鋒澀。徘徊欲睡。復起行。三更猶凭闌干立。

綠淨亭晚興

綠淨亭邊物色奇。放翁睡起曳筇枝。新涼已似雁來後。微雨卻如梅熟時。綠竹成陰藏細棧。朱闌倒影入清池。登臨獨恨非吾土。不爲城頭畫角悲。

憶山南

貂裘寶馬梁州日。盤槩橫戈一世雄。怒虎吼山爭雪刃。驚鴻出塞避雕弓。朝陪策畫清油裏。暮醉笙歌錦幄中。老去據鞍猶矍鑠。君王何日伐遼東。

又

醉墨淋漓酒百盃。轅門山色碧崔嵬。打毬駿馬千金買。切玉名刀萬里來。結客漁陽時遣簡。踏營渭北夜銜枚。十年一夢今誰記。閉置車中只自哀。

夕雨



屣履行莎徑。移牀臥草亭。風聲雜溪瀨。雨氣挾龍腥。奕奕空中電。昏昏雲罅星。徂年又如許。吾鬢得長青。

又

獨夜初傳漏。空齋半掩扉。候蟲燈下語。水鳥雨中歸。客舍愁彈劍。京塵怯化衣。故人招隱意。字字莫相違。

試茶

北窗高臥。野如雷。誰遣香茶挽夢回。綠地毫甌。雪花乳。不妨也道入闔來。

莆陽餉荔子

江驛山程日夜馳。筠籠初拆露猶滋。星毳斂玉雖奇品。終憶戎州綠荔枝。

初秋書懷

二十年前已二毛。卽今何恨鬢蕭騷。孤燈自伴詩情苦。俗子從嫌醉眼高。煙外暮鐘來遠寺。雨餘秋漲集空濠。思歸更向文書嬾。此手惟堪把蟹螯。

建州絕無芡意頗思之戲作

鄉國雞頭賣早秋。綠荷紅縷最風流。建安城裏西風冷。白棗堆盤看卻愁。

憶昔

憶昔西遊變姓名。獵圍屠肆押豪英。淋漓縱酒滄溟窄。慷慨狂歌華岳傾。壯士有心悲老大。窮人無路共功名。生涯自笑惟詩在。旋種芭蕉聽雨聲。

客思

裘馬平生喜遠遊。暮年顛顛向南州。文書與睡中分日。衰病和愁總怕秋。無復雪郊看射虎。但思煙浦聽呼牛。還家誰道無餘俸。倒橐猶堪買釣舟。

初秋夢故山覺而有作

陂水白茫茫。草煙濕霏霏。牧童一聲笛。落日無餘暉。遙山已漸隱。村巷亞竹扉。老翁延我入。苦謝柿栗微。幸逢歲有秋。一醉君勿違。念此動中懷。命駕吾將歸。

又

犬吠舍前後。月明村東西。岸草蛩亂號。庭樹鳥已栖。我僕城中還。擔頭有懸雞。小兒勸我飲。村酒拆亦泥。我醉不自覺。頹然葛巾低。著書笑蒙莊。茗芋物自齊。

又

昔我東歸時。父老迎船頭。聞篷相勞苦。怪我領雪稠。故山何負君。且作數月留。豈知席未煖。疋馬來南州。蠻花四時紅。瘴霧日夜浮。歸哉不可遲。勿與婦子謀。

又

杜宇眞吾交。勸去恨不速。忠告輸肝肺。厚意均骨肉。陋哉鷓鴣語。揣我貧念祿。竹雞更鄙淺。泥淖憂車軸。秋風嚴瀨清。春雨戴溪綠。行矣勿復疑。照影巾一幅。

高歎

千載前人每暗同。眼邊俗客馬牛風。作文要可張子布。飲酒思從陳孟公。半世氛埃成潦倒。幾時蓑釣入

空濛一菴處處皆堪老。莫怕無山著此翁。

雙清堂醉臥

客裏逢秋醉似泥。空堂獨臥意淒迷。亂號庭樹西風急。斜掛城樓北斗低。末路敢貪請鶴料。微官久厭駕雞棲。平生玉局經行地。擬乞冰銜隱剡溪。

醉書

半年愁病劇。一雨喜涼新。稍與藥囊遠。初容酒醜親。浩歌驚世俗。狂語任天真。我亦輕餘子。君當恕醉人。

憶唐安

南鄭戍還初過蜀。朝衫與鬢猶爭綠。逢春飲酒似長鯨。醉裏千篇風雨速。唐安池館夜宴頻。潏潏玉船搖畫燭。紅索琵琶金縷花。百六十絃彈法曲。曲終卻看舞霓裳。嫋嫋宮腰細如束。明朝解醒不用酒。起尋百畝東湖竹。歸吳寂寞時自笑。縱有詩情誰省錄。今年二頃似可謀。夫廩雲根結茅屋。

秋懷

暮年身世轉悠悠。又向天涯見早秋。昨夜月明今夜雨。關人何事總成愁。

又

星斗闌干河漢流。建州風物更禁秋。年來多病題詩嬾。付與鳴蛩替說愁。

晝臥聞碾茶

小醉初消日未晡。幽窗催破紫雲腴。玉川七盃何須爾。銅碾聲中睡已無。

月下獨行橋上

新秋未再旬。月露已浩然。放翁一幅巾。與影俱翩僂。飛橋挂澄谿。幽竇鳴細泉。開歲纔俛仰。已近搖落天。殊方久滯留。感此歲月遷。歸來看青燈。悄愴不得眠。

夜意

火雲夕方收。草露秋已白。堂空燈欲翳。壁壞蟲自噴。四顧寂無人。獨立岸吾幘。窮通何足論。等是百年客。何能爲一飽。半世出下策。布帆幸無恙。誰謂江海迤。

秋夜書懷

斷香漠漠繞藤牀。新月娟娟轉畫廊。鄉遠每勞千里夢。雨慳未放九秋涼。衰遲分作驥伏櫪。斂退敢求錐。出囊剩喜今年有奇事。嚴遵灘下繫歸航。

思故廬

平生一束書。不爲屋廬計。微官寄郵傳。俯仰閱半世。草堂白雲邊。日夜長松桂。柴門入幽夢。落日亂蟬嘒。宦遊有何好。海角愁瘴癘。拂衣便可耳。勿使老春薺。

雨夜

小雨初涼夜。殘燈欲暗時。病多愁近酒。心弱怯題詩。舊友殊方少。歸耕晚歲宜。回頭語孤影。此意有君知。

北窗哦詩因賦

二十年來賦遠遊。一窗又復寄南州。雙鵝戲雨陂塘曉。亂葉飄風院落秋。顏鬢蹉跎愁覽鏡。江山重復怯

登樓平生事業詩千首。殘稿從教處處留。

又

露下螢飛仲秋月。山圍水繞建安城。病多不辨酒中聖。身遠且令心太平。數卷蠹書行老矣。一盂蔬飯太僧生。白雲只在蒼間宿。聽我清宵詠句聲。

儆裝

絕物離人恨未能。聊爲旦過打包僧。蹇驢渺渺秋山雨。孤榻昏昏夜店燈。酒量已隨詩共退。客愁仍與病相乘。頽然衰颯嗟誰識。俠氣當年蓋五陵。

追感梁益舊遊有作

西遊萬里倚朱顏。肯放尊前一笑慳。蜀苑妓圍欺夜雪。梁州獵火滿秋山。晚途忽墮塵埃裏。樂事渾疑夢寐間。浮世變遷君勿歎。劇談猶是詫鄉關。

莆陽昭武延平送兵漸集戲書

鼓聲晨統統。角聲暮鳴鳴。作官了何事。空歎歲月徂。送兵稍稍集。秣馬脂吾車。風霜迫搖落。殘暑亦已無。野渡明丹楓。破驛吹黃榆。聊收作詩料。未用厭征途。

別建安絕句

三十年來雲水僧。常挑鉢袋繫行滕。信緣不作癡巢窟。卽是吾家無盡燈。

又

楚澤吳山已慣行。武夷從昔但聞名。北巖小寺長汀驛。且喜遊山第一程。

又

欹帽揚鞭晚出城。驛亭燈火向人明。多情葉上蕭蕭雨。更把新涼送客行。

初發建安

小雨初收雲未歸。吾行迨及晚秋時。寒沙新雁無人問。露井殘桐有客悲。征袂拂霜晨喚馬。驛窗剪燭夜題詩。悠然且作尋山想。夢裏功名莫自期。

宿北巖院

車馬紛紛送入朝。北巖燈火夜無聊。中年到處難爲別。也似初程宿灞橋。岑參詩云。初程莫早發。且宿灞橋頭。語意至工。

書感

溪路人家尙闔扉。強扶衰憊著征衣。百年朝露古所歎。一櫂秋風吾欲歸。楚客長號沾白壁。漢宮太息遺明妃。鑠金消骨從來事。老矣何心踐駭機。

長汀道中

晚過長汀驛。溪山乃爾奇。老夫惟坐轍。造物爲陳詩。鳥送穿林語。松垂拂澗枝。憑鞍久忘發。不是馬行遲。

黃亭夜雨去武夷四十里

未到名山夢已新。千峯拔地玉嶙峋。黃亭一夜風吹雨。似爲遊人洗俗塵。

遊武夷山

少讀封禪書，始知武夷君。晚乃遊斯山，秀傑非昔聞。三十六奇峯，秋晴無纖雲。空巖雞晨號，峭壁丹夜暎。巢居寄千仞，鴻荒想羲軒。風雨蛻玉骨，難以俗意論。丹梯不容躡，修臺亦畏捫。泝灘進小艇，愧驚白鷺羣。學道雖恨晚，養氣敢不勤。宦遊非本志，寄謝鶴與猿。

泛舟武夷九曲溪至六曲或云灘急難上遂回

暮年脚力倦躋攀，借得扁舟臥看山。怪怪奇奇何所似，綠蘿溪入下牢關。

又

一葉凌風入峽來，山童指點幾崔嵬。急流勇退平生意，正要船從半道回。

崇安縣驛

驛外清江十里秋，雁聲初到荻花洲。征車已駕晨窗白，殘燭依然伴客愁。

過建陽縣以雙鵝贈東觀道士爲長生鵝觀俯大溪鵝得其所矣武夷險絕處有仙船架崖壁間數日前大風吹墮船木數寸堅硬如石予偶得之皆此行奇事也各賦一詩

閑泛晴波唼綠萍，卻衝微雨傍煙汀。會稽內史如相遇，換取黃庭一卷經。

右雙鵝

斷崖幽洞白雲深，縹緲仙槎無古今。飛下一峯相勞苦，卻疑天外有知音。

右墮木

紫谿驛信州鉛山縣

他鄉異縣老何堪。短髮蕭蕭不滿簷。旋買一尊持自賀。病身安穩到江南。

又

雲外丹青萬仞梯。木陰合處子規啼。嘉陵棧道吾能說。略似黃亭到紫谿。

鵝湖夜坐書懷

士生始墮地。弧矢志四方。豈若彼婦女。齷齪藏閨房。我行環萬里。險阻真備嘗。昔者戍南鄭。秦山鬱蒼蒼。鐵衣臥枕戈。睡覺身滿霜。官雖備幕府。氣實先顏行。擁馬涉沮水。飛鷹上中梁。勁酒舉數斗。壯士不能當。馬鞍挂狐兔。燔炙百步香。拔劍切大肉。哆然如餓狼。時時登高望。指顧無咸陽。一朝去軍中。十載客道傍。看花身落魄。對酒色淒涼。去年忝號召。五月觸瞿唐。青衫暗欲盡。入對衰涕滂。今年復詔下。鴻雁初南翔。俯仰未閱歲。上恩實非常。夜宿鵝湖寺。槁葉投客牀。寒燈照不寐。撫枕慨以慷。李靖聞征遼。病體更激昂。裴度請討蔡。奏事猶衷創。我亦思報國。夢繞古戰場。

信州東驛晨起

衣上征塵鬢畔霜。信州古驛憩歸裝。悲歌未肯彈長劍。豪氣猶能臥大牀。半暗殘燈搖北壁。常飢老馬臥東廂。鄰雞唱罷衣篝暖。自笑行人日日忙。

玉山縣南樓晚望

小樓在何許。正在南溪上。空濛過釣船。斷續聞漁唱。征途苦僂人。舒嘯喜清曠。安得此溪水。爲我變春釀。



玉壺亭

玉壺亭上小徘徊。閑對殘荷把一盃。冠蓋交馳期會急。長官未必辦頻來。

步過縣南長橋游南山。普寧院山高處有塔院。及小亭縹緲可愛恨。不能到。

偶扶藤杖過南津。野寺長橋發興新。暫就清溪照鬢鬢。不妨翠霧濕衣巾。山縈細棧疑無路。樹落崩崖欲壓人。朝暮有程常猝猝。何因攜酒上嶙峋。

枕上感懷

五更攪轡山路長。老夫誦書聲琅琅。古人已死心則在。度越秦漢窺虞唐。三更投枕窗月白。老夫哦詩聲嘖嘖。淵源雅頌吾豈敢。屈宋藩籬或能測。一代文章誰汝數。老不能閑真自苦。君王雖賞于菑于。無奈宮中須羯鼓。

晚過招賢渡

老馬骨巉然。虺虺不受鞭。行人爭晚渡。歸鳥破秋煙。湖海淒涼地。風霜搖落天。吾生半行路。搔首送流年。

臥輿

白首躬耕已有期。鳳城歸路卻遲遲。臥輿擁被聽秋雨。占盡人間好睡時。

奏乞奉祠留衢州皇華館待命

世念蕭然冷欲冰。更堪衰與病相乘。從來幸有不材木。此去真爲無事僧。見丹霞錄。耐辱豈惟容唾面。寡言端擬學銘膺。尙餘一事猶豪舉。醉後龍蛇滿剡藤。

寓舍偶題

轉徙身飄梗，淹留等繫匏。雁孤依遠渚，鳩拙寄空巢。寒日頽梨頰，清霜長橘包。平生麴道士，歲晚欲深交。

夙興

客中睡眠少，常以雞鳴興。新炭熾宿火，膏油續殘燈。焚香倚蒲團，外靜中已凝。榮辱兩不到，淡如秋水澄。出定窗已白，炯炯寒日昇。廚人作芋糝，供此在家僧。

夜坐

老知世事謾紛紛，紙帳蒲團自策勳。一夜北風吹裂屋，石樓無耳不曾聞。

偶得石室酒獨飲醉臥覺而有作

初寒思小飲，名酒忽墮前。素嬰手自傾，色若秋澗泉。浩歌復起舞，與影俱翩僊。一笑遺宇宙，未覺異少年。詩人不聞道，苦歎歲月遷。豈知汝南市，自有壺中天。河洛久未復，銅駝棘榛然。秋風歸去來，虛老玉井蓮。

午睡

風霜踐殘歲，我乃羈旅人。如何得一室，牀敷暖如春。午枕挾小醉，鼻息撼四鄰。心安了無夢，一掃想與因。逡巡起，頰面覽鏡正幅巾。聊呼蟹眼湯，淪我玉色塵。

贈柯山老人

柯山老人九十餘，亂髮不櫛瘦如枯。百穿千結一布袴，得酒一吸輒倒壺。自言少年不蓄孥，有錢徑付酒家壚。人生辦此真良圖，棄官從翁許我無。

寓館晚興

隨牒人間不自憐，衢州孤驛更蕭然。百年細數半行路，萬事不如長醉眠。髮短經秋真種種，腹寬耐事只便便。晚窗商略惟當飲，安得黃花到眼邊。今年九月將盡竟未見菊。

葉相最高亭

高亭新築冠鼇峯，眼力超然信不同。膚寸法雲澤天下，大千沙一作法界納胸中。春遊到處羣花擁，夜宴歡時百榼空。劉白老來忘世味，只思詩酒伴裴公。裴晉公留守東都，白樂天、劉夢得以分務與晉公倡酬。

婺州州宅極目亭

尙書曳履上星辰，小爲東陽作主人。朱閣凌空雲縹緲，青山繞郭玉嶙峋。似聞旋教新歌舞，且慰重臨舊吏民。莫倚闌干西北角，卽今河洛尙胡塵。

謝演師送梅

早梅時節到江南，已判樽前酒滿衫。輸與西鄰明上座，解從大庾嶺頭參。

又

折送江梅意不疎，要教相對鬪清臞。爲君著向明窗下，試問山翁具眼無。

訪毛平仲問疾與其子适同遊柯山觀王質爛柯遺跡

籃輿訪客過仙村，千載空餘一局存。曳杖不妨呼小友，還家便恐見來孫。林巒巖絕秋風瘦，樓堞參差暮氣昏。酒美魚肥吾事畢，一菴那得住雲根。

月巖

幾年不作月巖遊。萬里重來已白頭。雲外連娟何所似。平羌江上半輪秋。

弋陽縣驛

大雨山中采藥回。丫頭巖畔覓詩來。喚船野渡逢迎雪。攜酒溪頭領略梅。久客愁心端欲折。何時笑口得頻開。慙慙記著今朝事。破驛空廊葉作堆。

弋陽道中遇大雪

我行江郊暮猶進。大雪塞空迷遠近。壯哉組練從天來。人間有此堂堂陣。少年頗愛軍中樂。跌宕不耐微官縛。憑鞍寓目一悵然。思爲君王掃河洛。夜聽簌簌窗紙鳴。恰似鐵馬相磨聲。起傾斗酒歌出塞。彈壓胸中十萬兵。

雪中感成都

憶在西州遇雪時。繡筵處處百花園。烏絲闌展新詩就。油壁車迎小獵歸。感事鏡鸞悲獨舞。寄書箏雁恨慵飛。愁多自是難成醉。不爲天寒酒力微。

雪後苦寒行饒撫道中有感

殘雪暮還結。朔風晴更寒。重裘猶粟膚。連酌無辭顏。指直不可握。終日縮袖間。十年走萬里。何適不艱難。附火財須臾。攬轡復慨歎。恨不以此勞。爲國戍玉關。

對酒

溫如春也爽如秋。一檣燈前自獻酬。百萬愁魔降未得。故應用爾作戈矛。  
又

歎息人真未易知。暮年始覺麴生奇。個中妙趣誰堪語。最是初醺未醉時。

梅花臨州道中見梅數樹憔悴特甚。

我與梅花有舊盟。卽今白髮未忘情。不愁索笑無多子。惟恨相思太瘦生。身世何曾怨空谷。風流正自合傾城。增冰積雪行人少。試倩羈鴻爲寄聲。

雪中尋梅

莫遣扁舟興盡回。正須衝雪看江梅。楚人原未知真色。施粉何曾太白來。

又

幽香淡淡影疎疎。雪虐風饕亦自如。正是花中巢許輩。人間富貴不關渠。

江上梅花

老來樂事少關身。猶喜尊前見玉人。豈是淒涼偏薄命。自緣纖瘦不禁春。娟娟月上明江練。黯黯天低慘玉塵。絕磴斷橋幽獨處。護持應有主林神。



# 陸放翁集

劍南詩稿

卷第十二

擬峴臺觀雪

垂虹亭上三更月。擬峴臺前清曉雪。我行萬里跨秦吳。此地固應名二絕。山川滅沒雪作海。亂墜天花自成態。狂歌痛飲豪不除。更憶銜枚馳出塞。蘆摧葦折號飢鴻。欲傳粉墨無良工。摩挲東絹三歎息。收入放翁詩卷中。明朝青天行日轂。萬瓦生煙失瓊玉。世間成壞本相尋。卻看晴山暈眉綠。

舊在成都初春無事日。訪昭覺保福正法諸刹甚可樂也。追懷慨然因賦長句。

憶在西川集寶坊。幅巾蕭散日初長。伊蒲塞饌分香積。優鉢羅花散道場。客路逢春增感慨。舊遊回首已微涼。新晴強作尋幽計。有底文書作許忙。

園中賞梅

閱盡千葩百卉春。此花風味獨清真。江邊曉雪愁欲語。馬上夕陽香趁人。慰眼紅苞初報信。回頭青子又生仁。羈遊偏覺年華速。徙倚闌干一愴神。

又

行遍茫茫禹畫州。尋梅到處得閑遊。春前春後百回醉。江北江南千里愁。未愛繁枝壓紗帽。最憐亂點糝

貂裘一寒可賀君知否。又得幽香數日留。

正月十五日出郊至金石臺

漸老惜時節。思遊那可忘。雪晴天淺碧。春動柳輕黃。笑語寬衰疾。登臨到夕陽。未須催野渡。聊欲據胡牀。

又

開歲多休暇。官身亦暫閑。樓臺先晝永。花柳向春慳。啼鳥隨遊轡。和風愜醉顏。更憐歸路好。破墨數峯山。

晚歸見西南諸山如畫

六日小飲園中光景鮮妍紅梅已拆恍記在果州偶得絕句

輕裘駿馬金泉路。金泉蓋謝自然輕舉之地。默數新春又九年。風景不殊人自老。忽驚作夢到臨川。

聞雁

過盡梅花把酒稀。熏籠香冷換春衣。秦關漢苑無消息。又在江南送雁歸。

撫州上元

江月微雲外。街泥小雨餘。人如虛市散。燈似曉星疎。羈雁同身世。新霜上鬢鬚。明年更清絕。魚火對茅廬。

登擬峴臺

層臺縹緲壓城闌。倚杖來觀浩蕩春。放盡樽前千里目。洗空衣上十年塵。縈迴水抱中和氣。平遠山如蘊藉人。更喜機心無復在。沙邊鷗鷺亦相親。

燈夕有感



芙蕖紅綠亦參差。睡起燒香強賦詩。萬里錦城無夢到。豈惟虛負放燈時。

庚子正月十八日送梅

滿城桃李爭春色。不許梅花不成雪。世間尤物無盛衰。萬點縈風愈奇絕。我行柯山眠酒家。初見窗前三  
四花。恨無壯士挽斗柄。坐令東指催年華。今朝零落已可惜。明日重尋更無迹。情之所鍾在我曹。莫倚心  
腸如鐵石。

初春懷成都

我昔薄遊西適秦。歸到錦城逢早春。五門收燈藥市近。小桃妖妍狂殺人。蜀中入春惟小桃先開。似垂絲  
海棠。霓裳法曲華清譜。燕妬身輕鶯學語。歌舞更休轉盼間。但見宮衣換金縷。世上悲歡豈易知。不堪風  
景似當時。病來幾與麴生絕。禪榻茶煙雙鬢絲。

春雨

冬旱土不膏。愛此春夜雨。四郊農事興。老穉迭歌舞。相呼長沮耕。分喜樊遲圃。豐年已在目。亭障靜桴鼓。  
我歸未有期。一官寄倉庾。幸復寬簡書。不敢恨羈旅。

雨中遣懷

病中草草度年華。睡起匆匆日易斜。抵死愁禁千斛酒。薄情雨送一城花。鏡湖煙水搖朱舫。錦里香塵走  
鈿車。此夢卽今都打破。不妨寂寞往天涯。

又

霏霏春雨細如絲。正是春寒欺客時。心向宦途元淡薄。夢尋鄉國苦參差。樓前新漲綠三尺。牆外尙餘紅幾枝。擺撥簿書呼酒榼。南湖西塔有幽期。

晚晴

水聲漚漚赴回塘。簾影疎疎遶四廊。靜院數盃傾白墮。幽窗一枕夢清湘。潤侵書笥深防蠹。暖徹衣篝剩得香。解組徑歸應更樂。偷閑猶足傲羲皇。

春晚

五十六翁身自愛。年來轉覺此生浮。山川信美故鄉遠。天地無情雙鬢秋。社後燕如歸客至。春殘花不爲人留。一觴一詠從來事。莫笑扶衰又上樓。

春晚坐講忽夢泛舟飲酒樂甚既覺悵然有賦

夢泛扁舟逸興多。畫橈搖蕩麴生波。微風簌簌生蒲葦。小雨霏霏濕芰荷。舞落烏紗從歲去。歌酣白紵奈情何。年來惟覺華胥樂。莫遣茶甌戰睡魔。

遣興

老子癡頑慣轉蓬。殘年嬾復問窮通。赦書雖未除詩債。盟府猶當策酒功。桐嶺市回人踏月。柘岡月落鳥呼風。浮生觸處無真實。豈獨南柯是夢中。

老去

老去時時病。春來日日陰。文書有期會。山水負登臨。倦客風埃眼。孤臣狗馬心。餘寒欺短褐。莫惜酒盃深。

雨夜

百紫千紅占歲華。又隨風雨捲泥沙。卽今空有夢爲蝶。當日曾將命乞花。倦枕殘燈人寂寞。幽窗小草字欹斜。悲歡變滅何窮已。學得山僧自一家。

簡黎道士

滿箔吳蠶繭漸稠。四郊膏雨麥方秋。道人昔是茶山客。病叟新爲藥市遊。耆舊凋零誰晤語。篇章璀璨尙風流。蘭亭刻曲春光好。倘肯相從弄釣舟。

臨川絕無佳酒時得一醉戲書

有酒時劇飲。無酒徒浩歌。庭花五六株。老子獨婆娑。誰云苦寂寞。在我亦已多。管絃萬二千。一笑謝天魔。夢作青城去。梨磴捫松蘿。又爲平羌遊。素月沉煙波。覺來撫几歎。奈此桎梏何。流年不貸人。去去如飛梭。

醉中懷江湖舊遊偶作短歌

無渡河。浪花無帶高崢嶸。莫登樓。茫茫芳草難爲情。華軒寶馬只好路旁看。冶金伐石空留後世名。古來惟有竹林諸人稱達生。一醉之外萬事鴻毛輕。可憐癡人競聲利。坐使方寸森五兵。散花洲上青山橫。野魚可膾菰可烹。脫冠散髮風鬻冷。臥看江月金盆傾。

三月二十一日作

蹴踘牆東一市譁。鞦韆樓外兩旗斜。及時小雨放桐葉。無賴餘寒開楝花。明月吹笙思蜀苑。軟塵騎馬夢京華。慳情減盡朱顏改。節物催人只自嗟。

天祺節日飯罷小憩

臥聽午漏隔花傳。簾裏花殘有斷煙。莫放轆轤鳴玉井。偷閑要補五更眠。

思歸

白髮滿青鏡。悵然山水身。那因五斗米。常作半途人。涉世風波惡。思歸懷抱真。會當求鋤斧。送老鏡湖濱。

齒痛有感

眼暗頭童負聖時。齒牙欲脫更堪悲。暮年漸解人間事。蒸食哀梨亦自奇。

南窗睡起

夢中忘卻在天涯。一似當年錦里時。狂倚寶箏歌白紵。醉移銀燭寫烏絲。酒來郫縣香初壓。花送彭州露

尙滋。起坐南窗成絕歎。玉樓乾鵲誤歸期。

又

晝漏迢迢暑氣清。不妨小倦帶餘醒。夢從隴客聲中斷。愁向湘屏曲處生。風度簾旌紅浪颭。窗明香岫碧

雲橫。閑情賦罷憑誰寄。悵望壺天白玉京。

初夏

百葉盆榴照眼明。桐陰初密暑猶清。深深簾幕度香縷。寂寂房櫳聞燕聲。細煨詩聯憑菜几。靜思棋劫對

楸枰。浣花光景應如昨。回首西州一愴情。浣花四月十九日也。

讀程秀才詩

程子晚相得。居然一坐傾。新詩欲飛動。病眼爲開明。英妙非凡質。衰遲畏後生。吾徒可相賀。五字有長城。  
晨起

一官又寄汝江頭。落魄文園故倦遊。榻上鐸聲悲落夢。簷邊桐葉冷生秋。暮年作吏寧長策。薄祿磨人尙  
小留。晨起憑欄歎衰甚。接籬紗薄髮颯颯。

雨夜

兩鬢新霜換舊青。客遊身世等浮萍。少年樂事消除盡。雨夜焚香誦道經。

得京書或怪久不通問

慣向江湖鍛羽翰。雲霄那敢接鷓鴣。百年未必如炊久。萬事真須作夢看。白首據鞍慚俠氣。清燈顧影歎  
儒酸。手遮西日成何味。還我平生舊釣竿。

水亭

日淡暑猶薄。雨餘風更清。翛然水亭立。試此葛衣輕。曬粉憐孤蝶。穿枝喜晚鶯。誰知簿書裏。也復得吾生。

醉眠

達士如鴟夷。無客亦自醉。癡人如撲滿。多藏作身祟。放翁亦何長。偶自遠聲利。胸中白如練。不著一毫僞。  
醉來酣午枕。晴日雷起鼻。寄謝敲門人。予方有公事。

感舊絕句

鴨翎墩前山簇馬。雞蹤橋下水連天。金丹煉成不肯服。且戲人間五百年。

又

鵝黃酒邊綠荔枝。鵝黃廣漢酒名綠荔枝。出敘州。摩訶池上納涼時。冰紈不畫驂鸞女。卻寫江南白紵辭。

又

南市夜夜上元燈。西鄰日日是清明。青氈犢車碾花去。黃金馬鞭穿柳行。

又

十月新霜兔正肥。佳人駿馬去如飛。織腰嫋嫋戎衣窄。學射山前看打圍。

又

半紅半白官池蓮。江濱廟池。半醒半醉女郎船。鴛鴦驚起何曾管。折得雙頭喜欲顛。

又

紅葉琵琶出嘉州。四絃彈盡古今愁。胡沙漫漫紫塞曉。漢月娟娟青冢秋。

又

美人傳酒清夜闌。欲歌未歌愁遠山。蒲萄一斗元無價。換得涼州也是閑。

晝臥聞百舌

雨後郊原已遍犁。陰陰簾幙燕分泥。閑眠不作華胥計。說與春鳥自在啼。江南謂百舌爲春鳥。

寄呂博士

薄宦東西蜀。僑居太少城。休論九年謫。喜識萬人英。別久心常折。書來眼未明。功名君自力。丘壑我平生。

遊疎山

我願匹馬飛騰遍九州。如今苦無驪裹與驪驅。葛陂之龍又難致。兀兀安得忘吾愁。幸餘一事差可喜。雲山萬里芒鞋底。曳杖行穿蟠冢雲。試茶手挹香溪水。江西山水增怪奇。疎山之名舊所知。惜哉不見侏儒師。尙想薪水俱空時。寺門欲近山若拆。老樹蒼崖含古色。挂包便住吾豈能。一來要是疎山客。

疎山東堂晝眠

飯飽眼欲閉。心閑身自安。樂超六欲界。美過八珍盤。香縷縈簷斷。松風逼枕寒。吾兒原解夢。爲我轉雲團。  
是日約子分茶。

山中作

朱墨紛紛訟滿庭。半年初得試山行。燒香掃地病良已。飲水飯蔬身頓輕。日落三通傳浴鼓。雨餘千耦看農耕。故巢光景還如此。爲底淹留白髮生。余書堂在雲門寺西。

觀蔬圃

菘芥可菹芹可羹。晚風啾唧槁棹聲。白頭孤宦成何味。悔不畦蔬過此生。

東堂晨起有感

不解飛車越九州。青鞵處處爲山留。百年未盡且作夢。三日閑行聊散愁。世上幾經華表柱。尊前好在黑貂裘。龍泉幸是無人斲。暮露光芒上斗牛。

金谿道中

雲闌苦竹市。雨來烏石岡。駕犁雙犢健。鬻繭一村香。天地君恩重。風埃吏責忙。敢辭坡路滑。且領筇與涼。

小憩前平院戲書觸目

道邊小寺名前平。殘僧二三屋半傾。旁分千畦畫楸局。正對一山橫翠屏。修織弱蔓上幽援。一作拔。堅瘦。穉柏當前榮。稻秧正青白鷺下。桑椹爛紫黃鸝鳴。村虛賣茶已成市。林薄打麥惟聞聲。泥行扶犁吒新犢。野饁燒筍炊香粳。十年此樂發夢想。忽然到眼難爲情。上車欲去復回首。那將暮境供浮名。

遣興

小麥登場雨熟梅。閉門病眼每慵開。酒盃不解爲愁敵。書卷纔開作睡媒。骨朽空名垂斷簡。冢荒殘碣臥蒼苔。紛紛傾奪知何得。老覺人間但可哀。

雨後獨登擬峴臺

高城斷處閣橫空。目力雖窮興未窮。燕子爭泥朱檻外。人家曬網綠洲中。誰能招喚三秋月。我欲憑陵萬里風。更比峴山無湛輩。論交惟是一枝筇。

數日訴牒苦多憊甚戲作

江南五月暑猶薄。梅子正黃風雨惡。庭中認獠不貸人。急甚常如虎遭縛。空齋鼠迹留几塵。賦詩飲酒疑前身。脫歸徑臥與壁語。敢恨無人問良苦。

與黎道士小飲偶言及曾文清公慨然有感

臨川稅駕忽數月。嗜睡愛閑常閉門。君詩始愜病僧意。吾道難爲俗人言。秋雨淒淒黃葉寺。春風酣酣綠



樹村曾公九原不可作，一尊破涕誦招魂。

念歸

江城五月朝暮雨，雨腳纔收水流礎。酒盃未把愁作病，麈柄欲拈誰共語。有時暫解簿書圍，獨坐藤牀看香縷。林塘渺渺鳩正懽，簾幙陰陰燕新乳。湖山舊隱入我夢，白首忘歸獨安取。一生花裏醉春風，卽今願作扶犁翁。

五月十一日夜且半夢從大駕親征盡復漢唐故地見城邑人物繁麗云西涼府也喜甚馬上作長句未終篇而覺乃足成之

天寶胡兵陷兩京，北庭安西無漢營。五百年間置不問，聖主下詔初親征。熊羆百萬從鑾駕，故地不勞傳檄下。築城絕塞進新圖，排仗行宮宣大赦。岡巒極目漢山川，文書初用淳熙年。駕前六軍錯錦繡，秋風鼓角聲滿天。首循峯前盡停障，平安火在交河上。涼州女兒滿高樓，梳頭已學京都樣。

雨夜

牆西泥三寸，牆東草三尺。可憐白鹿泉，蛙黽紛狼藉。濕螢如隕星，入戶黏几席。病夫本嗜睡，況此風雨夕。永懷灑西寺，更憶山南驛。陳迹不可追，昏然墮吾幘。

又

蒼高雨聲壯，堂豁霧氣入。飛螢照畫棟，相逐光熠熠。向來經春旱，蒼耳暗原隰。微官又厚責，撫事百憂集。三日雨不休，四野苗盡立。登高思賦詩，簿書縛人急。

焚香晝睡比覺香猶未散戲作

小屏煙樹遠參差。吏散身閑與睡宜。誰似爐香念幽獨。伴人直到夢回時。

又

燕梁寂寂篆煙殘。偷得勞生數刻閑。三疊秋屏護琴枕。臥遊忽到灑西山。

仲夏小旱方致禱忽大雨連日江水爲漲喜而有作

旱苗垂槁歎何堪。大雨誰知變立談。翠麓青林吞欲盡。惡風白浪戰方酣。江翻龜窟連雲澤。雷挾龍腥起雪潭。從此年豐真少事。炷香終日坐蒲龕。

冒雨登擬峴臺觀江漲

雨氣分千嶂。江聲撼萬家。雲翻一天墨。浪蹴半空花。噴薄侵虛閣。低昂泛斷槎。壯遊思夙昔。乘醉下三巴。

薤庭草

露草煙蕪與砌平。羣蛙得意亂疎更。微涼要作安眠地。放散今宵鼓吹聲。

蛺蝶詞

蛺蝶子。去復來。草長齊腰花亂開。蜜蜂辛苦爲人計。林鶯百轉胡爲哉。嗟爾蛺蝶獨得意。飛來飛去無嫌猜。猜追花逐絮。闌干角。人生安得如汝樂。

大雨踰旬既止復作江遂大漲

牆角蚊雷喧甲夜。溼星昏昏出雲罅。臨堂仰占久歎咤。懸知龍君未稅駕。行人困苦泥沒胯。居人悲啼江

入舍便晴猶可望秋稼。努力共禱城南社。

又

一春少雨憂旱暵。熟睡湫潭坐龍嬾。以勤贖嬾護其短。水浸城門渠不管。傳聞霖潦千里遠。榜舟發粟敢不勉。空村避水無雞犬。茆舍夜深螢火滿。民家避水多依丘阜。以小舟載米賑之。

燒丹示道流

昔燒大藥青牛谷。磊落玉床收箭鏃。扶桑朝暾謹火候。仙掌秋露勤沐浴。帶間小瓢鬼神衛。異氣如虹夜穿屋。點成黃金棄山海。揮手人間一裘足。明年服丹徑仙去。洞庭月冷吹橫玉。相逢只恐驚倒君。毛髮鬣鬣垂地綠。

書感

半世狂疎踐駭機。暮年持此欲安居。會憑香火消前業。已築茆茨訟昨非。余村居築小軒。以昨非名之。薄俗慣看翻覆手。憂心空復倒顛衣。煙葦雪笠家風在。送老湖邊一釣磯。

夏日

病退身初健。時清吏更休。渴蜂窺硯水。慵燕息簾鉤。碁局每坐隱。屏山時臥遊。真成愛長日。未用憶新秋。

寄統

大兒挈藥囊。小兒負書笈。共作蘭亭遊。詎必羣賢集。言此二十年。白首終未踐。汝復守荆扉。經年不相見。楚越天一涯。書疏何由頻。諸弟亦可憐。說兄輒酸辛。江城秋尚遠。桐葉落可掃。悵然懷故谿。菱絲雨中老。

自詠

家弊須微祿。年衰尙遠遊。未逃朋友責。更遣吏民羞。采藥思長往。傳書却小留。微風入桐葉。分我一簾秋。  
夏日晝寢夢遊一院闌。然無人簾影滿堂。惟燕蹋箏絃。有聲覺而聞鐵鐸。風響璆然殆所夢也。邪  
因得絕句

桐陰清潤雨餘天。簷鐸搖風破晝眠。夢到晝堂人不見。一雙輕燕蹴箏絃。

虛堂

暑氣虛堂一點無。爽如秋露貯冰壺。滄州未遽浮舴艑。碧井聊聽放轆轤。肅肅清風生薤簟。酣酣美睡付  
紗幮。惱人不奈奴兵輩。環抱文書待日晡。江百率以申初治文書。至暮夜乃已。

夢仙夢朝謁大官殿。仰視去天甚近。星皆大如月。氣候清寒如十月。問時庚子六月一日也。

中宵遊帝所。廣殿綴仙官。天逼星辰大。霜清劍珮寒。賦詩題碧簡。侍宴跨青鸞。惆悵塵緣重。夢殘更未殘。  
自嘲

夜作看花夢。朝賦飲酒詩。吾夢固忘矣。詩亦聊自欺。荒園無佳花。牽牛漫疎籬。給酒月四斗。官供酒月止  
四斗耳。一觴難屢持。悲歡有定數。未至誰得知。願從大鈞問。一笑在何時。

長歌行

燕燕尾涎涎。橫穿乞巧樓。低入吹笙院。鴨鴨背曖曖。朝浮杜若洲。暮宿蘆花夾。嗟爾自適天地間。將儔命  
侶意甚閑。我今獨何爲。一笑乃爾慳。世上悲歡亦偶然。何時爛醉錦江邊。人歸華表三千歲。春入篋篋十

四絃

對酒

簷鐸鳴雜珮。簾旌動微波。我老嬾讀書。如此長日何。名酒來清江。嫩色如新鵝。奇俎映玉盤。珍鮮開綠荷。萬事姑置之。適然酣且歌。官遊亦何好。且復小婆娑。秋風雲門道。踏月捫青蘿。

自詠

夢歸不恨故山深。霜雪今年已滿簷。報國有心身潦倒。養生無術病侵尋。晨興聊取經遮眼。夜坐時憑易洗心。安用更爲逃暑飲。虛堂二復自蕭森。

夏日睡起

簾紋似秋水。含風蹙微漪。帳幅如春煙。縹緲不受吹。團扇墮枕邊。皎皎素月暉。非睡復非覺。心定息自遲。茶熟我亦起。寒泉掬珠璣。浮瓜空把玩。甚矣今年衰。

所居堂極涼雖三伏常有秋意也偶得長句

高棟虛簷六月涼。野人誰遣寄華堂。炎威自避重重幙。清吹時生曲曲廊。白苧出箱開疊雪。甘瓜隨刃落輕霜。憑誰爲報金羈客。滿帽京塵有底忙。

雨後露坐小酌

閉門誰與樂頽年。旋掃桐陰近酒邊。病久一春稀見蝶。雨多六月始聞蟬。官倉求飽真聊爾。山墅懷歸每惘然。從此讀書仍復嬾。惟留白眼望青天。

日暮南窗納涼

冠蓋塵沙得我憎。脫巾聊喜髮鬢鬢。素娥東湧行空闊。清吹南來掃鬱蒸。團扇正閑看破墨。矮牀欹臥怯文藤。扁舟歸去應尤樂。莫羨金盤賜苑冰。

中夜起登堂北小亭

幽人曳杖上青冥。掠面風輕宿醉醒。朱戶半開迎落月。碧溝不動浸疎星。舍聲格磔頻移樹。花影扶疎自滿庭。歎息明年又安往。此身何啻似浮萍。

登擬峴臺

顛賴思吳客。淒涼擬峴臺。一年秋欲到。兩鬢老先催。裊裊菱歌斷。翩翩水鳥來。倚闌哦五字。未穩莫輕回。

夜意

灑地移牀曲檻前。葛衣蕭爽接籬偏。庭空秋近露沾草。月落夜闌星滿天。靜待微風停素扇。旋消殘酒漱寒泉。翛然自與氛埃遠。安用騎鯨學水仙。

道院遣興

微官不復歎頭顛。高棟虛窗樂有餘。中夜塔鈴空際語。望秋庭樹月中疎。甌炊青飯留巖客。露點朱毫勸玉書。猶恨未成歸剡曲。小舟閑采白芙蕖。

夜行至白鹿泉上

小雨病良已。新秋夜漸長。隔城聞鶴唳。出戶逐螢光。荒徑穿蒙密。遙空望莽蒼。泉聲落環珮。肝肺爲清涼。

堂中以大盆漬白蓮花石菖蒲脩然無復暑意睡起戲書

海東銅盆面五尺中貯澗泉涵淺碧豈惟冷浸玉芙蓉青青菖蒲絡奇石長安火雲行日車此間暑氣一點無紗幮竹簟睡正美鼻端雷起驚僮奴覺來隱几日初午碾就壑源分細乳卻拈燥筆寫新圖八幅冰綃瘦蛟舞

初秋

溼螢相逐照高棟又見一年風露秋流落江湖常踽踽掃平河洛轉悠悠簿書終日了官事尊酒何時寬客愁擬倩天風吹夢去浩歌起舞散花樓

書懷絕句

不到天台三十年草菴猶記宿雲邊老僧曉出松門去手挈軍持取澗泉

又

憶過棲賢見蜀僧雲堂十月冷生冰定回簌簌聞窗雪一碗琉璃照佛燈蜀僧左緜海辨也

又

丈人祠西山谷盤麻姑洞前松櫟寒仙翁欲覓渺無處聞在青溪浴大丹仙翁謂謙先生

又

早佩黃庭兩卷經不應靈府雜羶腥憑君爲買金鴉髻歸去秋山斲茯苓

又

未駕青鸞返帝鄉。三江七澤路茫茫。看山看水無程數。漁艇爲家芡作糧。

狂吟

浮世何須宇宙名。一狂自足了平生。秋風湘浦緝蘭佩。夜月緱山聽玉笙。學劍慣曾遊紫閣。結巢終欲隱青城。年來自笑彌耽酒。百斛葡萄未解醒。

聞雨

潭底垂龍喚不應。驕陽似欲敗西成。虛堂永夜耿無睡。起聽四郊車水聲。

初秋小疾效俳諧體

宿疢逢秋劇。衰容逐日添。專房一竹几。列屋萬牙籤。今年傳書頗多。遣悶憑清聖。忘情付黑甜。晚來風月好。一笑捲疎簾。

雨後極涼料簡篋中舊書有感

日暎小雨不至晡。雨雖未足涼有餘。細泉冷泠咽幽竇。清吹策策驚高梧。笠澤老翁病蘇醒。欣然起理西齋書。十年燈前手自校。行間顛倒黃與朱。區區樸學老自信。要與萬卷歸林廬。爾來世俗喜變古。鑿空飾詐無根株。愀然撫几三太息。力薄抱恨何由祛。蘭臺漆書非已責。且爲籤勝除蠹魚。

秋夜

湖海秋初到。房櫳夜轉幽。露濃驚鶴夢。月冷伴蛩愁。生計依微祿。年光墮遠遊。嚴灘已在眼。早晚放孤舟。  
去年欲自三衢舟行。泛七里湖。歸山陰。今竟當爲此行也。



抄書

書生習氣重。見書喜欲狂。擣蘖漬剡藤。辛苦補散亡。且作短檠伴。未暇名山藏。故家借籤帙。舊友餉朱黃。借書于王韓。晁曾諸家。而呂周輔字文子友。近寄朱黃墨。皇墳探八索。奇字窮二蒼。儲積山崇崇。探求海茫茫。一笑語兒子。此是卻老方。

晚自白鹿泉上歸

坐穴藜牀愧未能。酌泉聊喜曳枯藤。詩從病後功殊少。酒到愁邊量自增。事業何由垂竹帛。笑談空覺負交朋。興闌卻逐棲鴉返。寂寞西窗已上燈。

秋旱方甚七月二十八夜忽雨喜而有作

嘉穀如焚稗草青。沉憂耿耿欲忘生。鈞天九奏簫韶樂。未抵虛簷瀉雨聲。

秋日小雨有感

七月江邊暑已微。虛窗臥看雨霏霏。淒涼蛩伴草根語。憔悴鵲從天上歸。志士酒酣看寶劍。美人淚盡倚鴛機。嗟予亦有新秋感。遙憶蒼苔滿釣磯。

書李商叟秀才所藏曾文清詩卷後

隴蜀歸來兩鬢絲。茶山已作隔生期。西風落葉秋蕭瑟。淚灑行間讀舊詩。

碧海行

碧海如鏡天無雲。衆真東謁青童君。九奏鏗鏘洞庭樂。八角森茫龍漢文。共傳上帝新有詔。蚩尤下統旄。

頭軍徑持河洛還聖主。更度遼碣清妖氛。幽州螻蚋一炬盡。安用咸陽三月焚。藝祖騎龍在帝左。世上但策雲臺勳。

道院遣興

滿鏡新霜老可驚。十年煙隴廢春耕。黃絲黑黍有歸夢。白髮蒼顏無宦情。浮世不堪供把玩。安心隨處是修行。尙嫌未到無爲地。酷愛朝鐘暮磬聲。

夜酌

遙夜澆愁賴麴生。燈前忽見臥長瓶。比紅有句狂猶在。染白無方老已成。園徑露螢黏溼草。塔簷風鐸亂疎更。悲愁要是騷人事。未必忘情勝有情。

言懷

莫笑生涯似斷蓬。向來諸俠避英雄。報仇使氣風塵裏。吹竹彈絲錦繡中。樂事眼看成昨夢。倦遊心伏作衰翁。論交尙喜筇枝在。白鹿泉邊溯晚風。

送客城西

倦客憑鞍半醉醒。秋光滿眼歎頽齡。日斜野渡放船小。風急漁村攤網腥。客思不堪聞斷雁。詩情彊半在郵亭。歸來更恨城笳咽。烟火昏昏獨掩屏。

雨夜

庭院蕭條秋意深。銅爐一炷海南沉。幽人聽盡芭蕉雨。獨與青燈話此心。

病中作

浮世寄酣枕，勞生居漏船。已悲身老大，更著病沈綿。親舊動千里，歡娛無百年。牀頭周易在，端擬絕韋編。

社日小飲

社日西風吹角巾，一尊強醉汝江濱。杏梁燕子還堪恨，歸去匆匆不報人。

晚到東園

岸曠尋青士，憑軒待素娥。官身苦日短，荒圃得秋多。醉眼輕浮世，羈懷激浩歌。功名從蹭蹬，詩酒且婆娑。

秋晚登擬峴望祥符觀

放翁局促留江干，愛此樓前煙水寬。雨昏回望殿突兀，秋晚剩覺山蒼寒。中原未復淚橫臆，故里欲歸身

屬官。雲外飛仙故不遠，喚渠小爲駐青鸞。

秋思

黃落梧桐覆井牀，莎根日夜泣寒蠶。老生窺鏡鬢成雪，俊鷗掣韝天欲霜。破虜誰持白羽扇，從軍曾擁綠沈槍。壯心自笑何時豁，夢遶祁連古戰場。

病目廢書終日危坐

肺渴常止酒，目昏復捐書。蒲團坐袖手，一窗寬有餘。心知世緣薄，分與鐘鼎疎。湛然千仞淵，養此徑寸珠。光明照憂患，何適不自娛。白雲可與友，晴空閑卷舒。

感昔

常記東園按舞時。春風一架晚薔薇。尊前不展鴛鴦錦。只就殘紅作地衣。成都小東門外趙氏園。

又

八陣原頭縱獵歸。割鮮藉草酒淋漓。誰知此夕西窗裏。一盞青燈獨詠詩。八陣原在成都廣漢之間。

視陂至崇仁村落

津亭徙倚客衣單。秋盡江南亦已寒。雁翅不禁疎雨溼。楓林初染早霞丹。少年已歎儒冠誤。暮境更知行路難。倦馬歸來踏殘日。長吟聊得寫憂端。

馬上

客遊多感慨。老病少歡欣。去去穿村市。翻翻吹帽簷。天低落平野。雁遠入寒雲。漸覺江城近。秋笳馬上聞。

寄周洪道參政

半生篷艇弄煙波。最愛三湘欸乃歌。擬作此行公勿怪。胸中詩本漸無多。

又

菱舟煙雨久思歸。貪戀明時未拂衣。乞與一城教睡足。猶能覓句寄黃扉。

北窗

白首微官只自囚。青燈明滅北窗幽。五更風雨夢千里。半世江湖身百憂。壯志已孤金鎖甲。倦遊空攬黑貂裘。灞亭夜獵猶堪樂。敢恨將軍老不侯。

登擬峴

翠阜圍平野。朱樓壓繚牆。風回半汀雁。雲護一天霜。有地聊容拙。無方可療狂。白頭詩興在。吟罷意差彊。  
休日

賜休暫許養衰殘。靜院翛然晝掩關。釀酒移花調護悶。弄琴洗硯破除閑。與人多忤讒消骨。報國無功愧滿顏。一寸歸心向誰說。小屏依約剡中山。

別張教授歸獨登擬峴

小閣敞朱扉。停車暫息機。行人呼晚渡。幼婦浣秋衣。霜樹欹危堞。風鴉滿落暉。登臨客愁裏。況是送將歸。  
晚晴至索笑亭

中年苦肺熱。臍喜見新霜。登覽江山美。經行草樹荒。堂空響棋子。盞小聚茶香。興盡扶藜去。斜陽滿畫廊。  
新釀熟小酌索笑亭

新酒黃如脫殼鵝。小園持盞暫婆娑。文章不進技止此。仕宦忘歸人謂何。宿業簿書昏病眼。夢遊烟雨溼漁蓑。醉中笑向兒童說。白髮今年添幾多。

乾道初子自臨川歸鍾陵李德遠范周士送別于西津是日宿戰平風雨終夕今自臨川之高安復以雨中宿戰平悵然感懷

故人已作山頭土。倦客猶鄩陌上塵。十五年間真一夢。又騎羸馬涉西津。  
又

十五年前宿戰平。長亭風雨夜連明。無端老作天涯客。還聽當時夜雨聲。

村舍小酌

野性安衡茅，傑屋愁兢兢。上不補縣官，下有肉食慚。雖非策雲驥，實鄙作繭蠶。失計不容悔，漁養換朱藍。少壯尚可力，老大真難堪。今朝意頗豁，村舍寄半酣。玉版烹雪筍，金苞擘霜柑。豈惟寫我憂，亦以稅我驂。弄筆作一笑，何用與客談。逡巡上車去，溼翠浮烟嵐。

白塔道中乘臥輿行

小疾載臥輿，獨飲亦薄醉。朝離戰平館，午過白塔市。清寒正宜嬾，搖兀更益睡。所嗟下程早，不得究此味。忽憶從軍時，雪夜馳鐵騎。壯心誰復識，撫事有餘愧。

宿城頭鋪小飲而睡

亭傳臨江濟，牀敷息我勞。屋茅殘月冷，庭樹北風颺。虛市饒新兔，村場有濁醪。氣衰仍病著，小飲不能豪。豐城村落小憩

霜信催寒力，尙微郵亭繫。馬旋添衣，平郊極目冬耕遍。小婦簪花晚餉歸，孤宦每隨征雁遠。故人已似曉星稀，上書自效真須猛。菰正堪炊蟹正肥。

再題

柴門數頃秋，半日爲遲留。老驥厭伏櫪，飢鷹思下韉。野橋危欲斷，山雨落還收。何許丹青手，端能寫此愁。

發豐城縣

豐城古縣已再遷，出郭十步江渺然。冷雲四合欲下雪，柔櫓數聲初放船。孤村燈火照破驛，客子何以娛

今夕不辭金盃醉十分。要看玉花深一尺。

豐城尚安之間。憩民家。景趣幽邃。爲之慨然懷歸。

數家聚雲根。細路入叢薄。濺濺石渠水。來往一略約。有無鄰里通。笑語婦子樂。濁醪時相就。青蔬缺鹽酪。日暮歸閉門。續火星燂爚。先期畢租稅。老不入城郭。嗟予獨何事。早插紅塵脚。故山未成歸。悵望有餘恻。宿華嚴寺。

夜宿華嚴寺。人扶到上方。喚僧同看畫。避佛旋移牀。小雨不成雪。烈風還作霜。鐘殘燈漸暗。趺坐默焚香。寄奉新高令。

小雨催寒著客袍。草行露宿敢辭勞。歲饑民食糟糠窄。吏惰官倉鼠雀豪。只要閭閻寬筮楚。不須亭障肅弓刀。九重屢下丁寧詔。此責吾曹未易逃。

高安州宅三詠

丹井神仙李八百棟丹處

丹成人已仙。遺窳亦已平。尚餘松根井。鏘然環玦聲。我來試一啜。槁面還童嬰。祝君勿關鑰。人人遣長生。井有闌楯護之。

劍池李八百洗劍處

我壯喜學劍。十年客峨眉。毫髮恐未盡。屠釣求隱淪。今年獨何幸。見此度世人。夜深來較術。雷雨戰江津。偃公。

巨松偃青蓋。閱世歸獨存。頗疑古仙翁。藏丹在其根。或是結靈藥。百尺有伏龍。終隨風雨化。不死何足言。

與高安劉丞遊大愚觀壁間兩蘇先生詩

野性縱壑魚。官身墮穿虎。適得建溪春。頗憶松下鬪。微霜初變寒。短景已過午。佳客能聯翩。老宿相勞苦。懷哉兩蘇公。去日不可數。泉扃一埋玉。世事幾炊黍。吾儕生苦晚。佇立久惻楚。尙想來遊時。黃鍾廣大呂。



# 陸放翁集

劍南詩稿

## 卷第十三

宿黃仙觀。兵火焚蕩之餘，惟一殿突兀猶在。黃仙蓋與許旌陽同時飛昇者。

拔宅翛然上碧虛。神仙豈亦愛吾廬。重門不改雲山色，古殿猶存劫火餘。翠木蕭森高蔽日，黃冠貧窶自畦蔬。殘年安得長來此，一椀松肪讀隱書。

玉隆得丹芝

何用金丹九轉成。手持芝草已身輕。祥雲平地擁笙鶴，使自西山朝玉京。

贈西山老人

生世不把筆。殘年惟灌園。賃春來並舍，賣晝到前村。勤苦供租稅，清貧遺子孫。從來棲遁志，剩欲與翁言。

病酒宿土坊驛

少時見酒喜欲舞。老大畏酒如畏虎。一日飲酒三日病。客路那堪夜聞雨。雨聲蕭蕭宿空堂。不寐始知更漏長。賣藥思從伯休隱。愛花卻笑拾遺狂。

十一月上七日蔬飯驛嶺小店

新杭炊飯白勝玉。枯松作薪香出屋。冰蔬雪菌競登槃。瓦鉢氈巾俱不俗。曉途微雨壓征塵。午店清泉帶

脩竹建谿小春初出碓。一碗細乳浮銀粟。老來畏酒厭芻豢。卻喜今朝食無肉。尙嫌車馬苦磨人。會入青雲騎白鹿。

進賢驛感懷明日當歸至臨川

環走幾千里。馳歸亦再旬。征途饒感慨。訟牒費精神。風雪常欺客。文章本誤身。小詩無傑思。猶得常吟呻。入臨川境馬上作

投老磨身簿領間。卻因馬上得偷閑。兼旬敢恨常爲客。一飯何曾不對山。銅鏡無情欺白髮。霜風有力散酡顏。今宵要看浮橋月。儘放征騑晚入關。

別楊秀才

歲暮江頭又語離。淡煙衰草不勝悲。俗人憤憤寧知子。心事悠悠欲語誰。燈暗想傾澆悶酒。路長應和贈行詩。人生但要身彊健。一笑相從自有時。

發臨川

見客道傍店。添衣江上村。陂長風浩浩。山遠霧昏昏。虛日人聲合。凶年菜色繁。扶衰歸北闕。何以報君恩。早行

江路迢迢馬首東。臨川一夢又成空。日高未泫晨霜白。風勁先消卯酒紅。山市人經饑饉後。孤生身老道途中。著身穩處君知否。射的峯前臥釣篷。

白干鋪別傳用之主簿

我行忽百里，送客亦已空。傅子獨眷眷，旦暮隨此翁。謝之不肯去，瘦馬衝北風。泥濘及馬臆，霜飛逼裘茸。茅店得小語，慨然念年凶。不作兒女悲，道義相磨礱。我歸亦何爲，魚鳥愁池籠。君乃臺閣人，鸞鳳儀笙鏞。若耶遶青山，子草堂在若耶溪上。天祿摩蒼穹，此別各努力。出處何必同。

過茱萸鋪青松朱戶前，臨大道絕似西陲亭驛。悵然有作。

茱萸小驛夕陽愁，搔首臨風感舊遊。渾似軍行散關路，但無鼓吹動涼州。

青溪道中行古松間，因少留淪茶而行。

露溼青松細細香，旋呼拄杖路斜陽。三生舊發遊山願，一卷新傳辟穀方。雲外未論笙鶴近，塵中曾厭簿書忙。拾樵汲澗俱清絕，聊爲煎茶一據牀。

弋陽縣江上書觸目

縣前奇哉一江水，日暮風吹碧鱗起。客恨征塵忽如洗，不用金篦刮眸子。丹楓岸邊雪色蘆，下有老翁方捕魚。欲求妙思貌畫圖，王維鄭虔今世無。

乾封驛早行

己已被驛書，乙亥戒徂徠。扶衰犯霜露，疲憊不可狀。夜行星滿天，晨起雞初唱。槁枝燒代燭，凍菜擲供餉。三年走萬里，天幸苟亡恙。深知賦材薄，自笑得名妄。宣溫望玉座，何以待諮訪。春江色如藍，歸舟行可榜。

過江山縣浮橋有感

堪笑行人日日忙，又扶衰病過浮梁。灘流急處水禽下，桑葉空時村酒香。枯枿取懷貪雨露，飢鴻自憫犯

風霜。宦途商略無安處。早晚歸耕剡曲旁。

衢州早行

鄰雞已三號。殘燭無一寸。參差發行囊。迢遞望前頓。滿靴霜若雪。破面風抵刃。敢辭行路難。漸喜京邑近。少年奉朝請。親見堯授舜。飄然如脫葉。蹭蹬垂七閩。風埃暗征袍。歲月集衰鬢。餘生迫歸休。周行愧英俊。

杭頭晚興 嚴州

山色蒼寒野色昏。下程初閉驛亭門。不須更把澆愁酒。行盡天涯慣斷魂。

又

落葉孤村晚下程。癡雲殘日半陰晴。篝爐火煖牀敷穩。臥聽黃鶉穀穀聲。

行至嚴州壽昌縣界得請許免入奏仍除外官感恩述懷

曉傳尺一到江村。拜起朝衣漬淚痕。敢恨帝城如日遠。喜聞天語似春溫。翰林惟奉還山詔。湘水空招去國魂。聖主恩深何力報。時從天末望修門。

桐廬縣泛舟東歸

桐江艇子去乘月。笠澤老翁歸放慵。一尺輪囷霜蟹美。十分潏灑社醅濃。官遊何啻路九折。歸臥恨無山萬重。醉裏試吹蒼玉笛。爲君中夜舞魚龍。

予欲自嚴買船下七里灘謁嚴光祠而歸會灘淺陸行至桐廬始能泛江因得絕句

客星祠下渺烟波。欠我扁舟舞短蓑。不爲窮冬怕灘惡。正愁此老笑人多。

又

桐廬縣前鷓鴣聲急，蒼烟茫茫白鳥雙。亂山日落潮未落，勝絕不減吳松江。

漁浦

桐廬處處是新詩，漁浦江山天下稀。安得移家常在此，隨潮入縣伴潮歸。

又

漁翁持魚叩舷賣，炯炯綠瞳雙臉丹。我欲從之逝已遠，菱歌一曲暮江寒。

蕭山

素衣已免染京塵，一笑江旁整幅巾。入港綠潮深蘸岸，披雲白塔遠招人。功名姑付未來劫，詩酒何孤見在身。會向桐江謀小築，浮家從此往來頻。

辛丑正月三日雪

開歲尙殘冬，佳哉雪意濃。潤歸千里麥，聲亂五更鐘。簾隙收初密，牆隅積已重。龍團笑羔酒，狐腋襲駝茸。危檻臨欹竹，幽窗聽墮松。忽思西戍日，憑堞待傳烽。予從戎日嘗大雪中登興元城上高興亭待平安火至。

正月二十八日大雪過若耶溪至雲門山中

山中看雪醉騎驢，清賞真成十載無。高壓孤峯增峭絕，斜傾叢竹失枝梧。松肪火暖眠僧榻，芋糲羹香擁地爐。病骨雖癯猶健在，未應遽作臥遊圖。

雪中登雲泉上方

滃滃雲堆上，茫茫雪海中。煎茶誇坐客，打竹課蠻童。冰谷鳴飢鶴，烟汀立斷鴻。歸來更堪喜，葑火滿爐紅。  
僧以葑爲火。

衝雪至餘慶覺林雪連日不止

策蹇清吟涉若耶，灞橋猶恨近京華。山前千頃誰種玉，座上六時天散花。林雀無聲溪徇斷，炊煙不動竹籬斜。勝遊更覺平生少，未羨銀河泛客槎。

大雪歌

若耶溪頭朝暮雪，鴉鵲墮死長松折。橫飛忽已平屐齒，亂點似欲粧簾纈。放翁憑閣喜欲顛，摩娑拄杖向渠說。莫辭從我上嵯峨，此景與子同清絕。銀盃拌蜜非老事，石鼎煎茶且時啜。題詩但覺退筆鋒，把酒未易生耳熱。扶衰忍冷君勿笑，報國寸心堅似鐵。漁陽上谷要一行，馬蹄蹴踏河冰裂。

雪霽歸湖上過千秋觀少留

縱轡不嫌遠，逢山猶一登。夕陽陂渺渺，殘雪塔層層。折竹橫遮道，飢鳥下啄冰。欲歸還小駐，倚杖對峻嶒。

二月四日作

早春風力已輕柔，瓦雪消殘玉半溝。飛蝶鳴鳩俱得意，東風應笑我閒愁。

新築山亭戲作

危檻凌風出半空，怪奇造化欲無功。天垂繚白縈青外，人在紛紅駭綠中。日月匆匆雙轉轂，古今杳杳一

飛鴻酒酣獨臥林間石。未許塵寰識此翁。

春晴出遊

一春彊半病。頗廢山澤遊。今晨忽良已。風日亦清柔。朝飧具冷餅。瘦骨辭重裘。穉荷出溝港。芳杜滿河洲。勿言酒苦薄。一笑失百憂。且當詠尋壑。詎必賦登樓。

題山家壁

山中無傳漏。猿鳴知既夕。芳藤上幽援。素月照高壁。主人殊喜事。歡若有夙昔。稚子繁竹槃。炊黍持餉客。卜鄰雖未辨。清嘯聊自適。衰病久廢詩。筆端歎荆棘。

春晚風雨中作

箕踞藜牀岸。幅巾何妨病。酒住湖濱。駕風浪作連三日。掃地花空又一春。樂事清宵當秉燭。畏途平地有摧輪。頽然耐辱君無怪。元是人間澹蕩人。

北窗

九陌黃塵早暮忙。幽人自愛北窗涼。清吟微變舊詩律。細字閑抄新酒方。草木扶疎春已去。琴書蕭散日初長。破羌臨罷搢頤久。又破銅匱半篆香。

山中晚興

薄酒亦陶然。偃蹇澗石側。巾墮拄杖橫。意象頗自得。青山受落日。忽作玻璃色。躊躇不忍去。下磴天已黑。

夜登山亭

飛觀崢嶸天宇寬。幽人半醉凭闌干。三山渺渺鸞鶴遠。七澤茫茫葦笠寒。清吹拂林橫玉笛。紫雲覆鼎熟金丹。童顏綠髮無人識。回首塵寰一夢殘。

西村醉歸

俠氣崢嶸蓋九州。一生常恥爲身謀。酒甞剩欠尋常債。劍不虛施細碎讎。見孟東野詩岐路凋零白羽箭。風霜破弊黑貂裘。陽狂自是英豪事。村市歸來醉跨牛。

自詠

三十年前接俊遊。卽今身世寄滄洲。俚聲不辦諧詔護。暮氣寧能徹斗牛。綠酒可人消永日。黃鸝多事管閑愁。吹笙跨鶴何時去。剩欲平章太華秋。

閑中頗有四方之志偶得長句

世論紛紛枉見仇。吾身自計本悠悠。讀書漸懶惟思睡。壓酒初成不怕愁。蜀棧冷雲侵瘦馬。楚江籠月繫孤舟。興來會作飄然去。更續騷人賦遠遊。

遣興

綠髮凋零白髮多。山林未死且婆娑。無端忤俗坐狂耳。甚欲讀書如嬾何。雨過亂葦堆野艇。月明長笛和菱歌。此中得意君須領。莫愛車前印幾窠。

又

遠簷新葉著啼鶯。睡起東窗一榻橫。愁袞袞來疑有約。春堂堂去恨無情。鶻飛局上新棋勢。龍吼牀頭古



劍聲莫歎柴荆無客到。綠尊還對暮山傾。

醉題

坎止流行五十秋。胸中不解著閑愁。浩歌野渡驚雲起。狂舞空庭挽月留。性本自然憎截鶴。器非大受愧函牛。平生最愛嚴灘路。早晚貂裘換釣舟。

小園

小園煙草接鄰家。桑柘陰陰一徑斜。臥讀陶詩未終卷。又乘微雨去鋤瓜。

又

歷盡危機歇盡狂。殘年惟有付耕桑。麥秋天氣朝朝變。蠶月人家處處忙。

又

村南村北鶉鴉聲。水刺新秧漫漫平。行遍天涯千萬里。卻從鄰父學春耕。

又

少年壯氣吞殘虜。晚覺丘樊樂事多。駿馬寶刀俱一夢。夕陽閑和飯牛歌。

步虛

微風吹碧海。細細生龍鱗。半醉騎一鶴。去謁青華君。歸來天風急。吹我過緱山。鏘然哦詩聲。清曉落人間。人間仰視空浩浩。遠孫白髮塵中老。初見姬翁禮樂新。千九百年如電掃。

又

瀛海日月淵。蓬壺仙聖宅。駕鶴一時遊。海面日夜窄。人生蜉蝣耳。一閔瓦甕中。天地廣如許。誰能發其蒙。丹書千卷藏。一塵子能求之勿從人。晴窗趺坐春滿腹。崑崙待得丹芝熟。

又

曩者過洛陽。宮闕侵雲起。今者過洛陽。蕭然但荒壘。銅駝臥深棘。使我惻愴多。可憐陌上人。亦復笑且歌。世事茫茫幾成壞。萬人看花身獨在。北邙秋風吹野蒿。古冢漸平新冢高。

又

一瓢小如爾。芳醪溢其中。醉此一市人。吾瓢故無窮。不言術神奇。要是心廣大。觴豆有德色。笑子乃爾隘。岳陽樓中橫笛聲。分明爲子說長生。金丹養成不自服。度盡世人朝玉京。

醉中登避暑臺

半醉行歌上古臺。脫巾散髮謝氛埃。但知禮豈爲我設。莫管客從何處來。剡曲煙波菱蔓滑。耶溪風露藕花開。老來世事渾成嬾。一櫂幽尋未擬回。

立秋前三日夜坐庭中偶賦

絳闕清都侍宴還。天風搖珮夜珊珊。月輪桂滿蟾初冷。星渚橋空鵲尚閑。一鶴每臨雲雨上。幾人虛老市朝間。試將綠髮窺清鏡。未愧僊姝玉鍊顏。李文饒詩云。河漢女。玉鍊顏。雲駟往往到人間。

南堂臥觀月

河漢橫斜星宿稀。臥看涼月入窗扉。恍如北戍梁州日。睡覺清霜滿鐵衣。

夜坐獨酌

玉宇沉沉夜向闌，跨空飛閣倚高寒。一壺清露來雲表，聊爲幽人洗肺肝。

夜興

鶴瘦龜肌與靜宜，更闌徙倚並清池。月當三五初盈夜，河直西南欲落時。浩浩醉歌羣鷺起，翩翩孤影角巾欹。飛仙授我青瑤簡，索賦山中夜興詩。

月夜泛小舟湖中三更乃歸

落日愁思把釣鉤，南鄰借得采菱舟。湖心月上明如晝，樹杪風生冷逼秋。壯歲功名慚汗馬，暮年心事許沙鷗。桐江一葉真奇策，莫爲兒曹作滯留。

無題

半醉凌風過月旁，水精宮殿桂花香。素娥定赴瑤池宴，侍女皆騎白鳳凰。

又

出繭脩眉淡薄妝，丁東環佩立西廂。人間浪作新秋感，銀闕瓊樓夜夜涼。

自山中夜行還湖上

火雲嶢嶢水車鳴，行人畏熱不敢寧。蕭然一馬兩園丁，缺月照我影伶俜。荒雞起早忽再唱，北斗低盡餘三星。扁舟菱歌正嫋嫋，叢冢鬼火何熒熒。迎人漸見鏡湖白，回首已失秦山青。道邊野店得小憩，一盃濁酒傾殘瓶。登盤絕愛畦韭美，轆釜未厭谿鱗腥。丈夫所要飽辛苦，文叔尙困蕪婁亭。

大風

今年毒熱不可支。白汗如雨愁纖絺。皇天悔禍爲一洗。秋風作意來如期。聲如怒濤撼坤軸。夜半折我南齋竹。幽人晨起得奇觀。鳳尾襪襪一窗綠。

新秋

天河漸近鵲橋時。一夜風吹斗柄移。金井梧桐元未覺。畫廊蟋蟀已先知。青燈耿耿還相伴。白髮蕭蕭只自悲。猶勝玉門關外客。臥聽沙雁數歸期。

月夕睡起獨吟有懷建康參政

月上虛堂一榻橫。斷香漠漠欲三更。隔簾清露挾秋氣。繞樹驚鴉啼月明。只怪夢尋千里道。不知愁作幾重城。苦吟更恨知心少。西望金陵闕寄聲。

病瘡後偶書

秋色已蕭然。曲肱清夜眠。孤燈欺病後。薄酒慰愁邊。藥物從人乞。文章畏客傳。惟應一蓬艇。湖海送凋年。斷角斜陽觸處愁。長亭搔首晚悠悠。世間最是蟬堪恨。送盡行人更送秋。

秋日聞蟬

感秋

南山射虎漫英雄。投老還鄉一秃翁。世味掃除和蠟盡。生涯零落併錐空。秋驚蠹葉凋殘綠。病著衰顏失舊紅。笠澤松陵家世事。一竿惟是待西風。

南軒

今年秋早涼。七月已蕭然。南軒修竹下。枕簟終日眠。時將半殘夢。聽此欲斷蟬。推枕起太息。四序忽已遷。功名墮渺莽。衰疾方沈綿。新月獨多情。窺窗澹娟娟。

夜坐

虛堂夜無寐。顧影歎鈴蟬。露溼螢黏草。雲迷雁落汀。舊書開蠹簡。濁酒倒殘甌。流落知無憾。危機實飽經。

新涼書事

臥看烏篆印蒼苔。窗戶涼生亦樂哉。鳴樹亂蟬催日落。拂塔飛葉報秋來。病餘已覺身如寄。醉裏卻憐心尙孩。排日從今占幽事。折殘籬菊探溪梅。

聞蟬思南鄭

昔在南鄭時。送客褒谷口。金羈叱撥駒。玉盃蒲萄酒。醉歸涉漾水。鳴蟬在高柳。回鞭指秦中。所懼壯心負。人生豈易料。蹭蹬十年後。蟬聲恍如昔。而我已白首。逆胡亡形具。輿地淪陷久。豈無好少年。共取印如斗。

憶昔

憶昔浮江發劍南。夕陽船尾每相銜。楠陰暗處尋高寺。荔子紅時宿下巖。高寺在瀘州。下巖在雲安軍。峽口烹豬賽龍廟。沙頭伐鼓挂風帆。區區陳迹何由記。惟有征塵尙滿衫。

病中夜興

病瘡秋來久未平。草堂遙夜不勝清。疾風遞響驚林葉。列宿收芒避月明。百計不能逃白髮。一生堪笑役

虛名釣車且作桐江夢。莫念安西萬里行。

秋夜

秋氣侵帷夢不成。一燈西壁翳還明。風高露井無桐葉。雨急煙村有雁聲。擊筑誰同燕市飲。賃舂方作會稽行。從來自許知何等。堪歎江湖白髮生。

謝張時可通判贈詩編

聖朝中興六十年。君家文武何聯翩。先生劍履冠麟閣。後嗣簪橐陪甘泉。流傳到君愈卓犖。投我千篇皆傑作。未分玉帳萬貔貅。且擅詩人一丘壑。爾來士氣日靡靡。文章光燄伏不起。君今已似曠齋雲。更看他年鯤擊水。

酬莊器之賢良見贈

先朝六科親策士。事業功名何壯偉。元祐復科才數年。所得四三俄復止。中興思賢形夢想。屢詔自是朝廷美。紈袴小兒壞人事。賜帛西歸困嘲詆。諸公相視歎才難。一士臥雲誰挽起。跨驢過我時共語。晁董千年元不死。高談疊疊有脈絡。橫得虛名吾可恥。烏巾白紵塞路衢。砥柱頽波望吾子。

舟過樊江憩民家具食

旅食何妨美蕨薇。夕陽來叩野人扉。蕭蕭短鬢秋初冷。寂寂空村歲薦饑。蓼岸刺船驚雁起。煙陂吹笛喚牛歸。詩情剩向窮途得。蹭蹬人間未必非。

舟中作

斷岸飲鸕鷀。清波跳噉。紅橋未斜日。白塔已昏鐘。詩律與年邁。客愁如酒濃。宋公題壁處。橫靄抱孤峯。  
稱心寺有宋考功詩。而予所未到。望之慨然。

九月三日泛舟湖中作

兒童隨笑放翁狂。又向湖邊上野航。魚市人家滿斜日。菊花天氣近新霜。重重紅樹秋山晚。獵獵青帘社酒香。隣曲莫辭同一醉。十年客裏過重陽。予自庚寅至辛丑。始見九日于故山。

霜天晚興

薄霜門巷不勝清。小立湖邊夕照明。紅顆帶芒收晚稻。綠苞和葉摘新橙。閑評琴價留僧話。靜聽松聲領鶴行。壯志消磨渾欲盡。西風莫動玉關情。

九月六日小飲醒後作

短劍悲秦俠。高歌憶楚狂。酒醒愁袞袞。香冷夢悵悵。屋老垣衣茂。池深石髮長。地爐須早計。衰病怯新霜。

書悲

今日我復悲。堅臥腳踏壁。古來共一死。何至爾寂寂。秋風兩京道。上有胡馬跡。和戎壯士廢。憂國清淚滴。關河入指顧。忠義勇折激。常恐埋山丘。不得委鋒鏑。立功老無期。建議賤非職。賴有墨成池。淋漓豁胸臆。

又

丈夫孰能窮。吐氣成虹霓。釀酒東海乾。累麴南山齊。平生褰旗手。頭白歸扶犁。誰知蓬窗夢。中有鐵馬嘶。何當受詔出。函谷封丸泥。築城天山北。開府蕭關西。萬里掃塵煙。三邊無鼓鼙。此意恐不遂。月明號荒雞。

中夜起出門月露浩然歸坐燈下有賦

月白萬瓦霜露重。四山雨開門。忽驚歎秋色已如許。去蜀如昨日。坐閱四寒暑。無才屏朝蹟。有罪宜野處。平生萬里心。收斂臥環堵。朱顏逝不留。白髮生幾縷。人言尺蠖屈。要有黃鵠舉。功名非老事。歲晚忍羈旅。

新寒

病怯新寒欲不禁。南窗擁褐夜愔愔。江湖跌宕送餘日。書劍蕭條孤壯心。杜曲新愁隨斷雁。遼陽遺恨入疎砧。此懷擬向何人說。賴有昏燈伴苦吟。

幽居

松陵甫里舊家風。晚節何妨號放翁。衰極睡魔殊有力。愁多酒聖欲無功。一編蠹簡晴窗下。數捲一作掩疎籬落木中。退士所圖惟一飽。諸公好爲致年豐。

醉中步月湖上

閑餘時節早。天氣已淒冷。悠哉曳杖行。樂此清夜永。霜風瘦病骨。林月寫孤影。新詩得復忘。薄酒吹易醒。浮生役聲利。百歲常鼎鼎。清遊倘可繼。終老謝人境。

東村

塘路東頭烏柏林。偶攜藤杖得幽尋。桃源阡陌自來往。輞口雲山無古今。遠浦過帆供極目。暮天橫雁入微吟。歸來更覺愁無那。剩放燈前酒椀深。

西村



湖塘西去兩三家。杖履經行日欲斜。蹙蹙水紋生細澗。蜿蜿沙路臥修蛇。旱餘蟲鏤園蔬葉。寒淺蜂爭野菊花。老去郊居多樂事。脫巾未用歎蒼華。

題張幾仲所藏醉道士圖

千載風流賀季真。畫圖髣髴見精神。邇來祭酒皆巫祝。眼底難逢此輩人。

又

臥聽牀頭壓酒聲。起行籬下摘新橙。一尊久欠敲門客。風味何人似麴生。

山園草間菊數枝開席地獨酌

屋東菊畦蔓草荒。瘦枝出草三尺長。碎金狼藉不堪摘。掃地爲渠持一觴。日斜大醉叫墮幘。野花村酒何曾擇。君不見詩人跌宕例如此。蒼耳林中留太白。

湖村月夕

客路風塵化素衣。閑愁冉冉鬢成絲。平生不負月明處。神女廟前聞竹枝。

又

錦城曾醉六重陽。回首秋風每斷腸。最憶銅壺門外路。滿街歌吹月如霜。

又

金尊翠杓猶能醉。狐帽貂裘不怕寒。安得驂騮三萬疋。月中鼓吹渡桑乾。

又

誰持綠酒醉幽人。鶴筴筠枝發興新。今夜湖邊有奇事。青山缺處涌冰輪。

卯酒徑醉走筆

少時憑酒剩狂顛。摘宿緣雲欲上天。才盡氣衰空自笑。一盃纔放已頽然。

山中望籬東楓樹有懷成都

五門西角紅樓下。一樹丹楓馬上看。回首舊遊如夢裏。西風吹淚倚闌干。紅樓蜀工所作。在五門西南隅。

暮秋有懷王四季夷

鏡湖西畔小茅茨。紅葉黃花秋晚時。天闊素書無雁寄。夜闌清夢有燈知。功名蹭蹬初何憾。朋舊乖離未

免悲。遙想扁舟五湖口。阻風中酒又成詩。

幽居

老子堪哈老轉癡。幽居喜及早寒時。芋魁加糝香出屋。菰首芼羹甘若飴。菰首。菱白也。顛倒朱黃思誤字。

縱橫黑白戲拈棋。此懷敢向今人說。骨朽諸賢卻見知。

有懷

筇杖斜斜倚素屏。北窗遙夜冷如冰。何時得與平生友。作字觀書共一燈。

對酒

醫從和扁來。未著卻老方。吾晚乃得之。莫如麴蘖良。一盃臉生春。況復累十觴。坐令桃花紅。換盡霜葉黃。看鏡喜欲舞。追還少年狂。但恨寶釵樓。胡沙隔咸陽。芳華雖無恙。萬里遙相望。寶釵樓。咸陽旗亭也。芳華。

樓在咸都合江圍。感歎徑投枕。悲歡兩茫茫。

初冬

鉏犁滿野及冬耕。時聽兒童叱犢聲。逐客固宜安散地。閑民何幸樂昇平。雪花漫漫蕎將熟。綠葉離離薺可烹。飯飽身閑書有課。西窗來趁夕陽明。

晝寢夢一客相過。若有舊者夷粹可愛。既覺作絕句記之。

夢中何許得嘉賓。對影胡牀岸幅巾。石鼎烹茶火煨栗。主人坦率客情真。

書歎

多病文園苦滯留。時時浩歎攬貂裘。縱無夜雨何曾寐。不爲秋風也自愁。今歲頓驚絲鬢改。此生難繼錦江遊。欲談舊事無人共。日落鴉歸又倚樓。

督下麥雨中夜歸

細雨闌村墟。青煙溼廬舍。兩兩犢並行。陣陣鴉續下。紅稠水際蓼。黃落屋邊柘。力作不知勞。歸路忽已夜。犬吠闌籬隙。燈光出門罅。豈惟露沾衣。乃有泥沒胯。誰憐甫里翁。白首學耕稼。未言得一飽。此段已可畫。

霜曉肩輿行湖上

去去出柴關。巾車古陌間。晨霜染丹葉。宿霧淡青山。登覽身猶健。歌呼酒每慳。殷勤鏡湖水。聊爲照衰顏。

杜門

寂寞山深處。崢嶸歲暮時。燒灰除菜蝗。讀如橫字去聲。送芋謝牛醫。覓水晨澆藥。燈窗夜覆棋。杜門君勿

怪。遲暮少新知。

橫塘

橫塘南北埭西東。拄杖飄然樂未窮。農事漸興人滿野。霜寒初重雁橫空。參差樓閣高城上。寂歷村墟細雨中。新買一菱苔樣綠。此生端欲伴漁翁。是日偶買蓑衣甚妙。

書事寄良長老

素屏烏几野人廬。山色蒼寒十月初。雨足四郊耕欲遍。霜高萬木脫無餘。一尊窗下澆愁酒。數卷牀頭引睡書。寄語住菴劉老宿。不應隨俗向人疎。

食齋十韻

舍東種早韭。生計似庾郎。舍西種小菓。戲學蠶叢鄉。惟齋天所賜。青青被陵岡。珍美屏鹽酪。耿介凌雪霜。采擷無闕日。烹飪有祕方。候火地爐煖。加糝沙鉢香。尙嫌雜筍蕨。而況汗膏粱。炊菰及黓麩。得此生輝光。吾饒實易足。捫腹喜欲狂。一掃萬錢食。終老稽山旁。

冬煖頗有春意追憶成都昔遊悵然有作

濯錦江邊罨畫樓。金鞭曾護犢車遊。紛紛萬事反乎覆。落落一身淹此留。刻燭賦詩空入夢。傾家釀酒不供愁。探春歌吹應如昨。亦有朋儕記我不。

忽忽

忽忽復悠悠。頻驚歲月遒。若無船貯酒。將奈斛量愁。列炬燕宮夜。成都故蜀時燕王宮今屬張氏海棠爲

一城之冠呼鷹漢廟秋。南鄭漢高帝廟。予從戎時多獵其下。凋年莫多感。夢境付滄洲。

醉書山亭壁

物外陽狂五百年。扁舟又繫鏡湖邊。飛昇未抵簪花樂。遊宦何如聽雨眠。綠蟻灘尊芳醞熟。黑蛟落紙草書顛。忽拈玉笛橫吹去。說與傍人是地仙。

十月旦日至近村

鴨腳葉黃烏臼丹。草煙小店風雨寒。荒年人家雞黍送。芋羹豆飯供時節。村童上牛踏牛鼻。吹笛聲長入雲際。今年雖飢卻少安。縣吏不來官放稅。

蔬圃絕句

擬種蕪菁已是遲。晚菘早韭恰當時。老夫要作齋盂備。乞得青秧趁雨移。

又

百錢新買綠蓑衣。不羨黃金帶十圍。枯柳坡頭風雨急。憑誰畫我荷鋤歸。

又

青青蔬甲早寒天。想像登盤已墮涎。更欲鉏畦向東去。園丁來報竹行鞭。

又

瓦壘浮屠盆作池。池邊紅蓼兩三枝。貪看忘卻還家飯。恰似兒童放學時。

又

小橋只在槿籬東。溝水穿籬曲折通。煙雨空濛最堪樂。從教打濕敗天公。

又

衝雨衝風不怕寒。晚來日出短簷乾。遠畦拾塊真爲樂。莫作陶公運甕看。

又

嬾隨年少愛花狂。且伴羣兒鬪草忙。行遍山南山北路。歸時新月浸橫塘。

冬夜不寐至四鼓起作此詩

秦吳萬里事轍遍。重到故鄉如隔生。歲晚酒邊身老大。夜闌枕畔書縱橫。殘燈無焰穴鼠出。槁葉有聲村

犬行。八十將軍能滅虜。白頭吾欲事功名。高麗有識云。當有八十老將平之。李英公實應是識。

蔬圃

山翁老學圃。自笑一何愚。礪瘠才三畝。勤劬賴兩奴。正方畦畫局。微潤土融酥。翦闢荆榛盡。鋤犁磊塊無。過溝橫路約。駉駉起浮屠。拾園中瓦礫作小塔。隙地成瓜。援餘功及芋區。如絲細生菜。似鴨爛蒸壺。此事今真辦。東歸不爲鱸。

夢中作

拓地移屯過酒泉。第功圖像上凌煙。事權皂纛兼黃鉞。富貴金貂映玉蟬。油築毬場飛驪馱。錦裁步障貯嬋娟。擁塗士女千層看。應記新豐舊少年。

村居酒熟偶無肉食。煮菜羹飲酒。

歌風俚頽楚狂，畏犧醜齷笑蒙莊。著書幸可俟後世，對客從噴臥大牀。三畝青蔬了盤筯，一缸濁酒具盃觴。丈夫窮達皆常事，富貴何妨食萬羊。李文饒嘗遇異人云平生當食萬羊。

辛丑十月諸公餽酒偶及百榼戲題長句

喜事諸公尙見存，尺書時到箭羅門。已邀風月成三友，聊對湖山倒百尊。醉墨淋漓動高壁，狂歌悲壯落前村。悠然睡起西窗黑，一點青燈又斷魂。

灌園

少攜一劍行天下，晚落空村學灌園。交舊凋零身老病，輪囷肝膽與誰論。

幽居

破屋頽垣霧雨昏，幽人終日掩柴門。因鋤衰草通南阜，偶洗叢篁見北村。短褐奇溫等狐腋，寒蔬脆美敵熊蹯。冬來酒戶微增舊，萬事應須付一尊。

日出入行

吾聞開闢來，白日行長空。扶桑誰曾到，崦嵫不可窮。但見旦旦升天東，但見暮暮入地中。使我倏忽成老翁，鏡裏衰鬢成霜蓬。我願一日一百二十刻，我願一生一千二百歲。四海諸公常在座，綠酒金尊終日醉。高樓錦繡中天開，樂作畫鼓如春雷。勸爾白日無西頽，常行九十萬里胡爲哉。

午醉徑睡比覺已甲夜矣

自我歸城西，已復再見冬。雖未挂衣冠，其實則老農。好事或餉酒，石室酒最醲。一醉輒至暮，臥聞湖寺鐘。

心安病自除。衾煖夢欲重。化作孤鶴去。雲巖巢長松。

簡蘇訓直判院莊器之賢良

行盡天涯白髮新。槿籬竹屋著閑身。讀書達旦失衰病。食菜終年安賤貧。正使寄聲無薛孟。不妨同里有荀陳。從今杖履時相過。花柳村村次第春。

醉眠曲

老夫暮年少嗜好。但願無事終日眠。斜風急雨勢方橫。高窗小閣且幽妍。爐紅酒綠足閑暇。橙黃蟹紫窮芳鮮。一盃一盃意忽倦。徑撥紙帳投蠻氈。鼻間鼾聲欲撼屋。手中書冊正墮前。不知校事白中聖。那惜門生嘲腹便。讀書萬卷晚乃悟。妙哉此訣祕不傳。是醒是醉人莫測。非夢非覺中了然。駸駸百年露電速。鼎鼎一世膏火煎。金丹九轉顧未暇。且向人間稱睡仙。

冬夜

歲晚風霜惡。將如遙夜何。殘燈挑更暗。寒犬吠偏多。支枕成孤詠。懷人起浩歌。梅花不解飲。誰伴醉顏酡。

又

忽忽流年恨悠悠。獨夜情。向人燈欲語。遠舍露如傾。夢每輕千里。愁偏怯五更。殷勤桑落酒。好爲解除醒。

夜話贈華師

少喜洛陽俠。今成衡嶽僧。深培地爐火。明照佛龕燈。衰鬢晨霜白。禪心古澗澄。猶能遍參在。爲我買行滕。

臥病書懷



袞袞年光挽不留。卽今已白五分頭。病中對酒猶思醉。夢裏逢人亦說愁。青海戰雲臨賊壘。黑山飛雪灑貂裘。丈夫有志終難料。憔悴漁村死卽休。

病中絕句

酒錢自昔從人乞。詩思出門何處無。青籬織蓬菅織席。此生端欲老江湖。

又

半脫貂裘雪滿鞍。慣將豪舉壓儒酸。病來意氣渾非昨。一炷香煙帳底看。

又

酒味醺人睡味濃。午時高枕到昏鐘。經旬不見西窗日。世上應無嬾似儂。

又

造物今年憫我勞。微疴得遂閉門高。黃紬被暖青氈穩。不怕郊原雪意豪。

又

青燐猶有佛燈明。點滴時聞竹露聲。欲睡不成還起坐。麗譙風順報三更。

又

少時談舌挾風雷。病後逢人口嬾開。安得東臯隱君子。相看無語只銜盃。

蔬園雜詠

菘

雨送寒聲滿背蓬。如今真是荷鋤翁。可憐遇事常遲鈍。九月區區種晚菘。

蕪菁

往日蕪菁不到吳。如今幽圃手親鉏。憑誰爲向曹瞞道。徹底無能合種蔬。

葱

瓦盆麥飯伴隣翁。黃菌青蔬放筯空。一事尙非貧賤分。茱萸僭用大官葱。鄉園有大官葱。比常葱差小。

巢

昏昏霧雨暗衡茅。兒女隨宜治酒殺。使覺此身如在蜀。一盤籠餅是碗巢。蜀中雜魚肉作巢。饅頭佳甚。唐人正謂饅頭爲籠餅。

芋

芋

陸生晝臥腹便便。歎息何時食萬錢。莫謂蹲鴟少風味。賴渠撐拄過凶年。

卯飲醉臥枕上有賦

天寒朝泥酒熟醉臥蓬窗。雨勢平吞野。風聲倒卷江。漁叢傲狐腋。菜把美羊腔。常笑潮陽守。南征畏下瀧。

又

一榻臥空舍。四山風雨聲。病多書倚閣。寒極酒施行。孤憤歌彌放。端憂涕易橫。羣胡滿河洛。志士若爲情。

# 陸放翁集

## 劍南詩稿

### 卷第十四

十月二十六日夜夢行南鄭道中既覺恍然攬筆作此詩時且五鼓矣

孤雲兩角不可行。望雲九井不可渡。蟠家之山高插天。漢水滔滔日東去。高皇試劍石爲分。草沒苔封猶故處。將壇坡陀過千載。中野疑有神物護。我時在幕府。來往無晨暮。夜宿沔陽驛。朝飯長木舖。雪中痛飲百榼空。蹴踏山林伐狐兔。耽耽北山虎。食人不知數。孤兒穿婦讎。不報日落風生行。旅懼我聞投袂起。大噉聞百步。奮戈直前虎人立。吼裂蒼崖血如注。從騎三十皆秦人。面青氣奪空相顧。國家未發渡遼師。落魄人間傍行路。對花把酒學醞藉。空辱諸公誦詩句。卽今衰病臥在牀。振臂猶思備征戍。南人孰謂不知兵。昔者亡秦楚三戶。

雨晴步至山亭欲遂遊東村未果

村陋垣屋頹。歲晚風雨橫。泥塗絕還往。殮粥養衰病。藥囊雜書卷。白髮滿清鏡。一榻臥兼旬。不踐牆下徑。烏鵲忽報晴。霜重節候正。厭供凍硯愁。頗動蠟屐興。山楹快遠眺。松吹愜幽聽。地瘦藥苗稀。葉脫木枝勁。東村未爲遠。腳力不濟勝。三歎入荆扉。跣趺學僧定。

喜晴

衡門病臥動經旬。歲晚況堪風雨頻。晴日一窗殊慰眼。清霜萬瓦更宜人。開書頓失昏花墜。試茗初看白乳新。南埭東陂從此好。剩將紅蕊插烏巾。

對食

人苦不知足。貪欲浩無窮。豹胎日壓飮。萍藎卻時供。飲豚以人乳。萬乘亦改容。方其未遇時。鵝禽動英雄。哀哉王相國。計墮飯後鐘。所以賢達士。一視約與豐。我亦蹭蹬者。羈遊半生中。木槃飽藜莧。美與玉食同。口腹嗟幾何。曾是役我躬。放箸一笑粲。賦詩曉愚公。

不睡

城遠不聞鐘鼓傳。孤村風雨夜騷然。但悲綠酒欺多病。敢恨青燈笑不眠。水冷硯蟾初薄凍。火殘香鴨尙微煙。虛窗忽報東方白。且復繙經繡佛前。

睡

紙帳青氈暖有餘。昏昏信腳到華胥。凍醪有力勤推挽。春茗無端苦破除。半熟擁衾聞急雨。乍回推枕覓殘書。箇中得意君知否。萬戶一作里。生封未必如。

憶荊州舊遊

書劍萬里行。翩翩度關登隴。常慨然射麋雲夢。最樂事。至今曠快思。楚天落筆。千言不加點。班荆百榼。命割鮮。有時憑陵呼五白。笑人辛苦作太玄。君不見將軍昔忍跨下辱。京兆晚爲人所憐。功名富貴自古只如此。不如馳射樂飲終殘年。

五雲門晚歸

高城帶遠林。落日動寒砧。行客自朝暮。青山無古今。衰遲慙逸氣。憂患足危心。溪迳滯歸艇。何時春水深。

冬暖

今年歲暮無風雪。塵土肺肝生客熱。經旬止酒臥空齋。吳蟹秦酥不容設。日憂疾疫被齊民。更畏螟蝗殘宿麥。濃霜薄霰不可得。太息何時見三白。老夫壯氣橫九州。坐想提兵西海頭。萬騎吹笳行雪野。玉花亂點黑貂裘。

歲暮

吳中寒氣薄。歲暮亦和風。移樹木村北。尋僧渡港東。露葵收半綠。霜稻杵微紅。一飽無餘念。吾生正不窮。

雪夜

書卷紛紛雜藥囊。擁衾時炷海南香。衰遲自笑壯心在。喜聽北風吹雪牀。

又

村路雪泥人斷行。佛燈一點絳紗明。山前栖鶴歸何晚。磔磔風傳勁翮聲。

禪室

早誇劇飲無勍敵。晚覺安禪有宿因。赫赫心光誰障礙。緜緜鼻息自輕勻。蒲龕紙帳藏身穩。香椀燈籠作夢新。勿爲霜寒憶溫暖。少林立雪彼何人。

炭盡地爐危坐至夜分戲作

短景窗易黑。長宵爐少紅。直令貧到骨。未害氣如虹。志士元謀道。儒生敢諱窮。霜嚴雞喔喔。但愧讀書功。

夜汲井水煮茶

病起罷觀書。袖手清夜永。四鄰悄無語。燈火正淒冷。山童亦睡熟。汲水自煎茗。鏘然轆轤聲。百尺鳴古井。肺腑凜清寒。毛骨亦蘇省。歸來月滿廊。惜踏疎梅影。

雪後尋梅偶得絕句十首

雪晴蕭散曳筇枝。小塢尋梅正及時。臨水登山一年恨。十分說似要渠知。

又

青帝宮中第一妃。寶香熏徹素綃衣。定知謫墮不容久。萬斛玉塵來聘歸。橘中四叟博輸玉塵九斛。

又

銀燭檀槽醉海棠。老來非復錦城狂。疎梅對影太清淡。爲拂焦桐彈履霜。

又

雪裏芬芳亦偶然。世人便謂占春前。飽知桃李俗到骨。何至與渠爭著鞭。

又

雙鶻飛來噪午晴。一枝梅影向窗橫。幽人宿醉閑欹枕。不待聞香已解醒。

又

竹籬曲曲水邊村。月澹霜清欲斷魂。商略前身是飛燕。玉肌無粟立黃昏。

又

相逢未易可疎親。不是登牆宋玉鄰。林下風標許誰比。直須江左謝夫人。

又

春近山中日漸長。重重雲崦闕幽香。神仙不飲塵凡酒。素面看人醉後狂。

又

蕊殿仙姝下界遊。偶來稅駕剡溪頭。君看月裏橫枝影。盡是蒼龍與翠虬。

又

清霜夜夜奈寒何。賴是知心有素蛾。枉道疎枝不禁笑。主人歡意自無多。

寄朱元晦提舉

市聚蕭條極。村墟凍餒稠。勸分無積粟。告糴未通流。民望甚飢渴。公行胡滯留。徵科得寬否。尙及麥禾秋。

村居冬日

溪轉樵風路。林藏禹會村。簷冰垂玉塔。山月涌金盆。畏客常稱疾。耽書不出門。尙嫌城市近。更擬卜雲根。

寓天慶觀有林使君年八十七方燒丹云一黍米大可化汞一斤爲黃金梅道人年八十五善醫

世路崎嶇久已忘。道腴禪悅度年光。故攜開士降龍鉢。來寄高人夢蝶牀。只道燒金有劉向。不知賣藥是韓康。日長坐覺非塵世。庭檜花開蜂蜜香。

宿天慶道院

衰病厭多事。清遊諧夙心。夜深樓突兀。歲晚柏蕭森。汲井洗靈藥。焚香橫素琴。身閑境自勝。城市亦山林。

贈林使君

使君物外閱年華。厭聽奴兵早暮衙。雙履踏雲呼野渡。一瓢邀月醉梅花。紅爐點汞閑消日。烏几繙經不憶家。我亦崐山有歸處。約君同載泝三巴。

又

松檜陰中百步廊。我來剝啄叩琳房。魚腸寶劍餘蛟血。鴉嘴金鋤帶藥香。弱水蓬萊風浩浩。赤明龍漢劫茫茫。何妨付與神丹訣。教跨青鸞到帝鄉。

冬夜

窮巷蕭條早閉門。北窗燈火夜昏昏。老于俗事不挂眼。愁憶故人空斷魂。急雪打窗飛磔細。狂風卷野怒濤翻。土牀紙帳寒無寐。強把村醅不厭渾。

宴坐

身寄窮山裏。心安一事無。新傳小止觀。漸解半跏趺。急雪鳴窗紙。孤燈耿地爐。老來元少睡。且復兀枯株。

夢中作

路平沙軟淨無泥。香草丰茸沒馬蹄。擣紙聲中春日晚。恍然重到浣花溪。

夜寒遣興

道人頽然寄北窗。愁魔百萬一笑降。夜闌酒渴有奇夢。吞楚七澤吳三江。孤村蕭蕭雨解雪。寒犬噤臥飢



鼠齧擁衾危坐待天明。白首忍窮心似鐵。

雪後出遊戲作

小鱗平岡雪陸離。幽人又賦探春詩。典琴沽酒元非俗。著屐觀碑又一奇。大度乾坤容落托。多情風月笑衰遲。吾生也似梅花淡。燕未歸來蝶不知。

歲暮

半生浪走跨秦吳。白首還如筮仕初。凍芋濁醪邀里巷。昏煙溼雪暗郊墟。窮空敢恨寒無褐。憂患元因出有車。笑掩陳編聊自慰。古來富貴羨樵漁。

記夢

世事紛紛觸眼新。何由常作夢中身。遠遊萬里纔移刻。豪飲千場不忤人。鼓吹滿城壺日晚。鶯花如海洞天春。是間可老君知否。莫信人言想與因。

立春後三日作

拂面毳毳巷柳黃。穿簾細細野梅香。春回江表常年早。日向山中特地長。千古事終輸釣艇。一毫憂不到禪房。綠尊掩罷惟須睡。高枕看人舉世忙。

短景

短景迫窮冬。日月如鳥過。衡門窘風雨。衰病不可那。疎疎屋茅漏。獵獵窗紙破。鼠豪冒燈出。人倦掩屏臥。中都舊朋儕。零落今幾箇。弄筆欲遣愁。孤吟誰與和。

風雨旬日春後始晴

風吹過雁作斜行。雨洗殘梅只淡香。南浦春回波漸綠。東菴睡起日初長。詩囊屬稿慚新思。博齒爭豪悔昔狂。莫向晴窗對明鏡。朱顏減盡鬢蒼蒼。

乍晴風日已和泛舟至扶桑埭徘徊西村久之

十日風雨今日晴。衰病忽減思閑行。接籬一幅煙霧薄。舴艋八尺鳧鷖輕。亭亭孤塔遠天碧。曲曲深巷斜陽明。數家茅屋門晝掩。不聞人聲聞確聲。身似龐公不入城。東阡南陌餞餘生。新年倘有豐年喜。買酒漁村看太平。

晨起南窗晴日可愛戲作一絕

蕭散山林一幅巾。天公乞與自由身。茅簷不似宮墻暖。日滿南窗也可人。

攜瘦尊醉梅花下

楠纓作尊容斗許。擁腫輪囷元媚嫵。肯從放翁來住山。誰云置身不得所。山房寂寞久不飲。作意欲就梅花語。我病鮮歡花更甚。日暮淒涼泣殘雨。人生萬事雲茫茫。一醉常恐俗物妨。正須仙人冰雪膚。來伴老子鐵石腸。花前起舞花底臥。花影漸東山月墮。纓尊未竭狂未休。笑起題詩識吾過。

城西接待院後竹下作

水邊小丘因古城。上有巨竹數百箇。一徑蛇蟠不容腳。平處乃可十客坐。裊裊共看風枝舞。蔌蔌時聽春籟墮。古佛不粧香火冷。瘦僧如腊袈裟破。門前西去長安路。日夜舳艫衝尾過。老夫本乏臺省姿。且就清

陰曲肱臥。

夜飲示坐中

胡雁叫羣寒夜長。崢嶸北斗天中央。達人  
大觀眇萬物。烈士壯心懷四方。縱酒長鯨  
渴吞海。草書瘦蔓飽經霜。付君詩卷好收  
拾。後五百年無此狂。

夜從父老飲酒村店作

旗亭濁酒典衣沽。蟹舍老翁折簡呼。夜中  
醉歸騎草驢。鬼昂不須宗武扶。丹徒布衣  
有籌略。漁陽突騎莫枝梧。牀頭金盡何足  
道。肝膽輪囷橫九區。

壬寅新春

半生常是道邊人。歲晚初收事外身。濁酒  
一樽聊永日。小園三畝亦新春。尙無枕寄  
邯鄲夢。那有衣沾京洛塵。門外煙波三百  
里。鏡湖三百里。此心惟與白鷗親。

幽居春夜

暮景催人雪鬢雙。十年始復反吾邦。雲逢  
佳月每避舍。酒壓閑愁如受降。三弄笛聲  
初到枕。一枝梅影正橫窗。要知清夢遊何  
許。不釣桐江卽錦江。

讀書

放翁白首歸剡曲。寂寞衡門書滿屋。藜羹  
麥飯冷不嘗。要足平生五車讀。校讎心苦  
謹塗乙。吟諷聲悲雜歌哭。三蒼奇字已殺  
青。九譯旁行方著錄。有時達旦不滅燈。急  
雪打窗聞簌簌。倘年七十尙一紀。墜典斷

編真可續。客來不怕笑書癡。終勝牙籤新未觸。

晨起

小雨溼清曉。新鶯啼早春。年光驚病眼。節物屬閑身。巴峽東連楚。嶓山北控秦。遠遊端可繼。敢恨素衣塵。

昔在成都正月七日聖壽寺麻子市初春行樂處也偶晨興聞鄰村守麻有感

樂事新年憶錦城。城南麻市試春行。如今老病茅簷底。臥聽兒童嚇雀聲。

獨孤生策字景略河中人工文善射喜擊劍一世奇士也有自峽中來者言其死于忠涪間感涕

賦詩

憶昨騎驢入蜀關。旗亭邂逅一開顏。氣鍾太華中條秀。文在先秦兩漢間。寶劍憑誰占斗氣。名駒竟失養天閑。身今老病投空谷。回首東風涕自潸。

早春對酒感懷

探花疇昔喜春回。老大空驚節物催。芳糞旋開新壓酒。好枝猶把未殘梅。書生歲惡甘藜覓。志士時平死草萊。初聞獨孤策死欲豁孤懷誰語。夜彈長劍有餘哀。

曉出湖邊摘野蔬

浩歌振履出茅堂。翠蔓丹芽采摘忙。且勝堆盤供苜蓿。未言滿斛進檳榔。行迎風露衣巾爽。淨洗羶葷匕筯香。著句誇張君勿笑。故人方厭太官羊。

游饑之餘復苦久雨感歎有作

道傍樵負去何之。積雨仍愁麥不支。爲國憂民空激烈。殺身報主已差池。屬壓糠麩猶多愧。徒倚柴荆只自悲。十載西遊無惡歲。羨他喫下足蹲鴟。予在蜀幾十年未嘗逢歲歉也。

春晴泛舟

兒童莫笑是陳人。湖海春回發興新。雷動風行驚塾戶。前一日聞雷。天開地闢轉鴻鈞。鱗鱗江色漲石黛。嫋嫋柳絲搖麴塵。欲上蘭亭卻回棹。笑談終覺愧清真。

攜一尊尋春湖上

酒裏真須勉策勳。百年何啻是中分。花梢已點猩猩血。水面初生瑟瑟紋。一世極知均腐骨。萬鍾元自付浮雲。浩歌不恨無人和。但惜驚飛白鷺羣。

晦前二日夜欲曉自湖上歸對殘月獨酌

小閣對寒蟾。山尊盡更添。方看一輪滿。又歎兩頭纖。脈脈離雲嶠。娟娟傍畫簷。五更清露下。不恨客衣霑。

春曉有感

山杏溪桃續續開。緩歌誰與共傳盃。年來只有追歡夢。百舌無情又喚回。

夜觀秦蜀地圖

往者行省臨秦中。我亦急服叨從戎。散關摩雲俯賊壘。清渭如帶陳軍容。高旌縹緲嚴玉帳。畫角悲壯傳霜風。咸陽不勞三日到。幽州正可一炬空。意氣已無雞鹿塞。單于合入蒲萄宮。燈前此圖忽到眼。白首流落悲塗窮。吾皇英武同世祖。諸將行策雲臺功。孤臣昧死欲自薦。君門萬里無由通。正令選壯不爲用。筆

墨尚可輸微忠。何當勒銘紀北伐。更擬草奏祈東封。

久雨小飲

春來日日風雨橫。老去時時衰病攻。門外回塘初漲綠。尊前槁面慙生紅。未除豪氣每自笑。欲吐狂言無與同。安得并刀剪蒼溜。憑高萬里望晴空。

有懷獨孤景略

富貴世間元不乏。此君才大獨難成。暗鳴意氣千人廢。嫺雅風流一座傾。韜略豈勞平大敵。文章亦足主齊盟。荒山野水涪州路。腸斷西風薤露聲。

春雨復寒遣懷

去日堂堂挽不回。新年又傍鬢邊來。雨聲欲作海棠祟。書卷只爲春睡媒。村舍瘦蔬供薄酒。地爐微火伴殘灰。浩然忽起金鞭興。漾水蟠山安在哉。

春遊

平生樂行役。不耐常閉戶。今朝新雨霽。一笑整巾屨。青猿導幽蹊。春草伴微步。雖云尊酒薄。蔬果亦略具。辛夷發高枝。楊柳吹墮絮。行歌不知遠。落日呼野渡。橫林已棲鴉。淺水猶立鷺。歸來意頗豪。古錦有新句。

海棠

今日春已半。風雨停出遊。餅中海棠花。數酌相獻酬。尙想錦官城。花時樂事稠。金鞭過南市。紅燭宴西樓。千林誇盛麗。一枝賞纖柔。狂吟恨未工。爛醉死即休。那知茅簷底。白髮見花愁。花亦如病姝。掩抑向客羞。

尤物終動人。要非桃杏儔。東風萬里恨。浩蕩不可收。

寄仗錫平老借用其聽琴詩韻

放翁久矣無此客。闔戶兒童皆動色。寒泉不食人喝死。素綆銀瓶我心惻。千金易得一七難。晚途淹泊眼愈寒。豈知一旦乃見子。傑語豪筆無僧酸。門前清溪天作底。細細風吹穀紋起。倚欄一笑誰得知。愛子數詩如此水。江湖安得常相從。浩歌相踏臥短篷。功名渠自有人了。留我錦中雙頰紅。

五月十四日夜夢一僧持詩編過予有暴雨詩語頗壯予欣然和之聯巨軸欲書未落筆而覺追作此篇

黑雲塞空萬馬屯。轉盼白雨如傾盆。狂風疾雷撼乾坤。壯哉澗壑相吐吞。老龍騰擊下天關。鱗間火作電脚奔。巨松拔起千年根。浮槎斷梗何足論。我詩欲成醉墨翻。安得此雨洗中原。長河袞袞來崑崙。鶴鵠下看黃流渾。

新塘觀月

攜酒新塘南。中夜欲忘歸。貪看月滿湖。不覺露溼衣。天高鶴聲厲。風急螢火稀。此夕不一醉。行歎破鏡飛。漁家亦喜事。未掩水際扉。皇天有公道。處處皆清暉。

觀張提刑周鼎

他人富貴堆全壁。曼舞妖歌誇坐客。清心好古誰似公。漢庭諸人推博識。一朝得此周廟器。買不論貲空四壁。苔痕洗盡銅色見。坐臥摩挲欲忘食。蠻童捧出客爲起。恍如清廟陪劍履。腹中奇字粲蟲魚。嶧山之

碑那得比。知公原是功名人。看罷握手同悲辛。鎬京洛邑在何許。漠漠秋風吹虜塵。

口占送巖師還大梅護聖

放翁白髮已蕭然。黃紙新除玉局仙。寄語山頭老師叔。欲分茅舍度殘年。常禪師偈云。更移茅舍入深居。謂護聖也。

八月十四日夜湖山觀月

長空露洗玻璃碧。紫金之盤徑三尺。忽看擘地出人間。桂樹扶疎如淡墨。攬衣獨立鏡湖邊。風露萬頃秋渺然。開帆詎必入東海。騎鯨便可追飛仙。冰壺玉瀝侵骨冷。醉看孤鸞舞清影。夜闌歸舍人已眠。卻倩天風爲吹醒。

十五夜月色皦然有頃雲生遂不復見

北望但空闊。南望橫羣山。青天無翳行素月。寥寥永夜非人間。九醞漿成老仙醉。六銖衣薄天宮寒。翠眉真人不火食。小立環佩風珊珊。橫空邀我海山去。縹緲萬里驂青鸞。相攜一笑在雲表。徐看玉宇飛金盤。

夜聞秋風感懷

西風一夜號庭樹。起攬戎衣淚濺襟。殘角聲催關月墮。斷鴻影隔塞雲深。數篇零落從軍作。一寸淒涼報國心。莫倚壯圖思富貴。英豪何限死山林。

玉局歌

玉局祠官殊不惡。銜如冰清俸如鶴。酒壺釣具常自隨。五尺新蓬織青籟。倚樓看鏡待功名。半世兒癡晚



方覺何如醉裏泛桐江。長笛一聲吹月落。蔣公新家石馬高。謝公飛旆凌秋濤。微霜莫遣侵鬢綠。從今二十四考書玉局。

醉歌

往時一醉論斗石。坐人飲水不能敵。橫戈擊劍未足豪。落筆縱橫風雨疾。雪中會獵南山下。清曉嶙峋玉千尺。道邊狐兔何曾問。馳過西村尋虎跡。貂裘半脫馬如龍。舉鞭指麾氣吐虹。不須分弓守近塞。傳檄可使腥羶空。小胡逋誅六十載。狺狺獠子勢已窮。聖朝好生貸孳戮。還爾舊穴遼天東。

閉門

寂寂雲山千萬重。閉門不忍歎塗窮。高秋酒熟雪浮瓮。中夜劍歸雷吼空。近報犬羊逃漠北。豈無貔虎定關中。君王猶記孤忠在。安得英豪共此功。

草書歌

傾家釀酒三千石。閒愁萬斛酒不敵。今朝醉眼爛巖電。提筆四顧天地窄。忽然揮掃不自知。風雲入懷天借力。神龍戰野昏霧腥。奇鬼摧山太陰黑。此時驅盡胸中愁。搥牀大叫狂墮幘。吳牋蜀素不快人。付與高堂三丈壁。

野飲夜歸戲作

青海天山戰未塵。卽今塵暗舊戎袍。風高乍覺弓聲勁。霜冷初增酒興豪。未辦大名垂宇宙。空成慟哭向蓬蒿。鬪亭老將歸常夜。無奈人間兒女曹。

夜泊水村

腰間羽箭久凋零。太息燕然未勒銘。老子猶堪絕大漠。諸君何至泣新亭。一身報國有萬死。雙鬢向人無再青。記取江湖泊船處。臥聞新雁落寒汀。

幽居

遠屋巉巖碧玉峯。個中天遣養疎慵。捐書已歎空虛腹。得酒還澆壘塊胸。曲几坐看窺戶月。短篷臥聽隔城鐘。柴桑自有歸來意。枉道人間不見容。

與鄰翁登山亭

數掩槿籬圍夕照。一間茅舍背陰崖。吾生擾擾實無樂。人事悠悠那可諧。憂患向來侵綠鬢。登臨此日費青鞋。京華舊友凋零盡。野老逢迎一散懷。

無題

纏轆氈車赴密期。追歡最數牡丹時。新春欲近猶貪喜。舊愛潛移不自知。寶鏡塵生鸞悵望。鈿箏絃絕雁參差。玉壺莫貯臙脂淚。從溼泥金帶上詩。

遣興

平生與俗馬牛風。落魄人間亦未窮。綠綺奏終香縷碧。烏絲書罷鬪花紅。夢中吳蜀山川近。醉後周秦戰伐空。投老飄然君勿笑。也勝魚鳥在池籠。

夢宴客大樓上命筆作詩既覺續成之

表裏江山亦樂哉。華纓滿座敵鄒枚。歌從郢客樓中聽。獵向樊姬墓上回。梅蕊香清鑿寶髻。熊蹯味美按新醅。眼邊歷歷興亡事。欲賦章華恐過哀。

新塘夜歸

煙月茫茫十里堤。數聲漁唱埭東西。旋燒新兔傾村酒。扶得歸來醉似泥。

古風

少年慕黃老。雅志在山林。火食亦彊勉。寧有婚宦心。失脚墮世網。衰病忽侵尋。放逐適天幸。獨恨山未深。一牀元不睡。翛然橫素琴。開門毛髮冷。湖闊月欲沈。

又

賀鑑未嘗死。江天醉初醒。逸少亦度世。弭節過蘭亭。吾本淡蕩人。轉徙如蓬萍。聊憑一盃綠。駐此雙鬢青。邂逅兩仙翁。笙鶴遊青冥。還家不能食。濁世紛羶腥。

又

功名如博戲。大叫或作盧。文辭組繡耳。初不繫賢愚。負恃已可笑。憎嫉真區區。平生學金丹。我豈斯人徒。嘯歌醉自和。顏鬢老不沽。卻後三百年。煙雨釣鏡湖。

累日無酒亦不肉食戲作此詩

小築精廬刻曲傍。枵然蟬腹與龜腸。酒錢覓處無司業。齋日多來似太常。雲確旋舂菰米滑。風爐親候藥苗香。明年更入南山去。要試囊中服玉方。

讀書

讀書四更燈欲盡。胸中太華蟠千仞。仰呼青天那得聞。窮到白頭猶自信。策名委質本爲國。豈但空取黃金印。故都卽今不忍說。空宮夜夜飛秋燐。士初許身輩稷契。歲晚所立慚廉藺。正看憤切詭成功。已復雍容託觀釁。雖然知人要未易。詎可例輕天下士。君不見長松臥壑困風霜。時來屹立扶明堂。

自妙相歸將至杜浦堰舟中作

斜陽發東郭。初夜轉西城。寺閣疎鐘動。漁村遠火明。蒼茫林靄滅。撲漉水禽驚。漸喜吾廬近。遙聞過埭聲。

秋興

樵風溪上弄扁舟。濯錦江邊憶舊遊。豪竹哀絲真昨夢。爽砧繁杵又驚秋。墜枝橘熟初堪剪。浮盞醅香恰受罇。莫道身閒總無事。孤燈夜夜寫清愁。

哀北

太行天下脊。黃河出崑崙。山川形勝地。歷世多名臣。哀哉六十年。左袵淪胡塵。抱負雖奇偉。沒齒不得伸。老夫實好義。北望常酸辛。何當擁黃旗。徑涉白馬津。窮追殄犬羊。旁招出鳳麟。努力待傳檄。勿謂吳無人。

琵琶

西蜀琵琶選遶槽。梨園舊譜鬱輪袍。繡筵銀燭燕宮夜。一飲千鍾未足豪。故蜀燕王宮。今爲張氏海棠園。

三江舟中大醉作

志欲富天下。一身常苦飢。氣可吞匈奴。束帶向小兒。天公無由問。世俗那得知。揮手散醉髮。去隱雲海涯。

風息天鏡平。濤起雪山傾。輕帆入浩蕩。百怪不可名。虹竿秋月鉤。巨鰲倘可求。滅迹從今逝。回看隘九州。

短歌行

百年鼎鼎世共悲。晨鐘暮鼓無休時。碧桃紅杏易零落。翠眉玉頰多別離。涉江采菱風敗意。登樓待月雲爲祟。功名常畏謗議興。富貴每同衰病至。人生可數十八九。自古危機無妙手。正令插翮上青雲。不如得錢卽沽酒。

悲秋

秋燈如孤螢。熠熠耿窗戶。秋雨如漏壺。點滴連早暮。我豈楚逐臣。慘愴出怨句。逢秋未免悲。直以憂國故。三軍老不戰。比屋困征賦。可使江淮間。歲歲常列戍。

步至西村

一飽無餘事。西村偶獨行。搘筇息微倦。汲井漱餘醒。川闊雁平度。谷虛雲亂生。絕知豐歲樂。笑語隔柴荆。

題接待院壁

笙歌淒咽離亭晚。回首高城半掩門。疊疊遠山橫翠靄。娟娟新月耿黃昏。未嫌雙鷁妨欹枕。自是孤舟易斷魂。遙想柯橋落帆處。隔江微火認漁村。

九月晦日作

菊枝傾倒不成叢。柯葉凋零已半空。自是老來多感慨。不應蕭瑟爲秋風。

又

山路清寒近探梅。振衣高處興悠哉。飛鴻杳杳江天闊。一片愁從萬里來。

又

錦城誰與寄音塵。望斷秋江丈六鱗。正使傾家供麴蘖。定知不解醉愁人。

又

炊煙漠漠衡門寂。寒日昏昏倦鳥還。數樹丹楓映蒼檜。天工解作范寬山。

陶山遇雪覺林遷。菴主見招不果往。

山中大雪二尺彊。道邊虎跡如椀大。衰翁畏虎復畏寒。招喚不來公勿怪。梨花開時好風日。走馬尋公作寒食。不須沽酒引陶潛。箭筈蕨芽如蜜甜。

哭王季夷

迢遙天馬渥洼來。萬里修途忽勒回。爽氣卽今猶可想。舊遊何處不堪哀。夢中有客徵殘錦。地下無爐鑄橫財。欲醉一尊身尙病。鬢封春露溼蒼苔。

樊江晚泊

碧雲吞日天欲暮。城西振柁城東路。蓴羹菰飯香滿船。正是江頭落帆處。荻洲漁火遠更明。煙水蒼茫聞雁聲。不是綠尊能破悶。白頭客路若爲情。

蛾眉村旅舍作

小雨初收景氣和。青苔狼藉落梅多。曲肱野店睡斜日。濯足溪橋鳴細波。久厭俗情生眼白。近承天詔賜

顏酡。予自壬寅冬兩頰復丹。騎鯨未返蓬壺去。此路猶須幾浩歌。

娥江野飲贈劉道士

春光盎盎催官柳。柳色黃如醴中酒。橋邊微徑愜幽尋。世外高人共攜手。參差茅舍出木末。隱映酒旗常浦口。插花處處引村童。失道時時問耕叟。客堪共醉百無一事不諧心。十常九日斜潮落。不可留孤舟欲上頻搔首。

丈亭遇老人長眉及肩欲就之語忽已張帆吹笛而去

颯颯長眉綠覆肩。欲推壽數意茫然。若非楚國庚寅歲。定是堯時丙子年。銅笛一聲驚宿鷺。蒲帆數幅破晴煙。遙知乘醉江湖去。黃鶴樓頭又放顛。

寓舍聞禽聲

日暖林梢鶉鷓鳴。稻陂無處不青青。老農睡足猶慵起。支枕東窗盡意聽。

春晚

雨足人家插稻秧。蠶生鄰女采桑黃。萬花掃迹春將暮。百草吹香日正長。閒覓啼鶯穿北嶺。戲隨飛蝶過東岡。飄然且喜身強健。不怪兒曹笑老狂。

題瑩師釣臺圖

羊裘老子釣魚處。開卷令人雙眼明。未可忽忽便持去。夜窗吾欲聽灘聲。

仗錫平老具舟車迎前天衣印老印悉遣還策杖訪之作二絕句奉送兼簡平

畫舫籃輿不許前。白頭行腳意超然。舜江禹穴千山水。盡在高人拄杖邊。

又

魚鼓聲中白氎巾。南山筍蕨一番新。長安不是無卿相。林下平津獨可人。

湖邊曉行

蹇驢清曉掠湖堤。緩轡迎涼帽影低。露坼洛蓮紅漸鬧。雨催陂稻綠初齊。先秋葉已時時墮。失旦雞猶續續啼。不是老來忘睡美。戴星南畝慣扶犁。

久雨杜門遣懷

風雨蕭蕭臥掩關。經旬登覽負溪山。也知解送豐年喜。無奈難消永日閑。平野橫吹看淩厲。畫簷高瀉聽淙潺。城闌路斷吾何恨。濁酒枯魚亦破顏。

梅雨陂澤皆滿

雨暗迷行路。溪深沒舊痕。汪汪牛渾白。盎盎酒醅渾。暖浸千畦稻。橫通十里村。羣蛙更堪笑。鼓吹鬧黃昏。

夜意

幌外燈青見鼠行。林梢月黑有梟鳴。只言中夏夜偏短。萬里夢回天未明。

又

睡覺鄰雞已再啼。蓬窗燈暗雨淒淒。東家蹇驢不用借。明日門前一尺泥。

幽事



老境俗緣減。閑居幽事多。去沙通斷澗。插援讓新荷。碁罷看山臥。釣歸搖櫂歌。餘年端有幾。風月且婆娑。

對酒戲作

去日奔輪不啻過。凌煙勳業已蹉跎。只言一寸丹心在。無奈千莖白髮何。色比鵝雛京口酒。聲如珠貫渭城歌。身閑取醉真當勉。莫學癡人夢螳窠。

夏雨

清風起湖濱。急雨來天末。蚊蠅遽退聽。松竹例蘇活。奇聲集空庭。爽氣生細葛。素秋雖尙遙。聊喜寬肺渴。

軍中雜歌

三受降城無壅城。賊來殺盡始還營。漠南漠北靜如掃。清夜不聞胡馬聲。

又

秦人萬里築長城。不如壯士守北平。曉來磧中雪一丈。洗盡羶腥春草生。

又

匈奴莫復倚長戈。來款軍門早乞和。鐵騎如山尙可避。飛將軍來汝奈何。

又

名王金冠玉蹀躞。面縛纛下聲呱呱。槁街未遽要汝首。賣與酒家鉗作奴。

又

三月未春冰塞川。冬月苦寒雪闇天。紫髯將軍曉射虎。嚇殺胡兒箭似椽。

又

北面行臺號令新。繡旗豹尾渡河津。檄書纔下降書至。不用兒郎打女真。

又

漁陽兒女美如花。春風樓上學琵琶。如今便死知無恨。不屬番家屬漢家。

又

北庭茫茫秋草枯。正東萬里是皇都。征人樓上看太白。思婦城南迎紫姑。

夏夜舟中聞水鳥聲甚哀若曰姑惡感而作詩

女生歲深閨。未省窺牆藩。上車移所天。父母爲他門。妾身雖甚愚。亦知君姑尊。下牀頭雞鳴。梳髻著襦裙。堂上奉灑掃。廚中具盤殮。青青摘葵莧。恨不美熊蹯。姑色少不怡。衣袂溼淚痕。所冀妾生男。庶幾姑弄孫。此志竟蹉跎。薄命來讒言。放棄不敢怨。所悲孤大恩。古路傍陂澤。微雨鬼火昏。君聽姑惡聲。無乃譴婦魂。

暮歸舟中

五月未劇暑。暮從城市還。斷虹低飲澗。落日遠銜山。蟹舍叢蘆外。菱舟薄靄間。詩情終草草。虛遣鬢毛斑。

又

湖水綠可愛。弄橈衝夕霏。林昏漁火壯。山轉寺鐘微。老歎世情惡。窮知心事違。回頭語孤鶴。伴我莫先飛。

夏夜

夏夜忽已半。東岡月出生。起行遶庭樹。愛此露滴聲。漂流憶安臥。局促念遐征。幽懷誰晤語。華觴遠自傾。

又

螢火喜暗庭。桐葉矜冷雨。幽人悄不寐。獨夜誰與處。乾坤信無情。歲月遽如許。明發視鏡中。鬢絲添幾縷。

又

庭荒蔓草長。堂豁爽氣入。悠然推枕起。聊作倚杖立。飛螢亦避雨。黏棟光熠熠。南鄰輸稅歸。小婦愁夜汲。

又

結屋在郊墟。俯然謝炎熾。窗扉故闕寂。水竹亦幽邃。飛蟲望燈集。栖燕衝雨至。石枕與葛幘。美哉今夕睡。

北渚

北渚露濃蘋葉老。南塘雨過藕花稀。新秋漸近蟬更急。殘日已沉鴉未歸。銅鏡面顏無藥駐。玉關勳業與

心違。一蓑一笠生涯在。且醉蒼苔舊釣磯。

夏日五鼓起戲書

老雞喔喔桑樹顛。明星磊磊茅屋邊。我與視夜不復眠。坐看朝曦浴虞淵。開窗清風來穆然。拂几洗研整

蠶編。火雲崔嵬忽滿天。安得羲和徐著鞭。

雨夜

急雨如河瀉瓦溝。空堂臥對一燈幽。老雞多事彊知曉。落葉無情先報秋。身未蓋棺誰可料。尊常有酒莫

閑愁。功名老大從來事。且復長歌起飯牛。

小立

曠懷塵事外。小立綠陰間。舉世皆嫌拙。平生剩得閒。江郊雲易暗。旱歲雨終慳。欲醉尊無酒。悠然對暮山。

徙倚

漁扉夕不掩。徙倚欲三更。月正樹無影。露濃荷有聲。崢嶸歲將晚。悄愴恨難平。坐念中原沒。男兒恐浪生。

居山

涉世緣雖薄。居山味自長。穿雲雙屐溼。洗藥一溪香。有酒作臉纈。無愁供鬢霜。遼天渺歸鶴。千載付茫茫。

# 陸放翁集

劍南詩稿

卷第十五

秋興

白髮蕭蕭欲滿頭。歸來三見故山秋。醉憑高閣乾坤迤。病入中年日月遒。百戰鐵衣空許國。五更畫角只生愁。明朝煙雨桐江岸。且占丹楓繫釣舟。

又

暮境何堪與病遭。西風落葉擁亭臯。極知世上人情惡。且放江邊醉眼高。應俗紛紛何日了。詠詩混混寄吾豪。碧油金鎖平生意。未許人言學楚騷。

八月五日夜半起飲酒作草書數紙

有漏神仙有髮僧。碧幙欹枕對秋燈。忽然起索三升酒。颯颯蛟龍入剡藤。

秋雨漸涼有懷興元

又  
八月山中夜漸長。雨聲燈影共淒涼。遙知南鄭風霜早。已有寒熊犯獵場。

十年前在古梁州。痛飲無時不慣愁。最憶夜分歌舞歇。臥聽秦女擘箜篌。

又

清夢初回秋夜闌。牀前耿耿一燈殘。忽聞雨掠蓬窗過。猶作當時鐵馬看。

秋風曲

秋風吹雨鳴窗紙。壯士不眠推枕起。牀頭金盞酒尊空。櫪馬相看淚如洗。鴻門霸上百萬師。安西北庭九千里。帳前畫角聲入雲。隴上鐵衣光照水。橫飛渡遼健如鶻。談笑不勞投馬箠。堂堂羽檄從天下。夜半斫營。屏可鄙。拾螢讀書定何益。投筆取封當努力。百斤長刀兩石弓。飽將兩耳聽秋風。

送宣書記并寄其兄曇才二公

在吳識曇公。至蜀識才公。彌天宣書記。晚乃得從容。是家固多賢。天遣慰我窮。初秋夏末時。衲子各西東。子獨惜此別。共語夜燭紅。怪我耐逆境。萬事一笑空。子願知我否。視身如枯蓬。枯蓬未變滅。姑當付之風。家世無高年。我今六十翁。俯仰幾時客。結束已匆匆。那將須臾景。更受憂患攻。願言早來歸。相就煮晚菘。起晚戲作

地偏身飽閑。秋爽睡殊美。老雞每愧渠。三唱呼未起。廚人罷晨汲。童子愁屣履。惰慵雖可嘲。安靜良足喜。心空夢亦少。酣枕甘若醴。不學多事人。南柯豪衆蟻。

飲村店夜歸

致主初心陋漢唐。暮年身世落農桑。草煙牛跡西山口。又臥旗亭送夕陽。

又

澹澹村醪君勿辭。橙椒香美白鵝肥。醉中忘卻身今老。戲逐螢光鬪雨歸。

雨夜感懷

點滴空塔雨送涼。青燈對影獨淒傷。身如病木驚秋早。心似鯨魚怯夜長。鑄得黃金猶有術。掃空白髮定無方。蕭然禪榻君休笑。一卷殘書伴枕傍。

寄葉道人

白首不堪憂患纏。要將樂事餞流年。尋山猶費幾兩屐。貯酒真須百斛船。若信王侯等螻蟻。可因富貴失神仙。老杜詩。王侯與螻蟻。共盡隨丘墟。太白詩。富貴與神仙。蹉跎成兩失。驚人亦莫摩銅狄。秦華松風足晝眠。

月下小酌

昨日雨遶簷。孤燈對搔首。今夜月滿庭。長歌倚衰柳。世變浩無窮。成敗翻覆手。人生最樂事。臥聽壓新酒。我歸自梁益。零落愴親友。紛紛墮鬼錄。何人得長久。後生多不識。詎肯顧衰朽。一杯無與同。敲門喚鄰叟。讀袁公路傳。

成敗相尋豈有常。英雄最忌數悲傷。蕪蕪豆粥從來事。何恨郵亭坐篔簹。

鄰曲小飲

早稻喜登場。相呼集野堂。迎霜新兔美。近社濁醪香。茆屋滴殘雨。竹籬圍夕陽。新豐不須作。真箇是吾鄉。

秋夜觀月

夢回殘燭耿房櫺。杳杳江天叫斷鴻。病骨不禁風露重。披衣小立月明中。

又

誰琢天邊白玉盤。亭亭破霧上高寒。山房無客兒貪睡。常恨清光獨自看。

枕上

香冷燈昏夢自驚。清愁冉冉帶餘醒。夜長誰作幽人伴。惟是蛩聲與月明。

秋夕大風松聲甚壯戲作短歌

人生不自憐。坐受外物械。榮華難把玩。俄頃皆變壞。山棲亦何有。耳目差曠快。秋郊多烈風。夜壑起松籟。初聞尚蕭瑟。髣髴聽嚴瀨。忽如倒巨浸。便欲翻大塊。又疑楚漢戰。瀕洞更勝敗。不然六月雨。雷電奔百怪。三更勢稍斂。鐵馬歸入塞。孰能從吾遊。洗汝胸次隘。

明河篇

明河八月轉分明。炯如素練西南傾。年年歲歲見河漢。坊坊曲曲聞礮聲。良人萬里事征行。礮聲中有玉關情。遙知鐵衣冷如水。指點明河白髮生。積中草死駱駝鳴。萬里卻望長安城。兒生總角爺未見。歸心頓覺封侯輕。漢家自古有夷狄。付與窮荒何足惜。只願天狼無光太白低。還家爲婦說安西。

夜聞鄰家治稻

二頃春蕪廢不耕。半生名宦竟何成。歸來每羨農家樂。月下風傳打稻聲。

浪迹



浪迹人間四十年，鏡中不覺已華顛。山川慘澹秋多感，燈火青燐夜少眠。壯志已忘榆塞外，高情正在酒壚邊。扁舟不恨無人識，且復長歌入暮煙。

夜步庭下有感

夜遶中庭百匝行，秋風傳漏忽三更。星辰北拱疏還密，河漢西流縱復橫。驚鵲遶枝棲不穩，冷螢穿竹遠猶明。書生老抱平戎志，有淚如江未敢傾。

題酒家壁

明主何曾棄不才，書生飄泊自堪哀。煙波東盡江湖遠，雲棧西從隴蜀回。宿雨送寒秋欲晚，積衰成病老初來。酒香菰脆丹楓岸，強遣樽前笑口開。

題書齋壁

隨分琴書適性情，乍寒偏愛小窗明。旋煎鬻粟留僧話，故種芭蕉待雨聲。丹藥驗方非畏死，文章排悶不求名。是間幽事君知否，莫怪經秋少入城。

贈貓

裹鹽迎得小狸奴，盡護山房萬卷書。慚愧家貧策勳薄，寒無氈坐食無魚。

秋夕

羈魂虛仗些詞招，病骨那禁積毀消。亂葉打窗寒有信，昏燈照幔夢無聊。棧邊老驥心空在，爨下殘桐尾半焦。百感忽生推枕起，碧霄銀漢正迢迢。

秋雨排悶十韻

今夏久無雨。從秋卻少晴。空濛迷遠望。蕭瑟送寒聲。衣潤香偏著。書蒸蠹欲生。壞簷聞瓦墮。漲水見堤平。溝溢池魚出。天低塞雁征。螢飛明闇廡。蛙鬧雜疎更。藥釀時須焙。舟閑任自橫。未憂荒楚菊。直恐敗吳秔。夜永燈相守。愁深酒細傾。浮雲會消散。鼓笛賽西成。

小舟航湖夜歸書觸目

雲黑風號不見星。古丘叢木聚精靈。舟人已過微相語。兩兩三三鬼火青。

又

電掣半空雲黯黯。船浮積水浪憑陵。茫然不辯身何處。猶喜東南見塔燈。

又

遙望湖塘炬火迎。纔歸村舍雨如傾。畏途回首知安在。催喚兒童暖酒鐺。

幽居書事

莫歎人間苦不諧。清時有味是歸來。已因積毀成高臥。更借陽狂護散才。正欲清言聞客至。偶思小飲報花開。紛紛爭奪成何事。白骨生苔但可哀。

又

安命知天更不疑。幽居最愛早寒時。手中書墮初酣枕。窗下燈殘正劇碁。鮮鱸每從溪女買。香菰時就釣船炊。山陰清絕君須記。雪裏騎驢未辦詩。

晚霽

雨斷簷餘滴。雲疏日漏明。人其如積潦。天自活疲氓。溪碓舂香稻。霜叢剪綠橙。書生久愁臥。作意賦新晴。

又

漲水返舊壑。浮雲歸故山。園丁藝蔬去。鄰婦賃春還。喬木蒼煙外。孤村落照間。莫嫌樽酒薄。且用破愁顏。

雨後散步後園

淡日輕雲未快晴。涓涓溝水去無聲。爲憐一徑新苔綠。別就牆陰取路行。

又

澤國霜遲木未疎。秋來更覺愛吾廬。芭蕉綠潤偏宜墨。戲就明窗學草書。

示客

十年奔走每思歸。剩喜湖邊晝掩扉。社燕免教嘲作客。海鷗曾是信忘機。暉暉晚日收新稻。漠漠新寒試夾衣。留客盤殮君勿笑。一畦蔬甲摘初稀。

甲子晴

今日甲子晴。秋稼始可言。老農喜相覓。隨事具雞豚。掃地設菅席。酌酒老瓦盆。耳熱仰視天。何異傾金尊。牛羊散墟落。霽色滿衡門。起舞屬父老。勿恨此酒渾。

後一日復雨

一雨三日水抹隄。南村北村雲淒淒。天公約束龍返穴。不忍嘉穀沈塗泥。日光清薄潦未縮。起視又歎行。

雲西初纔浙瀝灑窗戶。俄已湍瀉鳴溝溪。豐凶相乘若翻手。振救小緩輒噬臍。窮閭腐儒不預此。且收芋栗寬兒啼。

紹興庚辰余遊謝康樂石門與老洪道士痛飲賦詩既還山陰王仲信爲予作石門瀑布圖今二十餘年別石門燈前感舊欲消魂。人生萬事皆如夢。自笑區區記劍痕。

十有四年開圖感歎作  
又

愛酒黃冠鬢如雪。石門邂逅一樽同。懸知久作此山土。愁對畫圖秋雨中。

雨中遣懷

秋稼連雲飽不疑。寧期一敗莫支持。雨如梅子初黃日。水似桃花欲動時。正晝蚊蟲驅不去。終宵鼃黽怒何爲。凶年氣象堪流涕。不把紛紛滿竹籬。

秋思

秋來情味更堪論。身寄城南五畝園。委轡看山無鐵獼。梅聖俞馬名。拾樵煎茗有青猿。王元之小童名陂。塘夜雨添新漲。原野煙蕪減舊痕。豈是平生少親友。略無人肯訪孤村。

秋雨歎

點點滴滴雨到明。悽悽惻惻夢不成。窗間殘燈暗欲滅。匣中孤劍鏗有聲。少年讀書忽頭白。一字不試空虛名。公車自薦心實恥。新豐獨飲人所驚。太行千仞插雲立。黃流萬里從天傾。遺民久憤汗左衽。虜何

足煩長纓。霜風初高。鷹隼擊。天河下洗。煙塵清。投筆急裝。無快士。令人絕憶。獨孤生。獨孤。近蒲人前。歲正於映中。

### 雨中小酌

晨起占雲日日西。吾廬煙雨正淒迷。愁看場上禾生耳。且泥盃中酒到臍。窗日幾時飛野馬。甕天惟是舞醯雞。前村著屐猶通路。自摘金橙擣鱸齋。

### 衰病有感

衰與病相乘。山房冷欲冰。在家元是客。有髮亦如僧。愁絕窮秋雨。情親獨夜燈。西鄰有甘井。聊得曲吾肱。

又

倦枕先雞覺。寒汀伴雁孤。寂寥誰省錄。衰疾且枝梧。鶴骨秋添瘦。龜腸夜自呼。蓋棺吾事定。未敢泣窮途。

又

羈宦一周星。歸如化鶴丁。灰心成寂寂。霜鬢失青青。小智空自貴。大愚元不靈。客來應絕倒。扶病講丹經。

### 雨止頓寒遂有晴意

霧雨昏昏地氣騰。盤中朝暮厭驅蠅。未看霽色排陰翳。先覺清寒洗鬱蒸。喚客喜傾新熟酒。讀書貪趁欲殘燈。明朝樂事真當賀。山北山南曳瘦藤。

### 秋晴出遊

雨餘清冷近霜天。拄杖閑拖不挂錢。黃葉舞風初藪藪。碧渠通溜正濺濺。無情日馭工催老。耐事天公聽

放顛薄暮行歌並湖去。有人儉樣畫癡仙。

悲秋

形骸枯槁病侵陵。少睡長飢一老僧。霜夜羈愁更無賴。莫收書策且留燈。

又

蕭蕭衰鬢點新霜。人靜房櫳易斷腸。等是閉門愁裏過。任教風雨壞重陽。

又

殘年孤寂不禁秋。醉自淒涼醒更愁。富貴空成守錢虜。吾今何止百官休。司空表聖自言有四宜休。

又

小雨簾櫳慘淡天。醉中偏藉亂書眠。夢回有恨無人會。枕伴橙香似昔年。

久雨道懷

暮年惜日月。木落輒動心。閑居念親友。所願聞足音。風雨斷官道。吾廬況幽深。渺渺雲水鄉。蕭蕭蘆荻林。草茂豪鳴蛙。天闊無來禽。四顧此何處。悠悠付孤斟。

野步書觸目

村落初過雨。園林殊未霜。幽花雜紅碧。野橘半青黃。飛鷺橫秋浦。啼鴉滿夕陽。最憐山腳水。掠亂入陂塘。

月下

月白庭空樹影稀。鵲棲不穩繞枝飛。老翁也學癡兒女。撲得流螢露濕衣。

九月十日

不須扇障庾公塵。散地翛然學隱淪。風帽可憐成昨夢。菊花已覺是陳人。昏昏但苦餘醒在。草草久無佳句新。歎息吾生行已矣。老來歲月似奔輪。

秋晴園中山禽絕多有感而賦

九日秋陰一日晴。山禽應喜我閑行。幽吭弄暖閑相命。勁翮凌風遠有聲。熟果啄餘看核墮。細枝銜得欲巢成。名園美蔭不飛去。似比交朋猶有情。

燈籠

我年十六遊名場。靈芝借榻棲僧廊。鐘聲纔定履聲集。弟子堂上分兩廂。燈籠一樣薄臘紙。瑩如雲母含清光。還家欲學竟未暇。歲月已似奔車忙。書生白首故習在。顛倒簡牘紛朱黃。短檠雖復作老伴。目力眩晃不可常。平生所好忽入手。摩挲把挈喜欲狂。蘭膏灑灑支達旦。秋雨蕭瑟輸新涼。討論廢忘正塗乙。遂欲盡發萬卷藏。所嗟衰病終難勉。非復當年下五行。

舟過南莊呼村老與飲示以詩

我昔過此時。荷花粲雲錦。今我復來遊。霜露已淒凜。鄉鄰福苦薄。積雨敗垂稔。禾頭耳穢穢。熟計難高枕。所懼憂吾君。歲暮詔發廩。勿言村醪薄。排悶聊共飲。

又

玄雲吞落日。大風東北起。隔林鳴兩鳩。當道行衆蟻。晴來未三日。雨候乃復爾。我場何時乾。嘉穀在泥滓。

豐凶歲所有遊惰古所恥。努力教子孫。天公終可倚。

秋夜獨過小橋觀月

湖上蕭蕭葉落頻。小橋東畔綸巾。乍圓素月升寒壁。欲散微雲蹙細鱗。有酒使應遺世事。得閑隨處勝官身。笑談但恨朋遊少。安得幽人與卜鄰。

紹興中與陳魯山王季夷從兄仲高以重九日同遊禹廟後三十餘年自三橋泛舟歸山居秋高雨霽望禹廟樓殿重複光景宛如當時而三人者皆下世子亦衰病無聊慨然作此詩

重樓傑閣倚虛空。紅日蒼烟正鬱葱。鄉國歸來渾似鶴。交朋零落不成龍。人生真與夢何校。我輩故應情所鍾。淚漬清詩卻回棹。不眠一夜聽鳴蛩。

雜興

風雨雞喔喔。雪霜柏森森。獨居雖無友。二物感我深。

又

萬物各有時。蟋蟀以秋鳴。我老自少眠。那得憎此聲。

又

漲水入我廬。萍葉黏半扉。日出水返壑。念汝何由歸。

又

清霜染丹葉。秋晚粲如春。回首風吹盡。天公解戲人。



予秋夜觀月得瘡疾枕上賦小詩自戲

貪看霜月步亭臯。不覺寒侵范叔袍。且倚誦詩驅瘡鬼。斷無人寄碧腴膏。唐小說載鄭處妻病瘡。杜子美教誦子璋燭髓血模糊等句。以卻之。又元微之謫江陵。病瘡。白樂天自長安寄以碧腴膏。

後春愁曲并序

予在成都作春愁曲。頗爲人所傳。偶見舊藁。悵然有感。作後春愁曲。

六年成都擅豪華。黃金買斷城中花。醉狂戲作春愁曲。素屏紈扇傳千家。當時說愁如夢寐。眼底何曾有愁事。朱顏忽去白髮生。真墮愁城出無計。世間萬事元悠悠。此身長短歸山丘。閉門堅坐愈生愁。未死且復秉燭遊。

秋花歎

秋花如義士。榮悴相與同。豈比輕薄花。四散隨春風。黃菊抱殘枝。寂寞臥寒雨。拒霜更可憐。和蒂浮煙浦。古來結交意。正要其死生。讀我秋花詩。可代丹雞盟。

寄題朱元晦武夷精舍

先生結屋綠巖邊。讀易懸知屢絕編。不用采芝驚世俗。恐人謗道是神仙。

又

蟬蛻巖間果是無。世人妄想可憐渠。有方爲子換凡骨。來讀晦菴新著書。

又

身閑剩覺溪山好。心靜尤知日月長。天下蒼生未蘇息。憂公遂與世相忘。

又

齊民本自樂衡門。水旱那知不自存。聖主憂勤常旰食。煩公一一報曾孫。

又

山如嵩少三十六。水似邛郯九折途。我老正須閑處著。白雲一半肯分無。

病思

夜窗孤影怯青燈。瘦著秋衣欲不勝。光景正如寒圃蝶。情懷卻羨病寮僧。篝爐冷落燒殘葉。禪榻欹斜倚古藤。莫怪頽然遺世事。鬢絲日日鏡中增。

病愈

秋夕高齋病始輕。物華凋落歲嶢嶢。蟹黃旋饜饑涎墮。酒滌初傾老眼明。提筆詩情還跌宕。倒牀藥裏尙縱橫。閑愁恰似憎人睡。又起挑燈聽雨聲。

病中忽有眉山士人史君見過欣然接之口占絕句

蜀語初聞喜復驚。依然如有故鄉情。絳羅餅餠玻璃酒。何日驀頤伴我行。眉州以羅裹餅餠。至二十四子。號通義餠。玻璃春。郡酒名也。亦爲西州之冠。

初寒

我窮不自活。萬事付天公。今年寒苦晚。霧雨常濛濛。雖追裘褐憂。坐念疾病攻。清夜喜不寐。萬木號西風。

新霜纔幾何。瘴癘一掃空。曉看烏臼林。已有數葉紅。微雲時去來。寒日猶曛曛。振衣起出戶。一笑尋鄰翁。

出塞曲

北風吹急雪。夜半埋氈廬。將軍八千騎。萬里逐單于。漢家如天臣。萬邦歡呼動。地單于降。鈴聲南來金閃。鏢。赦書已報經沙漠。

無題

碧玉當年未破瓜。學成歌舞入侯家。如今顛願篷窗裏。飛上青天妒落花。

道室卽事

一簪殘雪寄林亭。手把黃庭兩卷經。琴調養心安澹泊。爐香挽夢上青冥。隨緣久已均憂喜。玩世惟須半醉醒。溪父園公殊未見。頽然誰與共忘形。

夙興

青燈黃卷擁篝爐。殘髮垂蓬未暇梳。略似諸生勤夜課。絕勝小吏迫晨趨。雞聲喔喔寒猶力。月影離離淡欲無。幽致滿前君不領。枉因留滯歎頭顱。

長安道

千夫登登供版築。萬手丁丁供斲木。歌樓舞榭高入雲。複幕重簾晝燒燭。中使傳宣騎飛鞚。達官候見車擊轂。豈惟炎熱可炙手。五月瞿唐誰敢觸。人生易盡朝露晞。世事無常壞陂復。士師分鹿真是夢。塞翁失馬猶爲福。君不見野老八十無完衣。歲晚北風吹破屋。

記夢

夜夢有客短褐袍。示我文章雜詩騷。措辭磊落格力高。浩如怒風駕秋濤。起伏奔蹴何其豪。勢盡東注浮千艘。李白杜甫生不遭。英氣死豈埋蓬蒿。晚唐諸人戰雖麀。眼暗頭白真徒勞。何許老將擁弓刀。遇敵可使空壁逃。蕭然起敬豎髮毛。伏讀百過聲嘈嘈。情未終卷雞已號。追寫尙足驚兒曹。

冬夜讀書

茂陵病後非平昔。瘦骨玲瓏短髮疎。紅燭悔從長夜飲。青燈喜對少年書。聖賢親見生非晚。忿慾俱空死有餘。破屋頽垣君勿笑。更闌絃誦滿吾廬。

遊仙羅澗谷選放翁詩有遊僊七言古詩一首卽飄飄初珥玉殿三絕句合成者附記于此

飄飄鸞鶴杳難攀。萬里東遊海上山。應有世人遙稽首。紫簫餘調落雲間。

又

鳳舞鸞歌宴藥宮。碧桃花下醉千鍾。紅塵謫滿重歸去。花未開殘宴未終。

又

玄圃春風賜宴時。雙成獨奏玉參差。侍晨飲醕虛皇喜。一段龍綃索進詩。

又

初珥金貂謁紫皇。仙班最近玉爐香。爲憐未慣叢霄冷。獨賜流霞九醞觴。

又

玉殿吹笙第一仙。花前奏罷色悽然。憶曾偷學春愁曲。謫在人間五百年。

過鄰家

今日病良已。筇枝發興新。高居遺世事。一笑過吾鄰。夕照明丹葉。秋風老白蘋。素衣雖化盡。不爲犯京塵。

山園晚興

傳盃誰與豁幽悰。霜晚黃花未滿叢。過雁一聲寒靄外。短籬數掩夕陽中。易雖病裏猶能讀。詩到愁邊始欲工。惟有功名真已矣。嬾將華髮對青銅。

初冬出扁門歸湖上

桑柘枝空葉作堆。斜陽更著角聲催。雲歸玉笥茫茫去。水下蘭亭曲曲來。稻壠受犁寒欲遍。漁船入市晚爭回。貂裘破弊霜風冷。愁對青燈撥盃醅。

新寒小醉睡起日已高戲作

倦眼矇矓睡易成。華胥稅駕不多程。衾重枕隱當霜夕。氈暖屏深擁宿醒。栩栩蝶魂閑自適。緜緜龜息靜無聲。幽棲豈是忘微祿。正怕條鈴擾五更。

太息

閑將白髮照清溝。太息年光逝不留。勳業無期著書晚。此生與世判悠悠。

冬夜讀書

平生喜藏書。拱壁未爲寶。歸來稽山下。爛漫恣探討。六經萬世眼。守此可以老。多聞竟何用。綺語期一掃。

幽居出戶稀。衰病擁爐早。青燈照黃卷。作意勿草草。

晚步

地爐附殘火。將夕鳥雀喧。食已了無事。扶杖閑出門。披披歸雲陣。淡淡新月痕。平生足憂患。歲晚信乾坤。緩步牛羊巷。浩歌桑柘村。九原不可作。吾意與誰論。

村舍

空谷人稀到。新寒病頓輕。晨霜催小獵。宿雨潤新耕。草莽秦馳道。雲煙越故城。千年不磨滅。惟有暮山橫。

野步至近村

隨意出柴荆。清寒作晚晴。風吹雁北鄉。雲帶月東行。童稚爭追逐。漁樵習送迎。白頭寧復仕。惟此餞餘生。

夜坐油盞戲作

金樽畫燭少年豪。白首孤燈不厭勞。夜漏雖深書未竟。半缸誰與續殘膏。

又

欲盡殘燈更有情。可憐剪斷讀書聲。區區紙上太癡計。一笑開門看月明。

歲暮

離離井上桐。鬱鬱牆下桑。零落豈不悲。無奈中夜霜。蟋蟀更可念。歲暮依客牀。客亦自孤寂。衣篝歇殘香。一燈挂西壁。耿耿青無光。援筆欲寫愁。三喟不成章。

幽居感懷

偶傍楓林結數椽。東歸亦復度流年。汀洲雁下依殘水。墟里人行破夕煙。十月風霜欺客枕。五更鼓角滿江天。散關清渭應如昨。回首功名一愴然。

山中夜歸戲作短歌

駿馬不用換美妾。名酒不用博涼州。霜天飲酒騎馬出。馳獵蹴蹋川原秋。少年意薄萬戶侯。白首乃作窮山囚。箭鋒豈必盡狐兔。胸次聊欲平山丘。夜歸湖上酒初醒。莊舍蕭條燈火冷。解刀自笑太麤生。卻染松煤飛兔穎。

狂歌

少年雖狂猶有限。遇酒時能傲憂患。卽今狂處不待酒。混混長歌老巖澗。拂衣卽與世俗辭。掉頭不受朋友諫。挂帆直欲截煙海。策馬猶堪度雲棧。枵然癡腹肯貯愁。天遣作盎盛藜苳。髮垂不櫛性所使。衣垢忘濯心已慣。眼前故人死欲無。此生行矣風雨散。羞爲塵土伏轅駒。寧作江湖斷行雁。

遲暮

遲暮固多感。況此歲嶢嶢。霜霰忽已集。夜聞絡緯鳴。青燈不解語。依依有餘情。銅瓶煮寒泉。中作笙簫聲。沈憂能傷人。一夕白髮生。蓬萊渺雲海。金丹幾時成。

種秫

種秫供留客。移花待探春。愁邊開樂國。鬧裏作閑身。鬢髮今如此。頭顱莫問人。白鷗非避俗。野性自難馴。

擁爐

睡少人人笑老生。擁爐孤坐欲三更。月移西去失花影。風自北來傳漏聲。鳧鼎煎茶非俗物。雁燈開卷愜幽情。興來自喜猶強健。一紙清詩取次成。

冬夜吟

昨夜凝霜皎如月。碧瓦鱗鱗凍將裂。今夜明月卻如霜。竹影橫窗更清絕。造物有意娛詩人。供與詩材次第新。飢鴻病鶴自無寐。山窮水絕誰爲鄰。西村梅花消息動。唧唧寒醅漸鳴瓮。儘將醉帽插幽香。此生莫作長安夢。

讀書罷小酌偶賦

歲晚淒涼冰雪晨。頽垣破屋鏡湖濱。浮生亦念古有死。壯氣要使胡無人。黃卷展殘三太息。綠尊酌罷一嘔伸。躬耕不預差科事。猶向清時作幸民。

移花遇小雨喜甚爲賦二十字

獨坐閑無事。燒香賦小詩。可憐清夜雨。及此種花時。

書生歎

君不見城中小兒計不疎。賣漿賣餅活有餘。夜歸無事喚僮侶。醉倒往往眠街衢。又不見壠頭男子手把鉏。丁字不識稱農夫。筋力雖勞憂患少。春秋社飲常歡娛。可憐秀才最誤計。一生衣食囊中書。聲名纔出衆毀集。中道不復能他圖。抱書餓死在空谷。人雖可罪汝亦愚。嗚呼人雖可罪汝亦愚。曼倩豈即賢侏儒。冬夜醉解殘燈熒然起讀書。至明賦詩十韻。



冬夜厭久坐。頗幸一醉眠。滿酌文舉尊。徑臥子敬氈。鼻雷未及作。眼電遽瞭然。孤燈如秋螢。喚我開陳編。初欲限一卷。隨手紛聯翩。歡然不知疲。忽已晨鳥遷。嗟我行六十。衰病迫殘年。仕進今永塞。文章後誰傳。飽食而安寢。此計定自賢。勿學草玄翁。死爲人所憐。

夜行

路長憂炬盡。馬弱畏泥深。腸斷猿啼樹。魂驚鬼嘯林。艱危窮自慣。寒苦老難禁。回首金牛道。加鞭負壯心。須自小益還南鄭。夜宿金牛驛。時方大寒。人馬俱欲僵仆。今十二年矣。

遊淳化寺

蕭寺久不到。偶來幽興長。蝘穿珠九曲。蜂釀蜜千房。雨過山橫翠。霜新橘弄黃。年衰道不進。珍重一爐香。僧問拯迷。如何是祖師。西來意。師曰。古殿一爐香。拯迷卽淳化也。

餘慶出遊夜歸

杖藜尋勝愜幽情。芒屨如飛病體輕。迎客野梅纔半吐。避人山雉尙徐行。東谿水落灘聲壯。南嶺雲酣雪意成。薄暮歸來僧已定。佛龕獨對一燈明。

遊前山

兀兀無歡意。閑遊未擬回。屐聲驚雉起。風信報梅開。山雪堆僧衲。溪流動蟄雷。平生一桐帽。自惜犯塵埃。齋前獨坐戲作

閉戶學僧坐。頽然遺世情。虛窗鷓飛影。枯葉犬行聲。雪擁杉灰煖。雲垂紙帳明。清饑不可耐。一笑聽華鯨。

晚回僧至谿上

耽耽臥石熊當道。矯矯長松龍上天。不怕雪雲寒到骨。喚僧扶杖立橋邊。

僧飯

雲碓舂秬白。齋廚爨桂香。百窮慚燕頤。一飽慰龜腸。舉世知心少。平生爲口忙。何當棄簪笏。終老掩山房。

山店賣石榴取以薦酒

山色蒼寒雲釀雪。旗亭據榻興悠哉。麴生正欲相料理。催喚風流措措來。

平水小憩

蓐食草菴中。肩輿小市東。霧收山淡碧。雲漏日微紅。酒旆村場近。罾船浦澗通。平生喜行路。小住莫匆匆。

自若耶溪舟行杭鏡湖而歸

換馬亭前煙火微。鬪牛橋畔行人稀。雲山慘澹少顏色。霜日青薄無光輝。新酒麴成桑正落。美人信斷雁空歸。高樓何處吹長笛。清淚無端又溼衣。

宴坐

鼓樂弦歌萬二千。天魔剩欲破幽禪。道人袖手心如水。一點紗燈夜悄然。

遊山歸偶賦

此生本寄一浮漚。歸臥茅茨又四秋。習氣未除惟痛飲。幻軀偶健且閑遊。買蓑山縣雲藏市。橫笛江城月滿樓。與世沈浮最安樂。莫思將相快恩讎。

六十吟

人生久矣無百年。六十七已爲壽。嗟予忽忽蹈此境。衰髮如蓬面枯瘦。孤松摧折老澗壑。病馬淒涼依棧豆。尙無籌策活目前。豈有功名付身後。壁竦風入燈焰搖。地爐火盡寒蕭蕭。胸中白虹吐。千丈庭樹葉空衣未纒。

舒悲

嗜酒苦猖狂。畏人還醒醒。老病始悔歎。天下無此錯。管葛逝已久。千古困俗學。捫蝨論大計。使我思景略。中原失枝梧。胡塵暗河洛。天道遠莫測。士氣伏不作。煌煌東觀書。無乃太寂寞。丈夫不徒死。可作一丘貉。歲晚計愈疎。撫事淚零落。

山園晚興

病骨初輕野興濃。閑扶拄杖夕陽中。草枯陂澤涓涓水。木落園林淅淅風。楊子淒涼老天祿。馬周顛顛賴客新。豐壯心未與朱顏改。一笑憑高送斷鴻。

獨立

獨立柴荆外。頽然一秃翁。亂山吞落日。野水倒寒空。憂患工催老。飄零敢諱窮。漁歌亦何恨。悽斷滿西風。

探梅

半吐幽香特地奇。正如官柳弄黃時。放翁頗具尋梅眼。可愛南枝愛北枝。

又

江路雲低糝玉塵。暗香初探一枝新。平生不喜凡桃李。看了梅花睡過春。

遠興

莫言人世足悲傷。只爲詩情合斷腸。窗檻雨晴湖滌滌。郊墟煙重月茫茫。梅花調苦愁三弄。竹葉香清泥一觴。閉戶終年嗟局促。不如新雁到衡湘。

張功甫許見訪以詩堅其約

零落汀蘋露氣清。北窗昨夜已秋聲。書來屢有入東約。坐上極思虛左迎。激烈哦詩殷金石。縱橫落筆走蛟鯨。吾曹此事期千載。老眼相逢剩要驚。

# 陸放翁集

劍南詩稿

卷第十六

夜夢與數客觀畫有八幅龍湫圖特奇客請予作詩其上書數十字而覺不復能記明旦乃追補之亦髣髴夢中意也

高堂閱畫娛嘉賓。巨幅小卷縱橫陳。其間一圖最傑作。命意落筆驚倒人。奇峯峭立插地軸。飛瀑崩瀉垂天紳。壽藤老木幻荒怪。深潭危棧愁鬼神。忽然白晝起雷電。始覺異物蟠淵淪。陰雲四興誅老魅。甘澍連夕蘇疲民。豈惟陂澤苗盡立。已活億萬介與鱗。文章與畫共一法。腕力要可回千鈞。鐫銖不到便懸隔。用意雖盡終苦辛。君看此圖凡幾筆。一一圓勁如秋尊。乃知世間有絕藝。天造草昧參經綸。吾言未竟且復止。剩發幽奧天公噴。

泛舟

女牆巖巖帶斜暉。短棹還從剡曲歸。木葉經霜渾欲盡。人家近水自相依。逢迎俗客言多忤。顛沛窮途計易非。雪裏閉門殊不惡。故貂雖弊勝無衣。

夜聞大風感懷賦吳體

故都宮闕汗羶腥。原野久稽陳大刑。未須校尉戍西域。先要將軍空朔庭。意言揮戈可退日。身乃讀書方

聚螢病起窗前髮如雪。夜聞風聲孤涕零。

骨相

骨相元知薄。功名敢自期。病侵彊健日。閑過聖明時。形勝輪臺地。飛騰瀚海師。江湖雖萬里。猶擬綴聲詩。

有感

書生事業絕堪悲。橫得虛名毀亦隨。怖懼幾成牀下伏。艱難何啻劍頭炊。貧監河粟元知誤。乞尉遲錢更覺癡。已卜一菴鵝鼻谷。鵝鼻谷在秦望山秦刻石之所。崖嶺巉峻。可無芝朮療朝飢。

又

讀遍名山萬卷藏。殘年肯受俗低昂。正須嘯詠風濤上。未至悲辛酒盞旁。夢裏功名誰復計。閑中日月不勝長。虛皇有詔君知否。盡賜江湖作醉鄉。

城西晚眺

嫋嫋城笳咽。粲粲漁火青。霜凋兩岸柳。水浸一天星。靜看船歸浦。遙聞雁落汀。倚闌幽興極。不敢恨飄零。

苦寒

凍硯時能出苦吟。濁醪亦復慰孤斟。誰知冰雪凝嚴候。自是乾坤愛育心。癘鬼盡驅人意樂。遺蝗一洗麥根深。但嫌景短妨書課。棲鳥紛紛又滿林。

夙興

病後精神殊未減。披衣每起待晨雞。愛書不厭如平壑。戒酒新嚴似築堤。莫歎茅茨常局促。猶勝簿領苦

沈迷迎長漸近丹當熟。已覺溫溫下徹臍。

冬夜讀書甚樂偶作短歌

衰病作書崇。常恨無新功。兔甌供茗粥。睡思一洗空。郊居近城闔。漏鼓傳琴琴。紉帙開爛漫。牙籤紛疊重。朱黃參筆墨。照映燈花紅。魯壁汲冢祕。天遣慰困窮。衰衣窺藻火。宗廟聽笙鏞。端居得至樂。生世豈不逢。藜羹冷未啜。短褐忘嚴冬。拜手謝造物。不須黑頭公。

冬夜月下作

造物寧能困此翁。浩歌庭下答松風。煌煌斗柄插天北。熠熠月輪生海東。皂纛黃旗都護府。峨冠長劍大明宮。功名晚遂從來事。白首江湖未歎窮。

感憤

今皇神武是周宣。誰賦南征北伐篇。四海一家天歷數。兩河百郡宋山川。諸公尙守和親策。志士虛捐少壯年。京洛雪消春又動。永昌陵上草芊芊。

蓬戶

蓬戶真堪設爵羅。歲時野老自相過。人情靜處看方見。詩句窮來得最多。枕上長歌時激烈。樽前一笑且婆娑。白頭萬事都經遍。莫爲悲傷損太和。

行後園

霜風吹枯桑。落葉乾有聲。陂池日已涸。沙水見底清。人生非金石。歲暮難爲情。安得天邊鶴。駕之以遐征。

曉出遇獵徒有作

出門萬瓦粲晨霜。忽憶行軍起裹創。賣劍買牛身已老。搴旗斬將夢猶狂。奇才古有潛屠肆。豪氣今誰寓獵場。狐兔草間何足問。合留長箭射天狼。

贈道侶

崎嶇世路久知難。準擬丹成玉鍊顏。十載尋人遍巖穴。一樽隨處對溪山。蘇門晝寂聞舒嘯。函谷秋清候度關。剩欲相招同此事。疑君未辦一生閑。

六言

功名正恐不免。富貴酷非所須。鐵馬未平遼碣。釣船且醉江湖。

又

噉飯一簞不盡。結廬環堵猶寬。常得奉祠玉局。不須草詔金鑾。

又

烏有翁邊貫酒。無何鄉裏尋花。把定東風一笑。今年別是生涯。

又

壯歲京華羈旅。暮年湖海清狂。勿倚新知可樂。笑中白刃如霜。

作雪未成自湖中歸寒甚飲酒作短歌

黑雲垂到地。飛霰如細礫。我從湖上歸。散髮醉吹笛。少年志功名。目視無堅敵。慘淡古戰場。往往身所歷。



寧知事大謬。白首猶寂寂。淒涼武侯表。零落陳琳檄。報主知何時。誓死空憤激。天高白日遠。有淚無處滴。  
題傳神

鹽車心愧渥洼姿。邂逅風雲妄自期。鬻雪豈無歸漢日。飯牛猶有相齊時。君看短褐琴橫膝。誰許峨冠劍  
拄頤。白髮蕭蕭雖德矣。時來或將渡遼師。李英公平遼東時已八十餘。

閏月三夜舍西觀新月

平生絕愛初三月。況是平池浸玉鈎。老去人間朋舊少。一樽誰與話清愁。

獨夜

城上長更續短更。江平天迴雁方征。燈明紙帳雪霜色。火熟銅瓶風雨聲。濁酒未傾心已怯。細書時讀眼  
猶明。蕭然一室平生慣。羸下何須擁萬兵。

晚出偏門

一段新愁帶宿醒。半欹烏帽策驢行。村墟香動梅初破。裘褐寒輕雪未成。渡口人爭紅日晚。沙邊雁帶碧  
煙橫。悠然又覓長堤路。腸斷城樓畫角聲。

蕙苴蜀人謂其實爲蕙米。唐安所出尤奇。

初遊唐安飯蕙米。炊成不減雕胡美。大如芡實白如玉。滑欲流匙香滿屋。腹腴項鬚不入盤。況復飡酪誇  
甘酸。東歸思之未易得。每以問人人不識。嗚呼奇材從古棄。草菅君試求之籬落間。

答鄭虞任檢法見贈

臥龍山前秋雨晴。鄭子過我如夙昔。照人眉宇寒巉巖。懸知筆有千鈞力。鏡湖歲暮霜葉空。乃聞載酒同諸公。歸來湖山皆動色。新詩一紙吹清風。文章要須到屈宋。萬仞青霄下鸞鳳。區區圓美非絕倫。彈丸之評方誤人。

舟中曉賦

小艇下滄浪。吳歌特地長。斜分半艙月。滿載一篷霜。香飯炊菰白。醇醪點蟹黃。宦遊元爲口。莫恨老江鄉。

野興

玉門關外何妨死。飯顆山頭不怕窮。春蠶已成花欲動。了無一事著胸中。

又

猿臂將軍老未衰。氣吞十萬羽林兒。南山射虎自堪樂。何用封侯高帝時。

月夜有感

炯炯冰輪升澹澹。玉宇碧。高樓傾美酒。一醉不容失。陸生獨何事。閉戶飽岑寂。年來負風月。豈止此一夕。平生酒邊身。欲老每自惜。夜闌耿不寐。浩歌出金石。

落魄

落魄東吳莫笑儂。今年要不負春風。閑愁擲向乾坤外。永日移來歌吹中。酒浪欲爭湖水綠。花光卻妒舞衫紅。公卿憂責如山重。肯信人間有放翁。

遣興

壯年一箭落雙鷗。野餉如今擲藥苗。寒與梅花同不睡。悶尋鸚鵡說無憀。烏絲闌上詩初就。綠綺聲中酒半消。老去可憐風味在。未應山海混漁樵。

湖村野興

十里疎鐘到野堂。五更殘月伴清霜。已知無奈姮娥冷。瘦損梅花更斷腸。

又

山色空濛雨點微。醉中不覺濕蓑衣。何妨乞與丹青本。一棹橫衝翠靄歸。

看鏡

局促人間百不如。每看清鏡歎頭顱。醉來風月心雖在。老去軒裳夢已無。棋劫正忙停晚餉。詩聯未穩畫寒爐。乘除尙喜身彊健。六十登山不用扶。

塞上

塞上今年有事宜。將軍承詔出全師。精金錯落八尺馬。刺繡鮮明五丈旗。上谷飛狐傳號令。蕭關積石列城隄。不應幕府無班固。早晚燕然刻頌詩。

舟過會稽山下因繫舟遊近村迨暮乃歸

六十齒髮衰。歲月如逝波。秦王酒盞邊。知復幾經過。欣然捨畫楫。仄步捫青蘿。一徑入幽谷。四面聞樵歌。白雲忽破碎。翠木相蕩摩。激激春塘滿。柳陰戲雙鵝。浮生百憂中。此樂願豈多。日暮吾其歸。已恐爛斧柯。人日偶遊民家小園有山茶方開

人日西郊路。晨光射淺灘。停橈喜蕭散。照影歎衰殘。社酒香浮瓮。春蔬綠滿盤。山茶雖慰眼。不似海雲看。  
成都海雲寺山茶花。一樹千苞。特爲繁麗。

過杜浦橋

橋外波如鴨頭綠。杯中酒作鵝兒黃。山茶花下醉初醒。卻過西村看夕陽。

又

橋北雨餘春水生。橋南日落暮山橫。問君對酒胡不樂。聽取菱歌煙外聲。

上元日晝臥

積雨連上元。孤愁臥空館。宿醒殊未解。欲起意復嬾。牀敷蠻氈穩。被擁吳綾暖。殘香碧縷細。軟火紅焰短。  
雖云少睡眠。聊喜屢展轉。昏昏忽已暮。一笑呼茗椀。

莊器之作招隱閣項平父諸人賦詩予亦繼作

諸公共賦反招隱。細字斜行肯見傳。語到淮南小山作。人如江左永和年。一窗羅月禁春瘦。萬壑松風撼晝眠。我亦尙嫌林谷淺。因君更擬斷雲煙。

春夜讀書感懷

荒林梟獨嘯。野水鵝羣鳴。我坐蓬窗下。答以讀書聲。悲哉白髮翁。世事已飽更。一身不自恤。愛國涕縱橫。  
永懷天寶末。李郭出治兵。河北雖未下。要是復兩京。三千同德士。百萬羽林營。歲周一甲子。不見胡塵清。  
賊酋實孱王。賊將非人英。如何失此時。坐待姦雄生。我死骨即朽。青史亦無名。此詩倘不作。丹心尙誰明。

宿能仁寺

小雨暗江城。倦客寄僧榻。孤燈如秋螢。清夜自開闔。遙憐萍青青。厭聽竈閣閣。窗明竟無寐。卯酒倒殘榼。

寄題方伯譽遠菴

方侯胸中負經濟。議論源源有根柢。借令不用老山林。尚欲著書垂萬世。百年苦短萬世長。榮利一時真聚斲。渠曹定自別肺肝。今夕不爲明日計。

雨中宿石帆山下民家

老覺山行倦。閑便水宿幽。雨泥看放鴨。煙草聽呼牛。槃箸煩頻勸。窗扉喜小留。餘年竟何事。高枕送悠悠。

中夜雨霽月色入戶起飲酒一杯作絕句

吹盡浮雲天宇清。城頭疊鼓報三更。平生無此一杯酒。玉筍峯頭看月生。玉筍峯在石帆之南。

贈石帆老人

地僻林深客到稀。高春未起閉柴扉。新松鬱鬱三千本。密竹蕭蕭一尺圍。溪叟旋分菰米滑。山童新采蕨芽肥。因君更作長閑想。麟閣雲臺竟是非。

溪上醉吟

行行不知溪路深。但怪素月生遙岑。不辭醉袖拂花翠。與子更醉青蘿陰。

囚山

垣屋參差綠樹邊。囚山光景餞華顛。平川極目思秦地。大澤浮空憶楚天。刺虎射麋俱已矣。舉杯開劍忽

悽然此生終遺英雄笑，棘沒銅駝六十年。

小園

松菊僅三畝，作園真彊名。馴禽驚不去，熟果墜無聲。倦就盤陀坐，閑拈柳栗行。茅亭亦疎豁，憑檻看春耕。鄉人或病予，詩多道蜀中。遨樂之盛適，春日遊鏡湖。共請賦山陰，風物遂即杯。酒間作四絕句，卻當持以誇西州故人也。

又

嫩日輕雲淡拖天，撲燈過後賣花前。便從水閣杭湖去，捲起朱簾上畫船。

又

觴子窗扉面面開，金壺桃杏間尊罍。東風忽送笙歌近，一片樓臺泛水來。

又

湖波綠似鴨頭深，一日春晴直萬金。好事誰家鬪歌舞，方舟齊榜出花陰。

病中

花光柳色滿牆頭，病酒今朝嬾出遊。卻就水亭開小宴，繡簾銀燭看歸舟。

病起

風雨暗江天，幽窗起復眠。忍窮安晚境，留病壓災年。客助修琴料，僧分買藥錢。餘生均逆旅，未死且陶然。開歲忽六十，病餘閑炷香。春光向客淡，夜漏爲愁長。已老雞豚社，永違鸕鷀行。蒼龍西角月，孤夢墮微茫。

小築

小築茅茨鏡水濱。天教靜處著閑身。平原不復賦豪士。甫里但思歌散人。翠壁微泉時的鑿。衡門疊嶂曉嶙峋。子虛誤辱諸公賞。萬里輕鷗豈易馴。

記夢

東吳春暮寒猶重。睡美不聞城角動。身雖衰惰怕出門。江山尙入幽窗夢。夢到青羊看修竹。道人告我丹將熟。試求一黍換肝腸。他日重來駕黃鵠。青羊宮在成都南門外浣花道中。

久雨排悶

一春略無十日晴。雨腳纔斷雲已生。奇葩摧敗等青莧。嘉穀漂蕩隨浮萍。書生病臥苔及榻。溼薪燎衣熏欲盲。腰頑足痺空歎息。咫尺不得行中庭。讀書窗黑不見字。彈琴絃緩那成聲。老盆濁酒且復醉。兩部鼓吹方施行。

雨中泊舟蕭山縣驛

端居無策散悶愁。聊作人間汗漫遊。晚笛隨風來倦枕。春潮帶雨送孤舟。店家菰飯香初熟。市擔蓴絲滑欲流。自笑勞生成底事。黃塵陌上雪蒙頭。

夜漏欲盡行度浮橋至錢清驛待舟

潮生抹沙岸。雲薄漏月明。江頭曉色動。鶉起人未行。扶攜度長橋。仰視天宇清。遙憐繫舟人。聽我高屐聲。水檻得小憩。一笑拄杖橫。澄漪弄孤影。微風吹宿醒。湛然方寸間。不受塵事撓。寄語市朝人。此樂未易名。

江頭十日雨

江頭十日雨。雨止春已盡。殘紅如掃空。草木皆綠潤。村墟櫻筍鬧。節物團糝近。可憐笠澤翁。百憂集雙鬢。賦詩空自清。學道了不進。林間一甌茶。晤語君勿吝。

柯橋客亭

小市初晴已過春。朱櫻青杏一番新。霸陵老子無人識。暫借郵亭整角巾。

又

梅子生仁燕護雛。遶簷新葦綠扶疎。朝來酒興不可耐。買得釣船雙鱖魚。

小雨舟過梅市

故故催詩柳雨蓬。悠悠破夢隔雲鐘。遙看漁火兩三點。已過暮山千萬峯。老矣自應埋病骨。歸哉莫念抗塵容。停橈小住青楓岸。吳市高人儻可逢。

曉枕

曉枕鶯聲帶夢聽。忽看淡日滿窗櫺。閑愁誰遣濃如酒。醉過殘春不解醒。

巢菜并序

蜀蔬有兩巢。大巢。豌豆之不實者。小巢。生稻畦中。東坡所賦。元修菜是也。吳中絕多名。漂搖草。一名野蠶豆。但人不知取食耳。予小舟過梅市。得之。始以作羹。風味宛如在醴泉。蠶頤時也。冷落無人佐客庖。庾郎三九困譏嘲。此行忽似蠶津路。自候風爐煮小巢。



吳娘曲

鏡奩蠶出千黑蟻。釵梁梅小雙青豆。吳娘十四未知愁。羅衣已覺傷春瘦。閑尋女伴過西家。鬪草歸來日未斜。睡睫濛濛嬌欲閉。隔簾微雨壓楊花。

感舊

醉眼常輕兒女曹。西遊對客尙能豪。縷金羯鼓龜茲樂。鏤玉琵琶邏逆槽。巫峽已回行雨夢。錦江空憶浣花遊。閑情何計都除盡。爲覓并州快剪刀。

晨起閑步

飛紅掠地送春忙。嫩綠成陰帶露香。聽徹曉天鶯百轉。卻隨飛蝶度橫塘。

初夏同桑甥世昌過鄰家

空谷舊生涯。蕭條只自嗟。妻饑噓護筍。兒病失澆花。赤米老能飽。濁醪貧可賒。徵科幸差簡。扶杖過鄰家。

寓歎

孤生拙料事。諸老誤知人。世故幾翻覆。此身常賤貧。有書藏禹穴。無地靜胡塵。衰病今年劇。呻吟欲過旬。

春夏雨暘調適頗有豐歲之望喜而有作

二十年無赤白囊。人間何地不耕桑。陂塘處處分秧遍。村落家家煮繭忙。野老逢年知飽煖。書生隨例得猖狂。雨餘天氣初清潤。曳履長歌出草堂。

聞虜酋遁歸漠北

幽州遺民款塞來。來者扶老攜其孩。共言單于遠逃遁。一夕荆棘生燕臺。天威在上賊膽破。捧頭鼠竄吁可哀。妄期舊穴得孳育。不知天網方恢恢。老上龍庭豈不遠。漢兵一炬成飛灰。陛下中興天所命。築壇授鉞皆雄才。煌煌九霄揭日月。浩浩萬里行風雷。號山多獸可遊獵。汝不請命何歸哉。

初夏遊凌氏小園

水滿池塘葉滿枝。曲廊危榭愜幽期。風和海燕分泥處。日永吳蠶上簇時。閑理阮咸尋舊譜。細傾白墮賦新詩。從來夏淺勝春日。兒女紛紛豈得知。庾信詩云：夏淺卻勝春。鏡湖遊人至立夏而止。

偶得北虜金泉酒小酌

草草杯盤莫笑貧。朱櫻羊酪也嘗新。燈前耳熱顛狂甚。虜酒誰言不醉人。高適詩云：胡兒十歲能騎馬。虜酒千杯不醉人。

又

逆胡萬里跨燕秦。志士悲歌淚滿巾。未履胡腸涉胡血。一樽先醉范陽春。

無題

珠鞵玉指擘箜篌。誰記山南秉燭遊。結綺詩成江令醉。囊泉夢斷沈郎愁。天涯落日孤鴻沒。鏡裏流年兩鬢秋。不用更求驅豆術。人生離合判悠悠。

戲贈

簾幕陰陰晝漏遲。鵝黃雪白絡新絲。只應笑殺東鄰女。不見鞦韆到拆時。

題少陵畫像

長安落葉紛可掃。九陌北風吹馬倒。杜公四十不成名。袖裏空餘三賦草。車聲馬聲喧客枕。三百青銅市樓飲。杯殘鬻冷正悲辛。仗內鬪雞催賜錦。

閑居書事

園林綠葉一番新。桃李吹成陌上塵。玩易焚香消永日。聽琴煮茗送殘春。隱居正欲求吾志。大患元因有此身。堪笑癡人營富貴。百年贏得冢前麟。

登臺遇雨避於山亭晚霽乃歸

溽暑不堪蝸舍陋。瘦藤扶我上危臺。搏禽俊鷲橫空去。卷雨狂風掠野來。壯觀深知化工妙。幽尋卻躡夕陽回。悠然有喜君知否。屐齒留痕遍綠苔。

村居書觸目

雨霽郊原刈麥忙。風清門巷曬絲香。人饒笑語豐年樂。吏省徵科化日長。枝上花空閑蝶翅。林間葦美滑鶯吭。飽知遊宦無多味。莫恨爲農老故鄉。

訪醫

衰與病相乘。況復積憂慮。眩昏坐輒瞑。疲弱行欲仆。今晨訪之醫。見語疾當去。脈來如泉源。未易測君數。盛衰當自察。信醫固多誤。養氣勿動心。生死良細故。

夏夜讀書自嘲

事業無成去日遙。只今身世付滄洲。風煙慘慘菰蒲老。星斗離離河漢流。寂寞書生學奇字。窮愁客子著春秋。白頭自苦君無笑。骨朽成塵志未休。

夏日小宴

橫吹銅笛蒼龍聲。雙奏玉笙丹鳳鳴。已判百年終醉死。要將一笑壓愁生。旋移畫舫破山影。高捲朱簾延月明。試問炎歊在何許。夜闌翻怯葛衣輕。

送紫霄女道士四明謝君

一別南充十四年。時時清夢到金泉。山陰道上秋風早。卻見神仙小自然。果州金泉山謝自然飛昇之地。

又

道骨仙風凜不羣。清秋采藥到江村。自言家住雲南北。知是遺塵幾世孫。

醉中夜自村市歸

村市夜騎黃犢還。卻登小閣倚闌干。銀河斜界曉天碧。璧月下入秋江寒。吾輩身閑且飲酒。人生事定須闔棺。元自胸中著雲夢。莫驚綠鬢耐悲歡。

城北夜

端居厭孤寂。偶繫北城舟。天地淒涼色。江湖汗漫遊。螢光矜暗夜。蟲語報新秋。老去功名意。青燈映布裯。

秋夜舟中作

沽酒黃葉村。炊飯紅蓼岸。居人不孰何。正作漁父看。漁父我所羨。尚恐不得作。讀書端自癡。遊宦亦何樂。

四顧澤茫茫。仰視天離離。長歌入雲去。月落斗未欹。

日晚散步湖上遇小雨

暮色蒼蒼日初落。寒聲策策風正作。湖邊倚杖隄上行。病起聊試遊山腳。平生出門輕萬里。老去謝客專一壑。風濤傾洞蛟鱗橫。閭闔崔嵬鬼神惡。春蕪二頃叱黃犢。老學爲農亦不錯。兜鍪整蟬冕。俱掃空。雨笠香新織青籬。

安期篇

我昔遊崦嵫。捫蘿千仞峯。丈人倚赤藤。恐是安期翁。贈我一丸藥。五雲出瓢中。服之未轉刻。瑩然冰雪容。素手掬山靄。綠髮吹天風。丈人顧我喜。共騎一蒼龍。蓬萊亦何求。愛此萬里空。卻來過齊州。蝘埴看青嵩。

曉望海山

暮山青尙淺。曉山如黛染。開窗望海山。天清霧方斂。向來六月中。黑雲齊如截。蒼龍下曳尾。卷雨灑炎熱。造物信老手。忽作萬里秋。刻削此孤峭。巉然消客愁。豈無一布帆。寄我浩蕩意。會當駕長風。清嘯遺世事。

山園草木四絕句

紫薇

鐘鼓樓前官樣花。誰令流落到天涯。少年忘想今除盡。但愛清樽浸晚霞。

黃蜀葵

開時閑淡斂時愁。蘭菊應容預勝流。剩欲持杯相領略。一庭風露不禁秋。

拒霜

滿庭黃葉舞西風。天地方收肅殺功。何事獨蒙青女力。牆頭催放數苞紅。

蓼花

十年詩酒客刀州。每爲名花秉燭遊。老作漁翁猶喜事。數枝紅蓼醉清秋。

賽神曲

叢祠千歲臨江渚。拜祝今年那可數。須晴得晴雨得雨。人意所向神輒許。嘉禾九穗持上府。廟前女巫遞歌舞。鳴鳴歌謳坎坎鼓。香煙成雲神降語。大餅如槃牲腍肥。再拜獻神神不違。晚來人醉相扶歸。蟬聲滿廟鎖斜暉。

夜中起讀書戲作

髮已凋零齒已疎。忍飢白首臥蝸廬。風聲忽轆蓬窗過。夜半呼燈起讀書。

又

滅虜區區計本疎。水邊喬木擁茅廬。九原定發韓公笑。至老依然一束書。

秋夜出門觀月

六十衰翁適得閑。一秋無事掩柴關。雁來慘淡沙場外。月出蒼茫雲海間。飲酒已衰猶愛客。著書初畢可藏山。此生終羨漁家樂。小艇常衝夕靄還。

雨中買酒鏡湖酒樓

陰風號大澤。暮雨上高樓。愁憶新豐酒。寒思季子裘。登臨天地迓。老病歲時遒。安得急裝去。北平防盛秋。

聞虜政衰亂掃蕩有期喜成口號

正朔今年被百蠻。遙知喜色動天顏。風雷傳號臨春水。春水。虜都名。貔虎移軍過玉關。博士已成封禪草。單于將就會朝班。孤臣老抱周南恨。壯觀空存夢想間。

又

遺虜遊魂豈足憂。漢家方運幄中籌。天開地闢逢千載。雷動風行遍九州。刁斗令嚴青海夜。旌旗色照鐵關秋。功名自是英豪事。不用君王萬戶侯。

甲辰中秋無月十七夜獨儼然達旦

老覺人間無一欣。窮閭掃軌謝紛紛。已憑白露洗明月。更遣清風收亂雲。棲鵲揀枝寒未穩。斷鴻呼伴遠猶聞。病羸慵踏梧桐影。倚柱長吟夜向分。

悲秋

病後支離不自持。湖邊蕭瑟早寒時。已驚白髮馮唐老。又起清秋宋玉悲。枕上數聲新到雁。燈前一局欲殘棋。丈夫幾許襟懷事。天地無情似不知。

農家秋晚戲詠

鞭地如鏡築我場。破礮玉粒輸官倉。九月野空天欲霜。甌中初喜新粳香。舍邊蕭蕭落葉多。野蠶出繭飛黃蛾。寒蔬種罷醉且歌。隻雞短紙賽園婆。

病中作

老鶴遼天興未窮。此生光景自匆匆。家爲逆旅相逢處。身在嚴裝欲發中。澀眼尙于書有味。孤愁殊覺酒無功。揮戈草檄今誰記。歲晚江邊白髮翁。

秋夜讀書

讀書喜夜長。著書悲齒暮。平生企前哲。凜有庸人懼。吾廬大澤中。地曠北風怒。徂年凋草木。寒氣逼霜露。燈昏老眼闇。鈍馬行惡路。投枕卷未終。吾衰歎非故。

病起

頽垣破屋暗藜蒿。病起不知秋已高。晨倚山楹羣木脫。暮臨苔砌百蟲號。力殫編簡初何得。腰折塵埃只漫勞。賴有濁醪生耳熱。狂歌醉草寄吾豪。

晨起

孤夢忽自驚。小窗初送明。珍禽語庭樹。可愛不知名。向者事官遊。塵土過半生。傳呼束帶出。琴瑟尙殘更。山居雖自由。晨起亦有程。洗硯拂書几。一笑愜幽情。

秋夜

老病龍鍾不入城。濁醪麤飯餞餘生。未霜村舍秋先冷。無月江天夜自明。出塞雖慙平賊手。下帷聊喜讀書聲。山童睡熟青燈暗。自撥殘爐候藥鎗。

雨中過東村



小雨空濛物象奇。偶扶藤杖過東陂。熱巾風度人爭看。蠟屐年光我自悲。窮鬼有靈揮不去。死魔多力到無期。歸來笑向嚮門說。且了浮生一首詩。

### 山寺

寺門壓石危欲崩。槎牙老松挂蒼藤。風傳上方出定磬。雨暗古殿長明燈。宿林野鶻驚復起。爭栗山童呼不響。谿南聞道更幽絕。明日裂布縫行膝。

天王廣教院在戴山東麓。予年二十餘時與老僧惠迪遊略無十日不到也。淳熙甲辰秋觀潮海上。偶繫舟其門。曳杖再遊。恍如隔世矣。

遊山如讀書。深淺皆可樂。道邊小精舍。亦自一丘壑。淒涼四十年。始復重著腳。老僧逝已久。講座塵漠漠。當時童子輩。衰鬢亦蕭索。掃壁觀舊題。歲月真電雹。文章卑不傳。衣食窘如昨。出門意惘然。遼海渺孤鶴。

### 江月歌

放翁平生一釣船。秋水未落江渺然。露洗玉宇清無煙。月輪徐行萬里天。人間聲利何足捐。浩歌看月冷不眠。孤鶴掠水來翩翩。似欲駕我從此仙。我寓紅塵今幾年。俛首韁鎖常自憐。樂哉揮手過月邊。西風未凋玉井蓮。

### 初寒書懷

嵩雲緜月本閑人。誤落塵中白髮新。萬事看山差入眼。百年把酒獨關身。棧邊老馬行安往。牀下寒龜息自勻。藜杖一枝猶好在。未妨閑探早梅春。

歲暮

小築幽栖與拙宜。讀書寫字伴兒嬉。已無歎老嗟卑意。卻喜分冬守歲時。羹臠芳鮮新弋雁。衣襦輕暖自纈絲。農家歲暮真堪樂。說向公卿未必知。

晨興

倦枕厭寒夜。起尋殘火溫。喑喑衆雞動。耿耿一燈昏。野氣增霜力。窗光淡月痕。早朝非老事。且復灌吾園。

村飲

少年喜任俠。見酒氣已吞。一飲但計日。斗斛何足論。綠草滿雉場。紅旗植毬門。三叫落烏幘。倒瀉黃金盆。銀爐熾獸炭。狐兔紛炮燔。浩歌撼空雲。壯志排帝閭。回首今幾時。去日如車奔。朱顏辭曉鏡。白髮老孤村。鄰翁勸黍酒。稚子供魚殮。功名信已平。萬事付乾坤。

夜半讀書罷出門徙倚久之歸賦長句

浩歌曳杖出柴扉。不管三更露溼衣。擬看林梢殘月上。偶逢浦口斷雲歸。驚鴻脫網寒相倚。飢鶻思巢夜亦飛。卻掩北窗誰晤語。聊憑香盃洗塵機。

曝書偶見舊稿有感

日滿晴軒理蠹魚。壯遊回首一欷歔。淒涼王粲從軍作。零落相如諫獵書。歌吹恍思登北固。弓刀誰記渡南沮。虎頭本欠功名相。歸老林間計未疎。

崑崙行

陰雲解駁朝。嗽紅黃河直與崑崙通。不駕鸞鳳。騷虬龍。徑躡香煙上空中。吾行忽過日月宮。下視積氣青濛濛。寒暑不分晝夜同。嵯峨九關常烈風。凜然蕭森變冲融。不悻不眩身如空。塵沙浩劫環無窮。詎須更覓安期翁。

一室

九萬笑鵬搏。幽居一室寬。雨聲便早睡。酒力壓新寒。嬾覺閑多味。衰知死有端。此生吾自斷。不必夢邯鄲。

得所親廣州書

音信連年恨不聞。書來細讀卻消魂。人稀野店山魍語。路僻蠻村荔子繁。毒草自搖春寂寂。癘雲不動晝昏昏。此生相見應無日。且置清愁近一樽。

幽居戲詠

清泉遠屋竹連牆。回首微官意已忘。小瓮帶泥收洛筍。洛中冬筍野以小瓮爲遠餉。細鱗穿柳買河魴。黃旗萬里無侯骨。紅燭千鍾有酒腸。欲起九原誰可友。蘭亭修禊晉諸王。

幽事

蕭然四壁野人家。幽事還堪對客誇。快日明窗試墨。寒泉古鼎自煎茶。桐凋無復吟風葉。蘋老猶殘泣露花。萬里封侯真已矣。只將高枕作生涯。



# 陸放翁集

劍南詩稿

卷第十七

初冬雜題

勛業文章意已闌，暮年不足是看山。  
江南寺寺樓堪倚，安得身如杜牧閑。

又

莫嫌風雨作新寒，一樹青楓已半丹。  
身在范寬圖畫裏，小樓西角剩憑闌。

又

風橫雲低雨腳斜，一枝柔艸暮啞啞。  
昏昏醉臥知何處，推起船篷忽到家。

又

五斗安能解醉醒，膏騰睡眼怯窗明。  
策勛賴有春芽在，臥聽山童轉磴聲。

又

荒郊寒雨晚淒淒，四壁穿頰旋補泥。  
物我元須各安穩，自苦牛屋織雞棲。

又

風雨聲豪入夢中，不知身世寄孤蓬。  
狐裘氈帽如龍馬，天漢西南小益東。

閉戶

屏居無一事。閉戶常經旬。勿云草舍陋。愛此油窗新。三日不作詩。幽禽語撩人。尺素雜行草。往檄江梅春。十月四日夜記夢

四客聯轡來。我醉久不知。倒衣出迎客。媿謝前致辭。客意極疎豁。大笑軒鬚眉。禮豈爲我設。度外以相期。袞袞吐雄辯。泠泠誦新詩。共言攜酒壺。掃地臨前墀。意氣相顧喜。忽如少年時。老雞不解事。喚覺空嗟咨。涉世四十年。賢雋常追隨。爾來風俗壞。動腳墮險巇。森然義府刀。誰爲叔度陂。起作四客篇。捕影吾其癡。西路口山店

日薄霜清十月天。馬蹄聲裏送流年。店當古路三叉處。山似孤雲兩角邊。孤雲兩角在漢中。淹泊自悲窮不醒。衰殘更著病相纏。榆關瀚海知何在。目送飛鴻入暮煙。

題海首座俠客像

趙魏胡塵千丈黃。遺民膏血飽豺狼。功名不遣斯人了。無奈和戎白面郎。

送綽姪住菴吳興山中

一盃淡粥不烹蔬。綽居山粥飯外菜亦不食。自占雲根結草廬。非佛非心猶坐斷。定知不看夾山書。

又

湖海相從十日留。頗哀老子鬢驚秋。目光猶射車牛背。不用殷勤舉話頭。

冬夜與溥菴主說川食戲作

唐安慧米白如玉。漢嘉椀脯美勝肉。大巢初生蠶正浴。小巢漸老麥米熟。龍鶴作羹香出釜。木魚淪菹子盈腹。未論索麩與饋飯。最愛紅糟并魚粥。東來坐閱七寒暑。未嘗舉箸忘吾蜀。何時一飽與子同。更煎土茗浮甘菊。

仗錫平老自都城回見訪索怡雲堂詩

東華軟塵飛撲帽。黃金絡馬人看好。渠儂胸中誰得知。畏禍憂讒鬢先老。舉世輸與平元衡。青山白雲過一生。出門曳杖便千里。白雲不約常同行。敲門剝啄雲沒履。劇談未竟還東去。到山分我一片雲。併遣春風吹好句。

野飲

青山千載老英雄。濁酒三盃失阨窮。訪古頽垣荒塹裏。覓交屠狗賣漿中。平堤漸放春蕪綠。細浪遙翻夕照紅。已把殘年付天地。騎牛吹笛伴村童。

樊江觀梅

莫笑山翁老據鞍。探梅今夕到江干。半灘流水浸殘月。一夜清霜催曉寒。倚醉更教重秉燭。怕寒元自怯憑欄。誰知攜客芳華日。曾費纏頭錦百端。成都合江園芳華樓下梅最盛。

山亭觀梅

與梅歲歲有幽期。忘卻如今兩鬢絲。乘淡月時和雪看。斷蒼苔地帶花移。先春瘦損應多恨。靜夜香來更一奇。醉倒欄邊君勿笑。明朝紅萼綴空枝。

射的山觀梅

射的山前雨墊巾。籬邊初見一枝新。照谿盡洗驕春意。倚竹真成絕代人。餐玉元知非火食。化衣應笑走京塵。卽今畫史無名手。試把清詩當寫真。

又

凌厲冰霜節愈堅。人間乃有此癯仙。坐收國士無雙價。獨立東皇太一前。此去幽尋應盡日。向來別恨動經年。花中竟是誰流輩。欲許芳蘭恐未然。

別梅

竹籬數掩傍魚磯。萬點梅花掠地飛。正喜巡簷來索笑。已悲臨水送將歸。影橫月處愁空絕。子滿枝時事更非。自古情鍾在吾輩。尊前莫怪淚沾衣。

憶梅

護惜常愁滿樹開。况無一片在蒼苔。眼高嬾爲凡花醉。腸斷驚聞暮角哀。寫向素綃時拂拭。移來幽圃自栽培。論心竟是明年事。輸與醪醑在酒盃。

新晴午枕初起信筆

閉戶日陶然。晴窗春已妍。華胥夢中國。龍漢劫初年。浩浩塵揚海。茫茫杵倚天。何妨駕孤鶴。小憩華山前。

乙巳早春

故故啼鶯傍曲廊。飛飛戲蝶度橫塘。病來對酒心雖怯。老去逢花眼尙狂。牀擁琴書供枕籍。簾通風月索



平章一丘一壑從來事。起就功名未苦忙。

小雨

細細溼春光。霏霏破夕陽。臥聞驚倦枕。起看入虛堂。映葉鶯猶囀。爭泥燕正忙。閑愁無遣處。誰與共飛觴。

南樓遇大風雨

歎息誰如造物雄。故將意氣壓衰翁。千羣鐵馬雲屯野。百尺金蛇電掣空。身羨漁翁鳴急雨。心憐鴉陣困狂風。世間變態誰能測。歸路斜陽十里紅。

春晚至山中因訪陳道人

一春衰病集殘骸。太息流塵覆酒杯。僧鉢始知尊菜老。佛瓶初見杏花开。蘋溪小雨成幽討。松院斜陽又獨來。不爲愛閑從野叟。年來萬事學低摧。

小隱

小隱在江干。茆廬亦易安。庖廚供白小。籬落蔓黃團。蹭蹬馮唐老。飄零范叔寒。世情從迫隘。醉眼覺天寬。

春興

萬事不關身。翛然一幅巾。雖非愛酒伴。猶是別花人。杜詩走覓南隣愛酒伴。白樂天紫薇花詩。不別花人不與看。領略琴書意。掃空車馬塵。東阡與南陌。隨處夢殘春。

曾仲躬見過適遇予出留小詩而去次韻二首

地僻元無俗客來。蓬門只欲爲君開。山橫翠黛供詩本。麥卷黃雲足酒材。

又

數樹山花草舍東。想公繫馬落殘紅。那知老子耶溪上。正泛朝南暮北風。

睡起

風約飛花滿曲廊。蕭然無客共焚香。雲醅力重初投枕。鼻鼾聲豪已撼牀。栩栩夢遊心自適。昏昏起坐日方長。靜憑一几吾何恨。笑殺穿簾燕子忙。

病起

山村病起帽圍寬。春盡江南尚薄寒。志士淒涼閑處老。名花零落雨中看。斷香漠漠便支枕。芳草離離倚闌。收拾吟牋停酒椀。年來觸事動憂端。

山居戲題

海山縹渺斷雲扃。掃地焚香悅性靈。嫩白半甌嘗日鑄。硬黃一卷學蘭亭。衰顏冉冉臨清鏡。華髮蕭蕭倚素屏。尊酒不空身見在。莫爭天上少微星。

又

病起清羸不自持。年光都上鬢邊絲。昏昏雨細梅黃後。漫漫秧青水滿時。曲几方牀娛永日。矮冠高屐駭羣兒。客來莫笑狂顛甚。此處那容世俗知。

芒種後經旬無日不雨偶得長句

芒種初過雨及時。紗廚睡起角巾欹。癡雲不散常遮塔。野水無聲自入池。綠樹晚涼鳩語鬧。畫梁晝寂燕

歸遲。閑身自喜。渾無事。衣覆熏籠。獨誦詩。

久雨喜晴十韻

一雨二十日。頽牆屋。亦爛。扶杖出門行。四顧水瀾漫。村迴鳩爭巢。村昏雞失旦。荒庭蛙黽豪。空廡螢火亂。蠹魚敗書編。萍草黏戶半。清風忽東來。一剪雨脚斷。天青日杲杲。河白星燦燦。車轍尋舊途。船步出新岸。稍喜泥潦乾。破竈得炊爨。賤貧固多憂。長歌寄吾歎。

盆池

人生何處不兒嬉。一世元知孰是非。汲井埋盆鑿苔破。敲針作釣得魚歸。蕭蕭菰葉風聲細。嫋嫋蘋花雨點稀。並舍老翁能喜事。爲添拳石象苔磯。盆池初成。隣人吳氏老送小石置池上。

月中過蜻蜓浦

天光水色合爲一。舟出西城猶落日。一規忽見寒壁升。萬頃坐歎浴銀溢。哀哀姑惡訴何苦。熠熠螢火光自失。葦低時見小艇過。水響遙知大魚出。銅壺玉酒我徑醉。短髮垂肩蓬不櫛。緩篙遡月勿遽行。坐待湘妃鼓瑤瑟。

六峯項里看採楊梅連日留山中

綠陰翳翳連山市。丹實纒纒照路隅。未愛滿盤堆火齊。先驚探領得驪珠。斜簪寶髻看遊舫。細織筠籠入上都。醉裏自矜豪氣在。欲乘風露摘千株。  
雨中自項里夜至新塘捨舟步歸

樺炬如椽點不明。還家潦水與階平。一盃濁酒頽然睡。恍似金牛夜下程。

又

天如漆黑泥沒踝。老健猶能蹠蹠歸。裊裊爐香支枕看。終年只合掩柴扉。

夜聽竹間雨聲

解醒不用酒。聽雨神自清。治疾不用藥。聽雨體自輕。我居萬竹間。蕭瑟送此聲。焚香倚蒲團。袖手坐三更。人苦不自覺。忿慾投隙生。起歎蒼間雨。更與此君盟。

泛三江海浦

鼇負三山碧海秋。龍驤萬斛放翁遊。少舒我輩胸中氣。一掃羣兒分外愁。醉斬長鯨倚天劍。笑凌駭浪濟川舟。悠然高詠平生事。齷齪寧能老故丘。

獨酌有懷南鄭

憶從嶓冢涉南沮。笳鼓聲酣醉膽麤。投筆書生古來有。從軍樂事世間無。秋風逐虎花叱撥。夜雪射熊金僕姑。白首功名元未晚。笑人四十歎頭顱。

秋日泛鏡中憩千秋觀

病起重來理釣絲。扁舟迨及素秋時。舊交猶有青山在。幽趣唯應白鳥知。冉冉年光行老矣。茫茫世路欲何之。秦皇酒榼苔封遍。虛負霜螯左手持。湖山之間有石號秦皇酒壺。

秋夕虹橋舟中偶賦

解纜初離小市門。放篙衝破一谿雲。露螢合散自成陣。水鳥飛鳴如覓羣。楓落荷疎秋漸老。河傾斗轉夜將分。書生老負功名志。醉裏長歌強一欣。

秋思

一徑苔侵四壁空。北窗支枕聽秋鐘。故人去後登樓怯。白髮多來覽鏡慵。狂憶射麋窮楚澤。閑思釣雪泛吳松。相如病渴年來劇。釀酒傾家畏不供。

自嘲

窮途久矣歎吾衰。雙鬢新添幾縷絲。身是在家狂道士。心如退院病禪師。極知勾漏求丹藥。不及衡陽賣漉籬。習氣若爲除未盡。小軒風月又成詩。

豐年行

秋風蕭蕭秋日薄。築場穫稻方竭作。志士雖懷晚歲悲。農家自足豐年樂。撥醅白酒喚鄰曲。啄黍黃雞初束縛。長魚出網健欲飛。新兔臥盤肥可臠。躬耕辛苦四十年。一飽豈非天所酢。書生識字亦聊爾。莫作揚雄老投閣。

秋夜泊舟亭山下

逢水逢山到處留。可憐身世寄孤舟。一汀蘋露漁村晚。十里荷花野店秋。羽檄未聞傳塞外。金椎先報擊衙頭。聞虜曾行帳爲壯士所攻。幾不免虜語。謂曾所在爲衙頭。煌煌太白高千丈。那得功名取次休。

初秋山中作

萬里西風吹幅巾。卽今眞個是閑人。堆盤菱熟燕脂角。藉藻鱸新淡墨鱗。姥嶺蹇驢尋雪徑。娥江孤艇繫煙津。飄然樂事眞當勉。遠付十年無此身。

秋夜讀書有感

久病畏長夏。枕簟如炮焚。扶持賴藥物。俛仰秋已分。清夜炷爐香。鼻裊起孤雲。靈府豁蒙滯。舊學資鉅耘。言念總角初。操觚極艱勤。諸老頗賞識。謂可與斯文。沉痾幸鍼石。輪困勞斧斤。可憐四十年。薄陋負所聞。白首猶著書。逝將獻吾君。太官薦玉食。野人徒美芹。

晚涼登山亭

庭空葉飛秋。村迴鳩喚雨。新涼入巾褐。老子顛欲舞。憑高望稽山。秀色溢天宇。一鏡三百里。水落分別浦。淒涼吊禹穴。秦漢未爲古。世俗誰與歸。吾其老農圃。

夜步

市人莫笑雪蒙頭。北陌南阡信脚遊。風遞鐘聲雲外寺。水搖燈影酒家樓。鶴歸遼海逾千歲。楓落吳江又一秋。却掩船扉耿無寐。半窗落月照清愁。

感秋

秋堂靈氣清。蕭爽入毛骨。葛裯耿無寐。坐待山月沒。溼螢飛不起。熠燿依衰草。勁風西北號。落葉紛可掃。老生惜歲月。烈士志功名。登臨送將去。非復兒女情。懸知青海邊。殺氣橫千里。良時不可失。胡行速如鬼。時間處。曾自香草淀。入秋山。蓋遠遁矣。

病中作

一病二十日，直愁難自還。殘書不成讀，長夜只供閑。風舞迎霜葉，雲昏欲雨山。臨窗忽自笑，詩思又相關。

送猷講主赴李明府姜山之招

貫花籤帙壓車轅，惟子窮探到本源。聽法鬼神環麈尾，質疑英俊集龍門。孤舟此日輕爲別，尺素何時遠見存。坐想文殊對摩詰，高談無礙九河翻。

雨中排悶

點點滴滴雨不晴，暗暗淡淡燈不明。皇天胡爲貸此老，病臥垂困今已平。卻慙向者力量淺，鼠肝蟲臂猶關情。百年終歸朝露速，一死正自秋毫輕。明朝且作山中行，青鞋已覺白雲生。豐年處處村酒好，莫教湘湖蓴菜老。湘湖在蕭山縣，蓴菜絕奇。

秋夜歌

書生白首無處著，病臥空齋夜蕭索。茶鐺飈飈候湯熟，燈檠蔌蔌看燼落。山童喚起已復倒，顧影自笑如孤鶴。人言富貴墮駭機，一生窮愁正不惡。架上故裘破見肘，牀頭殘酒傾到腳。問君何以塵霜風，悠然臥聽山城角。

病起鏡中見白髮此去七十無十寒暑矣偶得長句

短鬢蕭條失故青，人間真似宿郵亭。正令寬作十年夢，安用更留三日醒。覆瓿書成空自苦，擊轅歌罷遣誰聽。客來若覓衰翁處，睡起悠然倚素屏。

初寒宴坐

微火如螢度篆盤。明窗坐敗幾蒲團。羣兒誰信老懷嬾。萬事不禁醒眼看。道在箠瓢端自足。心閑天地本來寬。此生自斷君知否。不辦歸裝也掛冠。

溪行

霜落水初澄。星繁月未升。近村聞夜犬。隔浦見秋燈。多病乃如許。微寒已不勝。平生鄰曲意。移棹避漁罾。

又

疎鐘度莽蒼。遠火耿微茫。歲暮水歸壑。夜寒天賈霜。人生一蟲臂。世路幾羊腸。老大忘繩檢。狂歌盡意長。

讀書

遠遜江湖上。端居風雨中。紙新窗正白。爐煖火通紅。籤帙方重整。聲形且細窮。扶衰倘未死。更破十年功。

自嘲用前韻

殘年過六十。寂寞臥山中。病眼驚新暗。衰顏失舊紅。人譏作詩瘦。自憫著書窮。輸與封侯骨。雲臺競策功。

病中久廢遊覽悵然有感

裘馬清狂徧兩川。十年身是地行仙。歸來訪舊半爲鬼。已矣此生休問天。不恨盃觴無藉在。但悲山水曠周旋。垂虹風月休如昨。安得青錢買釣船。

新釀熟小飲

玉船澉澉酌鵝黃。菊欲殘時抵死香。似與幽人爲醉地。清笳聲裏一天霜。



又

籬菊猶堪采落英。一尊玉瀝釀初成。今宵要向中庭飲。不展華茵展月明。

題徐淵子環碧亭亭有茶山曾先生詩

茶山丈人厭囂譁。幅巾每訪博士家。小亭談笑不知暮。往往城上聞吹笳。興來傑作粲珠壁。歲久妙墨亡。龍蛇。郎君弟子多白髮。回頭日月如奔車。徐卿赤城古仙子。十年四海推才華。覽觀陳迹喜不寐。旋補罅漏支傾斜。曲池還浸古來月。叢莽忽見當時花。重題舊句照高棟。力振風雅排淫哇。席間紵袍已散鶴。堂上講鼓初停撾。速宜力置竹葉酒。不用更淪桃花茶。桃花茶見曾公詩。

雜興

鰻井初生一縷雲。鮑郎山下雨昏昏。鶻聲嘔軋秋空曉。水際人家尙閉門。

又

孤夢初回揭短篷。橋邊曉日已曛曛。太平氣象君知否。盡在豐年笑語中。

又

古寺高樓暮倚闌。野雲不散白漫漫。好山遮盡君無恨。且作滄溟萬里看。

大雪

大雪江南見未曾。今年方始是嚴凝。巧穿簾罅如相覓。重壓林梢欲不勝。氈幄擲盧忘夜睡。金羈立馬怯晨興。此生自笑功名晚。空想黃河徹底冰。

遣興

書生不自憐。老眼付皇天。已飽三升稷。寧堆百屋錢。紅塵忙過日。青嶂醉論年。名字元虛幻。從人謗是仙。

委轡

委轡去悠悠。山窮得渡頭。白雲生碧巘。翠木擁朱樓。野榼淵明酒。征塵季子裘。自憐詩興在。杜若滿芳洲。

雪中作

竹折松僵鳥雀愁。閉門我亦擁貂裘。已忘作賦遊梁苑。但憶銜枚入蔡州。屬國餐甌真強項。翰林煮茗自風流。明朝日暖君須記。更看青鴛玉半溝。

夢筆驛

朱扉水際亭。白塔道邊寺。扁舟幾往返。每過輒歔歔。經秋病不死。歲暮復口至。少年自喧譁。此老獨顛顛。可憐釣鱉客。終返屠羊肆。吾身行亦無。榮辱安所寄。短燈照孤愁。寒衾推殘醉。明當臨大江。一灑壯士淚。

舟中感懷三絕句呈太傅相公兼簡岳大用郎中

浪中韞韞雨聲寒。孤夢初回燭半殘。甲子一周胡未滅。關山還帶淚痕看。

又

雨打孤篷酒漸消。昏燈與我共無聊。功名本是無憑事。不及寒江日兩潮。

又

夢筆亭邊擁鼻吟。壯圖蹭蹬老侵尋。不眠數盡雞三唱。自笑當年起舞心。

西興泊舟

衰髮不勝白。寸心殊未降。避風流水市。岸轅倚船窗。日上金鑿海。潮來雪捲江。登臨數奇觀。未易敵吾邦。

錢清夜渡

輕舟夜絕江。天闊星磊磊。地勢下東南。壯哉水所匯。月出半天赤。轉盼離巨海。清暉流玉宇。草木盡光彩。男子志功名。徒死不容悔。坐思黃河上。橫戈被重鎧。晚途雖益困。此志願常在。一日天勝人。醜虜安足醜。

夜歸

晡時振楫離西興。錢清夜渡見月升。浮橋沾酒市嘈噴。江口過埭牛凌兢。寒齋煮麩坐卯店。小鮮供饌尋魚鬻。偶逢估客問姓字。歡笑便足爲交朋。須臾一飽各散心。帆席健快如超騰。雲間戍樓鼓坎坎。山尾佛塔燈層層。夜分到家趨篝火。穉子驚起頭鬚鬢。道途辛苦未暇說。一尊且復驅嚴凝。

江北莊取米到作飯香甚有感

我昔從戎清渭側。散關嵯峨下臨賊。鐵衣上馬蹴堅冰。有時三日不火食。山蒸禽菜雜沙礫。黑黍黃床如土色。飛霜掠面寒壓指。一寸赤心惟報國。卽今歸臥稽山下。眼昏臂弱衰境逼。新秬炊飯香出飯。風殮澗飲何曾識。我豈農家志飽暖。閉戶惟思事耕織。征遼詔下尙可期。盾鼻猶堪試殘墨。

感興

築室眞須待伯夷。起墳仍合近要離。藥來賊境靈何用。米出胡奴死不炊。下石紛紛驚俗薄。絕絃寂寂嘆吾衰。一尊且作尋春計。又見東風浩蕩時。

新春

濛濛煙雨暗江干。新歲還勝故歲寒。酒壓濁清鳴社瓮。菜分紅綠簇春盤。良辰節物元如昨。病客情懷自  
鮮歡。卻羨村鄰機上女。隔離相喚祭蠶官。

新年

寄迹人間夢已長。新年脫帽始微霜。坐中使氣如秦俠。陌上行歌類楚狂。掃榻欲招貧與語。杜門聊以醉  
爲鄉。稽山剡曲雖堪樂。終憶祁連古戰場。

遊鏡湖

禹祠柳未黃。剡曲水已白。魴鱖來洋洋。鳧雁去拍拍。皇天亦大度。能容此狂客。挂席乘長風。未覺湖海迤。  
讀書五十年。自笑安所獲。昔人精微意。豈獨在簡冊。驥空萬馬羣。裘非一狐腋。超然登玉筍。及此煙月夕。  
玉筍峯在會稽山南。

初春晚晴

雪盡冰消斂積威。參差碧瓦帶斜暉。土膏漸釋人東作。天氣初和雁北歸。小閣金船嘗臘酒。華堂銀燭製  
春衣。關心雖有尋梅夢。冷蕊幽香事已非。自占歲多風雪屢廢觀梅之集。

偶讀山谷老境五十六翁之句作六十二翁吟

三百里湖水接天。六十二翁身刺船。飯足便休慵念祿。丹成不服怕登仙。胸中浩浩了無物。世上紛紛徒  
可憐。但有青錢沽白酒。猶堪醉倒落梅前。

自開歲略無三日晴戲作長句

新年暗隴覺春慳。變化相乘一瞬間。雨腳稍收初見日。風花忽起又遮山。風欲作則大霧充塞謂之風花  
欲行幽圃還成阻。未脫重裘自笑孱。桃李會開君勿恨。清尊且用破衰顏。

置酒梅花下作短歌

歲月不貸人。綠髮成華顛。此生幾兩屐。念之每悽然。我本塵外客。已絕區中緣。惟當及未死。勤醉梅花前。  
瘦影寫微月。疎枝橫夕煙。假蹇巖壑間。欲與松忘年。豈亦薄世俗。忽逐天風翩。吾詩不徒歌。持配湘娥弦。  
梅花已過聞東村。一樹盛開特往尋之慨然有感

春晚城南十里陂。亭亭獨立見奇姿。品流不落松竹後。懷抱惟應風月知。旋拂亂雲成小佇。重攜芳榼下  
幽期。佳人空谷從來事。莫恨桃花笑背時。

思蜀

老子饑堪笑。珍盤憶少城。流匙抄慧飯。加糝啜羹羹。相美傾筠籠。茶香出土鐺。西郊有舊隱。何日返柴荆。  
書憤

早歲那知世事艱。中原北望氣如山。樓船夜雪瓜洲渡。鐵馬秋風大散關。塞上長城空自許。鏡中衰鬢已  
先斑。出師一表真名世。千載誰堪伯仲間。

南窗擘黃柑獨酌有感

放翁潦倒鬢成絲。也把花前酒一卮。何限人間堪恨事。黃柑丹荔不同時。

久雨驟晴山園桃李爛熳海棠未甚開戲作

雨霽風和日漸長。小園尊酒答年光。直令桃李能言語。何似多情睡海棠。

臨安春雨初霽

世味年來薄似紗。誰令騎馬客京華。小樓一夜聽春雨。深巷明朝賣杏花。矮紙斜行閑作草。晴窗細乳戲分茶。素衣莫起風塵嘆。猶及清明可到家。

延和殿退朝口號

雨餘未肯放朝暾。穿仗恭承聖主恩。清蹕傳聲徐御殿。立庭中頃之。奏姓名。上乃自東廂出。御座紫衣引拜許龍門。徘徊漫結堯階戀。零落難招楚澤魂。歸去猶堪誇里巷。桐江新賜兩朱轡。

又

十年短櫂樂滄波。強著朝衫棄釣蓑。才薄何堪試馮翊。恩深猶許對延和。空牆煙柳遙迎馬。輦路春恨欲濺鞞。莫恨此身衰病去。同時朝士久無多。

簡楊庭秀

衰衰過白日悠悠。良自欺。未成千古事。易滿百年期。黃卷閑多味。紅塵老不宜。相逢又輕別。此恨定誰知。

飲張功父園戲題扇上

寒食清明數日中。西園春事又匆匆。梅花自避新桃李。不爲高樓一笛風。

夜泛西湖示桑甥世昌

嗟我客上都。忽已見暮春。騎馬出闔門。眯眼吹紅塵。西湖商賈區。山僧多市人。誰令汚泉石。只合加冠巾。黃冠更可憎。狀與屠沽鄰。勦勦酒肉氣。吾輩何由親。少須一闋散。境寂鷗自馴。舉手邀素月。移舟采青蘋。鐘從南山來。殷殷浮煙津。鶴髮隱者歟。長樂收釣緝。畏冷不竟夕。恨此老病身。明發復擾擾。吾詩其絕麟。

小舟過御園

聖主憂民罷露臺。春風別苑畫常開。盡除曼衍魚龍戲。不禁芻蕘雉兔來。水鳥避人橫翠靄。宮花經雨委蒼苔。殘年自喜身強健。又作清都夢一回。

又

水殿西頭起砌臺。綠楊鬧處杏花開。蕭韶本與人同樂。羽衛纔聞歲一來。鷓首波生涵藻荇。金鋪雨後上莓苔。遠臣侍宴應無日。目斷堯雲到晚回。

自真珠園泛舟至孤山

呼船經截鴨頭波。岸幘閑登瑪瑙坡。弦管未嫌驚鷺起。塵埃無奈汚花何。宦情不到漁蓑底。詩興偏於野寺多。明日一藤龍井去。誰知伴我醉行歌。

真珠園雨中作

清晨得小雨。潑閣意欣然。一掃羣兒迹。稍稍遊女船。煙波蘸山腳。溼翠到闌邊。坐誦空濛句。予懷玉局仙。

還家

富貴元須早致身。白頭豈復市朝人。數聲鶉鴉呼殘夢。一架醲醑送晚春。鼻幘出雲明客眼。澄江漲雨濯

京塵逢人枉道哦詩瘦。下語今年尙未親。

又

天津橋上醉騎驢。一錦囊詩一束書。作客況當多病後。還家已過暮春初。泥深村巷人誰顧。草滿園畦手自鉏。不爲衰遲思屏迹。此心元向利名疎。

初歸偶到近村戲書

雨過一村暗。風回百草香。刺船過古埭。倚杖立新塘。醉覺乾坤大。閑知日月長。暮歸詩滿卷。雖老尙能狂。

題跨湖橋下酒家

湖水綠於染。野花紅欲燃。春當三月半。狂勝十年前。小店開新酒。平橋上畫船。翩翩幸強健。不必愧華顛。

春遊至樊江戲示坐客

江頭蕭蕭春色暮。柳陰遊魚飽飛絮。茭羹箭筍美如玉。點鼓絲絃滑縈筍。銀鞍烏帽尋春客。朱戶青旗沽酒處。浮生細看纔幾時。一笑自應忘百慮。綠盃到手不肯盡。寶帶照地身何與。醅醱爛熳我欲狂。茗芋還家君勿遽。

暮春

顏頰都門白髮新。歸來一振客衣塵。啼鶯妒夢頻催曉。飛絮鍾情獨殿春。湖上風光猶淡沲。尊前懷抱頗清真。詩成絕恨知心少。自寫吳牋寄故人。

天華寺前遇縣令過避之入寺僧皆晝睡



墮絮飛花掠釣船。天華寺下賞春妍。縣多官府鳴騶過。僧少叢林避客眠。出網長魚猶餒餒。爭泥新燕欲翩翩。典衣剩買旗亭醉。已過旗亭六十年。

偶得海錯侑酒戲作

判無神藥斷清冥。放筴那憎海物腥。滿貯醇醪漬黃甲。密封小瓮餉紅丁。從來一飽忘南北。此去千鍾任醉醒。添雪更知憑茗椀。山童敲臼隔窗聽。

雨晴遊香山

雨打醱醺夜未拆。一晴柳岸先飄雪。我搖畫楫鏡湖中。碧水青天兩奇絕。長歌縹緲雲不動。橫笛清悲竹將裂。悠然起舞影零亂。卓爾四顧心激烈。好山可隱輕捨去。故人已貴長乖隔。肺渴生塵防酒興。眼暈成花作書厄。平生所期無一遂。獨有曠快相除折。夜歸燈火鬧湖邊。淡淡西南一鉤月。

春遊絕句

一百五日春郊行。三十六溪春水生。千秋觀裏逢急雨。射的峯前看晚晴。自秦望山而北合三十六溪水爲若耶溪。

夜行玉笥樵風之間宿龍瑞

野店谿橋供晚餉。吟邊醉裏弄春風。馬行缺月黃昏後。鍾下亂山空翠中。名宦不辭成寂寂。歲時惟恨去匆匆。頗聞禹穴遺書在。安得高人與細窮。

聞傅氏莊紫笑花開急棹小舟觀之

日長無奈清愁處。醉裏來尋紫笑香。漫道閑人無一事。逢春也似蜜蜂忙。

遊法雲寺觀彝老新葺小園

古寺朱扉傍水開。高僧笑語共徘徊。陰陰曲徑人稀到。一名花手自栽。竹筥引泉滋藥壺。風爐篝火試茶盃。此行自喜非生客。二百年間六世來。五世祖太保公捨園地建寺。

鹹齋十韻

九月十月屋瓦霜。家人共畏畦蔬黃。小甕大甕盛滌濯。青菘綠韭謹蓄藏。天氣初寒手訣妙。吳鹽正白山泉香。挾書旁觀穉子喜。洗刀竭作廚人忙。園丁無事臥曝日。棄葉狼藉堆空廊。泥爲緘封糠作火。守護不敢非時嘗。人生各自有貴賤。百花開時促高宴。劉伶病醒相如渴。長魚大肉何由薦。凍齋此際價千金。不數狐泉槐葉麵。磨挈使腹一欣然。作歌聊續冰壺傳。

長門怨

未央宮中花月夕。歌舞稱觴天咫尺。從來所恃獨君王。一日讒興誰爲直。呖只之天今萬里。空在長安一城裏。春風時送簫韶聲。獨掩羅巾淚如洗。淚如洗。今天不知此生再見應無期。不如南粵匈奴使。航海梯山有到時。

遣興

莫羨朝回帶萬釘。吾曹要可草堂靈。風來弱柳搖官綠。雲破奇峯湧帝青。聽盡啼鶯春欲去。驚回夢蝶醉初醒。從教俗眼憎疎放。行矣桐江醉客星。

晨坐道室有感

一鉢青精便有餘。世間萬事總成疎。手揮絃上烏棲曲。口誦巖間鳥跡書。丹氣初升勤沐浴。芝房未熟飽耘鋤。碧霄騰舉人人事。莫戀污渠與臭帑。

晝臥

忽忽見春盡。徂年那更還。香生帳裏霧。書積枕邊山。凌厲心猶壯。沈緜氣已孱。千秋有管葛。看鏡汗吾顏。

雨晴

久雨作我病。今朝身頓輕。花房避初旭。簾影弄新晴。漉酒綸巾折。聽琴拄杖橫。翛然又終日。未覺負平生。

宿石帆山下

卷地東風吹釣船。石帆重到又經年。放翁夜半酒初解。落月啣山聞杜鵑。

又

繫船禹廟醉如泥。投宿漁家月向低。溼翠撲人濃可掬。始知身在石帆西。

小雨泛鏡湖

吾州清絕冠三吳。天寫雲山萬幅圖。龍化廟梁飛白雨。鶴收仙箭下青蕪。菱歌嫋嫋遙相答。煙樹昏昏淡欲無。端辦一船多貯酒。敢辭送老向南湖。鏡湖一名南湖。

小憇村舍

藤梢維艇子。煙際覓人家。小婦簪新麥。羣童摘晚茶。溪雲易成雨。崖樹少開花。聊寄平生快。青鞋到若耶。

平水

水悍溪橋敗。沙頽野徑移。年華入詩卷。心事付筇枝。雨霽鶉鳩喜。春歸鷓鴣知。客庖消底物。麥飯薦菘絲。

初夏山中

又報東皇促駕歸。醉中闕賦送春詩。佛餅是處見紅藥。僧榻有時聞子規。野客款門聊倒屣。谿潭照影一軒眉。年光佳處惟初夏。兒女紛紛詎得知。

雨後

礎潤還成雨。雲收旋作晴。巖花分日發。林筍逐番生。筆硯行常具。軒窗晚更明。塵埃幸不到。那得廢詩情。

雲門溪上獨步

山路聯翩十日陰。晚晴剩喜得幽尋。殘紅猶有數枝在。漲綠真成一倍深。泉響瓊環鳴闔壑。月明珠壁散疎林。歸來寂寞鐘初動。羞向孤燈說壯心。

雲門過何山

漠漠稻滿陂。濛濛雨霑衣。林花落更新。礮鳥止復飛。我作山中行。十日未擬歸。思酒過野店。念茶叩僧扉。眠枕松下石。適意無訶譏。心廣體自舒。泰然不肉肥。念昔在官塗。萬事與願違。逢人無一欣。對食或累歎。低回三十年。竟不飽蕨薇。空將書五車。自誣腹十圍。餘日猶幾何。可復貪塵鞿。臙拾柏子香。閉門觀昨非。

明覺院

細路蟠青壁。層軒倚碧空。天香下塵世。僧梵起雲中。藤絡將頽石。松號不斷風。尤憐扶杖處。直下數飛鴻。

自雲門至上竈欲遊一二僧菴以雨不果

道遠晨炊米風和晝減衣。花殘孔官廟。苔滿葛仙磯。剩欲尋僧話。先判秉炬歸。山昏又成雨。心事固多違。

自上竈過陶山

宿雨初收見夕陽。縱橫流水入陂塘。蠶家忌客門門閉。茶戶供官處處忙。綠樹村邊停醉帽。紫藤架底倚胡牀。不因蕭散遺塵事。那覺人間白日長。

四月

四月江南暑尙微。虛堂初換葛衣時。嬾陪陌上雍容騎。且對窗間羸膊棊。糝徑落花猶片片。拂雲新竹已離離。年來病肺疎盃酌。應接風光賴有詩。

初夏閑居卽事

門巷蕭蕭日正長。方牀曲几傲羲皇。輕風忽起楊花鬧。清露初晞藥草香。對奕兩奩飛黑白。讎書千卷雜朱黃。穿簾語燕能從我。分爾湖邊一夏涼。

夜汲

酒渴起夜汲。月白天正青。銅瓶響寒泉。聞之心自醒。井邊雙梧桐。映月影離離。上有獨棲鶻。細爪握高枝。我欲畫團扇。良工不可求。三歎拊庭楯。浩然風露秋。

排悶

老去知心少。流塵鎖斷絃。尊空問字酒。囊罄作碑錢。掃葉供朝爨。和泥補漏船。胸中元浩浩。白眼望青天。

初夏夜賦

好景入新夏。幽人臥弊廬。廊腰得風遠。樹罅見星疎。門掩鴉棲後。鐘鳴月上初。青燈尙堪近。起了讀殘書。

新霽城南舟中夜興

身是江湖不繫船。雨餘隨處一翛然。浮雲盡斂出青嶂。孤月徐升行碧天。收網漁歌移別浦。隔城塔影落前川。明朝閑就平洲飲。巾履追涼又一年。

泊舟

蘸岸煙波穢畫船。幅巾蕭散餞流年。兩行楊柳吹晴雪。只著啼鶯未著蟬。

又

湖水無風鏡面平。巉巖倒影萬峯青。放翁眼界使疎豁。過盡蘆村泊蓼汀。

飲伯山家因留宿

小醉悠然不作醒。斷雲飛盡卻成晴。月生檐外見簾影。風下城頭聞角聲。岸幘莎庭便髮冷。酌泉桐井覺魂清。雞號忽報明星上。夢破虛皇白玉京。

夜泛蜻蜓浦

四顧水無際。三更月未生。偶成搖櫂去。不減御風行。煙浦漁歌斷。蘆洲鬼火明。還家人已睡。小立叩柴荆。

晨起看山飲酒

愛山入骨髓。嗜酒在膏肓。跌宕風煙外。歌呼麴蘖傍。虛窗天柱曉。書堂正見天柱峯。小瓮囊泉香。家醪今

年試用歧下藥泉。麴法垂老叨微祿。無□□□忙。

枕上偶賦

初夏暑猶薄。紗幮怯夜涼。孤螢入窗罅。斜月下牆陰。靜養觀書眼。窮悲濟世心。吾衰亦久矣。徂歲苦駸駸。

自詠

射的山前一老樵。此生何敢辱旌招。繆緣學道肱三折。不遇知音尾半焦。去蠹區區慙啄木。附高燁燁鄙凌霄。但令窮死心無愧也。勝鳴珂事早朝。

題齋壁

二十餘年此結茆。園公谿父日論交。風翻半浦亂荷背。雨放一林新笋梢。隔葉晚鶯啼谷口。唼花雛鴨聚塘坳。出門行罷還無事。借得丹經手自抄。

又

四顧茫茫水接天。幽居真個似乘船。月窗竹影連棲鵲。露井桐聲帶斷蟬。甘寢每憎茶作祟。清狂直以酒爲仙。形骸那得常羈束。六十年來又二年。

又

舴艋爲家一老翁。陽狂羞與俗人同。夢回菱曲漁歌裏。身寄蘋洲蓼浦中。斷簡塵埃存治道。高丘草棘閉英雄。旗亭村酒何勞醉。聊豁平生芥蒂胸。

又

稽山千載翠依然。著我山前一釣船。瓜蔓水平芳草岸。魚鱗雲襯夕陽天。出從父老觀秧馬。歸伴兒童放紙鳶。君看此翁閑適處。不應便謂世無仙。



# 陸放翁集

劍南詩稿

## 卷第十八

丙午五月大雨五日不止鏡湖渺然想見湖未廢時有感而賦

朝雨暮雨梅正黃。城南積潦入車箱。鏡湖無復鍼青秧。直浸山脚白茫茫。湖三百里漢訖唐。千載未嘗廢。陂防屹如長城限。胡羌嗇夫有秩走且僵。早有灌注水何傷。越民歲歲常豐穰。洗湖誰始謀不臧。使我婦子鑿糟糠。陵遷谷變亦何常。會有妙手開湖光。蒲魚自足被四方。煙艇滿目菱歌長。

游鄞

晚雨初收旋作晴。買舟訪舊海邊城。高帆斜挂夕陽色。急艫不聞人語聲。掠水翻翻沙鷺過。供廚片片雪鱗明。山川不與人俱老。更幾東來了此生。

泊上虞縣

鄞江久不到。乘興偶東遊。漲水崩沙岸。歸雲抱縣樓。吟餘聲混混。梳罷髮颼颼。喜見時平象。新絲入市稠。

發丈亭一作長亭

姚江乘潮潮始生。長亭却趁落潮行。參差鄰舫一時發。臥聽滿江柔艫聲。

又

玄雲垂天暗如漆。鱗聲嘔軋知船行。南風忽起卷雲去。江月已作金盆傾。

明州

豐年滿路笑歌聲。蠶麥俱收穀價平。村步有船銜尾泊。江橋無柱架空橫。海東估客初登岸。雲北山僧遠入城。仗錫平老出山來。迎予風物可人吾欲住。擔頭蕪菜正堪烹。

水亭獨酌十二韻

清風掃鬱蒸。爽氣生戶牖。客中淡無事。翛然一盃酒。書生拙自料。事業期不朽。少年忝朝跡。蹭蹬今白首。歷觀千載事。和戎固嘗有。定襄伍原間。乃可畫地守。神州在何許。東巡已去久。煌煌一統業。謨訓其可負。太祖嘗書大宋一統字。以賜王溥。荆楚多劍客。宜潤富弩手。孰能用其長。坐使老農畝。講武幸長楊。勞軍臨細柳。中興望聖時。未死得見否。

坐客有談狄魚眼眶之美者感歎而作

黃雀頭顱羞五鼎。狄魚眼眶參雋永。兩螯何臯蟹喪軀。一鬮可憐牛斷領。霜刀斫脰幾許痛。公子方誇醉魂醒。物生怖死與我均。碓儿流丹只俄頃。哀哉堂堂七尺身。正坐舌端成業境。豪華只可誇僕妾。報應那知類形影。世間擾擾何時了。一念超然差若穎。不妨瓦鉢飽晚菘。更汲山泉試春茗。

衰病不復能劇飲而多不見察戲作此詩

平生不持面看人。寧作五湖雲水身。忍窮閉門豈自苦。是中有味敵八珍。酒盃澀澀鼓吹作。我自悲吒人自樂。更闌坐睡不得去。如鷹在韉虎遭縛。丈夫歡樂自有時。遇酒先怯非予衰。萬騎擊胡青海岸。此時意

氣令君看。

或以予辭酒爲過復作長句

陸生酒戶如蠡迤。痛酒豈能堪大白。正緣一快敗萬事。往往吐茵仍墮幘。爾來人情甚不美。似欲殺我以麴蘖。滿傾不許計性命。傍晚更復騰頰舌。醉時狂呼不復覺。醒後追思空自責。卽今願與交舊約。三爵甫過當亟徹。解衣摩腹午窗明。茶磴無聲看霏雪。

行路難

平生結交無十人。與君契合懷抱真。春遊有時馬忘秣。夜話不覺雞報晨。極知貧賤別離苦。明日有懷就誰語。人無根柢似浮萍。未死相逢在何許。道邊日斜泣相持。旗亭取醉不須辭。君貴堂廚萬錢食。我勸一盃應不得。

千峯樹宴坐

蒼寒千疊擁官居。吏退憑高樂有餘。盡日煙雲窮變化。入秋草木漸凋疎。朱紱靜按新傳譜。黃卷閑披累譯書。聊與邦人共無事。吾僚不用笑迂疎。

喜雨

勢掠郊原飛急雪。聲搖窗戶過奔雷。坐知多稼連雲熟。不獨新涼傍枕來。

又

浙瀝蒼聲枕上聞。攬衣起坐對爐熏。萬家歌舞豐年樂。未費烏龍一線雲。

五鼓

樓堞琴琴鼓。簾櫳煜煜燈。浪名隨牒吏。實似打包僧。衰病元難強。疎慵每自憎。誰知戍邊日。秋野正呼鷹。

官居戲詠

萬里飄然似斷蓬。桐廬江上又秋風。判餘牘尾棲鴉溼。衙退庭中立雁空。燈火市樓知酒賤。歌呼村路覺年豐。誰言病守無歡意。也與他人一笑同。

又

說著功名卽自羞。暮年世味轉悠悠。一庭落葉楸梧老。萬里悲風鼓角秋。懷綬不爲明日計。登樓且散異鄉愁。漁舟大似非凡子。能揀溪山勝處留。是日書所見。

又

城頭閑倚一枝藤。病起清羸不自勝。衙鼓有期催晚坐。條鈴無賴喚晨興。愛書習氣嗟猶在。寡過工夫愧未能。寂寞已無臺省夢。諸公袞袞自飛騰。

倦眼

看書澀似上羊腸。得睡甘如飲蜜房。起坐藤床搔短髮。數聲畫角報斜陽。

拜旦表

一封馳奏效嵩呼。清蹕何時返故都。只道建炎巡狩禮。誰知故事自祥符。

早自烏龍廟歸

殘漏聲中聽曳鈴。翩翩吹帽出郊坰。雨餘澗落雙虹白。雲合山餘一髮青。鐵馬蹴冰悲昨夢。朱顏辭鏡感  
頽齡。歸來獨對空齋冷。鳥迹蒼苔自滿庭。

上丁

燎火明中庭。老槐泣殘雨。白頭奉祀事。恐懼劇仰俯。三終樂在懸。再拜肉升俎。誰言千載後。恍若到鄒魯。  
吾國雖褊小。大社胙弗土。如何儼章綬。日夜臨筮楚。藏書如丘山。及物無一羽。吾其可憐哉。去去老農圃。

新秋

打窗落葉報秋期。病叟頽然兩鬢絲。縱酒已無年少夢。讀書仍負夜涼時。問囚損氣嗟誰念。學道刳心恐  
已遲。買鶴清溪歸計足。寄聲先遣故人知。

殘年

殘年迫鍾漏。病骨怯風霜。投幘早當去。強顏徒自傷。文符紛似雨。訟訴進如牆。笑殺滄浪客。微官有許忙。  
休日行郡圃

南山如黛照朱扉。地接官居到亦稀。寒蝶徘徊掠衰草。孤花閃淡弄斜暉。荒城歌舞難娛客。休日文書且  
解圍。猶勝去年窮巷底。臥聞砧杵念秋衣。

登北榭

遠城山作翠濤傾。底事文書日有程。無溷我爲揮吏散。獨登樓去看雲生。香浮鼻觀煎茶熟。喜動眉間煉  
句成。莫笑衰翁淡生活。它年猶得配玄英。方千有千峯樹詩。

小酌

簾外桐疎見露蟬。一壺醉嫩寒天。團臍磊落吳江蟹。縮項輪囷漢水鯪。此兩物近頗登盤。投老宦遊真漫爾。平生懷抱固超然。文書縛急何由耐。會向長安市上眠。

焚香作墨瀋決訟吏皆退立一丈外戲作此詩

客鬢新添幾縷絲。山城且付一官癡。空濛碧靄籠香岫。近得一石穴。達於背。出香如雲。霏霽玄雲起墨池。判牒不妨閑作草。坐衙聊得細哦詩。吏民莫怪秋來健。漸近南山射虎時。

齋中閑詠

風號萬物作濤聲。雲截千峯似几平。多病支離仍老境。暮秋蕭瑟更山城。燕觴久罷塵痕積。庭訟全稀藓暈生。莫道齋中日無事。焚香掃地又詩成。

秋夜聞雨

香斷燈昏小幌深。不堪病裏值秋霖。驚回萬里關河夢。滴碎孤臣犬馬心。清似釣船聞急瀨。悲於靜院聽繁砧。玉峯老去情懷惡。穩受千莖雪鬢侵。韓致光詩云。不知短髮能多少。一滴秋霖白一莖。

自詠

鈍似窗間十月蠅。淡如世外一孤僧。心勞撫字雖亡補。筆判虛空却麗能。厭見文書銜客袖。但思蔬水曲吾肱。何時却宿雲門寺。靜聽霜鐘對佛燈。

秋懷

少時本願守墳墓。讀書射獵畢此生。斷蓬遇風不自覺。偶入戎幙從西征。朝看十萬閱武罷。暮馳三百巡邊行。馬蹶度隴電聲急。士甲照日波光明。興懷徒寄廣武歎。薄福不挂雲臺名。頰鬚白盡愈落莫。始讀法律親笞榜。訟氓滿庭鬧如市。吏牘圍坐高于城。未嫌樵唱作野哭。最怕甜酒傾稀餚。平生養氣頗自許。雖老尚可吞司并。何時擁馬橫戈去。聊爲君王護北平。

不寐

閏年九月已重裘。說著功名卽自羞。病骨不禁霜氣峭。高風正送雁聲遒。半盃濁酒如欺老。一點青燈欲訴愁。不寐裁詩真習氣。輸它睡足向黃州。

醉中戲作

當年買酒醉新豐。豪士相期意氣中。插羽軍書立談辦。如山鐵騎一麾空。玉關久付清宵夢。笠澤今成白髮翁。堪笑燈前如意舞。尙將老健壓諸公。

頻夜夢至南鄭小益之間慨然感懷

身似菴居老病僧。罷參不復繫行縈。夢中忽在三泉驛。庭樹鳴梟鬼弄燈。

又

客枕夢遊何處所。梁州西北上危臺。雪雲不隔平安火。一點遙從駱谷來。

夜雨枕上

秋雨不肯晴。秋夜不肯明。寸心集百憂。厭此點滴聲。歲月不貸人。老病忽至此。丈夫本憂世。兒女乃畏死。

雨夜

蒼雲晝埋山。白雨夜溢渠。虛堂閃風燈。獨處誰與娛。吾生過六十。鬢髮日夜疎。出當飲美酒。歸當讀奇書。可憐兩不遂。兀兀如枯株。明復對胥吏。孤憤何由摅。

安流亭俟客不至獨坐成詠

憶昔西征鬢未霜。拾遺陳迹吊微茫。蜀江春水千帆落。禹廟空山百草香。馬影斜陽經劍閣。鶻聲清曉下瞿唐。酒徒雲散無消息。水榭憑欄淚數行。

秋興

楸槐雨霽。靈鳥雁水拍拍。曉行城南路。落葉滿阡陌。新霜上衰鬢。吾死亦已迫。那將有限身。常作未歸客。長吟側紗帽。萬里一秋色。世俗不足論。天豈無皁白。

又

朝先鳴雞興。夕殿棲鷗還。符檄積几案。寢飯於其間。榜笞督租賦。涉筆駢我顏。忽忽過白日。胡能慰惝髒。葉脫橫林疎。鬢髻溪南山。豈無一盃酒。吾事何時閑。

燕堂獨坐意象殊憤憤起登子城作此詩

睡魔困衰翁。白日坐兀兀。忽然振衣起。目瞭尙如鶻。憑高望中原。佳氣未消歇。逆賊稽大刑。痛憤深至骨。新霜下昌陵。草有胡馬齧。羽林百萬士。何日聞北伐。賤臣官有守。不敢叫行闕。夢中涉黃河。太行高礪砢。天河未洗兵。封豕食上國。坐令河洛間。百郡暗荆棘。夷吾非王佐。尙足救左衽。中原消息斷。吾輩何安寢。



世俗苦齷齪，誰與共此功。安知無奇士，悲歌燕市中。

秋雨北榭作

秋風吹雨到江濱，小閣疎簾曉色分。津吏報增三尺水，山僧歸入萬重雲。飄零露井無桐葉，斷續煙汀有雁羣。了却文書早尋睡，檐聲偏愛枕間聞。

次韻王給事見寄

大手方司一世文，癯儒何敢望餘塵。誰知天上黃扉貴，肯記江邊白髮新。末路愈窮詩有祟，舊書渾忘筆無神。床頭周易尊中酒，猶賴渠儂不負人。

病中夜半

蕭蕭欲脫猶吟葉，耿耿微明未滅燈。夜半不眠閑倚壁，使君清似北山僧。

卽事

組繡紛紛銜女工，詩家於此欲途窮。語君白日飛昇法，正在焚香聽雨中。

歲晚懷故人

衰髯白盡無添處，病骨癯然欲折時。客抱琴來聊淪茗，吏封印去又哦詩。山橫城上勢如壓，角舳樓頭聲正悲。零落斷鴻書不到，歲殘何以慰相思。

馮耆行

馮耆山頭暮烟紫，牛羊聲斷行人止。平沙風急捲寒蓬，天似穹廬月如水。大胡太息小胡悲，投鞍欲眠且

復起。漢家詔用李輕車。萬丈戰雲來壓壘。

又

焉者山下春雪晴。莽莽惟有蒺藜生。射麋食肉飲其血。五穀自古惟聞名。樵蘇切莫近亭障。將軍臥護真長城。十年牛馬向南睡。知是中原今太平。

丙午初冬得心腹痛疾大下而愈羸耗不支方在告臥燕堂東偏聞民間前一夕被盜者慨然有感

惜惜四壁空。宛宛一室奧。雨聲靜更聞。雨氣深不到。下簾設紙屏。篝火支藥竈。勿言此幽陋。足以養衰耗。頗聞閭里間。比夕多狗盜。游徼無乃闕。鰥寡將孰告。家貧未決去。祿食常念報。臥疴疇敢安。起立擲吾帽。因王給事回使奉寄

病告中遇風雪作長歌排悶

風雪橫街不能出。閉戶垂帷養衰疾。黃昏臥聽打窗聲。聊挽清寒入詩律。公孫布被久有味。子敬青氈煖無匹。石鼎閑烹似爪茶。霜皴旋破如拳栗。蹲鴟足火微點鹽。蠶粟熬湯旋添蜜。龍蛇鱗鱗寒笥束。子母累累丹柿實。玉狸試說涎已墮。石芥纔嘗酒如失。天公付汝亦已厚。飽食長謠抱雙膝。丈夫豈爲口腹計。壯志常恐無時畢。伐胡疏奏端許前。腰領敢辭膏斧鑿。

冬夜戲作

賤貧百年愁。老大萬事倦。起家來牧民。竊語笑丞掾。拘攣拙徵科。儉陋省遊宴。不思返江湖。乃爾辱畿甸。斯言中吾病。有靦在其面。行常自劾去。暫寓等郵傳。十月夜正長。歲事到冰霰。膏油幸可具。更盡書一卷。

夜坐

曲几蒲團夜過分。頽然半脫鹿皮巾。驚鴻避弋鳴煙渚。斷角凌風上雪雲。仕宦愈知林下貴。窮愁方策酒中勛。扁舟東去何時辦。昔向金丹幸有聞。

又

山城意象自蕭然。況是高齋作雪天。漸暗玉蟲寒有燼。欲殘金鴨煖無煙。衰容病後如添歲。遙夜冬來抵過年。安得龍縮三丈幅。爲君試寫白雲篇。

遣興

圖書雞犬共扁舟。又續人間汗漫遊。醉眼本輕千古事。釣竿新賜一灘秋。慣看浮世成陵谷。莫露神光上斗牛。老病豈堪常作客。夢尋歸路傍西疇。

登紫翠樓

水落溪聲壯。天寒山色奇。殘雲宿虛閣。馴鷺下清池。簿領消豪氣。功名負聖時。憑高不勝歎。神武迫歸期。丙午十月十三夜夢過一大冢傍人爲余言此荆軻墓也。按地志荆軻墓蓋在關中。感歎賦詩。采藥遊名山。物外富眞賞。秋關策蹇驢。雪峽蕩孤漿。還鄉忽十載。高興寄遐想。夢行河潼間。初日照仙掌。

坡陀荆棘家。狐兔伏秦莽。悲歌易水寒。千古見精爽。國讐久不復。驚覺泚吾穎。何時真過茲。薄醪神所饗。病起小飲。

病起新霜滿鬢蓬。憑高一笑與誰同。酒如淥靜春江水。人有鴻荒太古風。野寺鐘來夕陽外。寒山空插亂雲中。一官正爾妨人樂。只合滄浪狎釣翁。

冬夜讀書

莫笑燈繁二尺餘。老來舊學要耘鉏。寒生點滴三更雨。喜動縱橫萬卷書。本著儒冠那免此。可因吏牘頓拋渠。善和舊賜今猶在。剩采芸香辟蠹魚。

夜坐觀小兒作擬毛詩欣然有賦

北風城頭鼓鞀鞀。徂歲崢嶸正多感。老夫假寐角巾低。穉子高吟兩鬢髧。衰遲笑我藏袖手。狂率憐渠滿軀瞻。旋炊粉餠裹青箬。新爇錫枝綴紅糝。未言問事漸瀾翻。且賞揮毫能果敢。嗟予疇昔如汝年。萬卷縱橫恣窺覽。卽今見汝尙懂欣。此癖真同嗜昌歎。夜闌我困兒亦歸。獨與狸奴分坐毯。

郡齋偶書

白首奉魚書。蕭然一事無。吏閑晨已散。人醉暮相扶。卷野收禾黍。連江下舳舻。山城君勿謂。東北是皇都。又

翠嶺當城起。清江擘硤流。軻峨商客輻。嘈噴酒家樓。豐歲人元樂。殘年我獨愁。秦吳環萬里。感慨故貂裘。又

江墮清笳月，霜嚴畫戟門。灘聲寒更壯，山氣旦常昏。搖落悲徂歲，羈遊憶故園。無勞空竊食，何以報君恩。  
燈下閱吏牘有感

老眼今年太負渠，義經魯史頓成疎。一爲柱後惠文吏，厭讀司空城旦書。正苦雁行須束縛，不言鼠輩合誅鉏。致君堯舜元無術，黃卷何辭飽蠹魚。

過放生池追懷江公民表諫議池蓋公所創也

釣臺先生諫大夫，建中初元起江湖。是非非玉座側，身可死徒志不渝。烟汀月島二十載，白髮短髯藏菰蒲。晚蒙湔洗得一障，上奏猶自稱龕疎。公廣濟到任表云：不能軟熟，終是龕疎，其不撓如此。此公造處直奇特，竺乾先生分半席。九州看如掌中果，天不遺爲吁可惜。徑歸斂手築陂池，也活龜魚論萬億。肯冷桐山喚不聞，停車悵望春波碧。

園中絕句

梅花重壓帽簷偏，曳杖行歌意欲仙。後五百年君記取，斷無人似放翁顛。  
又

溪北溪南飛白鷗，夕陽明處見漁舟。憑誰爲剪機中素，畫取天涯一片秋。

戲作浙西諸郡惟嚴無職租

歸臥元知作餓夫，宦遊依舊是癯儒。免教妻子爭秔秫，秋稼連雲一稜無。

縱筆

閑經月下白蘋洲。半脫風前紫綺裘。曾值東風謁鸞駕。却因南渡看龍舟。年光已付曹騰醉。天宇誰從汗漫遊。莫怪又成橫笛去。故人期我玉華樓。玉華樓在青城山丈人觀。

又

東都宮闕鬱嵯峨。忍聽胡兒敕勒歌。雲隔江淮翔翠鳳。露霑荆棘沒銅駝。丹心自笑依然在。白髮將如老去何。安得鐵衣三萬騎。爲君王取舊山河。

又

行省當年駐隴頭。腐儒隨牒亦西遊。千艘衝雪魚關曉。萬竈連雲駱谷秋。天道難知胡更熾。神州未復士堪羞。會須瀝血書封事。請報天家九世讎。

病中偶得名酒小醉作此篇是夕極寒

一壺花露拆黃滕。醉夢酣酣喚不醒。屏煖半銷香鴨火。窗寒初結研蟾冰。詩囊羞澀悲才盡。藥裏縱橫覺病增。早掛朝衣歸去是。貴人誰記接茵憑。

晨讀道書

家貧悔嗜酒。年邁思學道。雖云善補過。見事恨不早。儒生守章句。忽忽遂將老。巖間得奇書。足以慰華皓。丹液下注臍。黃雲上通腦。海山行常歸。白髮何足掃。

後園獨步有懷張季長正字

斯世元知少賞音。道存何恨死山林。半生去國風埃面。一片憂時鐵石心。閑看斷雲成小立。偶穿修竹得

幽尋。故人已到梁州未。尺紙東來抵萬金。

老將效唐人體

寶劍夜長鳴。金痍老未平。指弓誇野戰。抵掌說番情。已矣黑山戍。悵然青史名。和親不用武。教子作儒生。

書憤

清汴逶迤貫舊京。宮牆春草幾番生。剖心莫寫孤臣憤。抉眼終看此虜平。天地固將容小醜。犬羊自慣瀆齊盟。蓬窗老抱橫行略。未敢隨人說弭兵。

晨起

衣潤熏籠煖。燈殘漏箭長。鳴雞帶窗月。立馬怯庭霜。病骨陰晴覺。官身早夜忙。火城那復夢。愁絕軟塵香。

雪

但苦奇寒惱病翁。豈知上瑞報年豐。一庭不掃待新月。萬壑盡平號斷鴻。繭紙欲書先研凍。羽觴纔舉已尊空。若耶溪上梅千樹。欠我今年繫短篷。

歲晚書懷

早見龍翔上太清。紹興末游官玉牒所。卽今孤宦老山城。靈丹不解換凡骨。薄命枉教生太平。積雪樓臺增壯觀。近春鳥雀有和聲。如山吏牘何時了。惆悵西窗晚照明。

晨過天慶

羅月挂團壁。松風號急灘。孤燈經院曉。殘雪醮壇寒。賸欲閑扶杖。何妨醉墮冠。詩成興不盡。萬里跨青鸞。

冬夜

翩翩殘曆不滿紙。坎坎壘鼓無停擿。香殘未消古鼎火。燈暗尚結寒缸花。長安故人日已遠。錦江小築天之涯。拘攣動覺更有責。幽獨更似僧無家。臥聞沙雁叫空闊。想見雪谷森谿。飭起提一筆。掃疋紙。入卷颯颯奔龍蛇。

比得朋舊書多索近詩戲作長句

庭下訟訴如堵牆。案上文書海茫茫。酒酸飭冷不得嘗。椎牀大叫欲發狂。故人書來索文章。豈知吏責終歲忙。寒龜但欲事縮臄。病驥望重騰驤。日曛稍退鳧鷖行。小山叢竹堂東廂。呼兒深炷銅爐香。楚騷爲我賦不祥。

休日感興

宦海風波實飽經。久將人世寄郵亭。家無釵澤窮馮衍。身著襦裙老管寧。藥圃按行新蔓綠。書樓徙倚暮山青。偶然得句悲誰屬。零落交朋比曉星。

病中偶書

燈火青熒古屋深。挂冠境界已駸駸。竹枝影瘦橫殘月。藥杵聲寒續暮砧。病覺死生真大事。老知道德愧初心。經龕禪版殊常勉。嬾學莎蛩事苦吟。

寒夜

脫葉爭辭木。寒雲巧護霜。羈遊少驪樂。短景極匆忙。吟苦蟲催織。鳴哀雁斷行。幽懷誰晤語。惆悵此燈光。



雪中獨酌

金尊玉鑿有何好。不堪生世匆匆老。朱顏忽已謝晨鏡。白骨行看閉秋草。駭浪嵯峨風作之。蛟龍血人以爲嬉。畏塗寄命三十載。賴有痛飲紓吾悲。莫驚醉眼炯如電。假鉞猶堪行督戰。指麾突騎取遼陽。雪灑轅門夜傳箭。

送客

長亭柳漸柔。送客常閑遊。江近聞津鼓。雲開見戍樓。簿書來袞袞。歲月去悠悠。閉眼尋歸路。春蕪滿故疇。

新晴

宿雨解殘雪。新春侵故年。和風拆冰鱗。淡日弄窗妍。心事綠尊裏。歲華烏帽邊。今朝我病減。隨處一欣然。

出城

翩飜烏帽出林坳。掠面風微酒半醒。戍火難尋玉關夢。衣塵空愧草堂靈。天晴山雪明城郭。水漲江流近驛亭。客鬢不如堤上柳。數枝春動又青青。

立春日送客郊外

短鬢那禁歲月催。勝邊花底又春回。雪消漸暖青鴛日。冰解初橫玉鑑梅。江驛軒窗臨古道。市樓絃管賣新醅。自憐病守無歡意。一笑常因送客來。

大雪自夜至旦欲午始晴

薄暮雪雲低。清宵氣慘悽。方聽打窗急。已報與階齊。疎箔穿飛蝶。空庭聚戲猊。新晴思訪客。愁絕滿城泥。

雪夜有感

狂膽輪囷欲滿軀。一麾誰憫滯江湖。青衫曾奏三千牘。白首猶思丈二笏。龍虎翔空瞻王氣。犬羊度漠避天誅。何時冒雪趨行殿。香案前頭進陣圖。

雪中忽起從戎之興戲作

狐裘臥載錦駝車。酒醒冰髭結亂珠。三尺馬鞭裝白玉。雪中畫字草軍書。

又

鐵馬渡河風破肉。雲梯攻壘雪平壕。獸奔鳥散何勞逐。直斬單于覺寶刀。

又

十萬貔貅出羽林。橫空殺氣結層陰。桑乾沙土初飛雪。未到幽州一丈深。

又

羣胡束手仗天亡。棄甲縱橫滿戰場。雪上急追奔馬迹。官軍夜半入遼陽。

十二月二十七日祭風師歸道中作

虎豹生憎上九關。諸公袞袞遂難攀。面顏已老塵埃裏。精力虛捐簿領間。束帶敢言趨玉陛。橫戈猶憶戍天山。新春自笑摧頹甚。鼓吹東風拜胙還。

春晴

南陌爭牛事已非。綵山又近放燈期。風和已染柳千縷。山冷未開茶一旗。酒病況當人別後。春光偏在雪

晴時道傍笑我清狂在。馬上看山細詠詩。

丁未正月春色已粲然。露坐高風堂北觀種花。

苦寒不解歲崢嶸。病守兀坐憂疲氓。天風誰遣撼斗柄。便覺春色來江城。北山賽廟見殘雪。東津送客聞新鶯。衣裘漸減體殊健。簾幙乍捲眼爲明。今朝天氣更佳絕。淡日微漏雲徐行。我移胡床坐庭下。幅巾半脫筇枝橫。散關旌旗掃昨夢。少城絲竹真前生。數株桃杏亦漫種。未去與汝聊逢迎。

燕堂春夜

南樓統統下疎更。一點紗籠滿院明。映月疎梅入簾影。讀書榭子隔窗聲。呻吟藥裏身寧久。汛掃胡塵意未平。草檄北征今二紀。山城仍是老書生。游嘗爲丞相陳魯公史魏公樞相張魏公草中原及四夏書檄於都堂。

早春池上作

疎嬾元當與世辭。殘年況近乞身期。一官空作讀書祟。五斗不供沽酒資。冰拆野塘初灑灑。雪殘芳草已離離。物華似有平生舊。不待招呼盡入詩。

感興

文章天所祕。賦予均功名。吾嘗考在昔。頗見造物情。離堆太史公。青蓮老先生。悲鳴伏櫪驥。蹭蹬失水鯨。飽以五車讀。勞以萬里行。險艱外備嘗。憤鬱中不平。山川與風俗。雜錯而交并。邦家志忠孝。人鬼參幽明。感慨發奇節。涵養出正聲。故其所述作。浩浩河流傾。豈惟配詩書。自足齊漢經。我衰敢議此。長歌涕縱橫。

東齋偶書

華髮蕭蕭不滿簪，強扶衰病著朝衫。寒廳靜似阿蘭若，佳客少於優鉢曇。詩酒放懷窮亦樂，文移肆罵老難堪。棄官若遂飄然計，不死揚州死劍南。顧況詩云：人生只合揚州死，而余嘗有歸蜀之意。

丁未上元月色達曉如晝予齋居屬貳車領客

此夕幾年無此晴，碧天萬里月徐行。官壚賣酒似千斛，市里行歌徹五更。潼酪獨烹僧鉢美，瑠璃閑照佛龕明。頽然坐睡君無笑，寶馬香車事隔生。

自郊外歸北望譙樓

天上何年墮翠蚪，屈蟠爪尾護吾州。重門雨細旌旗溼，危堞風高鼓角遒。漠漠川雲昏佛塔，涓涓野水入農疇。曠懷不耐微官縛，擬脫朝衫換釣舟。

馬上作

平橋小陌雨初收，淡日穿雲翠靄浮。楊柳不遮春色斷，一枝紅杏出牆頭。

還舍

賸欲銜盃樂太平，新愁還續舊愁生。出門始覺春來早，處處簾櫳笑語聲。

杏花

江城開歲風雨頻，閉閣不出俄經旬。忽逢國豔帶卯酒，坐覺天地無餘春。芳敷正當晨露重，盛麗欲擅年華新。數株欹斜傍山驛，一簇深淺臨煙津。徘徊跋馬不忍去，只恐飄墮隨車塵。念當載酒醉花下，破曉啼

鴛先喚人。

兩京

兩京煙柳厭胡塵。又見淳熙十四春。薄命遭回猶許國。孤忠懇款欲忘身。蘇君落魄黃金盡。褚令悲傷白髮新。曾向延和隨仗入。至今殿檻夢嶙峋。

贈表弟江參議

襄州參議真豪傑。熟視華途嬾著鞭。奪得鸞篋花裏活。皎如玉樹酒中仙。才高狗監無人薦。句好雞林有客傳。江弟今居四明。老去眼邊親舊少。津亭少爲繫歸船。

讀書

束髮論交一世豪。暮年顛賴因蓬蒿。文辭博士書驢券。職事參軍判馬曹。病裏猶須看周易。醉中亦復讀離騷。若爲可奈功名念。試覓并州快剪刀。

夜登千峯樹

夷甫諸人骨作塵。至今黃屋尙東巡。度兵大峴非無策。收泣新亭要有人。薄醜不澆胸壘塊。壯圖空負膽輪囷。危樓插斗山銜月。徙倚長歌一愴神。

旬日公事頗簡喜而有賦

社近樓臺晝已長。豐年頗減簿書忙。雨催樹綠吹簫陌。日射塵紅擊鞠場。農事漸興初浸種。吏衙早退獨焚香。晚來別有歡然處。檢教兒書又一箱。杜牧之寄小姪阿宜詩云。一日讀十紙。一月讀一箱。

聞鼓角感懷

鼓坎坎。角鳴鳴。四鼓欲盡五鼓初。老眼不寐如鰈魚。撫枕起坐涕泗濡。平生空讀萬卷書。白首不識承明廬。時多通材臣腐儒。妄懷孤忠策則疎。欲剖丹心奏公車。論罪萬死尚有餘。雷霆願復寬須臾。許臣指陳輿地圖。億萬遺民望來蘇。藝祖有命行天誅。皇明如日詎敢誣。拜手乞賜丈二笏。中原煙塵一掃除。龍舟泝汴還東都。

社日小飲

催花初過社。公雨對酒喜烹溪。友魚儘道亂山窮絕處。年華未覺異吾廬。

又

社雨霏霏溼杏花。農家分喜到州家。蒼鵝戲處塘初滿。黃犢歸時日欲斜。

昔日

昔日從戎日。身由許國輕。陣如新月偃。箭作餓鷗鳴。堅壁臨關守。連營並渭耕。至今悲義士。書帛報番情。予在興元日。長安將吏以申狀至。宣撫司皆蠟彈。方四五寸。絹中動息必具報。

新晴

雨斷歸雲急。沙乾步履輕。風花嬌作態。野水細無聲。社酒家家醉。春蕪處處耕。今朝公事少。一笑賦新晴。

倚欄

閑岸紗巾小倚欄。吳中三月尚春寒。蜂脾蜜滿花初過。燕觜泥新雨未乾。老厭簿書思屏迹。病逢節物強

追歡一樽又動流年感。城上斜陽畫角殘。

寄徑山印禪師

市朝聲利戰方酣。眼看紛紛每不堪。但有客誇車九九。了無人問衆三三。會當身返東西蜀。要與公分上下菴。趙州有上菴菴主。下菴菴主語春枕。悠然夢何許。兩枝筇杖喚魚潭。喚魚潭在眉山中巖。客至撫掌魚輒羣出。

園中歸戲作

醉裏來尋澗上花。已飄殘雪散餘霞。蠹生也解欺人老。風伯無端妬物華。不恨童心伴蜂蝶。但愁病眼厭風沙。歸來隱几東窗下。一卷黃庭送日斜。

春曉東郊送客

雨餘氣清潤。迨我送客時。翻翻車蓋風。五里城東陂。初旭斂花房。晨露流桐枝。南山卷溼翠。更覺光景奇。澄潭集魚艇。村路亞酒旗。欲歸且復留。造物成吾詩。

暮春歎

春深桃李爭時節。千團紅雲萬堆雪。東風一夜吹欲空。曲徑平池爛如纈。城門獵獵雙青旗。羲和促轡西南馳。中原未有澄清日。志士虛捐少壯時。

曉雨

平明小雨壓香塵。透舍扶疎綠漸勻。睡過花時慵著句。老來春事不關身。

又

東風吹雨送殘春。冉冉年光次第新。君看枝頭如許綠。爭教桃李不成塵。

登千峯樹

飛觀危欄縹緲中。聊將醉眼送歸鴻。一生未售屠龍技。萬里猶思汗馬功。王衍諸人寧足責。姜維豎子自應窮。他年弔古憑高處。想見清伊照碧嵩。

晚春園中作

少逢春歸未解悲。千篇曾賦傷春詩。可堪霜點鬢鬢後。更值綠暗園林時。楊花輕墮簷外影。杏子重壓闌邊枝。毬場立馬漏聲靜。綺窗語燕簷陰移。向來春事渺何許。長空鳥跡何由追。鞦韆未拆已寥寞。日暮東風吹綵旗。

北窗

小雨霏霏旋作晴。北窗清潤綠陰成。却緣政拙文書少。臥聽簾櫳燕子聲。

浮生

浮生過六十。百念已頽然。獨有耽書癖。猶同總角年。橫陳糲飯側。朗誦短檠前。不用嘲癡絕。兒曹尚可傳。

小壘

小壘荒寒外。高齋寂寞中。貧妨挂冠快。病減讀書功。橋斷春江白。雲穿夕照紅。悠然扶杖處。歲月歎恩慙。

大闕後一日作假



小院鈎簾掃落花。公餘蕭散似山家。下巖紫壁臨章草。正焙蒼龍試貢茶。塞上遠遊心尙壯。車中深閉髮先華。老來日月真堪惜。愁聽高城咽暮笳。

自嘲

貪祿忘歸祇自羞。一窗且復送悠悠。鏡明不爲人藏老。酒薄難供客散愁。正得虛名真畫餅。元非大器愧函牛。年來事業知君否。高束詩書學問囚。

曉出東城

聽徹清笳聽曉鐘。據鞍漏鼓尙蒙蒙。西樓落日徑三尺。北嶺亂雲生半峯。蒼蹬幽尋過古寺。綠疇小駐勞春農。煙村已遠猶回首。恐有鷓鴣與伏龍。

初夏遇休日園中閑賦

青山圍女牆。細草滿毬場。虛簷搖水影。曲檻吹蘋香。房櫳寂無人。雙燕說曉涼。賜休無公事。蕭散寄一牀。久苦吏役拘。更知閑味長。桑空繭綴簇。陂滿稻吐秧。良時動人懷。東望一慨慷。寧當戀微祿。如鼠死太倉。

小雨出西門五里至東嶽廟

埋沒文書每自憐。偷閑出郭一欣然。稻陂雨細豐年候。槐陌風清嫩暑天。心似春鴻寧久住。身如秋扉合長捐。平生士雅今亡恙。老病何由共著鞭。

初夏燕堂睡起

歌鳳平生類楚狂。山城遲暮得深藏。洗春雨過清陰合。掠水風生綠藻涼。晨几硯凹涵墨色。午窗盃面聚

茶香功名到手渾閑事。此與他年未易忘。

哺後領客僅見燭而罷戲作短歌

忍睡出坐衙。扶病起觴客。本來世味薄。況復酒戶迨。譚諄時強語。鬼昂已頽曠。燒燭不盈寸。歸臥弄書冊。我來未穫稻。客裏今食麥。悵望稽山雲。飛去無六翮。

讀宛陵先生詩

歐尹追還六籍醇。先生詩律擅雄渾。導河積石源流正。維嶽崧高氣象尊。玉磬漻漻非俗好。霜松鬱鬱有春溫。向來不道無譏評。敢保諸人未及門。

書歎

人生如春蠶。作繭自纏裹。一朝眉羽成。鑽破亦在我。少年不自珍。妄念然烈火。眼亂舞腰輕。心醉笑齒瑳。餘齡幸早悟。世味無一可。但憶喚山僧。煎茶陳餅果。

# 陸放翁集

劍南詩稿

卷第十九

曉出南山

久向人間觸駭機。斂收孤迹早宜歸。亡羊未恨補牢晚。搏虎深知攘臂非。明月長庚天欲曉。新桐清露暑猶微。扁舟葦笠平生事。莫羨黃金帶十圍。

聞韓无咎下世

青劍飄然去國時。南蘭陵郡日題詩。吳波漲綠迎桃葉。穰燭堆紅按柘枝。故友去爲山下土。衰翁何恨鬢邊絲。憑高老淚無揮處。神武衣冠挂已遲。

官居書事

早涉人間足畏塗。一麾投老向江湖。年光已上星星鬢。日力猶供急急符。本自陽狂無藉在。更堪羸病不堪梧。滅胡意氣嗟誰許。淚盡神州赤縣圖。

又

走遍人間老更窮。強尋一笑與誰同。簿書衰袂呻吟裏。歌舞紛紛困睡中。手版倒持悲末路。寒江獨釣媿高風。知心賴有譚夫子。時遣書來問放翁。比數得譚德稱書。

夏日北榭賦詩弈棋欣然有作

異事嚴州省見稀。幅巾闌角立多時。青林白鳥自成畫。急雨好風常有詩。酷信醫方逢酒怯。強驅吏牘坐衙遲。悠然笑向山僧說。又得浮生一局棋。

謁告歸臥晚登子城

此身真是抱官囚。厭見長空赤日流。齋壁曉山千嶂雪。扇紈新雁一汀秋。繫船空作清湘夢。御氣難尋太華遊。菱角藕絲還恨少。強攜玉瀝醉高樓。

迓使客出郊夜歸過市樓

山川慘澹作秋霖。雲物徘徊結夕陰。手版向人慙老大。肩輿出郭當登臨。二年雪瀨饒羈思。萬里冰河歇壯心。却羨喧呼樓上客。隔簾紅燭醉更深。

秋夜登千峯樹待曉

萬里秋風夜艾時。剡川孤客不勝悲。讀書眼暗定誰許。憂國涕零空自知。欲墜高梧先策策。漸低北斗正離離。倚闌不覺雞號曉。剪燭題詩寄所思。

九月初郊行

九月吳中尚袂衣。江郊策馬踏斜暉。蕎花漫漫連山路。豆莢離離映版扉。蒼兔避鷹投磔去。黃鸝脫網傍人飛。農家光景關心事。不爲無才也合歸。

衰病

衰病龍鍾已要扶。誰猶作折腰趨。世無魯國真男子。心憶高陽舊酒徒。萬里秋風吹鬢髮。百年世事歎頭顱。桐江久客無奇句。孤負君王乞左符。

書意

一鳴輒斥不鳴烹。禍福元知未易評。湖海淒涼身跌宕。孟觴豪舉筆縱橫。敢希二頃成高臥。但願諸公致太平。波暖龍州泝清汗。道邊扶杖眼猶明。

秋懷

策策桐葉風。濛濛菊花雨。空堂一燈青。幽壁百蟲語。嗟余豈願仕。老病歸無所。屈指計歲年。強半墮羈旅。荷戈北戍秦。挂席西適楚。名慚垂竹帛。文不諧律呂。所餘惟一死。忍復類兒女。金丹或可成。青霄渺輕舉。

過村店有感

細篾絡丹柿。枯籬懸碧花。炊煙生旅竈。野水漱寒沙。棲鳥爭投樹。歸牛自識家。恍然遊蜀路。搔首憶天涯。

嚴州大閱

鐵騎森森帕首紅。角聲旗影夕陽中。雖慚江左繁雄郡。白樂天詩云。蜀川何寂寞。茂苑太繁雄。且看人間矍鑠翁。清渭十年真昨夢。玉關萬里又秋風。憑鞍撩動功名意。未恨猿驚蕙帳空。

後園閑步

木葉勾萌喜小春。鬢毛蕭颯媿陳人。今朝忽破簿書夢。此地暫還風月身。閑岸綸巾照清淺。却扶藤杖上嶙峋。人生要是便疎豁。金馬銀臺莫問津。

照潺湲閣下池水

平生不鑷白。霜雪滿鬢眉。照水默自笑。已迫溝壑期。慨然念歸休。不計妻子飢。渠飢亦有命。我節詎可移。自我來桐江。實無負惇嫠。詭波如崩山。孤迹則已危。陸子定何人。正恐君未知。午枕夢剡曲。秋風吹釣絲。

秋郊有懷

漫漫蕎麥花。如雪覆平野。離離豆子莢。敷枝忽堪把。頗憶故鄉時。屏迹謝車馬。水宿依蟹舍。泥行沒牛胯。作勞歸薄暮。濁酒傾老瓦。縷飛綠鯽膾。花簇頰鯉鮓。棄官雖未決。世念亦已且。浩歌續楚狂。幽懷欣獨寫。

又

檐頭買雙兔。市店取斗酒。還家掃北窗。歡言酌親友。家貧氣未餒。禮薄情更厚。高吟金石裂。健筆龍蛇走。酒闌起出門。孤月挂衰柳。大笑各散歸。吾輩可不朽。官身縛簡書。此樂寧復有。悵望秦稽雲。憑高一搔首。

又

楚人固多孱。妄謂秋可悲。寧知河嶽間。氣俗樂此時。壯士鳴雕弓。健馬嚼枯萁。日馳三百里。榆關赴戰期。陣雲壓龍庭。殺氣搖參旗。熾火燎狐兔。倒瀉黃金卮。勒銘燕然石。千載鎮胡兒。安能空山裏。凍研哦清詩。

又

秋山瘦益奇。秋水淺可涉。出城西風勁。拂帽吹脫葉。新霜拆栗罅。宿雨飽豆莢。枯柳無鳴蜩。寒花有穿蝶。郊行得幽曠。頗覺耳目愜。斷雲北山來。欣然與之接。挂冠易事爾。看鏡歎勳業。永懷桑乾河。夜渡擁馬鬣。

夙興

喔喔老雞催落月。丁丁殘漏伴斜河。一盃淡粥寒燈下。還與山僧不校多。

### 聽事望馬目山

官身早暮不容閑。塵土堆胸媿滿顏。也有向人誇說處。坐衙常對水南山。

### 秋興

滿簪白髮不勝繁。竊祿偷安媿主恩。東館煙波秋漸瘦。北山霧雨晝多昏。功名蹭蹬身長棄。籌策瀾翻舌幸存。堪笑此生虛過盡。一秋閉閣聽啼猿。

### 又

孤城寂寞近江干。處處疎砧送早寒。水落纔餘半篙綠。霜高初染一林丹。民租屢減追胥少。吏責全輕法令寬。偶有一樽聊獨醉。強掇黃菊助清歡。

### 久無暇近書卷慨然有作

少年喜讀書。事業期不朽。致君頗自許。書卷常在手。白頭乞鍾釜。坐使此心負。朝衙有達午。夕坐或過酉。文符苦酬對。迎餞厭奔走。直憂先狗馬。豈但凋蒲柳。永懷簡編香。更覺冠冕醜。飢餐一簞飯。悶酌一卮酒。吟哦從所好。貧賤亦何有。余悔已莫追。寄謝故山友。

嚴州多菊然。率過重陽方。開或舉東坡先生菊花開時。卽重陽之語。余謂此猶是未忘重陽者。恐

### 此花不肯也戲作一絕

無人喚醒賦歸翁。滿把清香誰與同。但辦對花頻舉酒。莫橫重九在胸中。

地僻

地僻天教養散材。流年沉著鬢毛催。青山自繞孤城去。畫角常隨晚照來。几淨雙鉤摹古帖。甕香小啜試新醅。乘槎不是英纏遠。無奈先生興盡回。

吏責

吏責何時得暫停。年來減盡鬢邊青。高談正樂催迎客。美睡方酣報掣鈴。安得雲山長在眼。便從樵牧與忘形。詩成不用頻煩惱。自古籠禽例剪翎。

張時可直閣書報已得請奉祠雲臺作長句賀之

燈前一笑拆書開。喜見冰銜洗俗埃。丞相苦留猶不住。諸公欲挽固難回。玩鷗有約問何闊。斂版無聊歸去來。千載伏波應太息。輸君談笑上雲臺。

累日文符沓至悵然有感

豪氣人言苦不除。固應屣迹向江湖。封侯萬里獨心在。餬口四方何事無。薄俗更堪開眼看。老翁寧辦折腰趨。鼠肝蟲臂今無擇。付與乾坤造化爐。

又

白首逢人只累欷。今雖未是昨真非。文章才盡欲焚稿。仕宦興闌當拂衣。浪出自應爲後戒。放言那計墮危機。遼天華表蒼茫裏。千載何人識令威。

又



三十年爲一世。人孤城夢斷洛陽塵。游忝朝迹。今二十有八年矣。強顏嬾復看人面。何地真堪著此身。白骨久埋金谷友。黃花尙醉葛天民。嚴光釣瀨雖亡恙。除却江山萬事新。

大風

初聞瀕洞怒濤翻。徐聽驂驪戰馬奔。紙帳蒲團坐清夜。恍如身在若耶村。

冬夜讀書

退食淡無事。一窗寬有餘。重尋總角夢。却對短檠書。功業雖蹉跎。光陰且破除。更須求半偈。回向此心初。

再用前韻不以次

壯心雖迫老。吏責未妨書。言議思公瑾。英雄陋本初。移燈近牀榻。聽雨落塔除。回首山南戍。流年一紀餘。

思歸

短髮今年雪滿巾。一盃且醉瓮中春。定無術致長生藥。那得愁供有限身。碎枕不求名利夢。挽河盡洗簿書塵。江湖意決君知否。致主唐虞自有入。

喜小兒病愈

喜見吾家玉雪兒。今朝竹馬遶廊嬉。也知笠澤家風在。十歲能吟病起詩。肆忽作病起詩一首

又

一牀共置朝回笏。百屋常堆用剩錢。何似吾家好兒子。吟哦相伴短檠前。

初冬風雨驟寒作短歌

東園日淡雲容薄。綸巾朝暮闌干角。北風動地萬木號。不料一寒如此惡。豈惟半夜雨打窗。使恐明朝雪平壑。綠酒雖漓亦復醉。早貂已弊猶堪著。所嗟此身老益窮。蹭蹬無功上麟閣。久從漁艇寄江湖。坐看胡塵暗幽朔。萬鞭枯齒憤未平。蠶下老會何足縛。要及今年墮指寒。夜擁雕戈度窮漠。

余年二十時嘗作菊枕詩頗傳於人。今秋偶復采菊縫枕囊。悽然有感。

采得黃花作枕囊。曲屏深幌悶幽香。喚回四十二年夢。燈暗無人說斷腸。

又

少日曾題菊枕詩。蠶編殘稿鎖蛛絲。人間萬事消磨盡。只有清香似舊時。

陶淵明云三徑就荒松菊猶存。蓋以菊配松也。余讀而感之。因賦此詩。

菊花如端人。獨立凌冰霜。名紀先秦書。功標列仙方。紛紛零落中。見此數枝黃。高情守幽貞。大節凜介剛。乃知淵明意。不爲汎酒觴。折嗅三歎息。歲晚彌芬芳。

蕎麥初熟刈者滿野喜而有作

城南城北如鋪雪。原野家家種蕎麥。霜晴收斂少在家。餅餌今冬不憂窄。胡麻壓油油更香。油新餅美爭先嘗。獵歸熾火燎雉兔。相呼置酒喜欲狂。陌上行歌忘惡歲。小婦紅粧穗簪髻。詔書寬大與天通。逐熟淮南幾誤計。

有自蜀來者因感舊遊作短歌

錦城如海行不極。馬迹重重車轂擊。家住城西三十年。聞說城東未曾識。看花走馬宿中路。經月酒徒無

覓處露香風暖海棠開。碧雞坊中倘相遇。放翁顛顛鬢成絲。空有西遊千首詩。今朝雨霽上危榭。意氣頗如年少時。持盃欲作消愁計。酒未著人愁已醉。不成題句寫幽情。一幅蛟縮空寄淚。

東吳女兒曲

東吳女兒語如鶯。十三不肯學吹笙。鏡奩初喜穉蠶出。窗眼已看雙繭成。庭空日暖花自舞。簾卷巢乾燕新乳。阿弟貪書下學遲。獨揀詩章教鸚鵡。

雨夕

歲旱連夏秋。客袂壓塵土。欣然成一笑。愛此清夜雨。瓦檠墮燈燼。銅椀起香縷。心清病良已。境寂句欲吐。東溪久枯涸。想像素蛟舞。分喜到溝池。游魚命儔侶。

晚遊東園

藥瓢藜杖合施行。獨往山林已歃盟。傍水斷雲含暮色。拂簷高竹借秋聲。癡人自作浮生夢。腐骨那須後世名。莫笑吟哦無闕日。老來未盡獨詩情。

小雨

小雨暗林塘。寒聲遶畫廊。事須求暫假。宜睡稱燒香。事須二字。蓋唐人公移中語也。

初寒在告有感

掃地燒香興未闌。一年佳處是初寒。銀毫地綠茶膏嫩。玉斗絲紅墨瀋寬。俗事不教來眼境。閑愁那許上眉端。數樞留得西窗日。更取丹經展卷看。

又

豪舉當年氣吐虹。卽今顛顛一衰翁。寄懷本自俗塵外。移病何妨寒雨中。香暖候知銀葉透。酒清看似玉船空。故人吳蜀音塵斷。安得相攜一笑同。

又

橫林吹葉水生洲。身落窮山古睦州。到枕雨聲酣旅夢。背窗燈影動清愁。氣衝星斗有孤劍。力挽棟梁無萬牛。未減匈奴身已老。此生虛負幄中籌。

馬上作

白髮憑鞍一老翁。出門漏鼓尙鞦韆。淒涼旅思傳呼裏。零落新詩假寐中。正苦文移來陸續。何由笠釣入空濛。浮生正自少如意。付與秋風吹斷蓬。

冬夜聞角聲

嫋嫋清笳入雪雲。白頭老守臥中軍。自憐到死懷遺恨。不向居延塞外聞。

又

憶在梁州夜雪深。落梅聲裏玉關心。山城老去功名忤。臥對寒燈淚滿襟。

塞上曲

茫茫大磧吁可嗟。暮春積雪草未芽。明月如霜照白骨。惡風卷地吹黃沙。馳鳴喜見泉脈出。雁起低傍塞雲斜。窮荒萬里無斥堠。天地自古分夷華。青氈紅錦雙奚車。上有胡姬抱琵琶。犯邊殺汝不遺種。千年萬

年朝漢家。

荊州歌

楚江鱗鱗綠如釀，銜尾江邊繫朱舫。東征打鼓挂高帆，西上湯豬聯百丈。伏波古廟占好風，武昌白帝在眼中。倚樓女兒笑迎客，清歌未盡千觴空。沙頭巷陌三千家，煙雨冥冥開橘花。峽人住多楚人少，土鎗爭餉菜萸茶。

冬夜讀書

挑燈夜讀書，油涸意未已。亦知夜既分，未忍捨之起。人生各有好，吾癖正如此。所求衣食足，安穩住鄉里。弗屋三四間，充棟貯經史。四傍設几案，坐倦時徙倚。無聲九韶奏，有味八珍美。寢鉢籤帙間，自適以須死。豈惟畢吾身，尚可傳兒子。此心何時遂，感歎歲月駛。

寓歎

江上霜風透弊袍，區區無奈簿書勞。衰遲始憶壯遊樂，仕宦更知歸臥高。人怪羊裘忘富貴，我從牛僧得賢豪。俗間問訊真成嬾，有手惟堪把蟹螯。

又

劍外歸耕夢不通，公車上疏路何從。有心求縮地萬里，無羽可朝天九重。狂誦新詩驅瘧鬼，醉吹橫笛舞神龍。明當采藥玉霄去，他日君看冰雪容。

燕堂東偏一室頗深暖，盡日率困於吏牘。比夜乃得讀書其間，戲作。

袞袞流年往，匆匆短景過。簾深上燈早，地窄貯香多。書盡還重讀，詩成更自哦。向令無此處，將奈旅愁何。

又

賦性無他好，開編喜欲迷。琴琴傳夜漏，喔喔待晨雞。油減玉蟲暗，灰深紅獸低。悠然撫書歎，無術濟黔黎。

又

永夜東齋裏，人聲靜不譁。衣篝起香穗，書几落燈花。爐暖聽寒雨，窗明送曉鷗。文章空自苦，白首不名家。

懷鏡中故廬

臨水依山偶占家，數間茆屋半欹斜。雲邊腰斧入秦望，雨外舞蓑歸若耶。從宦只思乘下澤，忤人常悔讀南華。病來更怯還鄉夢，頻嚮籬泉試露芽。

書感

丈夫本願脫世鞅，丹成晝日凌空飛。纓冠佩玉朝紫微，白銀宮闕瞻巍巍。不然萬里將天威，提兵直解邊城圍。苜蓿滿川胡馬肥，掩取不遺一騎歸。苦心文章亦未非，與此二事同一機。寥寥千載見亦稀，莊屈已死吾疇依。哀哉窮子百家衣，豈識萬斛傾珠璣。欲洗薄蝕還光輝，熟睨無力空獻欬。

對酒

新酥鵝兒黃，珍橘金彈香。天公憐寂寞，勞我以一觴。胸中萬卷書，老不施毫芒。持酒一澆之，與汝俱深藏。生當老窮巷，死埋南山岡。古來共如此，已矣庸何傷。

夢歸

老去無餘念。時時夢弊廬。細傾新釀酒。盡讀舊藏書。雲螭鉏畝粟。煙畦挽野蔬。從渠造物巧。賦芋戲羣狙。

蜀使歸寄青城上官道人

輕別青城十二年。至今客枕夢林泉。一盃松屑齋前進。兩卷丹經肘後傳。欲與公爲塵外侶。幾時身上峽中船。世間牛蟻何勞問。輸與雲窗一粲然。上官常稱病。憤對客一笑而已。

寄成都邃道人

賣藥錦城中。燒丹雪山麓。石竇取鵝管。玉牀收箭鏃。紫雲晨覆鼎。白虹夜穿屋。鬼神嚴厲守。沆漉勤沐浴。此士真可人。高簡遺世俗。江頭十年別。顏色炯在目。使來每寄聲。喜我淡無欲。靈劑何必多。分餉一黍足。

寄邛州宋道人宋與余在臨邛。鴨翎舖同遇異人。宋遂棄官學道。

鴨翎舖前遇秋雨。獨與宋生棲逆旅。坐門憺悅見老仙。劇談氣欲凌天宇。袖中出劍秋水流。血點斑斑新報仇。我醉高歌宋生舞。洗盡人間千古愁。老仙約我遊太華。是夕當醉蓮峯下。語終冉冉已雲霄。萬里秋風吹鶴駕。我今伶俚踐衰境。不如宋生棄家猛。西望臨邛一慨然。青松偃盡丹爐冷。

小齋壁間張王子喬梅子真李八百許旌陽及近時得道諸仙像。每焚香對之。因賦長句。

山城作吏老堪羞。衫色塵昏鬢色秋。斂版那供新貴使。閉門聊與數公遊。至人不死閱千劫。大海無窮環九州。安得相攜從此逝。醉騎丹鳳下玄洲。

芳草曲

蜀山深處逢孤驛。缺甃頽垣芳艸碧。家在江南妻子病。離鄉半歲無消息。長安城門西去路。細靄斜陽芳

草暮尊前一曲渭城歌。馬蹄萬里交河戍。人生誤計覓封侯。芳草愁人春復秋。只願東行至滄海。路窮草斷始無愁。

烏龍廟

江邊蒼龍背負天。蟠踞千載常蜿蜒。其前橫關爲大川。高城鼓角聲隱然。龍廟於山家於淵。世爲吾州作豐年。老守雖愧筆如椽。潔齋試賦迎神篇。

寒夜移疾

南山北山高嶙峋。朝雨暮雨斷江津。時人正作市朝夢。老子已成雲水身。希世強顏心自媿。閉門謝病客生曠。天公何日與一飽。短艇湘湖自采蓴。湘湖在蕭山縣。產蓴絕美。

又

走遍天涯白髮生。晚叨微祿臥山城。知章自識狂供奉。士季那容醉步兵。廝藥有時攜短鑊。奏書無路請長纓。此心擬說還休去。付與空堦夜雨聲。

寒夜讀書

北窗暖焰滿爐紅。夜半濤翻古檜風。老死愛書心不厭。來生恐墮蠹魚中。

又

章編屢絕鐵硯穿。口誦手鈔那計年。不是愛書卽欲死。任從人笑作書顛。

又



憶昨從戎出渭濱。秋風金鼓震咸秦。爲肩竟欠封侯相。三尺繁邊老此身。

有爲予言烏龍高嶮不可到處有僧巖居不知其年子每登千峯樹望之慨然爲作二詩

樵子向予說有僧巢翠微巖扉雲共宿錫杖鶴同飛日暮松明火天寒榭葉衣棄官從此逝非子尙誰歸

又

嶮絕無微徑。淙潺有細流。寒巖依作屋。墮齒拾爲裘。木客求相識。毛人約共遊。百年如一瞬。塵世幾公侯。

楊庭秀寄南海集

俗子與人隔塵劫。何啻相逢風馬牛。夜讀楊卿南海句。始知天下有高流。

又

飛卿數閱嶠南曲。不許劉郎誇竹枝。四百年來無復繼。如今始有此翁詩。溫飛卿南鄉子九首其工不減夢得竹枝。

夜坐示桑甥十韻

好詩如靈丹。不雜羶葷腸。子誠欲得之。潔齋祓不祥。食飲屑白玉。沐浴春蘭芳。蛟龍起久蟄。鴻鵠參高翔。縱橫開武庫。浩蕩發太倉。大巧謝雕琢。至剛反摧藏。一技均道妙。佻心詎能當。結纓與易簪。至死猶自強。東山十月篇。萬古真文章。天下有精識。吾言豈荒唐。

夢回

病骨便衾暖。羈懷怯夢回。鐘殘燈燼落。香冷雨聲來。老抱憂時志。狂非濟世材。明朝人冬假。燒兔薦新醅。

醉中草書因戲作此詩

賜休暫解簿書圍。醉草今年頗入微。手挹凍醪秋露重。卷飄狂墨瘦蛟飛。臨池勤苦今安有。漏壁工夫古亦稀。穉子問翁新悟處。欲言直恐泄天機。

閑步至鞠場值小雪

倒盡床頭酒半罍。笑呼筇杖共閑行。梅花照水爲誰瘦。雪片倚風如許輕。孟德遇冬思射獵。廣文垂老謝才名。歸來跨火西窗下。獨數城樓長短更。

張季長學士自興元遣人來因詢梁益間事悵然有感

長記殘春入蜀時。嘉陵江上雨霏微。垂頭驢瘦悲鈴馱。截道狐奔脫獵圍。曉度市橋花欲語。晚投山驛石能飛。杜鵑言語元無據。悔作東吳萬里歸。

東齋夜興

山城殘角伴疎鐘。擁褐頽然一病翁。紙帳燈明盛龜甲。銅瓶火熟起松風。雨來尤覺睡味美。酒後不知愁思空。忽憶江湖泊船夜。號鳴避弋鬧羣鴻。

烏龍雪

烏龍如真龍。安尾臥江磧。時時登樓望。爪尾略可識。今朝事大異。千嶂忽如失。遙知重雲外。已有雪數尺。頗念采薇人。清坐焉得食。裹飯欲問之。矯首空峭壁。念昔故山時。僵臥風雪夕。靜聞長松折。聲若裂巨石。天晴視巖澗。鳥獸死如積。清夢不可尋。撫楯三太息。

曉出東城馬上作

曉出東城數幟紅。蒙茸狐貉擁衰翁。郊墟歎歲蕭條後。風雪窮冬慘淡中。耐辱已慚非士節。端憂未辦濟民窮。誕欺成俗真當懼。誰挽天河一洗空。

與建子振孫登千峯榭觀烏龍雪

二程慧堪憐。猶除志學年。能拋竹屨裏。來看玉蜿蜒。百念寬身後。餘生慰眼前。善和書幸在。它日要人傳。

述懷

尺寸雖無補縣官。此心炯炯實如丹。羯胡未滅敢愛死。尊酒在前終鮮歡。亞父抱忠撞玉斗。虞人守節待皮冠。縱言老病摧頽甚。壯氣猶憑後代看。

又

誘譽紛紛笑殺儂。此身本自等虛空。大鵬境界織塵裏。曠劫年光掣電中。翻動煙霞長鑱在。招呼風月一尊同。凡是聖誰能測。試問西鄰織屨翁。禪家所謂睦州陳蒲鞋者。故居在郡治之西二百步。

到巖十五晦朔郡釀不佳。求於郡下既不時。至欲借書讀之。而寓公多祕不肯出。無以度日。殊惘惘也。

桐君故隱兩經秋。小院孤燈夜夜愁。名酒過於求趙璧。異書渾似借荊州。溪山勝處身難到。風月佳時事不休。安得連車戴鞞釀。金鞭重作浣花遊。

雨中獨酌

僻郡荒山下，高齋寒雨中。微波生酒綠，短焰擁爐紅。學廢悲身老，民窮祝歲豐。廚人羞雉兔，更憶喚鄰翁。  
雉兔登盤頗懷鄰里。

被酒徑臥比覺已五鼓矣

俗事驅人挽不回，經年無地濯氛埃。酒酣稍覺客愁破，睡覺忽聞山雨來。窗外樹寒無鳥宿，壺中水暖有梅開。五更欲起先惆悵，燭下文書已作堆。

燈下讀玄真子漁歌因懷山陰故隱追擬

石帆山下雨空濛，三扇香新翠箬蓬。蘋葉綠，蓼花紅，回首功名一夢中。

又

晴山滴翠水投藍，聚散漁舟兩復三。橫隸北，斷橋南，側起船篷便作帆。

又

鏡湖俯仰兩青天，萬頃玻璃一葉船。拈棹舞，擁蓑眠，不作天仙作水仙。

又

湘湖煙雨長葦絲，菰米新炊滑上匙。雲散後，月斜時，潮落舟橫醉不知。

又

長安拜免幾公卿，漁父橫眠醉未醒。煙艇小，釣車腥，遙指梅山一點青。

送客至望雲門外

冬溫頻作雨。晨冷頓催晴。嫩日滿江驛。淡煙籠郡城。憂民懷凜凜。謀己恥營營。投檄真須決。鄰翁約耦耕。

題城南堂故人陳亦顏少游四方晚乃卜居臨安城南因以城南名其堂屬余賦詩。

山林恨與親友別。朝市不堪車馬喧。陳子調高無俗客。一塵卻要近修門。

又

借問城南老居士。新年樂事復何如。春寒催喚客嘗酒。夜靜臥聽兒讀書。

故山葛仙翁丹井有偃松覆其上。天矯可愛寄題。

葛翁煉丹一千年。翁去丹飛除此泉。炯如古鏡不拂拭。俯聽缺甃時鏘然。老龍受命護泉臥。蜿蜒直恐從天墮。人言神物老愈靈。夜半聲酣風雨過。放翁還山亦何有。閉門吟歎龍爲友。客來相對聊曲肱。但酌此泉勝酌酒。

估客樂

長江浩浩蛟龍淵。浪花正白蹴半天。軻峨大扁望如豆。駭視未定已至前。帆席雲垂大隄外。纜索雷響高城邊。牛車麟麟載寶貨。磊落照市人爭傳。倡樓呼盧擲百萬。旗亭買酒價十千。公卿姓氏不曾問。安知執秉中書權。儒生辛苦望一飽。趁起光範祈哀憐。齒搖髮脫竟莫顧。詩書滿腹身蕭然。自看賦命如紙薄。始知估客人間樂。

楚宮行

漢水方城一何壯。大路並馳車百兩。軍書插羽擁修門。楚王正醉章華上。璇題藻井窮丹青。玉笙寶瑟聲

冥冥忽聞命駕遊。七澤萬騎動地如雷霆。清晨射獵至中夜。蒼兕玄熊紛可藉。國中壯士力已殫。秦冠東來遣誰射。

妾命薄太白作此篇言長門宮事予反之。

妾命薄。早入天家侍帷幄。君王勤儉省宴游。寶柱朱弦塵漠漠。日長別殿承恩稀。盱眙猶聞親萬機。宮中雖無珠玉賜。塞上不見煙塵飛。不須悲傷妾命薄。命薄卻令天下樂。

晚登千峯榭

只道文書無了日。也能擺撥上層臺。窗明山雪暮方作。露白野梅寒未開。老病真慚天下士。窮愁強覆掌中盃。兒曹莫怪憑闌久。得句何妨秉燭回。

晝睡

書獄徵租自笑忙。暫歸聊得憩匡牀。屏圍夜雨孤舟句。枕帶秋風九日香。方睡菊花枕。一卷蠹書棲倦手。數聲殘角報斜陽。清泉浴罷。西窗靜。更覺茶甌氣味長。

胸次鬱鬱偶取枯筆作狂草遂成長句

酒隱人間六十年。晚途斂板自傷憐。莊周聊寄漆園吏。梅福終爲吳市仙。方外酒徒盟尙在。囊中劍術老當傳。此心鬱屈何由豁。聊遣龍蛇落蜀牋。

休日與客燕語既去聽小兒誦書因復作草數紙

賜沐家居謝掾曹。暫將蕭散慰勤勞。琅琅應節兒書熟。甕甕生風客論高。玉屑名牋來濯錦。風漪奇石出

臨洮託盟翰墨吾安敢。揮灑淋漓自足豪。張季長寄洮研何元立寄蜀紙皆近到新定。

青城大面山中有二隱。十一曰譙先生。定字天授。建炎初以經行召至揚州。欲留之。講筵不可拜。通直郎直祕閣致仕。今百三十餘歲。巢居嶮絕。人不能到。而先生數年輒一出。至山前人有見之者。其一曰姚太尉平仲。字希安。靖康初在圍城中。夜將死。士攻賊營不利。騎駿驟逸去。建炎初所在揭榜以觀察使召之。竟不出。淳熙甲午乙未間。乃或見之於丈人觀道院。亦年近九十。紫髯長委地。喜作草書。蓋皆得道於山中。云偶成五字二首。託上官道人寄之。

寄謝譙夫子。今年一出無萬緣。隨夢斷。百念與形枯。雲護巢松谷。神呵煨藥爐。憑高應念我。白首學徵租。

右寄譙先生

太尉關河傑。飛騰亦遇時。中原方蕩覆。大計易差池。素壁龍蛇字。空山熊豹姿。煙雲千萬疊。求訪固難知。

右寄姚太尉

累日多事不復能觀書。感歎作此詩。

我生無它長。所得靜而簡。出仕三十年。不殖一金產。四方到爲家。所向不容揀。南進極巨海。西戍掠危棧。爲州亦何好。且復占仕版。俸不給淖糜。況敢事酒錢。晨興坐堂上。符檄高嚶噓。藏書三萬軸。一字不到眼。胸中積磊塊。歎息誰爲鏟。浮生固如此。正可付一莞。

北窗

雲開見山雪。院靜聞松風。吏去曲肱臥。疑非塵世中。

讀范文正瀟灑桐廬郡詩戲書

桐廬朝暮苦匆匆。瀟灑寧能與昔同。堆案文書生眼黑。入京車馬漲塵紅。逢迎風月麴生事。彈壓江山毛穎功。二子年來俱埽迹。頽然堪笑一衰翁。

筇中偶得去年二月都下數詩

昨佩魚符入鳳城。春風處處聽鶯聲。欲尋舊友半爲鬼。重到西湖疑隔生。浮世正如投六博。野人何意慕三旌。嚴州戍滿真當老。猶幸爲民死太平。

感寓

人生堂堂七尺身。本與聖哲均稱人。唐虞乃可讓天下。光被萬世常如新。哀哉末俗去古遠。斷喪太朴澆。全淳豆羹簞食輒動色。攘竊乃至忘君親。錙銖必先計利害。詎肯冒死求成仁。不欺當從一念始。自古孝子爲忠臣。

征婦怨效唐人作

萬里安西久宿師。東風吹草又離離。玉壺貯滿傷春淚。錦字挑成寄遠詩。擊虜將軍方戰急。押衣敕使尙歸遲。粧臺寶鏡塵昏盡。髮似飛蓬自不知。

雪

癘癘家家一洗無。更欣餘潤沃焦枯。花壺夜凍先除水。衣焙朝寒久覆爐。松頂積高時自墮。竹枝壓重欲相扶。雲開正值春風早。卻看晴光滿九衢。



寒夜思飲酒不果與肆同歌樂渣魚戲作

我老畏作病。孟酒久不持。讀書寒雨中。比夕頗思之。呼童欲洗酌。願以病自疑。清坐歎寂寞。痛飲愁淋漓。三爵醒醉間。此理當徐思。一掬琴高魚。且復伴吾兒。

縱筆

凍研笑膠儒。雕弓隱獵徒。不成平趙魏。正可老江湖。顛顛頭雖禿。輪困膽尙麤。咸陽呼五白。何處不能廬。

又

故國吾宗廟。羣胡我寇讎。但應堅此念。寧假用它謀。望駕遺民老。忘兵志士憂。何時聞遣將。往護北平秋。

歲晚盤尊索然戲書

經年薄宦客桐廬。市邑蕭然一物無。名酒不來惟飲溼。長魚難覓且焚枯。支離鶴骨寒添瘦。宛轉龜腸夜自呼。更與兒曹同一笑。燈前短褐拆天吳。

立春前四日謝雪方拜天慶庭中雲復作

珮玉珊珊謁衆真。竟煩一雪慰疲民。未看舞鶴隨飛蓋。先喜飄花集拜茵。耕壟土膏千耦出。市樓酒賤萬家春。使君老去悲才盡。詩句難追節物新。

桐江行

我來桐江今幾時。面骨皴皴髮如雪。怒噴不復有端緒。讒謗何曾容辨說。十年山棲卻水食。釀桂餐芝自芳潔。作官一飽仰紅腐。坐對盤殮常嘔噎。雪晴宿戒南山遊。剩要賦詠臨清流。將行復輟卻退坐。臺符吏

牘令人愁。胸中崔嵬向誰吐。獨立憑高時自語。文章當以氣爲主。無怪今人不如古。

屢雪二麥可望喜而作歌

苦寒勿怨天雨雪。雪來遺我明年麥。三月翠浪舞東風。四月黃雲暗南陌。坐看比屋騰歡聲。已覺有司寬吏責。腰鎌丁壯傾閭里。拾穗兒童動千百。玉塵出礮飛屋梁。銀絲入釜須寬湯。寒酷發劑炊甍裂。新麻壓油寒具香。大婦下機廢晨織。小姑佐庖忘晚粧。老翁飽食笑捫腹。林下擊壤歌時康。

丁未除夕前二日休假感懷

掛冠神武草躊躇。家具何妨載鹿車。怨謗相乘真市虎。技能已盡似黔驢。黃金散後猶耽酒。白髮生來更愛書。新歲定尋林下約。一觴一詠未成疎。

又

夢寄梅村竹塢間。不堪客裏見春還。潮生水欲通南澗。雪霽雲猶冒北山。病思過年應小減。官身得假未全閑。變名吳市男兒事。末路低回自笑孱。

假中閉戶終日偶得絕句

雨聲滴滴暮未已。苔暈重重寒更添。知是使君初睡起。清香一綫透疎簾。

又

老夫昔是青城客。酒肉淋漓豈本心。還我山家本來面。數拳春筍薦孤斟。仗錫山寄筍枯。一名筍兒拳。

又

官身常欠讀書債。祿米不供沽酒資。剩喜今朝寂無事。焚香閑看玉谿詩。

除夜雪

只怪重衾不禦寒。起看急雪玉花乾。遲明欲謁虛皇殿。廐馬蒙氈立夜闌。

又

北風吹雪四更初。嘉瑞天教及歲除。戊申元日卯初立春。半盞屠蘇猶未舉。燈前小草寫桃符。

戊申元日

白頭身世歎羈孤。一念兒時淚已濡。尚記爭先書鬱壘。豈知落後舉屠蘇。盃盤草草思鄰舍。車馬紛紛厭九衢。六十年非心自了。掛冠猶足補東隅。

初春感懷

關河謝遠遊。歲月迫歸休。敢恨驥伏櫪。但思狐首丘。雪明窗誤曉。霜點鬢驚秋。羈旅饒愁思。誰憐季子裘。

閉閣

閉閣孤城賸放慵。桐江清絕勝吳松。雲收忽見北山雪。月落正聞西寺鐘。世味老來無奈薄。土思病後不勝濃。蓴羹豈止方羊酪。輕許平生笑士龍。

潺湲閣小立

飽食何曾補縣官。潺湲閣上倚闌干。水紋靴皺風初緊。花色鞋紅露未乾。薄酒愁邊供醉醒。故人夢裏話悲歡。孤城正在山窮處。過社今朝尙爾寒。

睡起至園中

欲掛衣冠萬事輕。不妨小住向山城。綠尊耐久常相伴。雪鬢纔生便放行。拂枕時時覓幽夢。倚闌日日聽新鶯。夕陽更有欣然處。來看青郊雨後耕。

# 陸放翁集

劍南詩稿

卷第二十

上書乞祠

上書又乞奉祠歸。夢到湖邊自叩扉。此去敢辭依馬磨。向來眞慣擁牛衣。致身途遠年齡暮。報國心存氣力微。誓墓那因一懷祖。人間處處是危機。

春殘

老墮空山裏。春殘白日長。庸醫司性命。俗子議文章。燭映一池墨。風飄半篆香。箇中有佳處。袖手看人忙。

三月二十日晚酌

暫因賜沐作閑身。太息纔餘一日春。委地落花新著雨。穿簾歸燕不生人。衛青此日怪長揖。王翰當年謀卜鄰。商略晚窗須小醉。朱櫻青店正嘗新。

次前韻

烏帽紅塵過去身。荒山野水又經春。殘年欲盡初聞道。薄宦宜休不問人。一局枯棋忘日月。數斟濁酒約比鄰。石帆山下菱歌斷。未歎臨風白髮新。

北窗閑詠

陰陰綠樹雨餘香。半捲疎簾置一牀。得祿僅償賒酒券。思歸僅償賒酒券。思歸新草乞祠堂。古琴百衲彈清散。名帖雙鉤揭硬黃。夜出灞亭雖跌宕。也勝歸作老馮唐。

休日留園中至暮乃歸

儘道官身屬太倉。未妨寄傲向林塘。綠波春漲羣魚樂。清露晨流蔓草香。閑試名弓來射圃。醉盤驕馬出毬場。長城萬里知誰許。看鏡空悲兩鬢霜。

北窗病起

一飢可忍萬緣輕。況復幽窗疾漸平。更事天公終賞識。欺人鬼子漫縱橫。道邊塵起頻障扇。門外波清剩濯纓。不爲褊心憎薄俗。客星祠下是歸程。

自東津泛舟至桐溪

潮生東西津。雨暗上下塔。蕭蕭亂菰蒲。拍拍起鳧鴨。吾船雖褊小。尚可著一榻。溪風吹醉頰。高枕墮紗帽。南山浮溼翠。偃蹇呼不容。安得青蓮公。傑句爲彈壓。

遊客至大浪灘上

小壘瓜蔓綠。短籬梅子黃。曉風掠水來。吹我醉面涼。平生蕭散意。未覺將迎忙。溪山供一笑。客主可相忘。寧當倒手版。聊復據胡牀。太平豈無象。麥飯家家香。我歸亦何有。養氣猶軒昂。那因五斗陳。坐變百鍊剛。

郊行

小雨東郊氣象新。蕭蕭清吹爽衣巾。並谿密竹巧藏寺。夾道新麻高沒人。老厭簿書愁欲睡。病疎盃酌渴

生塵。桐君山路無多遠。元自知津莫問津。

夏雨

東風吹雨溪上來。北山出雲以應之。嚴州城中三日雨。朝暮點滴無休時。向來秧底乾欲裂。白水漫漫俄盈陂。豚肩覆豆巫醉飽。龍骨挂壁農遨嬉。今年蠶麥收數倍。爾大如釜麥兩岐。西成在眼又如此。還鄉鼓腹歌淳熙。時去受代纔四十日。

雨中作

礎潤雲生五月中。山城細雨晚空濛。讀書雖恨此身老。把酒尙思吾輩同。積潤畫圖昏素壁。漬香衣幘覆熏籠。新晴不用占鐘鼓。臥聽林梢淅淅風。

醉題

不學空門不學仙。清樽隨處且陶然。人情正可付一笑。生世元知無百年。白首難陪東閣客。清風自足北窗眠。歸耕只要無人問。安用文章海內傳。

有懷青城霧中道友

雪谷孤松自鬱然。紛紛朝菌但堪憐。坐更拂石芥城劫。時說開皇龍漢年。淡煮藜羹天送供。閑拖藤杖地行仙。笑看王室中興後。更約長安一醉眠。

梅雨初晴遊客東郊

霽色澄鮮已斷梅。江郊隱隱尙輕雷。層巒正對孤城落。健席遙看大輻來。幼婦髻鬟簪早稻。近村坊店賣

新醅吾行在處皆詩本錦段雖殘試剪裁。

晚歸

暑雨初晴日江臯欲暮天鴉棲沙際樹人喚渡頭船病骨羸將折昏眸困欲眠市橋燈火鬧且復喜豐年。

休日登千峰樹遇大風雨氣象甚偉

今日逢休沐憑高且暫閒風聲初捲野雨氣已吞山疾病臨觴嬾塵埃得句慳西征忽在眼河勢抱函關。

雨中獨坐

馬目山頭雨腳昏龍津橋下浪花翻年豐郡僻無公事一炷清香晝掩門。

舊識姜邦傑於亡友韓无咎許近屢寄詩來且以无咎平日倡和見示讀之悵然作此詩附卷末

須溪本作嚴州贈姜梅山

故人玉骨已生苔謂南澗公邂逅逢君亦樂哉湖寺繫舟無夢去京塵馳騎有詩來醉中不敢教兒誦看處常須浴手開久矣世間無健筆相期力幹萬鈞回。

釣臺見送客罷還舟熟睡至覺度寺

抽身簿書中茲日睡頗足縹緲桐君山可喜忽在目紛紛衆客散杳杳一筇獨昔如脫淵魚今如走山鹿詩情森欲動茶鼎煎正熟安眠簟八尺仰看帆十幅逍遙富春飯放浪漁浦宿送老水雲鄉羹藜忍思肉。

泛富春江

雙鷺搖江疊鼓催伯符故國喜重來秋山斷處望漁浦曉日昇時離釣臺官路已悲捐歲月客衣仍悔犯



風埃還家正及雞豚社。剩伴鄰翁笑口開。

宿漁浦

東歸剡曲只三程。旅泊還如萬里行。燈影動搖風不定。船聲鞦韆浪初生。曳裾非復白頭事。瞑目那求青史名。歸去若爲消暮境。一蓑雨煙學春耕。

泝小江飯舟中

老作孤舟客。秋濤漲小江。林昏見飛燐。村近有驚龍。天闊三更月。篷低一尺窗。魚殮雖草草。聊喜到吾邦。

乞祠久未報

聖朝未許領叢祠。擁褐清羸不自支。鄒禹有靈應笑拙。周公無夢固知衰。得閑要及身安日。到死應無睡足時。七百日來塵滿抱。今朝漸祓有新詩。

七月十日到故山削瓜淪茗脩然自適

鏡湖清絕勝吳松。家占湖山第一峯。瓜冷霜刀開碧玉。茶香銅碾破蒼龍。壯心自笑老猶在。狂態極知人不容。擊壤窮閭歌帝力。未妨堯舜亦親逢。

曉興

亂蟬嚙新秋。老木立清曉。我亦岸綸巾。寄傲萬物表。大千藏粒粟。浩劫過飛鳥。癡子居其間。利欲自纏繞。可憐榮進意。未向蓋棺了。浮名更嚇鬼。白堊寫丹旆。我於斯世事。看破自少小。老矣更何求。歸哉憇林沼。

感秋

會稽八月秋始涼。梧桐葉落覆井床。月明縞樹遶驚鵲。露下溼草啼寒螿。丈夫行年過六十。日月雖短志意長。匣中寶劍作雷吼。神物那得終摧藏。君不見昔時東都宗大尹。義感百萬虎與狼。疾危尙念起擊賊。大呼過河身已僵。宗汝霖垂死尙部勒。諸將北伐忽大呼過河者三。隨卽殲絕。

秋夜有感

候蟲何唧唧。歲晚聲出壁。不惟嬾婦驚。感此白頭客。壯年事征戍。萬里不得息。揚颿凌秋濤。策馬赴山驛。日照蛟鼉涎。雪印豺虎迹。誰知七尺軀。幸脫九死厄。前年補畿郡。入對瞻玉色。報恩無死所。再拜衰淚滴。卽今故山歸。愈歎老境逼。不眠中夜起。仰視星歷歷。中原何時定。銅駝臥荆棘。滅胡恨無人。有復不易識。

五鼓入城

道旁竹樹露如傾。帶睡悠悠十里行。曉色未分煙尙重。壓城樓閣已崢嶸。

飯罷忽鄰父來過戲作

旋炊香稻鬻新菰。飯飽逍遙樂有餘。茶味森森留齒頰。香煙郁郁著圖書。毛皮尙在寧知我。鱗甲深藏莫問渠。賴有鄰翁差耐久。雨畦頻喚共攜鋤。

秋夜讀書

一雨濯殘熱。秋風忽已深。青燈照空廊。重露滴高林。危坐讀周易。會我平生心。夜分徐掩卷。闌弄牀上琴。簾外初斜河。屋頭已橫參。人生每如此。利欲安能侵。

夜坐忽聞村路報曉鐵牌

何人叩鐵警農耕。炊飯家家起五更。也似早朝風雪裏。遙聽宮漏下宮城。

又

秋氣淒涼霧雨昏。老書生病臥孤村。五更不用元戎報。片鐵錚錚自過門。

白雲自西來過書巢南窗

眠山千里青未了。恨隔長江不到吳。羈雲冉冉吾舊識。安得挽之來坐隅。

贈竹十韻

放翁小築湖西偏。虛窗曲檻無炎天。人間乃有真富貴。透舍十萬碧玉椽。連林娟娟滋清露。高枝裊裊搖蒼煙。常憂俗客觸新粉。屢戒園丁傷逸鞭。涼生尊罍消午醉。聲撼窗屏驚晝眠。春殘斷十得美苗。氣壓卿相食萬錢。爾來作吏若墮窳。每一夢到心悽然。還家再見卻愉快。塵土何地從臞仙。囊中幸藏餐玉法。欲屏萬事相周旋。更當待月出東嶺。坐石泠泠揮響泉。

雜感

自古文章與命仇。功名身外更悠悠。一從識得元無事。窮死逢人不說愁。

又

小軒幽檻雨絲絲。種竹移花及此時。客去解衣投臥榻。半醒半醉又成詩。

又

少年意氣與春爭。朱彈金鞭處處行。誰信即今空谷裏。旋租黃犢學躬耕。

又

自洗銅壺試玉醅。小軒風月爲徘徊。此心未與年俱老。猶解逢花眼暫開。

又

側帽垂鞭小陌東。名花迎笑一枝紅。啼鶯驚斷尋春夢。惆悵新霜點鬢蓬。

入城寓榻開元

羸僮倦馬困長堤。借榻禪房日未西。熟睡覺來閒隱几。庭楸陰轉乳鴉啼。

夜出偏門還三山

月行南斗邊。人歸西郊路。水風吹葛衣。草露溼芒屨。漁歌起遠汀。鬼火出破墓。淒清醜醉魂。荒怪入詩句。到家夜已半。佇立叩蓬戶。穉子猶讀書。一笑慰遲暮。

四鼓酒醒起步庭下

酒解夜過半。出門步中庭。天高河漢白。月淡煙霧青。重滴竹杪露。疎見樹罅星。壞甃啼寒螿。深竹明孤螢。秋晚雖未霜。蠹葉時自零。四序逝不留。慨然感頽齡。平生茅一把。不博帶萬釘。鷗溝謝拍拍。鴻路追冥冥。

感憤秋夜作

月昏當戶樹突兀。風惡滿天雲往來。太阿匣藏不見用。孤憤書成空自哀。吾輩赤心本貫日。昔人白骨今生苔。榮河溫洛不可見。青海玉關安在哉。

反感憤明夜讀前作而悲。乃復作此自解。

膊膊庭樹雞初鳴。嗚嗚天衢雁南征。百年朝露豈長久。萬事浮雲常變更。出處有心終有愧。聖賢無命亦無成。西疇雖薄可自力。雙犢且當乘雨耕。

東齋

著腳紅塵已恨深。便應畢世住山林。貴人自作宣明面。老子曾聞正始音。議論坐狂當永棄。簿書緣病復難任。東齋幽寂憑誰畫。開幔床橫一素琴。

雨夜四鼓起坐至明

門巷冷如冰。生涯淡似僧。小窗愁夜雨。孤影怯秋燈。林鵲棲仍起。山童喚不響。悠然坐待旦。息倦倚書牕。

夜讀兵書

八月風雨夕。千載孫吳書。老病雖憊甚。壯氣頗有餘。長纓果可請。上馬不躊躇。豈惟慶皋蘭。直欲封狼居。萬乘久巡狩。兩京盡丘墟。此責在臣子。憂愧何時摅。南鄭築壇場。隆中顧草廬。邂逅未可知。旄頭方掃除。

老歎

百年逝不留。萬事本難料。夜行鐘漏迫。但取賢達笑。頗疑功名事。造物付年少。歸休莫問人。曉鏡勤自照。

秋霽

灑氣明山川。霽色滿天地。西風吹我衣。忽有萬里意。中原運當平。所要在得士。餘年猶幾何。棄置復棄置。

齋中聞急雨

一味疎慵養不才。飯蔬亦已罷銜盃。衡茆終日人聲絕。臥聽芭蕉報雨來。

老病追感壯歲讀書之樂作短歌

少年志力強，文史富三冬。但喜寒夜永，那知睡味濃。  
庭樹風淅淅，城樓鼓摐摐。自鞭不少貸，凍坐聞晨鐘。  
探義劇攻玉，摛文笑雕龍。落紙筆縱橫，圍坐書疊重。  
得意自吟諷，清悲答莎蛩。飢腸得一甞，美如紫駝峯。  
俯仰五十年，于世終不逢。夜半起飯牛，頽然成老農。  
束書不更讀，蠹簡流塵封。世無袁伯業，太息吾何從。  
閑中戲書

又

糲飯從來不願餘，還山喜遂此心初。  
挽河盡洗彈冠念，閉戶閑縫插架書。  
一榼不妨從客飲，數椽也復是吾廬。  
少游細看猶多事，安用人間下澤車。

又

少年拜舞綴庭紳，曾見中天日月新。  
金印終歸妄校尉，白頭仍是斥仙人。  
修營香火三生願，收拾風波九死身。  
豈但漁樵與爭席，海邊漚鳥亦相親。

采藥

釣竿風月寄滄洲，醉髮髣髴荻葉秋。  
仕進世誰知我嬾，功名命不與人謀。  
衰遲更覺歲時速，疎賤空先天下憂。  
病骨未銷讒未已，聊須周易著牀頭。

簷子編成細箬新，獨穿空翠上嶙峋。  
丹砂巖際朝曦日，枸杞雲間夜吠人。  
絡石菖蒲蒙綠髮，纏松薜荔長蒼鱗。  
金貂謁帝我未暇，且作人間千歲身。

過猷講主桑漬精舍

寂寞衡門傍水開。放翁曳杖此徘徊。林疎時見釣篷過。風急忽聞菱唱來。講罷繩牀懸麈柄。齋餘童子供茶盃。解衣許我閒摩腹。又作幽窗夢一回。

自桑漬泛舟歸三山

端爲身閑覺日長。不嫌兒輩笑清狂。湖光潏潏歸舟疾。雨點霏霏醉頰涼。斷約苔生人喚渡。孤村霜近稻登場。宦情不獨今日薄。游子從來念故鄉。

訪野人家

山入柴門窄。橋通野路長。羣童挑燕笏。幼婦采雞桑。淳古非今俗。留連到夕陽。盤飧取辭飽。滿箸藥苗香。

塞上曲

秋風獵獵漢旗黃。曉陌霜清見太行。車載氈廬馳載酒。漁陽城裏作重陽。

又

將軍許國不懷歸。又見桑乾木葉飛。要識君王念征戍。新秋已報賜冬衣。

又

金鼓轟轟百里聲。繡旗寶馬照川明。王師仗義從天下。莫道南兵夜斫營。

又

老矣猶思萬里行。翩然上馬始身輕。玉關去路心如鐵。把酒何妨聽渭城。

硯湖并引

余得英石數峯環立其中凹處可容一龕因以瀦水代硯滴名之曰硯湖且爲賦詩

羣山環一湖湖水綠溶漾微風掠窗過亦解生細浪餘流浸翠麓倒影寫青嶂自然出天工豈復煩巧匠  
病夫屏盃酌不遣運酒舫時時挹清泚筆墨助豪宕帖成龍蛇走詩出雷雨壯從今几硯旁一掃蟾蜍樣  
泛湖

筆牀茶竈釣魚竿。潏潏平湖淡淡山。浪說枕戈心萬里。此身常在水雲間。

寓蓬萊館

桐葉吹殘蕉葉黃。驛窗微雨送淒涼。長安許史無平素。莫恨棲棲立路旁。

又

占驛蕭蕭獨倚闌。角聲催晚雨催寒。殘年遇合應無日。猶說新豐強自寬。

夜還驛舍

樓上琴琴初發更。斷雲收雨旋成晴。市橋新漲搖燈影。驛路殘泥壯屐聲。闌闌變遷非曩日。情懷牢落感  
餘生。高秋病起猶能醉。剩買官醅樂太平。

舟中大醉偶賦長句

過江何敢號高流。偶與俗人風馬牛。畫幟新搖嚴瀨月。清尊又醉戴溪秋。壯心無復在千里。老氣尙能橫  
九州。古寺試求三丈壁。爲君驅筆戰蛟虬。



行飯至新塘夜歸

門前徙倚尙餘霞。湖上歸來月滿沙。雲溼一聲新到雁。林昏數點後棲鴉。淒迷籬落開寒菊。鄭重比鄰設夜茶。早議挂冠君會否。暮年心念不容差。

雲門感舊

總角來遊老未忘。背人歲月去堂堂。樾松看到偃霜蓋。廢寺憶曾開寶坊。佛几古燈寒焰短。齋廚新粟午炊香。興闌未忍登車去。更倚溪橋立夕陽。

若耶溪上

微官元不直鱸魚。何況人間是畏途。今日溪頭慰心處。自尋白石養菖蒲。

又

九月霜風吹客衣。溪頭紅葉傍人飛。村場酒薄何妨醉。菰正堪烹蟹正肥。

秋雨頓寒偶書

羈懷不醉自昏昏。臥對青燈獨掩門。沙雁帶寒來古澤。林鳩催雨暗孤村。數椽蟹舍償初志。九陌塵衣洗舊痕。自歎一生書裏活。暮年無力濟黎元。

新晴泛舟至近村偶得雙鰕而歸

秋風一夜老汀蘋。剡曲稽山發興新。青嶂會爲身後塚。扁舟聊作畫中人。園林搖落知寒早。父老逢迎覺意真。歸舍不妨成小醉。眼明細柳貫霜鱗。

上書乞祠輒述鄙懷

干祿本代耕窮達敢自必。早遇高皇帝九品對宣室。妄懷犬馬心。嫠緯不暇恤。上恩等天地。腰領免斧鑕。旋屬紹興末。陽谷瞻日出。日賤臣復何幸。便殿首造膝。煌煌帝堯典。推擇首秉筆。愚忠雖懇款。野性實坦率。飄然去周行。湖海抱沉疾。遠遊客窮塞。亭障秋蕭瑟。聖君終記省。萬里忽乘駟。同朝久凋謝。存者不十一。造廷故抱暗。下殿衰涕溢。蹉跎又十載。憂患豈易述。流年不貸人。白髮日夜密。冠雖未卽挂。馭已不容叱。尙覲公朝恩。養老霑散秩。閉門教子孫。志願真永畢。

泛湖上雲門

三百里湖秋渺然。是間可以著釣船。浩歌暮過石帆下。爛醉夜泊樵風邊。樵風溼在若耶溪。鏡湖之間。茫茫沙月忽側墮。裊裊山氣時孤濤。冥鴻遠舉謝斯世。白鷗自放全其天。幽棲幸脫市朝械。捷徑那著功名鞭。人生各自適。意耳稷禹巢許知誰賢。

書歎

世態秦欺楚。交情越視秦。寧教待羝乳。不耐望車塵。書積高圍坐。花繁亂插巾。那須散人號。已是萬天民。

枕上作

寒夜臥林廬。蕭然適有餘。蟲悲號壞壁。燈暗守殘書。養拙天知我。安貧老似初。雖非漆園吏。也作蝶籬遽。老病無復宦情。或者疑焉。作此示之。

病思蕭條豈獨今。十年前已鬢霜侵。舊交略盡形吊影。薄宦宜休口語心。老驥已甘當伏櫪。窮猿況是急。

投林別君徑入亂雲去。後日相思何處尋。

拄杖

放翁拄杖具神通。蜀棧吳山興未窮。昨夜夢中行萬里。蓮華峯上聽松風。

北望

北望中原淚滿巾。黃旗空想渡河津。丈夫窮死由來事。要是江南有此人。

歲晚感懷

利名爭奪兩皆非。生世寧殊露易晞。老冉冉來誰獨免。冢崇崇處會同歸。聽歌莫惜終三疊。縱獵何妨更一圍。醉臥日高呼不醒。笑人霜曉束朝衣。

大雨中作

北風撼山勢岌岌。老夫倚杖檐前立。貪看白雨掠地風。飄灑不知衣盡溼。當年入朝甫三十。丈胡塵叩江急。屬聞蠶彈遣檄書。亟壞布裳縫袴褶。卽今白髮不可數。破屋頽垣窘風雨。汝生汝死問者誰。人雖不問心自悲。

繫舟平水步

舟尾參差野岸橫。屐聲穿市得閑行。雨昏茆店炊煙溼。人語蓬窗積火明。枝上橙香初受摘。擔頭菰脆正堪烹。漁樵自是平生意。不爲衰遲薄宦情。

初到行在

六十之年又四年也。騎瘦馬趁朝天。首陽柱下孰工拙。從事督郵俱聖賢。筆墨有時閑作戲。功名到底是無緣。都城處處園林好。不許山翁醉放顛。

還都

平生薄名宦。所願得早休。奔走三十年。鏡中霜鬢秋。歸踏長安道。恍然皆舊遊。處處見題名。始驚歲月逾。西湖隔城門。放浪輸白鷗。當時見種柳。已足繫巨舟。挂冠當自決。安用從人謀。勿以有限身。常供無盡愁。

宿盃中偶作

流落歸來兩鬢絲。此生真媿北山移。數殘宮漏寒無寐。開盡梅花病不知。同舍破甘醒宿酒。故人折簡索新詩。生涯可笑清如許。枉是京塵撲馬時。譚德稱有簡催和詩。

四鼓出嘉會門赴南郊齋宮

客遊梁益半吾生。不死還能見太平。初喜夢魂朝帝所。更驚老眼看都城。九重宮闕晨霜冷。十里樓臺落月明。白髮蒼顏君勿笑。少年慣聽舜韶聲。

題張野夫監簿大招圖

此生只合老漁樵。扶病誰令趁早朝。開卷未終三太息。羈魂零落恐難招。

簡譚德稱監丞

廣都江上送舟行。淚灑春風別少城。冉冉幾經新歲律。依依猶有舊交情。塵冠當挂彈何用。革帶頻移瘦自驚。剩欲約公風雨夜。一燈相對話平生。

致齋監中夜與同官縱談鬼神效宛陵先生體

五客圍一爐。夜語窮幻怪。或誇雷可斫。或笑鬼可賣。或陳混沌初。或及世界壞。或言修羅戰。百萬起睚眦。餘談恣搜抉。所出雜細大。風雲墮皮幘。幽坎窺鐵械。羣號起古聚。孤泣出空廡。妖狐冠鬪體。掩袂弄姿態。空轆伏逸囚。夜半出竊嘍。雖云多聞益。頗犯綺語戒。不如姑置之。投枕休困憊。明當掛祠衣。僕僕愁亟拜。

夜歸

飲酒不盡觴。觀棊不竟局。索馬踏街鼓。仰視月挂木。疾馳沿河隄。不記幾坊曲。到家四鄰寂。往往睡已熟。天香餘鼻鼻。佛燈猶煜煜。中庭雖一席。緩步意亦足。寒犬吠荆籬。棲鶻起叢竹。市聲從北來。始覺非林谷。卻尋西窗書。開卷剪殘燭。官閑居更遠。一笑謝羈束。

次韻鄭唐老

宦遊早日闕。相聞一面那。知乃爾勤秋。釣清灘方入夢。曉穿細仗又逢君。驟看落筆驚風雨。便擬同舟臥水雲。作意歸休還會否。暮年無力起斯文。

五鼓赴太社臘祭

霜寒裂屋瓦。月白射坊門。病骨愁看影。孤吟怯斷魂。飢鷹掣羈絆。老馬伏車轅。不奈清宵夢。殘蕪滿故園。

己酉元日

夜雨解殘雪。朝陽開積陰。桃符呵筆寫。椒酒過花斟。巷柳搖風早。街泥濺馬深。行宮放朝賀。共識慕堯心。以亮陰免賀禮。

送潘德久使薊門

崑崙東分一枝渾。奔蹴砥柱經龍門。羲皇受圖撫上古。神禹治水開中原。三靈實扶藝祖業。萬國共仰東都尊。羣兒撞壞吁可歎。願使殘虜今遊魂。因君試求出師路。孟津白馬應如故。不須更議繫河橋。北風正可乘冰渡。頗聞盧龍已數盡。復道飛狐合屯戍。轅門倘駐拂雲祠。烽火應過明妃墓。君歸解鞍藉芳草。細談塞北忘予老。讀書飲酒待賊平。萬丈旄頭方下掃。

我夢

我夢入煙海。初日如金鎔。赤手騎怒鯨。橫身當渴龍。百日京塵中。詩料頗闕供。此夕復何夕。老狂洗衰慵。夢覺坐歎息。杳杳三茆鍾。車馬動曉陌。不覺睡味濃。平生擊虜意。裂袷髮上衝。尚可乘一障。憑堞觀傳烽。晨起有感

痛飲可以豪。謝病可以高。計之顧不審。老與世俗塵。丈夫本自許。四十擁旌旄。上馬不回顧。賊穴窮腥臊。渭橋恥未雪。孰謂弓可褭。此志竟悠悠。徂歲行滔滔。一官客長安。燭下束弊袍。豈惟歎龍鍾。行恐悲蒼蒿。吾曹議古人。後亦觀吾曹。浮雲易變滅。公議終堅牢。

南省宿直

檐角參差散暮霞。重門鎖斷市聲譁。風經綠樹鴉棲穩。月入空廊柱影斜。藤紙靜臨新獲帖。銅瓶寒浸欲開花。誰知今夕幽窗夢。又榜扁舟上若耶。

又

頽然靜對北窗燈。識字農夫有髮僧。但遣奚奴持古錦。何須侍史護青綾。塵埃奔走無由息。疾病侵陵不自勝。猶喜眼中多壯觀。時看雲海化鯤鵬。





# 陸放翁集

劍南詩稿

卷第二十一

夜歸磚街巷書事

近坊燈火如晝明。十里東風吹市聲。遠坊寂寂門盡閉。只有煙月無人行。誰家小樓歌惱儂。餘響縹緲紫  
簾櫳。苦心自古乏眞賞。此恨略與吾曹同。歸來空齋臥淒冷。燈前病骨嶮嶮影。獨吟古調遣誰聽。聊與梅  
花分夜永。

馬上作

三十年前客帝城。城南結騎盡豪英。湖山冷落悲陳迹。文字流傳付後生。衰老更禁新臥病。塵埃時拂舊  
題名。馬頭風捲飛花過。又得殘春一日晴。

行在春晚有懷故隱

老辱明時乞一官。逢春惆悵獨無歡。舊人零落北音少。市肆蕭疎民力殫。歸計已栽千箇竹。殘年合挂兩  
梁冠。石帆山路頻回首。箭茁蓴絲正滿槃。

儀曹直廬

春晚氣始和。微雲淡朝陽。開軒面小庭。露漬薔薇香。遊絲卷欲盡。忽復百尺長。而我正遺事。枕藉書一牀。

讒波雖稽天，未遽妨人狂。惟當傾綠酒，莫待熟黃粱。

讀書

兩兩星躔九九車，天津笑我醉騎驢。床頭正可著周易，架上何妨抽漢書。幸有古人同臭味，不嫌兒子似迂疎。頽然白髮雖堪鄙，耐事禁愁卻有餘。

小昭慶院講僧舊在都下與之相從今沒已久見畫像於院中作詩弔之

囊歲曾陪夜講燈，伏犀插腦齒如冰。假令重見應難識，遺像瓏然一老僧。

晨入省中偶書

清風拂畫簾，初日照素壁。花枝蝶小憩，草葉露時滴。房櫳闕無人，溝水聲激激。摩挲語枯筇，伴我住幽寂。

春晚

今年病過春，得健春欲盡。更堪風雨橫，紅溼棲綠潤。一笑本自難，造物復爾吝。榆莢堆平塔，柳絮飛作陣。塵埃生破糝，霜雪滿衰鬢。平生慕陶謝，著語終不近。

觀潮送劉監至江上作

江平無風面如鏡，日午樓船帆影正。忽看千尺涌濤頭，頗動老子乘桴興。濤頭洶洶雷山傾，江流卻作鏡面平。向來壯觀雖一快，不如帆映青山行。嗟余往來不知數，慣見買符官發渡。雲根小築幸可歸，勿爲浮名老行路。

新晴馬上

一劍飄然萬里身。白頭也復走京塵。畫樓酒飾滴殘雨。綠樹鶯聲催暮春。絕塞勒回勳業夢。流年換盡市朝人。此生安得常強健。小艇湘湖自采蓴。湘湖在蕭山縣。

過六和塔前江亭小憩

斷岸孤亭日暮時。欄邊聊試葛巾欹。偶觀挂席乘潮快。便覺懸車納祿遲。痛飲相如無奈渴。清言叔寶不勝羸。年來親友凋零盡。惟有江山是舊知。

春夕睡覺

破衫羸馬老黃塵。人自衰遲歲自新。積雨恐侵春甲子。昏燈嬾守夜庚申。花枝影轉欹殘月。鼻鼾聲撼四鄰。自笑功名猶有夢。散關金鼓震函秦。

送霍監丞出守盱眙

淮浦鱗鱗浸碧天。卽今誰料作窮邊。空聞甌脫嘶胡馬。不見浮屠插霽煙。亭障久安無檄到。盃觴頻舉有詩傳。長城萬里英雄事。應笑窮儒飽晝眠。

寄題徐載叔秀才東莊東莊乃藏書之所

次公醒狂何必酒。直諒多聞俱可友。萬籤插架號東莊。多稼連雲亦何有。今年偶入長安城。不識貴人呼作卿。南臺中丞掃榻見。北門學士倒屣迎。郎官酸寒誰肯顧。君來下馬談至莫。東莊雖富未可矜。更要縱橫開武庫。

入省

點點輕花墮綠盃。翩翩羸馬犯黃埃。眼邊好句等閑過。夢裏故人時一來。玉塞請行狂放在。霜髭自照老  
相催。今朝涼冷文書少。隱几南窗聽轉雷。

出省

五更束帶聽朝雞。出省還家日已西。酒市雨餘青旆重。河橋風爽紫驄嘶。久慙旅飯糜倉粟。常憶新橙擣  
膾齋。萬事似棋聊爾耳。年來著數不勝低。

和周元吉右司過弊居追懷南鄭相從之作

梁益東西六十州。大行臺出北防秋。閱兵金鼓震河渭。縱獵狐兔平山丘。露布捷書天上去。軍諮祭酒幄  
中謀。豈知今日詩來處。日落風生蘆荻洲。

尤延之侍郎屢求作遂初堂詩詩未成延之去國因以奉送

印何纍纍綬若若。只堪人看公何樂。忽然振袖開布帆。慰滿平生一丘壑。遂初築堂今幾時。年年說歸真  
得歸。異書名刻堆滿屋。欠伸欲起遭書圍。捨之出遊公豈誤。綠髮朱顏已非故。請將勳業付諸郎。身踐常  
年遂初賦。

送張野夫寺丞牧滁州

皇天方憂九州裂。建隆真人仗黃鉞。陣雲冷壓清流關。賊壘咿嚶氣如髮。逋誅猾虜入檻車。北風吹乾草  
頭血。一龍上天三百年。舊事空聞遺老說。金印斗大誰作州。公子玉面蒼髯虬。賦詩健筆挾風雨。論兵辯  
舌森戈矛。別君帳飲灞橋頭。長歌爲君寬旅愁。戰場遺迹儘可畫。尺素寄我關河秋。

史院書事是日丞相過局

信史新修稿滿牀。牙籤黃帊帶芸香。中人馳賜初宣旨。丞相傳呼早出堂。皇祖聖謨高萬古。諸賢直筆擅三長。孤臣曾趣龍墀對。白首爲郎只自傷。紹興辛巳嘗蒙恩賜對。今三十九年矣。

病中數辱會無逸架閣見問今日忽聞徙居走筆奉簡因致卜鄰之約

病羸不辦攬衣迎。剝啄空慙扣戶聲。凡藥豈能驅二豎。清心幸足制三彭。巷南僦屋儻可問。歲晚囊衣吾亦行。不爲朝天愁路澀。夜窗燈火要尋盟。

喜楊廷秀祕監再入館

公去蓬山輕。公歸蓬山重。錦囊三千篇。字字律呂中。文章實公器。當與天下共。吾嘗評其妙。如龍馬受轡。燕許亦有名。此事恐未夢。嗚呼大廈傾。孰可任梁棟。願公力起之。千載傳正統。時時醉黃封。高詠追屈宋。我如老蒼鶻。寂寞愁獨弄。杖屨勤來遊。雪霽梅欲動。

次韻和楊伯子主簿見贈

齋戒叩頭賤。天公幸矣使我爲枯蓬。枯蓬於世百無用。始得曠快乘秋風。此生安往失貧賤。白髮蕭蕭對黃卷。今人雖鄰有不覲。古人卻向書中見。猿啼月落青山空。舊隱夢寂思東蒙。不願峨冠赤墀下。且可短劍紅塵中。終年無人問良苦。眼望青天惟自許。可憐對酒不敢豪。它日空澆墳上土。文章最忌百家衣。火龍黼黻世不知。誰能養氣塞天地。吐出自足成虹蜺。渡江諸賢骨已朽。老夫亦將正丘首。杜郎苦瘦帽攔耳。程子久貧衣露肘。君復作意尋齊盟。豈知衰懦畏後生。大篇一讀我起立。喜君得法從家庭。鯤鵬自有

天池著。誰謂太狂。須束縛。大機大用。君已傳。那遺老夫安注腳。杜輿伯高。程有徽。文若皆近。以詩文得名於諸公。而尤與予善。

簡何同叔

白髮都門客。青燈夜雪時。盡捐塵世事。細看月湖詩。格律冰霜敵。襟懷猿鶴知。吾儕端後死。此事要深期。  
去國待潮江亭太常徐簿宋卿載酒來別

昨解魚符已徑歸。偶隨尺一起柴扉。暫留已媿黔吾突。久住空令緇客衣。外物紛紛何足問。故人眷眷莫相違。從今再見應無日。長與沙鷗共釣磯。

醉中作行草數紙

還家痛飲洗塵土。醉帖淋漓寄豪舉。石池墨瀋如海寬。玄雲下垂黑蛟舞。太陰鬼神挾風雨。夜半馬陵飛萬弩。堂堂筆陣從天下。氣壓唐人折釵股。丈夫本意陋千古。殘虜何足膏礎斧。驛書馳報兒單于。直用毛錐驚殺汝。

雪夜小酌

黃昏雲齊雪意熟。二更雪急簌簌。地爐對火得奇溫。兔醢魚鱸窮旨蓄。引盃且作稿面紅。脫帽不管衰鬢禿。浩歌三終徐自和。藏書萬卷方盡讀。從來本不擇死生。況復區區論禍福。雪晴著屐可登山。與子一放千里目。

卽事

壁編茅養病翁。五更擁褐聽霜風。老雞棲冷啼偏早。宿火灰深撥更紅。知我向來惟斷簡。會心終竟在孤蓬。東歸已賈腰間劍。魯叟從今不諱窮。

到家旬餘意味甚適戲書

天恐紅塵著腳深。不教經歲去山林。欲酬清淨三生願。先洗功名萬里心。石鼎鷓鴣閑煮茗。玉徽零落自修琴。晚來剩有華胥興。臥看西窗一炷沉。

雨後復小雪

雨雪來無已。冬春忽欲交。賤貧安淡薄。老鈍耐譏嘲。村酒兒能取。農書手自鈔。暮年真箇嬾。屋漏旋添勃。

鯉魚行

鯉魚財三尺。淺水不覆脊。雖懷江湖樂。已歎刀几赤。長鯨之長幾千丈。雪蹴山傾萬重浪。縱遊不厭滄海寬。一躍已在青天上。身世局促古所哀。險嚼貪餌胡爲哉。人間溝瀆莫更顧。夜半變化乘風雷。

雪夜作

雪重從壓竹。竹折有奇聲。雪深亦莫掃。小窗終夜明。我老尙耐冷。開卷對短檠。龍茶與羔酒。得失不足評。但思被重鎧。夜入蔡州城。君勿輕癯儒。有志事竟成。

晨起

倦枕廉纖雨。幽窗料峭寒。溪柴旋篝火。野蔌鬪登槃。年老衣冠古。身閑宇宙寬。兒孫生我笑。趨揖已儒酸。鄉市小把柴。謂之溪柴。蓋自若耶來也。

野饋

經年倉粟厭陳陳。天遣香秬饋野人。黃耳蕈生齋鉢富。白頭非出客盤新。此生不復營三釜。一飽何曾羨八珍。尚媿古來高士在。盃羹無糝甑生塵。

醉中浩歌能戲書

造物小兒如我何。還家依舊一漁蓑。穿雲逸響蘇門嘯。卷地悲風易水歌。老眼閱人真爛熟。壯心得酒旋消磨。傍觀虛作窮愁想。點檢霜髯卻未多。

朝雨

甲夜星照泥平旦。雲行西。小屋古澤中。天昏雨淒淒。避溼升我堂。垂翅閱老雞。所欣園中蔬。冒土青滿畦。門無今雨客。路滑愁長堤。一盃且復睡。物理何足齊。

春雨

苦雨何時止。微雲又作陰。傍簷時小立。隱几復微吟。枝重殘紅濕。隄平漲綠深。物華元自好。老病負登臨。

又

春愁無處避。春雨幾時晴。黯黯陰連月。蕭蕭滴到明。窗昏減書課。弦緩咽琴聲。何以娛幽獨。新醅手自傾。

記夢

夢裏都忘兩鬢殘。恍然白紵入長安。種教紙熟修溫卷。儻得驢騎候熱官。紅葉滿街秋著句。青樓燒燭夜追歡。如今萬事消除盡。老眼摩挲靜處看。



野興

紅飯青蔬美莫加。鄰翁能共一甌茶。舍西日緊花房斂。港北風生柳腳斜。筇杖不妨閑有伴。茆簷終勝老無家。自驚七十猶強健。采藥歸來見暮鴉。

又

鬢邊莫笑久星星。造物常鍾我輩情。每帶除醒蹋花影。又和殘夢聽鶯聲。軒窗風過書籤亂。洲渚潮生釣艇橫。韓子未除豪氣在。文章都待不平鳴。

杭州夜歸

昔如架上九秋鷹。今似窗間十月蠅。無復囊韃思出塞。不妨粥飯略同僧。白蘋洲晚初回櫂。綠樹村深已上燈。莫謂陶詩恨枯槁。細看字字可銘膺。

又

野艇迢迢信所之。歸來常及欲昏時。陂塘煙重怨姑惡。林薄月明悲子規。出谷寺鐘初縹緲。穿籬積火已參差。欣然笑向簷門說。又了浮生一首詩。

或問余近況示以長句

天亦知予嬾是真。暮年乞與自由身。幽尋東浦鷺迎櫂。獨臥北窗鶯喚人。野卉滿頭狂取醉。草廬容膝樂忘貧。死時是處堪藏骨。不用要離更作鄰。

估客有自蔡州來者感悵彌日

洮河馬死劍鋒摧。綠髮成絲每自哀。幾歲中原消息斷。喜聞人自蔡州來。

又

百戰元和取蔡州。如今胡馬飲淮流。和親自古非長策。誰與朝家共此憂。

初夏郊行

小硯孤吟恐作愁。長堤曳杖且閑遊。破雲山踔千螺翠。經雨波涵一鏡秋。  
粧妝青紅村步市。闌干高下寺家樓。去年此日君知否。十丈京塵沒馬頭。

重午

葉底榴花盛絳繒。街頭初賣苑池冰。會稽不藏冰。賣者皆自行在來。世間各自有時節。蕭艾著冠稱道陵。

夏日

赤日黃塵襍穢忙。放翁湖上獨相羊。竹梢露滴驚殘夢。荷蓋風翻送早涼。暑用酒逃猶有待。熱憑靜勝更無方。空齋一榻翛然臥。閑看衣篝起篆香。

睡起見楊花滿庭偶書

斷香裊裊傍窗紗。睡起曹騰日未斜。堪歎一春風雨惡。今年四月見楊花。

梅雨

沐罷斜簪二十冠。斷雲殘靄暗江干。絲絲梅子熟時雨。漠漠楝花開後寒。剩采芸香辟書蠹。旋舂麥粳續家餐。日長倦睫惟思閉。茗椀真須抵死寬。

醉歌

讀書三萬卷。仕宦皆束閣。學劍四十年。虜血未染鏑。不得爲長虹。萬丈掃寥廓。又不爲疾風。六月送飛電。戰馬死槽櫪。公卿守和約。窮邊指淮淝。異域視京雒。於乎此何心。有酒吾忍酌。平生爲衣食。斂版靴兩腳。心雖了是非。口不給唯諾。如今老且病。鬢禿牙齒落。仰天少吐氣。餓死實差樂。壯心埋不朽。千載猶可作。

醉書秦望山石壁

秋雨初霽開長空。夜天無雲吐白虹。擘波浴海出日月。破山卷地驅雷風。崑崙黃流瀉浩浩。太華巨掌摩穹穹。平生所懷正如此。拜賜虛皇稱放翁。放翁七十飲千鍾。耳目未廢頭未童。向來楚漢何足道。真覺萬古無英雄。行窮禹迹亦安住。聊借曠快洗我胸。濤瀾屢犯蛟鱗怒。澗谷或與精靈逢。黃金鑄就決河塞。倅獻頡利長安宮。不如醉筆掃青嶂。入石一寸豪健驚天公。

秋夜

藥餌扶衰疾。琴書返故園。陶公方止酒。棄令且清言。煙鳥宿沙際。露螢明草根。塵囂不到處。此意與誰論。

夜意

孤夢初回夜氣清。世塵掃盡覺心平。月沉洲渚漁歌遠。人語比鄰續火明。獨汲寒泉鳴細綆。靜聽漏鼓下高城。悠然坐待東方白。卻看軒窗淡日生。

蝸廬

小葺蝸廬使著家。檣籬莎徑任欹斜。爲生草草僧行腳。到處悠悠客泛槎。孤蝶惜衣晴曝粉。穉蜂貪蜜晚

爭花有書懶讀吾堪愧。睡起何妨自禮茶。

予十年間兩坐斥臯雖擢髮莫數而詩爲首謂之嘲詠風月既還山遂以風月名小軒且作絕句扁舟又向鏡中行。小草清詩取次成。放逐尙非餘子比。清風明月入臺評。

又

綠蔬丹果薦瓢尊。身寄城南禹會村。連坐頻年到風月。固應無客叩吾門。

題梅漢卿醉經堂

它人爛醉錦瑟傍。君獨醉心編簡香。沉酣骨髓春盎盎。如枕麴蘖羅盃觴。三萬牙籤插高架。五千黃卷撐枯腸。信哉名教有樂地。白首不入無功鄉。

得親舊書問近況以詩代書報之

溪頭日日弄潺湲。敢料餘生竟得全。白簡免勞中執法。青銅罷算小行年。花前一笑頻開口。林下深藏永息肩。欲養金丹還懶去。身今已是地行仙。

放逐

放逐雖慙處士高。笑譚未減少年豪。青山隨處有三窟。白首今年無二毛。正得筇枝爲老伴。盡將書帙付兒曹。飲酣自足稱名士。安用辛勤讀楚騷。

月下野步

空中磊落斗跨天。道旁荒寒月滿川。行歌驚起鷗鷺眠。三萬里在拄杖邊。敲門索酒太華前。飛渡黃河不

須船袖中短鐵青蜿蜒。昔曾巴丘從老仙。削平巖崖扶雲煙。此妙可得不可傳。雷聲殷殷電煜然。已覺遼碣無腥羶。雪花如席登祁連。歸來卻看東封年。

自詠

孤艇渺煙波。衡門暗薛蘿。衣冠醉學究。世有醉學究圖。毛骨病維摩。撫几時長喟。臨觴亦浩歌。無勞問蝸角。蠻觸正橫戈。

午睡起遇急雨

揩眼捫髻破晝眠。闌邊小立獨幽然。叢花雨打無飛蝶。高柳風驚有墮蟬。才路本居元子下。功名那計祖生先。今朝會意君知否。目送飛雲揮五絃。

夜雨暴至

堂中虛窗雨氣入。堂前叢竹雨聲急。山童束縵走求火。屋漏惟愁打書溼。秋風穰穰九千頃。自饒湖北際海墾地凡九千頃。皆同鄉上腴也。此夕真成傾玉粒。蹋歌作社約比鄰。一飽今年可平埽。

睡起作帖數行

睡餘得清風。起坐傍書几。日長誰晤言。賴此管城子。欣然共遊戲。一笑我忘爾。羣鴻偶下集。但怪驚不起。古來翰墨事。著意更可鄙。跌宕三十年。一日造此理。不知筆在手。而況字落紙。三叫投紗巾。作歌識吾喜。

新秋

短鬢蕭蕭失舊青。此身已看作郵亭。新秋無限淒涼意。盡付風蟬與露螢。

秋興

去秋尙十日，軒窗夕已涼。露草黏溼螢，壞壁啼寒蠶。丈夫志四海，臨書慨以慷。白髮忽如此，惟有歸耕桑。藥餌且枝梧，鄰曲相扶將。豈無甕中酒，老病不能觴。南山有歸處，歲晚柏已行。下從吾親游，此事歲月長。

又

無食苦日長，無衣念秋近。雖云老農圃，未害樂堯舜。士生要弘毅，病在墮驕吝。得喪纔幾何，哀哉以身徇。平生最耐事，霜雪亦滿鬢。憂患一洗空，吾道其少進。

幽居

幽居人迹稀，柴扉晝常掩。小池清見底，疎雨時數點。蟬嘒秋未衰，花房暮先斂。老大固多傷，年華還冉冉。山居食每不肉，戲作

谿友留魚不忍烹，直將蔬糲送餘生。二升畚粟香炊飯，一把畦菘淡煮羹。莫笑開單成淨供，也能捫腹作徐行。秋來更有堪誇處，日傍東籬拾落英。

自笑

諸公袞袞幾金貂，自笑無材負聖朝。老氣醉中猶跌宕，閑身夢裏亦逍遙。舊書日伴吾兒讀，薄飯時從野叟招。病後秋衣須早製，竹窗殘夜雨蕭蕭。

世上

世上悠悠東逝波，金丹將奈鬢絲何。牆頭楊柳知秋早，窗外芭蕉受雨多。伏櫪自應如老驥，還鄉元欲借

明馳吾棊一局千年事。從使旁觀爛斧柯。

夜歸偶懷故人獨孤景略

買醉村場半夜歸。西山落月照柴扉。劉琨死後無奇士。獨聽荒雞淚滿衣。

秋夜自近村歸

江頭浩歌天宇寬。刺船歸來清夜闌。女貞林黑月未上。姑惡聲悲村已寒。不恨故交日零落。本知浮生難控搏。頭童面槁更安往。莫問傍人君自看。

夜聞蟋蟀

布穀布穀解勸耕。蟋蟀蟋蟀能促織。州符縣帖無已時。勸耕促織知何益。安得生世當成周。一家百畝長無愁。綠桑鬱鬱暗微徑。黃犢叱叱行平疇。荆扉績火明煜煜。黍壠饁飯香浮浮。耕亦不須勸。織亦不須促。機上有餘布。盎中有餘粟。老翁白首如小兒。鼓腹擊壤相從嬉。

秋夜風雨暴至

風聲掠野來。湏洞如翻濤。雨聲集庭木。桐葉聲最豪。殘暑一洗空。凜然念綈袍。秋穀已登場。欲忘終歲勞。東舍捉鵝鴨。西舍烹豚羔。籬落開寒花。房櫳壓小槽。貧賤何所歎。樂歲成吾高。卻拾牆角檠。拂拭賀汝遭。月下小酌

草樹已秋聲。郊原喜晚晴。風生雲盡散。天闊月徐行。下箸槎頭美。傳盃甕面清。追歡猶可勉。徂歲不須驚。鄰曲有未飯。被追入郭者。憫然有作

春得香秬摘錄葵。縣符急急不容炊。君王日御金華殿。誰誦周家七月詩。

吾廬

吾廬鏡湖上。傍水開雲扃。秋淺葉未丹。日落山更青。孤鶴從西來。長鳴掠沙汀。亦知常苦飢。未忍吞羶腥。我食雖不肉。匕箸窮芳馨。幽窗燈火冷。濁酒倒殘瓶。

飲酒望西山戲詠

太白十詩九言酒。醉翁無詩不說山。若耶老農識幾字。也與二事日相關。

小院

小院回廊夕照明。放翁宴坐一筇橫。銅匳暖徹香初過。鐵杵聲清藥欲成。世事熟看無一可。古人不作與誰評。新涼社酒家家熟。使用陽狂了此生。

發篋得故人書有感

衰鬢星星換舊青。世間萬事但堪驚。晨炊欲熟客未覺。夜漏漸殘人尙行。花發且爲無事飲。詩成非復不平鳴。京華明舊凋零盡。忽見緘題似隔生。

秋光

年年最愛秋光好。病起逢秋合賦詩。叢菊漸黃人醉後。孤燈初暗雨來時。舊書細讀猶多味。老態相尋似有期。早信爲農勝覓祿。一生虛作虎頭癡。

晚秋風雨



儘道漁村陋。秋來物色奇。寒生沽酒興。雨及種花時。狂舞欲誰屬。清吟空自知。茫茫宇宙內。吾道竟何之。

幽居

白髮蕭蕭僅到肩。一枝藤杖日翩躚。草苫牆北棲雞屋。泥補橋西放鴨船。心似枯葵空向日。身如病櫟孰知年。放懷却有愴然處。不養金丹不學禪。

又

面面秋山擁翠屏。天留三畝著雲扃。迎霜南阜楓林赤。飽雨西村菜甲青。散策人驚衰後健。浩歌自覺醉中醒。凌煙冠劍應無爾。布帽羈縻老管寧。

故山

功名莫苦怨天慳。一櫂歸來到死閑。傍水無家無好竹。卷簾是處是青山。滿籃箭茁瑤簪白。壓擔稜梅鶴頂殷。野興盡時尤可樂。小江煙雨趁潮還。鏡湖

又

禹祠行樂盛年年。繡轂爭先罨畫船。十里煙波明月夜。萬人歌吹早鶯天。花如上苑常成市。酒似新豐不直錢。老子未須悲白髮。黃公墟下且閑眠。禹祠

又

老尉鴻飛隱市門。千年猶有舊巢痕。陸生於此寓棋局。子二十年前嘗寓居。曾丈時來開酒樽。曾丈謂文清公。渺渺帆檣遙見海。冥冥蒲葦不知村。數僧也復投詩社。零落今無一二存。梅山。

又

落磡泉奔舞玉虹。護丹松老臥蒼龍。霜柑籬角寒初熟。野碓雲邊夜自舂。挈榼人沽村市酒。打包僧趁寺樓鐘。幽尋自是年來嬾。枉道山靈不見容。雲門。

秋晚弊廬小葺一室過冬欣然有作

放翁畢竟合躬耕。剩喜東歸樂太平。碧瓦新霜寒尙薄。明窗嫩日雨初晴。素琴尋得無絃曲。野餉烹成不糝羹。更說市朝癡太絕。一湖秋水濯塵纓。

小室晚酌

病不禁寒怯早霜。東齋隨事具盃觴。清時寬大何妨醉。白首龍鍾未減狂。枝葉扶檠山果熟。鹽醃調適野蔬香。興闌徑覓華胥路。枕藉圖書滿一牀。

冬晚山房書事

山澤何妨老太平。巉巖骨相本來清。月明滿地看梅影。露下隔溪聞鶴聲。未辨藥苗逢客問。欲酬琴價約僧評。胡奴仁祖今俱絕。且學湘纍拾菊英。

又

屏迹山村病日增。烏皮几穩得閑凭。凍雲傍水封梅萼。嫩日烘窗釋硯冰。歲盡光陰饒袞袞。身閑醉夢且騰騰。蠻童采藥歸來晚。客至從噓喚不應。

村居日飲酒對梅花醉則擁紙衾熟睡甚自適也

江村歲晚掩柴荆。地僻久無車馬聲。孤寂惟尋麴道士。一寒仍賴楮先生。醉頭珠滴愁先破。帳底春回夢易成。莫笑衰翁殺風景。小瓶梅蕊解卿卿。

山居壘韻

禽吟陰森林。鹿伏樸檉木。嗚呼吾徒愚。僕僕逐肉粟。聯翩憐鳶肩。覆餗速戮辱。艱難還山間。獨欲足畜牧。躋梯棲西谿。築屋宿北谷。光芒常當藏。積玉觸俗目。

寓歎

心已忘斯世。天猶活此翁。嫩湯茶乳白。軟火地爐紅。課婢耘蔬甲。呼兒下釣筒。生涯君勿笑。聊足慰塗窮。

又

久矣門無客。高齋獨掩扉。敢言消壯志。要是息危機。清露夜自滴。孤雲寒不歸。晨炊勿關念。更典篋中衣。

又

裘薄使冬暖。簟空畏午飢。臨成乞米帖。看入借車詩。學古心猶壯。愛時語自悲。公卿闕自重。社稷欲誰期。



# 陸放翁集

劍南詩稿

卷第二十二

贈惟了侍者

水邊剝啄打門誰。滿袖清風一紙詩。驚起放翁蝴蝶夢。半窗寒日欲斜時。

又

雪中僵臥不須悲。徹骨清寒始解詩。一等人間閑草木。月窗君看早梅枝。

題湖邊旗亭

春色初回杜若洲。佳人又典鸕鷀裘。八千里外狂漁父。五百年前舊酒樓。渡口遠山顰翠黛。天邊新月挂瓊鉤。回頭笑向紅塵說。也有閑愁到此不。

醉臥道邊覺而有賦

太華五千仞。天台四萬丈。一枝古藤如黑龍。天遣飄然寄閑放。莫怪公卿不我知。我自不知渠是誰。史書弄筆後來事。繡鞍寶帶聊兒嬉。旗亭爛醉官道臥。醒後無人數吾過。世間恩怨一時空。且免它年送臨賀。

寓懷

脫粟未爲飢。短褐未爲寒。衆毀心自可。身困氣愈完。茆屋雖三間。趺坐則已寬。濁酒不滿瓢。浩歌有餘歡。

祿食妻子樂。功名後人看。成敗兩蝸角。貴賤一鼠肝。茫茫百年夢。底物堪控搏。不如學餐霞。駐此雙頰丹。行披終南雲。飛渡黃河湍。歸然過空城。人言古長安。霜露蒙荆榛。喟然增永歎。

又

蒼壁與黃琮。初非俗所貴。粲然薦纁藉。可對越天地。我豈賣餅兒。自銜三家市。持槃叫道邊。雖售無乃媿。文章等卜祝。王公以儒戲。書成藏名山。此是千載事。

又

我昔浮滄溟。浩渺難具論。華夷溱不辨。日月互吐吞。神龍忽上騰。尾鬣風霆奔。積浪自生火。烈焰焚乾坤。笑謂同舟子。世豈無鵬鯤。聊持豪逸氣。壓汝破碎魂。

又

鮑魚載沙丘。鹿馬獻阿房。泗上老亭長。仿伴起東方。干戈暗寓縣。鯨徒化侯王。富貴誠可慕。葅醢亦足富。青門獨無羔。種瓜亦何傷。後有阮嗣宗。識絕未易量。楚漢真豎子。孰謂斯人狂。

喜事

武夷老子雪垂肩。喜事何曾減少年。鸚鵡螺深翻細浪。辟邪爐暖起微煙。幽花滴露霑紗帽。亂絮憑風撲畫船。虎豹九關君勿歎。未妨一笑住壺天。

甜羹菘蘆服山藥芋作羹

山廚薪桂軟炊杭。旋洗香蔬手自烹。從此八珍俱避舍。天蘇甌味屬甜羹。

縱筆

文叔一人知此翁。洛陽城裏又春風。讓他綠髮好年少。二十四歲作三公。

又

一紙除書到海邊。紫皇賜號武夷仙。功名敢道渾無意。暫作閑人五百年。

又

背上嵯峨兩肉山。明騶有債自須還。玉霄峯頭雪色鹿。清曉一聲煙雨間。

又

素月徘徊牛斗間。天風吹鶴度函關。一年似此佳時少。喚起陳搏醉華山。

自嘲解嘲

世變真難料。吾癡只自嘲。移山謀畚土。黏日欲煎膠。得句題修竹。烹茶拾墮篋。行年不須算。斷是死衡茆。

又

種稻稽山下。誅茆剡曲傍。鳴雞耐昏早。飛燕異炎涼。古劍寒三尺。殘書亂一牀。穹穹與厚厚。能識我非狂。

春雨絕句

恰喜西窗晚照明。虛簷又報雨來聲。端憂不用占龜兆。壞盡花時自解晴。

又

千點猩紅蜀海棠。誰憐雨裏作啼粧。殺風景處君知否。正伴鄰翁救麥忙。

又

天公似欲敗蠶麤。雨冒南山暮不收。騃女癡兒那念此。貪看科斗滿清溝。

又

今年春半不知春。飛雹奔雷嚇殺人。縫得春衫元未著。免教惆悵洛陽塵。

又

梅中最晚是緗梅。一日來看欲百回。俗紫凡紅終避舍。不妨自向雨中開。

又

蕭條冬令侵春晚。淅瀝寒聲滴夜長。更事老翁頑到底。每言宜睡好燒香。

雨中臥病有感

病臥窮山白髮新。不堪風雨過中春。歌呼空倚一尊酒。零落漸無吾輩人。千載詩書成長物。兩京宮闕委胡塵。非熊老子不復見。誰弔遺魂清渭濱。

舟中作

不遷比景戍交河。三徑歸來得已多。應俗愈疎身老大。讀書漸廢意蹉跎。閑從孫叟蘇門嘯。醉和荆卿易水歌。歌罷卻揮孤櫂去。石闌干下買漁蓑。石闌干在剡谿道中。

山園

買得新園近釣磯。旋營茆棟設柴扉。山經宿雨修容出。花倚和風作態飛。世事只成驚老眼。酒徒頻約典



春衣狂吟爛醉君無笑。十丈愁城要解圍。

聞虜亂

運數羣胡盡。煙塵北道昏。百年身易老。萬里志空存。楊柳搖馳道。櫻桃奉寢園。南公忠義薄。此恨與誰論。

題千秋觀懷賀亭

河湟使典珥左貂。曲江相君謝不朝。宮中玉環狐作妖。黠虜旁窺心已驕。天維欲絕地軸搖。有識凜凜憂宗祧。賀公託言師松喬。黃冠徑歸侶漁樵。老馬立仗不自聊。去如鸞鳳冲煙霄。傾都祖餞擁涓橋。賢哉大夫脫塵囂。揚州渡江木蘭橈。入東夜聽錢塘潮。我來故祠竹蕭蕭。黃冠野服傳生綃。詞卑媿匪英瓊瑤。空采蘋藻奠桂椒。虛堂斷香閉寂寥。遺魂零落何由招。

禹祠

我昔下三峽。南賓繫歸臚。渡江謁神禹。拜手薦俎壺。壽藤枝如虬。巨柏腹若劔。門庭雖日荒。殿寢猶枝梧。巴俗喜禱祠。解牛舞羣巫。巍巍黻冕古。食與夷鬼俱。聖度固兼容。臣憤獨不攄。還鄉瞻廟貌。羸政久已除。嶽牧儼如生。想像聞都兪。廓清雖可喜。欲退復躊躇。念昔平水土。棋布畫九區。豈知千歲後。戎羯居中都。老虜失大刑。今復傳其雛。直令挽天河。未濯腥羶汗。夷鬼細事耳。披攘直須臾。天下讎不復。大恥何時祛。蚩蚩謂固然。此責在吾徒。揮涕灑庭草。誰憐小臣愚。

樊江

手中一卷養魚經。又向樊江上草亭。朝雨染成新漲綠。春煙澹盡遠山青。榜舟不厭頻來往。岸幘常須半

醉醒賦罷新詩自高詠。滿汀鷗鷺欲忘形。

東關

路入東關物象奇。角巾老子曳筇枝。蠶如黑蟻桑生後。秧似青鍼水滿時。穿市不嫌微雨溼。過谿翻喜壞橋危。當年野店題詩處。又典春衣具午炊。

又

雲蹙魚鱗襯夕陽。放翁繫纜水雲鄉。一筇疾步人驚健。斗酒高歌自笑狂。風暖市樓吹絮雪。蠶生村舍采桑黃。東阡南陌無窮樂。底事隨人作許忙。

練塘

微風吹頰酒初醒。落日舟橫杜若汀。水秀山明何所似。玉人臨鏡暈螺青。

娥江市

小聚依江近。支流入浦分。荒寒孤店雨。零亂野祠雲。薄餉炊畬粟。珍烹采澗芹。年來去健羨。摩腹自欣欣。

宿野人家

避雨來投白版扉。野人憐客不相違。林喧鳥雀棲初定。村近牛羊暮自歸。土釜煖湯先濯足。豆蔡吹火旋烘衣。老來世路渾諳盡。露宿風餐未覺非。

舟中遣懷

三黜歸來結草廬。平生狂態掃無餘。但思下帷授老子。那復騎牛讀漢書。歷歷舊遊渾似夢。蕭蕭殘髮不

勝梳。閔中事業君知否。不把漁竿卽荷鉏。

歸次樊江

芳草東西路。綠楊長短亭。人生豈匏繫。吾志本鴻冥。征袖朝霏雨。歸帆夜戴星。長魚幸能買。且復倒殘瓶。

夜過魯墟

中夜過魯墟。船底鳴細浪。月出菱歌長。林闇績火壯。故居不可識。四顧但青嶂。百年幾廢興。撫事一悽愴。士生本耕稼。時來偶卿相。功名亦餘事。所勉在素尚。况吾多難者。久已冥得喪。微祿行當辭。沒身事幽曠。

有感

溫洛榮河拱舊京。從來人物富豪英。報仇雖有楚三戶。守節得無齊二城。胡寇寧能斷地脈。王師行復暢天聲。鳳麟久伏應爭奮。勉爲明時頌太平。

遊石帆玉笥石旗諸山

暮景苦多病。幽尋寄一欣。溪喧常似雨。石潤易生雲。天迴回鴉陣。林疎過鹿羣。莫談朝市事。吾老厭紛紛。

信步近村

端閑何以永今朝。拈得筇枝度野橋。三畝空園喧啄木。十尋高樹絡凌霄。長飢未必緣詩瘦。多悶惟須賴酒澆。興盡歸來又陳迹。一林風葉暮蕭蕭。

寒食省九里大墓

陌上簫聲正賣餠。籃輿兀兀雨冥冥。人來平野一點白。山壓亂雲千疊青。石馬朱門松下路。凍齏冷飯柳

陰亭華巔尙記兒童日。撫事興懷涕自零。

平水道中

處處陂水滿。家家巢燕忙。葉舒桑漸闊。穗重麥初昂。高下山花發。青紅粉餌香。亦知時節好。老大自悲傷。  
五雲橋往時。鏡湖陂防不廢。則若耶溪水常滿。可行大舟至雲門。此橋本跨溪上。今乃在平陸矣。  
若耶北與鏡湖通。縹緲飛橋跨半空。陵谷變遷誰復識。我來徒倚暮煙中。

小雨雲門溪上

好雨疎疎壓暮埃。斷雲漠漠帶春雷。離黃穿樹語斷續。翠碧銜魚飛去來。生菜入盤隨冷麩。朱櫻上市伴青梅。狂吟不是誇強健。老氣如山未許摧。

雲門獨坐

山北山南處處行。回頭六十七清明。如今老去摧頽甚。獨坐焚香聽水聲。

泛湖至東涇

春水六七里。夕陽三四家。兒童牧鵝鴨。婦女治桑麻。地僻衣巾古。年豐笑語譁。老夫維小艇。半醉摘藤花。

又

湖光分別浦。嶺路過前村。泉石相縈帶。雲煙互吐吞。耕犁無易業。隣曲有通婚。試覓誅茆地。吾將遺子孫。

又

細細桃枝竹。疎疎麁眼籬。雪霜燒葑夜。月露采菱時。腰斧登山早。移罾出浦遲。關心盡幽事。恨汝不能詩。

舟過梅塢胡氏居愛其幽邃爲賦一詩

稽山翠入家家窗。此家清絕無與雙。丹葩綠樹錦繡谷。清波白石玻璃江。一堤茂草有眠犢。數掩短籬無吠龙。北軒商略可散髮。借與放翁傾酒缸。

北窗

北窗本意傲羲皇。老返園廬味更長。犢健戴星耕白水。蠶飢衝雨采青桑。俚儒朱墨開冬學。廟史牲牢祝歲穰。從此鬢毛雖似雪。未妨擊壤頌康唐。

聞蛙

科斗忽安在。蛙聲豪有餘。雖成兩部樂。恨失一編書。忿怒緣何事。號呼可奈渠。廚人不遐棄。猶得伴溪漁。

晚春感事

風惡房櫺燕子歸。雨多山路蕨芽肥。青糝旋擣作寒食。白葛預裁充暑衣。穉子日長供課早。故人官達寄書稀。幽居自喜渾無事。又向湖陰坐釣磯。

又

和風薄靄過清明。減盡重裘覺體輕。正午軒窗無樹影。乍晴阡陌有鶯聲。釀成西蜀鵝雛酒。鵝黃廣漢酒名。黃就東坡玉糝羹。捫腹脩然出門去。春郊何處不堪行。

又

徙倚闌干送落暉。年華冉冉恨依依。護雛燕子常更出。著雨楊花又嬾飛。已爲讀書悲眼力。還因攬帶歎

腰圍親朋半作荒郊冢。欲話初心淚滿衣。

又

少年騎馬入咸陽。鶻似身輕蝶似狂。蹴鞠場邊萬人看。鞦韆旗下一春忙。風光流轉渾如昨。志氣低摧只自傷。日永東齋淡無事。閉門掃地獨焚香。

山居

平生杜宇最相知。遺我巢山一段奇。茶磴細香供隱几。松風幽韻入哦詩。溪邊拂石同兒釣。竹下開軒喚客棋。幾許放翁新事業。不教虛過太平時。

四月三日同子坦子聿遊湖中諸山

我行無所詣。悠颺信舴艋。愛此綠樹村。捨棹度小嶺。路窮忽披豁。恍然得異境。蒼玉立萬峯。清鏡渺千頃。更爲西南行。聊破春晝永。遙看秀邃處。疑足事幽屏。一嶠果可人。奇石插碧井。鏘鳴若環珮。其味復甘冷。徘徊不忍去。照我鬢髮影。須臾日穿林。井面光炯炯。古今勝絕意。正用一笑領。安得絕世喧。於茲慕箕顓。

梅仙塢小隱

綠樹陰陰小嶺西。一翁二子自扶攜。雨前芳嫩初浮盃。臘腳清醇旋拆泥。本欲省緣行買餅。未能去殺尙烹雞。二者皆紀是日實事。弄橈莫便尋歸路。湖靜無風日未低。

盟雲

謂雲本無心。企望乃爾奇。謂雲果有心。百變端爲誰。豈憐此翁愁。一出怡悅之。橫截千嶂平。高擎一峯危。

銀城突嵯峨。玉海浩渺瀾。或爲羣龍矯。或作孤鶴飛。卷舒閑有態。去來倏無時。滃滃覆松頂。靄靄映水湄。帶雨過僧窗。和月傍釣磯。豈惟困畫工。吾詩固難追。惟當與之盟。畢世相娛嬉。忍飢固易耳。此友不可欺。

示兒

舍東已種百本桑。舍西仍築百步塘。早茶采盡曉茶出。小麥方秀大麥黃。老夫一飽手捫腹。不復舉首號蒼蒼。讀書習氣掃未盡。燈前簡牘紛朱黃。吾兒從旁論治亂。每使老子喜欲狂。不須飲酒徑自醉。取書相和聲琅琅。人生百病有已時。獨有書癖不可醫。願兒力耕足衣食。讀書萬卷真何益。

村居初夏

暮境難禁日月催。臘醅初見拆泥開。壓車麥穗黃雲卷。食葉蠶聲白雨來。薄飯蕨薇端可飽。短衫紵葛亦新裁。宦塗自古多憂畏。白首爲農信樂哉。

又

北陌東阡節物新。往來饋餉走比鄰。出籠鵝白輕紅掌。藉藻魚鮮淡墨鱗。笑語相聞豐歲樂。耕桑自足古風淳。頽然一醉茆簷下。且免西曹議吐茵。

又

煮酒開時日正長。山家隨分答年光。梅青巧配吳鹽白。筍美偏宜蜀鼓香。風暖緊催蠶上簇。雨餘閑看稻移秧。老夫見事真成晚。浪走人間兩鬢霜。

又

天遣爲農老故鄉。山園三畝鏡湖傍。嫩莎經雨如秧綠。小蝶穿花似繭黃。斗酒隻雞人笑樂。十風五雨歲豐穰。相逢但喜桑麻長。欲話窮通已兩忘。

又

故鄉風物勝荆吳。流水青山無處無。列植園林多美果。飽鉏畦壟富嘉蔬。橋邊來淬剝桑斧。池畔行芟縛糶菰。我有素紉如月扇。曾憑名手作新圖。

城東逆旅

店家乞火燎征衣。溼竹生薪不受吹。更甚從戎戍邊日。正如隨計入關時。百年擾擾夢相似。萬事悠悠心自知。賴有牀頭周易在。不妨清坐忍朝飢。

江村初夏

紫葢狼藉桑林下。石榴一枝紅可把。江村夏淺暑猶薄。農事方興人滿野。連雲麥熟新食麩。小裏荷香初賣鮓。蘋洲蓬艇疾如鳥。沙路芒屨健如馬。君看早朝塵撲面。豈勝春耕泥沒踝。爲農世世樂有餘。寄語兒曹勿輕捨。

舟中作

湖海飄然避世紛。汀鷗沙鷺舊知聞。漁舟臥看山方好。野店沽嘗酒易醺。病骨未成松下土。老身常伴渡頭雲。美芹欲獻雖堪笑。此意區區亦愛君。

東關



天華寺西艇子橫。白蘋風細浪紋平。移家只欲東關住。夜夜湖中看月生。

又

煙水蒼茫西復東。扁舟又繫柳陰中。三更酒醒殘燈在。臥聽蕭蕭雨打篷。

少微山

平生一舸艤。幾到少微山。傑觀掃無迹。高人呼不還。崖崩危欲壓。磴斷滑難攀。日暮增幽興。漁歌荅蒼間。

舟行至織女潭

艣枝搖碎碧琉璃。織女潭東白塔西。帶犢吳牛依茂樹。添巢海燕啄新泥。山谿曲折遙通谷。沙水淙潺各赴溪。猶恨兒曹不同載。一尊他日要重攜。

書歎

瀟落非時用。棲遲送此生。只知求醉死。何憚得狂名。伏櫪天涯老。吞舟海澨橫。眼前交舊盡。有淚對誰傾。

小園獨立

草香無處覓。花嫩不禁飛。澤國春歸晚。柴門客過稀。新泥添燕戶。細雨溼鶯衣。倚杖臨階久。衰翁氣力微。

觀蘇滄浪草書絹圖歌

天孫獨處河之湄。龍梭夜織冰蠶絲。機頭剪落光陸離。騎鯨仙人醉題詩。字大如斗健欲飛。利刃猛斫生蛟螭。墨渴字燥尤怪奇。百魁潛影神靈悲。嗚呼束雲作筆兮。海爲硯。激水上騰龍野戰。乾坤震蕩人始驚。筆未落時誰得見。

睡起書觸目

壓架藤花重團枝。杏子稠。渴蜂窺硯水。弱燕集簾鈎。入夏暑猶薄。投閑身自由。午窗初睡起。幽興付茶甌。

曉雨初霽

曉來一雨洗塵痕。濃綠陰陰可一園。燕子聲中寂無事。獨穿苔徑出籬門。

夏雨

連朝暑溽不可過。動地忽有東北風。嵯峨雲壓世界碎。天矯龍卷江湖空。塵沙洗濯草木醒。溝澮激盪舟舸通。更煩造物出壯觀。跨海千丈垂天虹。

自東涇度小嶺聞有地可卜菴喜而有賦

小嶺西南煙水間。頗聞有地百弓寬。誰其云者兩黃鵠。何以報之雙玉盤。竹塢未昏先曛暖。蓮汀常暑亦清寒。一菴何日從吾好。會約高人共倚闌。

露坐

五月暑猶薄。中庭試葛衣。蛙聲經雨壯。螢點避風稀。塵念三生誤。歸心半世違。殘年端有幾。可復負漁磯。

自笑

自笑胸中抵海寬。韭齋麥飯日加餐。住山綠熟塵機息。養氣功深槁面丹。惡路慣曾經灑灑。浮生何啻夢邯鄲。鏡湖五月秋蕭爽。剩傍灘頭把釣竿。

夜賦

夜窗搔首髮鬢髻。病不勝衣倚瘦藤。堪笑顏回忍飢面。常依韓愈看書燈。殘生已與灰俱冷。舊友誰如几可憑。月落風生忽增氣。掠蒼勁翮有歸鷹。

書懷

老死已無日。功名猶自期。清笳太行路。何日出王師。

醉後作小草因成長句

天教老去未全衰。猶欠縱橫萬首詩。家近將軍觴詠地。身如太史滯留時。酒翻銀浪紅螺酸。墨涌玄雲紫玉池。流落不妨風味在。花前醉草寫烏絲。

雨中作

空濛初喜灑欄楹。忽聽空階點滴聲。高枕便知宜夕睡。豐年不歎負春耕。多情幽草沿牆綠。無賴羣蛙繞舍鳴。屈指清秋兩旬近。卻愁徂歲又崢嶸。

詠史

入郢功成賜屬鏤。削吳計用載廚車。閉門種菜英雄事。莫笑衰翁日荷鋤。

登鵝鼻山至絕頂訪秦刻石且北望大海山路危甚人迹所罕至也

街頭旋買雙芒屨。作意登山殊不惡。蒼崖無罅竹鞭逸。崩石欲墜松根絡。憑高開豁快送目。歷險崎嶇危著腳。川雲忽起兩蛟舞。瀑水高吹萬珠落。大巖空腔誰所劖。絕壁峭立端疑削。坡平或可坐。百人峽束僅容飛。一鶴蛇蹊岌岌頭自眩。鬼谷慘慘神先愕。秦皇馬迹散莓苔。如鑄非鑄鑿非鑿。殘碑不禁野火燎。造

物似報焚書虐。人民城郭俱已非。煙海浮天獨如昨。

六七月之交山中涼甚

城市方炎熱。村墟乃爾涼。拂窗桐葉下。繞舍稻花香。獨鶴警秋露。雙螢明屋梁。臥聞機婦織。感歎夜初長。

幽居

大患元因有此身。百年強半走踈疎。折殘廣武城邊柳。染盡洛陽衣上塵。繞樹鵲孤棲漸穩。支牀龜老息初勻。出門不欲摩雙眼。世態年來又一新。

又

百頃菰蒲古澤中。老夫病起恰秋風。流年不貸人皆老。造物無私我自窮。市隱昔曾從嘯父。山栖今欲效園公。芳樽雖匪金丹術。槁面尊前也暫紅。

又

煙水重重際海涯。夜深風雨耿茆茨。交朋散落歡娛少。憂患侵陵志氣衰。癡腹何由有鱗甲。俗情自未去毛皮。詩書六十餘年夢。更擬傳衣付小兒。

園中雜詠

藝花本無多。過眼那復遺。陰陰一園綠。佳處乃在茲。悠然東窗下。顧與枕簟宜。風輕竹解箨。雨足果壓枝。

又

珍禽下上鳴。迨及清潤時。豈惟侑我觴。亦以起我詩。白練一團雪。來與紅練俱。魚虎飛照水。意若愛翠裾。





# 陸放翁集

劍南詩稿

卷第二十三

七月一日夜坐舍北水涯戲作

兀傲胡床酒半醒。釣筒收盡數舟橫。風生細葛無三伏。月上疎林正四更。北斗離離低欲盡。明河脈脈去無聲。斥仙豈復塵中戀。便擬騎鯨返玉京。

病後登山亭

野客雙蓬鬢。空山一草亭。睡魔欺茗薄。疾豎怯丹靈。治世窮馮衍。殘年老管寧。安居得後死。不敢恨飄零。

覽鏡

白頭漸覺黑絲多。造物將如此老何。三萬里天供醉眼。二千年事入悲歌。劍關曾蹴連雲棧。海道新窺浴日波。未頌中興吾未死。插江崖石竟須磨。比自三江航海至丈亭。

遣懷

許國區區不自勝。秋風空羨下鞦韆。青雲夜歎初心誤。白髮朝看一倍增。積憤有時歌易水。孤忠無路哭昭陵。唐制有冤者許哭昭陵下。頭顱自揣今如此。尙欲閑尋紫閣僧。陳希夷奇錢宣靖復招紫閣僧相之。

開元寺小閣十四韻

淵源兩名衲，築閣捫星辰。近山臥蜿蜒，遠山高嶙峋。朝看雨空濛，暮揖雲輪囷。賦詩有宿諾，下語終未親。萬法不孤起，請君作其因。高掛四面窗，淨掃一榻塵。室中絕人聲，門前謝車輪。容我睡半日，兩忘主與賓。緩燒海南沉，細碾建谿春。是間儻有句，可與屈宋鄰。詩如奮螭龍，天矯不受馴。使可造次得，何異池中鱗。世有擾龍手，媿我非其人。詩不已就乎，著眼勿逡巡。

寄題趙寬之主簿慈順堂

人間得意盡危機，獨有榮親事未非。魏闕恩光新綠綬，高堂娛侍舊斑衣。牙籤插架書無恙，蘭膳循垓養莫違。况有兩公天下士，爲君百斛瀉珠璣。謝昌國中丞楊廷秀祕監皆嘗有此作。

郊居

平生萬事不容求，惟有郊居志已酬。更漏遠城雞唱曉，歲時無曆葉知秋。潮生小舫行收获，月落長歌起飯牛。已作幸民仍醉死，人間毀譽判悠悠。

又

索米官倉例坐愚，東方未可戲侏儒。行藏要付他年看，富貴真堪一笑無。等死不過賒歲月，長閑勿更問妻孥。狂豪儘道非平昔，老膽輪囷尙滿軀。

新秋感事

江上清秋昨夜回，漁扉正對荻洲開。志存天下食不足，節慕古人讒愈來。風際紙鷂那解久，祭餘芻狗會堪哀。蕭然散髮聽秋雨，剩領新涼入酒盃。



又  
北渚秋風凋白蘋。流年冉冉默傷神。強顏未忍乞墻祭。積毀僅逃輸鬼薪。半榼浮蛆初試釀。兩螯斫雪又嘗新。受恩自度終無報。聊爲清時備隱淪。

八月一日微雨驟涼

流汗沾衣喘不供。孰知有此快哉風。新涼忽覺從天下。殘暑眞成掃地空。恰轉輕雷過林塢。已吹好雨到簾櫳。幽人病愈閑無事。剩賦歌詩樂歲豐。

秋雨

剡曲高秋一草亭。雨來迨我醉初醒。豪吞平野宜閑望。急打虛窗入靜聽。沙上溼雲號斷雁。籬根衰草綴孤螢。老人嬾復親燈火。臥看爐香掩素屏。

又

赤日黃塵勢已窮。七月中旬後。秋暑尤劇。淒風苦雨却忽忽。盛衰默定見天造。寒暑密移成歲功。柯葉凋零無茂木。羽翰顚頽有羈鴻。誰知病客悲秋意。盡在空塔點滴中。

又

冷雨蕭蕭澀不晴。叢篁遮盡小窗明。故衾獨展成酣寢。新釀初嘗得細傾。壁簡積陰添蠹字。牀琴生潤咽弦聲。此時懷抱眞難遣。一首清詩信筆成。

月下獨坐

髮根蕭爽受微風。徒倚闌干月正中。天宇了無雲一點。城樓俄報鼓三通。庭臯簌簌吹凋葉。江渚翩翩落斷鴻。回首人間塵土惡。騎鯨聊駐水精宮。

秋日步至湖桑埭西

伏枕衰方劇。搯筇氣忽增。細泉鳴暗竇。疎樹映孤燈。斷雁寒依渚。強魚健脫罾。行纏已無用。卻作在家僧。

秋社

明朝逢社日。鄰曲樂年豐。稻蟹雨中盡。海氛秋後空。不須諛土偶。正可倚天公。酒滿銀盃綠。相呼一笑中。

又

浦溆漁歌遠。茆茨績火明。新涼迎病起。樂事及秋成。社肉分初至。官壺買旋傾。殘年得家食。何以報時清。

秋思

南鄭歸來二十霜。背人歲月去堂堂。破裘不補知寒早。倦枕無懣厭夜長。年少若爲評宿士。狂生曾是說高皇。慨然此夕江湖夢。猶繞天山古戰場。

又

一生書劍徧天涯。兩歲秋風喜在家。爛醉日傾無算酒。高眠時聽屬私蛙。園林夕照明丹柿。籬落初寒蔓碧花。便擬掛冠君會否。耳根不復耐喧嘩。

又

殘暑偏能著此翁。吹襟刺喜得西風。露滋小徑蘭苔冷。月射高梁燕戶空。衰病呻吟真一洗。醉歌跌宕與

誰同。從今日日增幽興。水際先丹數葉楓。

又

半年閉戶廢登臨。直自春殘病至今。帳外昏燈伴孤夢。簷前寒雨滴愁心。中原形勝關河在。列聖憂勤德澤深。遙想遺民垂泣處。大梁城闕又秋砧。

又

雁陣橫空送早寒。白頭病叟住江干。風林脫葉山容瘦。霜稻登場野色寬。萬里關河驚契闊。一尊鄰曲話悲歡。書生餓死尋常事。那得重彈掛壁冠。

又

藥畦蔬壠夕陽中。帶落冠欹一病翁。步蹇每妨行藥興。眼昏幾廢讀書功。露濃乍警雲巢鶴。風勁先凋玉井桐。欲賦悲秋却休去。鬢絲已是滿青銅。

以事至城南書觸目

十里西風吹帽幫。江城衣杵遠猶聞。路如劍閣逢秋雨。山似爐峯鎖暮雲。原上老翁眠犢背。籬根小婦牧羊羣。百錢且就村場醉。舌本醇醪莫苦分。

舍西夕望

茆舍菱陂北。柴門藥圃西。奇雲去人近。澹月傍簷低。野迴羊牛下。林昏鳥雀栖。郊墟少還往。父子自扶攜。題城侍者峴山圖

漢水沉碑安在哉。千年峴首獨崔嵬。平生不作羊公計。但欲無名死草萊。

題城侍者剡溪圖

暮境侵尋兩鬢絲。湖邊自葺小茆茨。從今步步俱回棹。不獨山陰興盡時。

晚秋農家

老來萬事嬾。不獨廢應酬。門前卽湖山。亦復罕出遊。吾廬有真樂。一榻眠高秋。回看世上事。得喪良悠悠。

又

秋雨無時休。令我雙鬢縞。庭荒何由鋤。木落不得掃。遣奴入城市。寸步困泥潦。菰首幸可烹。芻豢置勿道。

又

豢犬使警夜。畜雞用司旦。徹警盜所窺。失旦固吾患。豈無糠糶費。施報不可緩。家居亦爲政。發我中夜歎。

又

東鄰稻上場。勞之以一壺。西鄰女受聘。賀之以一襦。誠知物寡薄。且用交里閭。努力畢農功。租賦勿後輸。

又

我年近七十。與世長相忘。筋力幸可勉。扶衰業耕桑。身雜老農間。何能避風霜。夜半起飯牛。北斗垂大荒。

又

疏溝架略約。拾瓦疊浮屠。旣晝菘韭畦。遂營瓜芋區。鼓香吳鹽白。飽計已有餘。捫腹笑自賀。無羊敗吾蔬。

又

苦寒牛亦耕。甚雨雞亦鳴。物物各有職。怠心其敢萌。我老返農圃。學業付後生。語兒續膏油。勿輟讀書聲。

又

吾里貧長者。蓋有萬石風。少年以利遷。但可哀其窮。仁義亦何常。聖賢與人同。我言不足取。汝豈忘乃翁。

湖上小閣

蒲萄初紫柿初紅。小閣憑闌萬里風。莫怪年來增酒量。此中能著太虛空。

苦雨歎

九淵龍公出忘還。瓦溝垂溜聲淙潺。茫茫大澤北際海。湫湫平湖南浸山。吾廬四望路俱斷。蛙黽爭雄亂昏旦。漏牀腐席夜失眠。溼竈生薪朝不爨。今年十分喜有秋。豈知青秧出禾頭。老夫一飽復繆悠。聽兒讀書寬日憂。

遣懷

秋風策策冷吹衣。謝病經年晝掩扉。絕世本來希獨立。刺天不復計羣飛。細思萬古名何用。太息九原誰與歸。葬近要離非素意。富春灘畔有苔磯。

道石吾家舊藏奇石甚富。今無復存者。獨道石一。尙置几案間。戲作。

秋風嫋嫋雨班班。身隱幽窗筆硯閑。小試壺公縮地術。數峯閑對道州山。

又

林虛靈壁俱尤物。散落人間不復還。投老東歸風味在。春陵小岫伴身閑。

又

誤因祿米棄蓴鱸。一落塵埃底事無。布韉青鞵雖與盡。此峯聊當臥遊圖。

蘭亭

蘭亭絕境擅吾州。病起身閑得縱遊。曲水流觴千古勝。小山叢桂一年秋。酒酣起舞風前袖。興盡回棹月下舟。江左諸賢嗟未遠。感今懷昔使人愁。

小菴村居

昔我作屋時。趣欲庇風雨。茆茨寒自刈。條枚細相拄。庫溼生蚍蚋。得煖森翅羽。摧撓自棟梁。朽敗連柱礎。鄰父爲我言。努力謀安處。土墜瓦可陶。步近木易取。豈知七十翁。沉痾久未愈。身世如浮漚。家舍真逆旅。一牀居易足。十歲敢自許。且當復其初。浩歌臥環堵。

書陶靖節桃源詩後

寄奴談笑取秦燕。愚智皆知晉鼎遷。獨爲桃源人作傳。固應不仕義熙年。

有叟

有叟鏡湖邊。茆茨八九椽。憑闌秋萬里。閉戶醉經年。身外浮名小。胸中浩氣全。此生吾自判。造物恐無權。不寐

老眼睡眠少。林居煙雨昏。百年歸老死。萬事付乾坤。熠熠螢穿幔。錚錚鐵過門。欲明聞瀟稻。浩歎閱黎元。

遙夜

遙夜凜高秋。蕭條念褐裘。煙江新雁下。竹塢暗螢流。舊友嗟誰在。初心恐不酬。一尊桑落酒。聊得洗吾愁。

秋晚思梁益舊遊

幅巾筠杖立籬門。秋意蕭條欲斷魂。恰似嘉陵江上路。冷雲微雨溼黃昏。

又

憶昔西行萬里餘。長亭夜夜夢歸吳。如今歷盡風波惡。飛棧連雲是坦途。

又

滄波極目江鄉恨。衰草連天塞路愁。三十年間行萬里。不論南北怯登樓。

紹熙辛亥九月四日雨後白龍挂西北方復雨三日作長句記之

長空黯闇如欲夜。白龍騰拏見雲罅。鱗間出火光照江。尾卷風霆雨如射。老人百歲見未曾。兒童閉門伏牀下。髮毛慘凜誰復支。性命么微不禁嚇。登場已歎禾生耳。出戶仍愁泥沒胯。皇天生民豈不愛。龍亦何心敗吾稼。父老相看出無策。攪涕頓顙號粉社。移牀避漏我亦忙。秉燭題詩寄悲吒。

蔬圃

蔬圃依山脚。漁扉並水涯。臥枝開野菊。殘枿出秋茶。病骨知天色。羈懷感物華。餘年有幾許。且灌邵平瓜。

農家

南畝勤菑穫。西城謹蓋藏。種蕎乘霽日。斫荻待微霜。谿碓新春白。山廚野簌香。何須北窗臥。始得傲羲皇。

自喜

半生羈宦走人間，醉裏心寬夢裏閑。自喜如今無一事，讀書纔倦卽遊山。

重九後風雨不止遂作小寒

病軀剩喜卽新秋，殘暑無端抵死留。風雨掃除雖一快，凋年搖落已堪愁。

又

菊枝欹倒不成叢，井上梧桐葉半空。射虎南山無復夢，雨蓑煙艇伴漁翁。

又

夜長稚子添書課，霜近衰翁憶醉鄉。儘道吳中時節晚，菊花也有一枝黃。

城南上原陳翁以賣花爲業得錢悉供酒資又不能獨飲逢人輒強與共醉辛亥九月十二日偶過其門訪之敗屋一間妻子飢寒而此翁已大醉矣殆隱者也爲賦一詩

君不見會稽城南賣花翁，以花爲糧如蜜蠶。朝賣一株紫，暮賣一枝紅。屋破見青天，盎中米常空。賣花得錢送酒家，取酒盡時還賣花。春春花開豈有極，日日我醉終無涯。亦不知天子殿前宣白麻，亦不知相公門前築堤沙。客來與語不能答，但見醉髮覆面垂髭髻。

甜羹之法以菘菜山藥芋菜蕪雜爲之不施醯醬山庖珍烹也戲作一絕

老住湖邊一把茆，時沾村酒具山肴。年來傳得甜羹法，更爲吳酸作解嘲。

暮秋書事

暮秋風雨卷茆茨，砧杵聲中過雁悲。楓葉欲丹先慘澹，菊叢半倒不支持。旗亭人熟容賒酒，野寺僧閑得



對碁莫怪苦尋林下事。駭機滿地只心知。

早自偏門入城晚出南堰門以歸

早從偏門入。暮從南堰歸。鮑郎山前路。空翠浮煙霏。秋令忽已深。病骨頻添衣。向來慕功名。常恐斯心違。乃今知其難。唵噉迫殘暉。伯鸞與幼安。尙友或庶幾。到家亦既夕。青燈耿窗扉。且復取書讀。父子窮相依。

初寒

蚊蠅掃迹葉飛初。剩喜幽窗讀我書。牆角短檠真耐久。手中團扇又成疎。百年作夢行休去。九月無衣亦安如。獨恨故人消息斷。寒江誰與倩雙魚。張季長自離吳門未得近書。

小舟自紅橋之南過吉澤歸三山

霏霏寒雨數家村。雞犬蕭然晝閉門。它日路迷君勿恨。人間隨處有桃源。

又

六月芙渠正盛時。畫船長記醉題詩。世間好景元無盡。霜落荷枯又一奇。

得貓於近村以雪兒名之戲爲作詩

似虎能緣木。如駒不伏轅。但知空鼠穴。無意爲魚殮。薄荷時時醉。氈氍夜夜溫。前生舊童子。伴我老山村。

晝睡

眼昏妨讀書。不睡復何如。擁被新寒裏。伸腰午飯餘。斷香縈倦枕。疎雨滴前除。未竟華胥樂。茶甌莫喚渠。

戲詠閑適

暮秋風雨暗江津。不下書堂已過旬。鸚鵡籠寒晨自訴。狸奴甃煖夜相親。典衣旋買修琴料。叩戶時聞請藥人。說與鄉鄰當賀我。死前長作自由身。

寓歎

荷戈常記壯遊時。齒豁頭童不自知。已分功名非力致。更悲文字與年衰。端居漸覺從人懶。熟睡偏於聽雨宜。自斷歸休君勿怪。一盃薺糝敵瓊糜。

又

醉撫酒壺憐矍矮。臥看香岫愛嶙峋。舊時京洛塵埃面。今作江湖風月民。幻世界中均起滅。太虛空裏孰冤親。可齋入定論千劫。說與天魔任惱人。

獨夜

獨夜迢迢掩素屏。病懷羈思共鈴聲。房櫺十月寒初重。風雨三更酒半醒。繁杵有聲時斷續。殘缸無焰尙青熒。恍然喚起西征夢。身臥金牛古驛亭。

記九月二十六夜夢

海山萬峯鬱參差。宮殿插水蟠蛟螭。碧桃千樹自開落。飛橋架空來者誰。桐枝高聳宿丹鳳。蓮葉半展巢金龜。和風微度寶箏響。永日徐轉簾陰移。西廂恍記舊遊處。素壁好在尋春詩。當年意氣不少讓。跌宕醉墨紛淋漓。宿醒未解字猶溼。人間歲月浩莫推。歎驚撫几忽夢斷。海闊天遠難重期。

夢海山壁間詩不能盡記以其意追補

碧海無風鏡面平。潮來忽作雪山傾。金橋化出三千丈。閑把松枝引鶴行。

又

海上乘雲滿袖風。醉捫星斗躡虛空。要知壯觀非塵世。半夜鯨波浴日紅。

又

一劍能清萬里塵。讒波深處偶全身。那知九轉丹成後。却插金貂侍帝宸。

又

春殘枕籍落花眠。正是周家定鼎年。睡起不知秦漢事。一尊閑醉華陽川。

當食歎

黃鶴舉網收。錦雉帶箭墮。藉藻頰鯉鮮。發菴蒼兔臥。吾儕亦何心。甘味樂死禍。貪夫五鼎烹。志士首陽餓。請言觀其終。孰爲當弔賀。八月黍可炊。五月麥可磨。一飽端有餘。努力事春籛。

睡鄉

有酒君勿啜。入腸作戈矛。有書君勿觀。到眼生君愁。不如睡鄉去。萬事風馬牛。郊墟無來客。風雨送暮秋。苔甃蟲唧唧。霜林葉颼颼。是時一枕睡。不博萬戶侯。斗帳裁青氈。重衾擁黃紬。華山希夷翁。千載可與遊。

晨興

未旦雞三號。將旦鵝羣鳴。湖陂地曠快。頗樂聞此聲。回首宦遊日。鈴索攪五更。未言簿書勞。讒謗隨日生。一飢百憂散。灑然懷抱清。雨後初得齋。晨庖有珍烹。豈不念加糝。侈汰恐易萌。且當讀古書。至味敵大羹。

初冬從父老飲村酒有作

父老招呼共一觴。歲猶中熟有餘糧。麩花漫漫渾如雪。豈莢離離未著霜。山路獵歸收兔網。水濱農隙架魚梁。醉看四海何曾窄。蘇子美詩云。吁嗟四海窄。且復相扶醉夕陽。

懷南鄭舊遊

南山南畔昔從戎。賓主相期意氣中。渴驥奔時書滿壁。餓鷄鳴處箭凌風。千艘粟漕魚關北。一點烽傳略谷東。惆悵壯遊成昨夢。戴公亭下伴漁翁。

冬夜讀書

霜雪紛紛滿鬢毛。凋年懷抱獨蕭騷。房櫳夜悄孤燈暗。原野風悲萬木號。病臥極知趨死近。老勤猶欲與書麈。小兒可付巾箱業。未用逢人歎不遭。

余爲成都帥司參議。成將軍漢卿爲成都路兵鈐相。從無虛日。余被召出蜀。漢卿坐法謫居於涪。旣得自便。因卜築爲涪人。今年廣漢僧祖成來山陰。乃言嘗至永嘉樂清縣柳市之廣福寺。有黃先生寓寺中。煉丹及見。則漢卿也。余聞之感歎不已。爲賦此詩。

將軍胸中備文武。鐵馬黃旗玉關路。羌胡可滅心自知。富貴有命才可與。奪官置之三硤中。空山猿鳥同朝暮。道逢奇士握手談。明日家人不知處。平生心事一丹竈。萬里生涯兩芒屨。東嘉古寺臥高秋。時有巢仙來叩戶。山中豈識故將軍。但怪英姿凜不羣。電眼蝟鬚長八尺。論丹說劍氣凌雲。

雜題

松肪釀酒石根醉。榭葉作衣雲外行。指點人間一長歎。秋風又到洛陽城。

又

山家貧甚亦支撐。時撫桐孫一再行。朝飯米空烹芋粥。夜缸油盡點松明。

又

羊裘老人只念歸。安用星辰動紫微。洛陽城中市兒眼。情知不識釣魚磯。

又

黍醅新壓野雞肥。茆店酣歌送落暉。人道山僧最無事。慳渠猶趁暮鐘歸。

又

釣魚吹笛本閑身。正坐微官白髮新。著屐此生猶幾緡。可令復踏九衢塵。

思蜀

山光染黛朝如溼。川氣鎔銀暮不收。詩料滿前誰領略。時時來倚水邊樓。

又

思蜀寸心折。歸吳雙鬢衰。今年脫虎口。昨夜夢驀頤。死隔平時友。愁吟別後詩。江山應好在。誰記踏青期。

又

一作劍關客。閑遊將十年。不嫌狂駭俗。自許醉知天。瑞草溪橋路。青衣野廟壩。霜天獵歸處。萬里入橫鞭。

來從雲棧北。行度雪山西。故事談金馬。遺蹤訪石犀。閑情淡於水。豪飲醉如泥。壞壁塵封遍。何人拂舊題。

又

玉食峨眉楫。金齋丙穴魚。常思晚秋醉。未與故人疎。白髮當歸隱。青山可結廬。梅花消息動。悵望雪消初。  
余昔在健爲師。伯渾王志夫。張功夫王季夷。瑩上人輩。以秋晚來訪。樂飲旬日而去。

散吏

拜賜明時散吏名。頭銜字字敵冰清。讀書有味聊忘老。賦祿無多亦代耕。笠澤蓴鱸秋向晚。緱山笙鶴月微明。人間樂事今真得。莫恨摧頽白髮生。

題剡溪瑩上人梅花小軸

孤舟清曉下溪灘。爲訪梅花不怕寒。忽有一枝橫竹外。醉中推起短篷看。

夜夢遊驪山

秦楚相望萬里天。豈知今夕宿溫泉。穿雲漱月無窮恨。依舊潺湲古縣前。  
溫飛卿詩云。至今湯殿水。嗚咽縣前流。

枕上

簷角查查鵲語輕。窗櫺澹澹日痕生。清愁不逐爐香散。旋啜寒齋解宿醒。

五更讀書示子

近村遠村雞續鳴。大星已高天未明。牀頭瓦檠燈煜爚。老夫凍坐書縱橫。暮年於書更多味。眼底明明見

辛潤。但令病骨尙枝梧。半盞殘膏未爲費。吾兒雖贗素業存。頗能伴翁飽菜根。萬鍾一品不足論。時來出手蘇元元。

夜坐

天公似欲假餘齡。鍼石年來幸小停。微火暖爐娛獨夜。斷雲吐月縞中庭。眼前樂事寒醅綠。身後虛名蠹簡青。賴有古人同此志。傍觀不用歎伶仃。

臥龍

危磴盤紆上翠微。倚天樓觀碧參差。雨來海氣先橫鶩。風惡松柯盡倒垂。孤鶻歸巢翅翎重。斷鴻覓伴語聲悲。人間萬事難禁老。醉撫闌干欲暮時。





# 陸放翁集

劍南詩稿

卷第二十四

野步晚歸

江村十日喜霜晴。草死泥乾拄杖輕。溝港淺來無鷺下。郊原暖處有牛耕。奔馳久厭兒童戲。淪落偏知世俗情。欲向書窗了殘課。歸來猶占夕陽明。

並山東南閒步至野人吳氏居乃歸

信步閒行遍四鄰。擁籬老稚看綸巾。人隨世換朋儕少。志與年衰感慨頻。梅送冷香雪橫岸。雁翻孤影下煙津。豐年何地酬君賜。剩向旗亭作醉人。

晝睡

我年垂七十。齒髮日變遷。初無金丹術。何以追飛仙。惟有一高枕。可以餞餘年。蕭蕭敗榻上。鼻鼾心了然。靜如豹隱霧。湛若珠藏淵。寄語少年輩。未宜嘲孝先。

連日有雪意戲書

壯歲羈遊半九州。卽今顛顛老菟裘。狂心那復繳鴻鵠。世事已如風馬牛。雪作未成增慘澹。葉飛欲盡更颼颼。聊將袖裏平戎事。判斷千巖萬壑秋。

兩蜀故人寄余閬中左縣題名石刻來皆二十餘年矣悵然有感

憶過西州樂飲時。百車載酒萬花圍。只言身外皆餘事。豈信人間有駭機。雪鬢已成新夢境。緇塵空化舊征衣。早知一笑難如此。剩判年光醉不歸。

歲晚

歲晚霜風正怒號。荒村敗屋擁藜蒿。窮猶可勉聖賢事。老豈遽忘鉛槧勞。從宦雖如碁已決。治經竊比繭初繅。閉門養氣淵源在。未敢摧傷學楚騷。

夢斷

夢斷燈殘聞雁聲。攪衣起坐待天明。街頭濁酒不堪醉。窗外疎梅空復情。人欲見擠真砭石。身寧輕用作投瓊。南湖可引春疇美。只合躬耕畢此生。

雨聲

雨聲點滴朝復暮。中有詩人絕塵句。雲門咸池渺千古。斷譜遺音此其緒。雨聲點滴夜不休。中有羈臣去國愁。九疑聯翩湘水秋。忠誠內激涕自流。我今衰病百無念。臥對青燈吐殘焰。支牀納息效寒龜。傍枕長吟笑孤劍。雨聲不斷睡愈美。窗白鴉啼攪衣起。呼兒燒兔傾濁醪。又倚胡牀雨聲裏。

農家

低垣矮屋倚江流。渾舍相娛到白頭。累世不知名宦樂。百年那識別離愁。飯餘常貯新陳穀。農隙閑眠子母牛。聞道少年俱孝謹。未應家法媿恬侯。

夜行湖上

月痕澹欲無。斗柄低竿沒。荒陂雁飛鳴。草屋牛臥齧。我行湖邊路。霜冷刮病骨。斷隄沙水溼。屢滑常恐蹶。殘年垂七十。野處猶短褐。窮死士所有。權門不可謁。

冬夜讀書忽聞雞唱

齷齪常談笑。老生丈夫失意合躬耕。天涯懷友月千里。燈下讀書雞一鳴。事去大牀空獨臥。時來豎子或成名。春燕何限英雄骨。白髮蕭蕭未用驚。

梅花絕句

凜凜冰霜晨皎皎。風月夜南山有飛仙。來結尋梅社。

又

憶昔西戍日。夜宿仙人原。風吹野梅香。夢繞江南村。

又

錦城梅花海。十里香不斷。醉帽插花歸。銀鞍萬人看。

又

低空銀一鈎。糝野玉三尺。愁絕水邊花。無人問消息。

又

蘭茝古所貴。梅乃晚見稱。盛衰各有時。類非人力能。

又

子欲作梅詩。當造幽絕境。筆端有纖塵。正恐梅未肯。

又

清霜徹花骨。霜重骨欲折。我知造物意。遣子世味絕。

又

士窮見節義。木槁自芬芳。坐回萬物春。賴此一點香。

又

南村花已繁。北塢殊未動。更賒一月期。待我醉春甕。

又

山月縞中庭。幽人酒初醒。不是怯清寒。愁蹋梅花影。

閉戶

簾瓢虛道不堪憂。閉戶方從造物遊。安樂本因無事得。功名常忌有心求。洗除仇怨忘蠻觸。收斂光芒靜斗牛。兒報牀頭春甕熟。人間萬事轉悠悠。

小園竹間得梅一枝

若耶溪邊鶴髮叟。流落一生端坐口。如今不怕桃李曠。更因竹君得梅友。嶺頭羈旅萬里愁。江上淒涼一杯酒。枝橫澹月影在地。蕊插烏巾香覆手。交情歲晚金石堅。孤操凜然真耐久。荒山野水終自得。銀燭金

壺亦何有。夢魂不接莊周蝶。心事肯付張緒柳。晚來畫角動高城。起舞聊爲放翁壽。

梅花絕句

幽谷那堪更北枝。年年自分著花遲。高標逸韻君知否。正在層冰積雪時。

又

萬瓦清霜夜漏殘。小舟斜月過闌干。老來一事偏堪恨。好看梅時卻怕寒。

得林正父察院書問信甚勤以長句寄謝

折柳湖南別尚新。書來已見柳搖春。故情存此膠投漆。薄俗從渠越視秦。長劍挂頤那復夢。短衣掩脛未全貧。有詩亦欲頻持寄。腸斷西江六六鱗。

蔬食戲書

新津韭黃天下無。色如鵝黃三尺餘。東門彘肉更奇絕。肥美不減胡羊酥。貴珍詎敢雜常饌。桂炊薏米圓比珠。還吳此味那復有。日飯脫粟焚枯魚。人生口腹何足道。往往坐役七尺軀。羶葷從今一掃除。夜煮白石箋陰符。

歎俗

風俗陵夷日可憐。乞墻鉗市亦欣然。看渠皮底元無血。那識虞卿魯仲連。

晚飯罷小立門外有作

此心何敢慕輕肥。尙媿無功飽蕨薇。浦面鳥衝殘靄去。柳陰人荷一鋤歸。病嗟短髮紛紛白。老覺初心種種

種非百步空庭著明月。黃昏手自掩荆扉。

觀梅至花涇高。端叔解元見尋。

春晴閑過野僧家。邂逅詩人共晚茶。歸見諸公問老子。爲言滿帽插梅花。

又

春暖山中雲作堆。放翁艇子出尋梅。不須問信道傍叟。但覓梅花多處來。

春雪

江雲垂野雪如簑。閏歲春來特地遲。倒盡酒壺終日醉。臥聽兒誦半山詩。

舟過季家山小泊

困睫濛濛渴煮茶。繫船來叩野人家。風翻翠浪千畦麥。水漾紅雲一塢花。健犢破荒耕犖确。幽禽除蠹啄槎牙。尋春非復衰翁事。且伴兒童一笑譁。

送王成之給事

我昔揚帆掠吳楚。夜泊秦淮聽春雨。明朝冠蓋擁長亭。誤辱諸公問良苦。是時衆中初識公。天驥蹴踏萬馬空。知心投分財數語。玉塵謾謾生清風。冶城醉墨鴉棲壁。長干祖道花照席。公方閉戶試諸生。坐歎江山少顏色。爾來俛仰三十春。欲話舊遊無故人。豈知邂逅逢一笑。使我肝膽還輪囷。衰遲少復入城市。虛左屢招慚主意。忽聞上印卻悽然。悔不日日從公醉。朝廷三載虛一相。如公早合鸞臺上。榮河溫洛久胡沙。此段功名勿多讓。

山家

白石青莎一徑斜，斷無人迹到山家。  
梁間歸燕避微雨，池面游魚爭落花。  
雪鬢但增新感慨，金鞭那復舊豪華。  
明窗睡起渾無事，篝火風爐自試茶。

送傑上人歸成都

錦城一別鬢成絲，今日山陰送傑師。  
亂絮飛花撲行路，正如東郭放船時。

又

春夜挑燈話別愁，此心已在錦江頭。  
舊時處處塵昏壁，想復長吟爲小留。

落魄

落魄江湖七十翁，欲持一笑與誰同。  
蕭蕭雪鬢難藏老，寂寂蓬門可諱窮。  
好句尙來欹枕處，壯心時在倚樓中。  
無涯毀譽何勞詰，骨朽人間論自公。

春晴出遊

芳樹參差葉已成，園林隨處聽鶯聲。  
遊人正樂還興歎，造物無心卻有情。  
糝徑落紅猶可藉，漲溪分綠已堪耕。  
蘭亭禹廟年年好，剩伴鄉鄰醉太平。

題瑩上人二畫

天地又秋風，谿山憶剡中。  
孤舟幸閑著，借我訪支公。

右剡谿

曉聽楓橋鐘。暮泊松江月。斯人亦可人。淡墨寫愁絕。

右吳江

和張功父見寄

舉世何人念此翁。敢期相問寂寥中。回思舊社驚年往。細讀來書恨紙窮。我用荷鋤爲事業。君將高枕示神通。叮嚀一語宜深聽。信筆題詩勿太工。

又

佐命貂蟬再世孫。手鉏瓜壟傍青門。超騰已得丹煥骨。戀著肯求香返魂。功父如夫人逝去。聞頗損眠食。故及之。正復悲秋如騎省。可令病渴似文園。庭前柏樹西來意。握手何時得共論。

山家暮春

遠屋清陰合。綠堤綠草纖。起蠶初放食。新麥已磨鎌。苦筍先調醬。青梅小醃鹽。佳時幸無事。酒盡更須添。

又

行飯獨相羊。扶藜過野塘。晴光生蝶粉。暖律變鶯吭。麩美羣兒競。蠶飢小婦忙。深知遊宦惡。窮死勿離鄉。

讀王季夷舊所寄詩

燈前忽見季夷詩。淚灑行間不自知。醉別西津如昨日。露晞漚滅已多時。余在京口與季夷別。遂不復相見。

題岸閣黎二畫



秋山瘦嶙峋。秋水渺無津。如何草亭上，卻欠倚闌人。

右秋景

溪上望前峯。巉巉千仞玉。渾舍喜翁歸。地爐煨芋熟。

右雪景

入雲門小憩五雲橋

穀雨初過換夾衣。園林零落到薔薇。鳴鳩日暖遙相應。雛燕風柔漸獨飛。臺省多才吾輩拙。江湖久客暮年歸。雲門蹋月方清絕。且倚溪橋看夕霏。

黃筋小店野飯示子坦子聿

山林久衰病。生世幾清明。未作松根臥。猶尋溪上行。食新炊麥飯。嘗饅啜蕪羹。孺子雖知學。家貧且力耕。

山園

山園寂寂閉春風。箇裏天教著放翁。萬事已拋孤枕外。一尊常醉亂花中。閑隨戲蝶忘形久。細聽啼鶯得意同。月桂可憐常在眼。小叢時放一枝紅。

入城至郡圃及諸家園亭遊人甚盛

老子何曾慣市塵。今朝也復入城闌。太平有象人人醉。造物無私處處春。九陌鶯花娛病眼。一竿風月屬閑身。不緣興盡回橈早。要就湖波照角巾。

次韻范參政書懷

養氣頽然似木雞。謗讒寧復問端倪。生塵甑煖喜炊黍。轅釜羹香忘糝藜。萬里曾遊雲棧北。一庵今臥鏡湖西。殘年老病侵腰膂。那得隨人病夏畦。

又

已著山林掃塔衣。洗除仕路劍頭炊。心光焰焰雖潛發。頷雪紛紛已太遲。度日只今閑水牯。知時從昔羨山雌。掩關未必渾無事。擬徧寒山百首詩。

又

身寄崦嵫欲盡時。且貪餘景伴兒嬉。故廬手種竹千箇。醉帽時簪花一枝。蠹篋有書供夙好。衡門無客作新知。羊裘自欠封侯骨。敢道君房徹底癡。

又

感昔傷懷一喟然。事賢猶及紹興前。此身顛仆應無日。諸老凋零不計年。客少可羅門外雀。家貧也辦杖頭錢。插花醉舞春風裏。不學龐翁更問禪。

又

春寒還似暮冬天。敗絮重披有蝨緣。雖欠高僧分白氈。偶蒙暴客恕青氈。濁醪盎盎貧猶醉。倦枕昏昏晝亦眠。年少從渠笑衰嬾。相呼禹廟看龍船。近有偷兒取二釜去。它幸無所失亡。

又

祠祿恩寬亦例沾。屏居懷抱苦厭厭。戍邊事往功名忤。迎客兒扶老病兼。遇輿榜舟無遠近。破愁沽酒任

酸甜。殘年唯有讀書癖。盡發家藏三萬籤。

又

芋栗多儲煮復煨。一塵那許到靈臺。虹穿道室爐丹熟。龍吼空山匣劍開。躡屨未成遊地肺。掩扉聊欲隱天台。桃花榮謝吾何預。一任劉郎去後栽。

又

探梅方憶雪中歸。轉眼青青子滿枝。築圃漫爲娛老計。篋牋又賦送春詩。乞身何日還初服。坐食終年媿聖時。睡起西窗澹無事。一枰閑看客爭棋。

又

字內寓形財幾時。西山俄已迫斜暉。百年過隙古所歎。衆口鑠金胡不歸。已是平生行逆境。更堪末路踐危機。夜香一炷無他祝。稽首虛空懺昨非。

又

趙州行脚我安能。閑卻牀邊六尺藤。釣閣臥聽西澗雨。棋軒遙見北村燈。平生愛睡如甘酒。晚歲憂讒劇履冰。剩欲舒懷答清獻。半空鸞鳳媿孫登。

春晚村居雜賦絕句

作堤蜿蜿六百尺。西崦東村成一家。春雨乍晴桑吐葉。秋風初冷稻吹花。

又

鵝兒草綠侵行路。幘子花明照屋除。處處乞漿俱得酒。杖頭何恨一錢無。

又

一篙湖水鴨頭綠。千樹桃花人面紅。茆舍青帘起余意。聊將醉舞答春風。

又

朝書牛券拈枯筆。暮祭蠶神酌凍醪。閑放無憂窮有意。傍人錯羨此翁高。

又

澆書滿挹浮蛆瓮。攤飯橫眠夢蝶牀。莫笑山翁見機晚。也勝朝市一生忙。

東坡先生謂晨飲爲澆書。李黃門謂午睡爲攤飯。

又

午枕閉門無客攪。夜燈開卷有兒同。若爲賤與天公道。盡乞餘生向此中。

沽隸西酒小酌

隸西小店酒新釀。一醉今朝覺易謀。從曠劫來俱有死。出青天外始無愁。功名未許妨高臥。風月猶能賦遠遊。造物向人元不薄。卷簾萬頃鏡湖秋。

戲詠村居

歌起陂頭正插秧。梯斜籬外又剝桑。日長處處鶯聲美。歲樂家家麥飯香。林杏半丹禁宿雨。叢萱自斂避斜陽。北窗合是羲皇上。已置臨風八尺牀。

又

馬跡車聲斷已無。鄰翁笑語自相呼。衣裁大布如亭長。船設低篷學釣徒。愍物欲師僧施食。畏人愁報吏催租。陳蕃壯志消磨盡。一室從今卻掃除。

戲詠閒適

鈔書字細眼猶明。擣藥聲清疾漸平。桐葉雨邊尋斷夢。菊花香裏散餘醒。人間榮辱知難到。紙上興亡看亦輕。惟恨暮年交舊少。滿懷情話向誰傾。

又

剡曲稽山是故鄉。人言景物似瀟湘。三升花露春壺滿。八尺風漪午枕涼。樹合綠陰山鵲鬧。盆鑄紫石水榭香。回思烏帽京塵客。始覺幽居白日長。

又

涉世心知百不能。閉門嬾出病相仍。箪瓢味美如烹鼎。鄰曲人淳近結繩。半顆鴉殘牆外杏。一枝鶻鼻澗邊藤。蕭然掃盡彈冠興。敢爲詩情望武陵。

夜與兒子出門閑步

家住黃花入麥村。閑將穉子出柴門。草根螢墮久開闔。雲際月行時吐吞。未分悲憂攻齒髮。已將生死付乾坤。舊書半蠹猶堪讀。糲飯藜羹莫更論。

老景

老景雖無幾，爲農尚有餘。曾傳種魚術，新得相牛書。黍酒時留客，菱歌或起予。平生湖海志，高枕看嚴徐。

初夏

荀生遮狹徑，溪漲入疎籬。漸及分秧候，還當煮繭時。雨昏雞共嬾，米盡鼠同飢。村巷無來客，清羸只自知。

晨起

老病少睡眠，臥見天窗白。棲鳥亦已鳴，一一翻去翮。我起將何之，且復守書冊。收斂萬里心，未厭容膝迫。吾家讀書法，一字亦常覈。勉哉積新功，莫問幾時客。

王右丞歎白髮詩曰：俯仰天地間，能爲幾時客。

月夜短歌

老夫倚杖當戶立，霜氣青冥月輪溼。颼颼短髮冷入頂，更覺衣屨清風襲。月落欲盡夜蒼茫，回顧明星已煌煌。明星雖高未須喜，三足陽鳥生海底。

小軒

四面山如碧玉城，小軒聊得愜幽情。乍飛乳燕低無力，自落來禽靜有聲。麟筆殘功成水晶，蛇圖餘思入棋枰。閑中事業吾能了，未恨林廬送此生。

愛閑

愛閑惟與病相宜，壯歲懷歸老可知。睡熟素書橫竹架，吟餘犀管閣銅螭。水芭蕉潤心抽葉，盆石榴殘子壓枝。堪笑放翁頭白盡，坐消長日事兒嬉。

靜院

靜院房櫺雨送涼。熏籠衣幘潤生香。小屏風疊圖遙碧。古錦囊書榻硬黃。已占江湖寬處老。絕知日月靜中長。敲門無客妨人睡。更覺餘年樂未央。

雨晴

閑曳枯筇自在行。曲廊小閣賞新晴。幽禽葉底吟風久。殘雨枝間照日明。茶映盞毫新乳上。琴橫薦石細泉鳴。亦知老健終難恃。且復蕭然得此生。

讀史有感

英雄自古埋秋草。世上兒童共笑狂。射賊曾飛白羽箭。閉門空枕綠沉槍。隆中高臥人千載。易水悲歌淚數行。讀盡青編窗日晚。一尊聊復弔興亡。

暮歸

意行無所之。偶傍陂頭立。空村犬吠豪。高樹蟬嘒急。風塵一身老。宇宙萬感集。還家日已暮。草露青鞋溼。仰首座求鈍菴詩。

鈍菴來問鈍何如。真箇能參鈍也無。掘井及泉那用巧。磨磚作鏡未爲愚。先師鉢袋當傳後。上座蒲團莫負渠。我亦年來念休歇。約君同作鈍工夫。

壁老求笑菴詩

臺省諸公六出奇。江湖狂客一生癡。無人爲問淨光老。撫掌掀髯端爲誰。

又

車馬往來塵暗天。淨光欣喜接諸賢。半甌春茗無多費。且結來生一笑緣。

浴罷

浴罷西軒物色幽。臥看香霧上衣篝。半廊月白初侵夜。一葉桐飛忽報秋。老覺年光殊袞袞。病知心事斷悠悠。碧筩且作池邊醉。玉色新醅手自篘。

夜坐水次

房星縱。心星橫。北斗高掛南斗傾。蓼根燿燿螢火明。葦叢哀哀姑惡聲。我倚胡牀破三更。溪風吹衣月未生。玉門關。拂雲城。何時連營插漢旌。白頭書生未可輕。不死令君看太平。

六月十四日微雨極涼

湖上清秋近。齋中白日長。雲來樹收影。雨過土生香。蓮小紅衣溼。瓜甘碧玉涼。晚來幽興極。移榻近方塘。

十五日雲陰涼尤甚再賦長句

襪襪京塵觸熱行。豈知世有野堂清。磴茶落雪睡魔退。激水跳珠涼意生。疊疊清風隨塵柄。悠悠長日付棋枰。小舟先向蘋汀泊。浴罷還須泛月明。

水亭晚眺

暑雨初晴浦面寬。水亭景物卷簾看。聯舟作陣圍魚隊。屈竹成籬護芡盤。四海諸公半丘壘。百年幾夕倚闌干。日沈未用忽忽去。待挽銀河濯肺肝。

自詠



萬事不挂眼。終年常避人。荒畦荷鋤晚。環堵結茆新。病馬何勞斥。輕鷗未肯馴。雖慚市門卒。聊作葛天民。  
立秋前四日夜泛舟至跨湖橋

短楫追涼十里來。夜深卻御使風回。離離蒲葉先秋老。嫋嫋蘋花帶露開。陌上歌呼簪稻穗。橋邊燈火賣官醅。時平樂事知何限。未歎流年兩鬢催。

信筆

爲善得禍吁可悲。顏回短命伯夷飢。何人長號血續淚。天自無心君自癡。

又

少年醉眼傲王侯。末路悲歌夜飯牛。濟世有時生一念。鏡中白髮勸人休。

又

急雨初過景物奇。一天雲作細鱗差。畫橈弄水三十里。恰是西村煙暝時。

示兒

斥逐襟袂歸。招喚振衣起。此是鄙夫事。學者那得爾。前年還東時。指心誓江水。亦知食不足。但有餓而死。小兒教汝書。不用日十紙。字字講聲形。仍要身踐履。果能稱善人。便可老鄉里。勿言五鼎養。肉食吾所鄙。

青山白雲歌

青山白雲翁。放浪酒中死。埋骨長松根。夜夜聽谿水。松老會作薪。骨朽會作塵。但留千載狂名在。知我他年自有入。

小市

小市狂歌醉墮冠。南山山色跨牛看。放翁胸次誰能測。萬里秋空未是寬。

蓬萊館午憩

驛門繫馬聽蟬吟。翻動平生萬里心。橋畔笛聲催日落。城邊草色帶煙深。關河歷歷功名晚。歲月悠悠老病侵。憶戍梁州如昨日。憑闌西望一霑襟。

夢遊散關渭水之間

平生望眼怯天涯。客裏何堪度歲華。但恨征輪無四角。不愁歸路有三叉。驛窗燈闇傳秋柝。關樹煙深宿暮鴉。叱犢老翁頭似雪。羨渠生死不離家。

# 陸放翁集

劍南詩稿

卷第二十五

秋夜

清夜不成寐。出門還浩歌。斷雲微翳月。薄露不傾荷。絡緯知時早。梧桐奈汝何。非關老懷惡。秋物感人多。

世事

世事本難全。吾生已媿天。借書常稻載。餽酒亦蟬聯。鱸粥隨時具。湖山此地偏。殘年更何慕。未死卽神仙。

夜半池上作

夜永空齋睡不成。起扶藤杖傍池行。露濃雙鵲移枝宿。風急孤螢墮草明。斷續更籌傳古戍。縱橫河漢接高城。寒泉未漱神先爽。靜聽銅瓶汲井聲。

秋夜將曉出籬門迎涼有感

迢迢天漢西南落。喔喔鄰雞一再鳴。壯志病來消欲盡。出門搔首愴平生。

又

三萬里河東入海。五千仞嶽上摩天。遺民淚盡胡塵裏。南望王師又一年。

夏秋之交久不雨。方以旱爲憂。忽得甘澍喜而有作

亂點灑庭蕪。涼聲集井梧。綠荷傾作汞。翠蔓綴成珠。臥聽病良已。行吟愁欲無。天公終老手。談笑活焦枯。

藥圃

少年讀爾雅。亦喜騷人語。幸茲身少閑。治地開藥圃。破荒斷瓦礫。引水灌膏乳。玉芝移石帆。金星取天姥。中椒蘼蕪輩。一一粲可數。次第雨苗滋。參差風葉舉。山僧與野老。言議各有取。瓜香躬采曝。泉潔謹炊鬻。老夫病若失。稚子喜欲舞。餘年有幾何。長鑿真託汝。

書歎

只道才高始不容。無才也墮駭機中。市朝回首已陳迹。日月催人成老翁。仗馬自貪三品料。雲鵬方駕九天風。今朝有喜君知否。揀得煙汀下釣筒。

夜興

夜出茆堂自撤扃。烏藤與我兩伶俜。涼蟾吐暈圍千丈。老木移陰可一庭。隔浦呼鳴聞宿鳥。傍簷開闔數流螢。放翁尙友論千載。不取梁鴻卽管寧。

閑中頗自適戲書示客

髮猶半黑臉常紅。老健應無似放翁。烹野八珍邀父老。燒窮四和伴兒童。野八珍見王履道詩。世又有窮四和香法。剪紗新製簪花帽。乞竹寬編養鶴籠。巢許夔龍竟誰是。請君下語勿匆匆。

新涼夜坐有作

老夫任運本騰騰。一念軒裳實未曾。閑似苔磯垂釣叟。淡如村院罷參僧。硯屏突兀蓬婆雪。書几青瑩蓮

勺燈臨瑯雪山硯屏及漢嘉古檟燈檠皆吾書室中物也稚子可憐貪夜課語渠循舊未須增。

荷花

風露青冥水面涼。旋移野艇受清香。猶嫌翠蓋紅粧句。何況人言似六郎。

又

南浦清秋露冷時。凋紅片片已堪悲。若教具眼高人看。風折霜枯似更奇。

醉中作

宦遊三十載。舉步亦看人。愛酒官長罵。近花丞相噴。湖山今入手。風月始關身。少吐胸中氣。從教白髮新。

題齋壁

平生喜蕭散。垂老厭奔走。三千鏡湖上。樂事未曾有。晨開一卷書。暮把一卮酒。病除覺身輕。赤脚自蹋藕。乃知造物意。亦未棄衰朽。今夕月殊佳。出門喚鄰叟。

老將

憶昔東都有事官。夜傳帛詔起西師。功名無分身空在。猶指金創說戰時。

又

百戰西歸變姓名。悲歌擊筑醉湖城。貂裘換得金鷄醬。種藥南山待太平。

白髮

疾病侵壯年。髮恐不及白。偶賴針石功。寓世成久客。行年垂七十。霜雪紛滿幘。耳目雖已衰。亦未與人隔。

濯纓千頃湖。送老五畝宅。大布縫長衫。東阡復南陌。

小雨

百穀畏秋陽。常恐膏澤吝。大哉天公仁。霖霖來有信。蘋汀水未長。藥壠土先潤。新涼生葛衣。老癯亦小振。

秋日郊居

山雨霏微鴨頭水。溪雲細薄魚鱗天。幽尋自笑本無事。羽扇筠枝上釣船。

又

行歌曳杖到新塘。銀闕瑤臺無此涼。萬里秋風菰菜老。一川明月稻花香。

又

秋日留連野老家。朱槃鮓鱸粲如花。已炊藟散真珠米。更點丁坑白雪茶。藟散米名。丁坑茶名。

又

車蕩比鄰例饋魚。流涎對此四腮鱸。北窗雨過涼如水。消得先生一醉無。

又

今年斟酌是豐年。社近兒童喜欲顛。半醉半醒村老子。家家門口掠神錢。

又

魚鹹滿缶酒新筩。處處吳歌起壠頭。上客已隨新雁到。晚禾猶待薄霜收。劍及諸暨人以八月來水鄉助

穫。謂之上客。以其來自山中也。

又

兒童冬學鬧比鄰。據案愚儒卻自珍。授罷村書閉門睡。終年不著面看人。農家十月乃遣子入學。謂之冬學。所讀雜字百家姓之類。謂之村書。

又

兩翁兒女舊論姻。酒榷羊腔喜色新。不遣交情隔生死。固應世好等朱陳。小兒子聿聘亡友張叔渚李女。蓋尋舊約也。

七月十七日大雨極涼

吳中七月熱未已。渴鳥呀呀井無水。炎官護前不少斂。樹頭敢望秋風起。天公老手亦豈難。雨來黑雲如壞山。瓦溝淙淙萬銀竹。變化只在須臾間。老夫挑燈北窗下。山童夜歸泥過踝。草根促織有底忙。繖衣未贖還慨慷。

雨中作

山雨時時急。霖流日日添。溼苔緣暗壁。腐瓦落頽簷。老至那容卻。狂來未易砭。泥深村路絕。煙樹出青帘。

秋興

天遣幽人儘放狂。醉眠無復客爲妨。墨蛟飛下剡藤滑。蒼壁礮成官焙香。老境雖深身更健。清秋欲半日猶長。閉門莫道都無事。又了移花一段忙。

又

蓬蒿門巷絕經過。清夜何人與晤歌。蟋蟀獨知秋令早。芭蕉正得雨聲多。傳家產業遺書富。玩世神通醉臉酡。如許癡頑君會否。一毫不遣損天和。

又

老子雖貧未易量。風流猶在小茆堂。蒲萄錦覆桐孫古。鸚鵡螺樹玉瀝香。千點荷聲先報雨。一林竹影剩分涼。秋來便有欣然處。新種蓴絲已滿塘。

雨夜南堂獨坐

老夫眼暗牙齒疎。七十未滿六十餘。故人欲盡誰與娛。獨坐默誦小年書。北風日夜吹雨急。空村泥深屋。亦溼。鳳皇覽德乃下集。可憐飛螢常熠熠。

夜不能寐復呼燈起坐戲作

吳中秋半暑未退。今歲雨多如許涼。藥鼎熒熒伴孤寂。三更袖手聽啼螿。

喜晴

久雨羣蛙日夜號。樂哉霽色滿江郊。草書已悟屋漏壁。詩句免悲風卷茆。喚婦晴鳩鳴廢圃。歸林棲鷓補危巢。泥乾我亦思來客。未暇移書廣絕交。

枕上

守書眼欲闔。投枕乃瞭然。兒曹戒曳履。相語翁正眠。豈知擁敗褐。炯如寒魚鰓。少時笑老人。其事今好還。蕭蕭雙白鬢。忽忽七十年。豈惟老態出。已覺衰病纏。白晝尙便靜。況此清夜闌。妙處殆難名。睡與不睡間。



新作南門弊廬本西鄉設門紹熙壬子歲始翦闢荆棘移門南鄉

翦棘移門未費錢好山無數碧巉然病夫憤憤真堪笑反衣狐裘三十年

寄成漢卿將軍

燕頤將軍萬里遊谿山好處卽遲留頗聞南岳度殘夏寧憶北平防盛秋君已飛騰丹換骨我方衰病雪蒙頭禪龜也有新助業百萬魔軍一戰收

病臥

病臥東齋怕攪衣年來真與世相違橫林蠹葉秋先覺別浦驕雲暝不歸歲月惟須付樽酒江山竟是屬漁磯鄰翁一夕成今古愈信人生七十稀村東吳翁病一夕而卒

晚晴

今年秋多陰殊未決豐歉時時雲一片復作雨數點晚來晴頗牢天宇碧如染微風過林梢斜日在山崦農家築場罷竭作事收斂貪睡吾可慙齋扉晝常掩

秋雨初晴有感

炎曦赫赫尙餘威冷雨蕭蕭故解圍號野百蟲如自訴辭柯萬葉竟安歸芰蕖菰菜珍無價上釣魴魚健欲飛散吏何功需一飽高眠仍聽擣秋衣

獨飲

怪怪奇奇不自懲晚途猶復氣橫膺舩船那待清歌勸酒到愁邊量自增

小築

小築湖邊避俗囂。幾年于此寓箠瓢。雖非隱士子午谷。寧媿詩人丁卯橋。羅雀門庭無俗駕。緣雲磴路有歸樵。詩情酒興常相屬。堪笑傍人說寂寥。

示兒

文能換骨餘無法。學但窮源自不疑。齒豁頭童方悟此。乃翁見事可憐遲。

新晴

積雨已淒冷。新晴還少和。稼收平野闊。木落遠山多。土潤朝畦菜。機鳴夜擲梭。時清年歲好。吾敢歎蹉跎。

晨起坐南堂書觸目

林塘天與占深幽。一把茆輕萬戶侯。漠漠斷雲開復合。纖纖微雨落還收。奇峯角立千螺曉。遠水平鋪正練秋。詩料滿前吾老矣。筆端無力固宜休。

壬子八月癸卯大風雨拔木飄瓦通夕不能寐

我昔浮江坐貪快。六十幅蒲船尾挂。惡風吹到馬當祠。出沒蜿蜒舞澎湃。舟人失色急倒檣。共上蘆灣望祠拜。風雲晝晦性命憂。更復何心問薪菜。顛危僅免葬魚腹。至今常抱垂堂戒。豈知風雨有茲夕。屋破窗鳴紛百怪。直疑屋外即長江。九轉得生那可再。正襟默坐徐自思。忠信固可當喪敗。鬼神雖惡技有窮。卷地破山真一噫。明朝倚杖看晴雲。茲夕驚心復何在。

秋雨不止排悶

放翁愁坐茆齋裏。泥潦連村不得行。夜夜溼星占雨候。時時老木送秋聲。小詩旋錄兼行草。薄酒新菑任濁清。身世正如萍在水。略無根柢也能生。

用短

用短定非癡。愛閑真復奇。飯香貧始覺。睡味老偏知。畦地閑栽藥。留僧靜對棋。餘年猶有幾。捨此欲何之。

覽鏡有感

齒如敗屨鬢成絲。七十之年敢自期。閱世久應書鬼錄。強顏那復乞山資。緋衫蔭子踰初望。下澤還鄉負聖時。回首墮溝元有命。不須深計巧丸兒。

哭徑山策老

岌岌龍門萬衲傾。翩翩隻屨又西行。塵侵白拂繩床冷。露滴青松卵塔成。遙想再來非四入。尙應相見話三生。放翁大欠修行力。未免人間愴別情。

松風東嶺諸松。多。余丙戌歲手種。距今壬子。二十有七年矣。

半嶺松風破睡時。起看山月倚筇枝。縱橫滿地髯龍影。盡是當年手自移。

醉歌

佛如優曇時一出。老姥何爲憎見佛。山從古在天地間。愚公可笑欲移山。火其書。廬其居。佛亦何曾可掃除。子有孫。孫有子。山竟嵯峨汝何喜。床頭有酒敵霜風。詩成老氣尙如虹。八萬四千顛倒想。與君同付醉眠中。

秋夜讀書有感

鬢毛焦禿齒牙疎。老病燈前未廢書。卷裏光陰能屬我。人間聲利久忘渠。窮山藏拙猶嫌淺。糲飯支羸不願餘。雨露安能澤枯朽。故人枉是費吹噓。時所聞如此。

瀘州亂

高寺坡前火照天。南定樓下血成川。從事橫屍太守死。處處巷陌森戈鋌。此州雄跨西南邊。平安烽火夜夜傳。豈知癰疽潰在內。漫倚築城如鐵堅。從來守邊要人望。縱有好謀氣先喪。卽今死者端爲誰。姓名至死無人知。

東鄰築舍與兒輩訪之爲小留

甲第潭潭莫羨渠。窮人從昔愛吾廬。茆茨新潔嗟何欠。鄰里追隨故不疎。甕醬芬香盤早免。白蠶珍醢膾寒魚。年豐日有攜尊興。家乘從今不一書。黃魯直有日記謂之家乘。

夜坐

瘦骨倚蒲團。燈篝影自看。心清便獨夜。酒盡怯新寒。病虎減精采。飢鴻摧羽翰。晚途堪笑閱。猶擬乞祠官。

西鄰亦新葺所居復與兒曹過之

竹屋茆檐烟火微。長歌相應負禾歸。窮居幸可支朝夕。世事何曾有是非。新苗畦蔬經宿雨。半開籬槿弄斜暉。老翁略與吾年等。眷眷遮留莫苦違。

有術士過門謂余壽及九十

形骸鶴瘦復松枯。況是新霜滿鬢鬚。醉似在家狂道士。愚於識字老耕夫。敢言萬里封侯事。但問縱文入口無。許我年如伏生比。逢時猶解誦唐虞。

晚眺

秋晚閑愁抵酒濃。試尋高處倚枯筇。雲歸時帶雨數點。木落又添山一峯。鳴雁沙邊驚客艣。行僧煙際認樓鐘。箇中詩思來無盡。十手傳抄畏不供。

秋日焚香讀書戲作

世事無端自糾紛。放翁隱几對爐熏。好官何恨輸玄保。奇字猶須屬子雲。婆律一銖能敵國。水沉盈握有兼斤。閉門莫怪常終日。不是高人不遣聞。

九月一日夜讀詩稿有感走筆作歌

我昔學詩未有得。殘餘未免從人乞。力孱氣餒心自知。妄取虛名有慚色。四十從戎駐南鄭。酣宴軍中夜連日。打毬築場一千步。閱馬列廐三萬疋。華燈縱博聲滿樓。寶釵豔舞光照席。琵琶絃急冰雹亂。羯鼓手勻風雨疾。詩家三昧忽見前。屈賈在眼元歷歷。天機雲錦用在我。剪裁妙處非刀尺。世間才傑固不乏。秋毫未合天地隔。放翁老死何足論。廣陵散絕絕還堪惜。

上書乞再任冲佑

虬枝六尺藤。方屋九寸帽。人間無處著。山水歸寄傲。耳中間淵明。自我髮未燥。高標不可揖。七十忽已到。明窗置經龕。奧室養丹竈。雖云迫遲暮。要足平昔好。悠然萬念空。快若河卷掃。寄聲幔亭雲。行拜散人號。

秋晚歲登戲作

水落沙痕出。天高野氣嚴。麝香油乍壓。蠶美韭新醃。裘褐風霜逼。衡茆醉夢兼。菊花香滿把。聊得擬陶潛。

又

漫漫蒿鋪白。紫紫橘弄黃。未論癡腹飽。已覺醉魂香。曳杖行歌裏。拋書倦枕傍。軒車雖已矣。終媿食官倉。  
時方謀祠祿。

舟中望禹祠蘭亭諸山

艣枝謳軋出煙津。醉倚船篷岸幅巾。禹穴探書慚舊學。塗山執玉記前身。雲低野澤號新雁。露溼芳洲老白蘋。逸少亡來欲千載。眼中髣髴見清真。

夜觀嚴光祠碑有感

我昔過釣臺。峭石插江淥。登堂拜嚴子。挹水薦秋菊。君看此眉宇。何地著榮辱。雒陽逢故人。醉腳加其腹。書生常事爾。乃復駭世俗。正令爲少留。要非昔文叔。平生陋范曄。瑣瑣何足錄。安得太史公。妙語寫高躅。

閑趣

濯罷銅甌陌上塵。此生長作水雲人。更貧家業猶供酒。未死年光盡屬身。閉戶棋聲聞臙膊。卷簾山色對嶙峋。貴公漫說林間事。東路何人岸角巾。

壬子九日登山小酌

老懷多感驚佳節。病骨宜寒喜薄霜。玉脰壘中橙尙綠。彩猫饌上菊初黃。幾年虛負登高興。何許重尋落

帽狂淺酌易醒歸薄暮。又成支枕獨焚香。

舍北望水鄉風物戲作絕句

西風沙際矯輕鷗。落日橋邊繫釣舟。乞與畫工團扇本。青林紅樹一川秋。

新黏竹隔作煖閣

骨相元作臞儒酸。况復疾豎乘衰殘。鶉姑聲急雨方作。烏舅葉丹天已寒。封姨青女交作戾。竹君楮生卻憐客。小兒但喜夜爐紅。老夫更愛晨窗白。蝸牛負廬亦自容。是豈不足支窮冬。已勝展鉢三椽下。莫羨直弗萬戶封。

禹跡寺南有沈氏小園四十年前嘗題小閤壁間偶復一到而園已易主刻小閤于石讀之悵然楓葉初丹。櫺葉黃。河陽愁鬢怯新霜。林亭感舊空回首。泉路憑誰說斷腸。壞壁醉題塵漠漠。斷雲幽夢事茫茫。年來妄念消除盡。回向禪龕一炷香。

贈鏡中隱者

小築林間避世紛。不妨野叟是知聞。來遊喜有檝迎我。歸臥豈無雲贈君。得鹿夢回初了了。吠葵聲惡尙惺惺。從今雪夜頻相過。紙帳蒲團要策勳。

月夜作

江風吹微雲。長空散魚鱗。秋露洗明月。青山湧冰輪。我病適良已。欣然岸綸巾。索酒惱諸兒。哦詩驚四鄰。頗覺胸次空。未歎白髮新。庭菊臥殘枝。奇香猶絕塵。園梅雖未花。瘦影已可人。方池湛滄淪。醜石立嶙峋。

幸無千金費，亦足終吾身。樂哉何所恨，擊壤從堯民。

記夢

我夢結束遊何邦，小憩野館臨幽窗。千峯廬山錦繡谷，一水蜀道玻璃江。春耕叱犢翁眉龐，曉汲負盎女髻雙。忽然夢斷已雞唱，擁衾坐待鄰鐘撞。

感舊

當年書劍揖三公，談舌如雲氣吐虹。十丈戰塵孤壯志，一簪華髮醉秋風。夢回松漠榆關外，身老桑村麥野中。奇士久埋巴硤骨，燈前慷慨與誰同。獨孤景略死于忠州十年矣。

小園

窄窄柴門短短籬，山家隨分有園池。客因問字來攜酒，僧趁分題就賦詩。晨露每看花蕊坼，夕陽頻見樹陰移。此二事非閑寂不知也。拂衣司諫猶忙在，此趣淵明卻少知。

初冬

已罷彈冠欲挂冠，一菴天遣養衰殘。雨荒園菊枝枝瘦，霜染江楓葉葉丹。羹釜帶鱗烹白小，蓬門和蔓繫黃團。夕陽更動閑遊興，十月吳中未苦寒。

閑中樂事

轉老轉迂疎，胸中一物無。放言誇酒聖，著論笑錢愚。掃地收松粉，全巢買鶴雛。登臨未應倦，天給短筇扶。

又



得喪略相當。幽居氣味長。五窮雖偃蹇。二豎已奔忙。出飯桃花輒。傾瓢竹葉香。語君真富貴。不是傲羲皇。

小舟

小舟無定處。隨意泊江村。雲氣分山疊。沙汀蹙浪痕。宦途危虎尾。閑味美熊羆。高詠淵明句。吾將起九原。

九月二十三夜小兒方讀書而油盡口占此詩示之

徹骨貧來累始輕。孤村月上正三更。汝緣油盡眠差早。我亦尊空醉不成。南陌金羈良自苦。北邙麟冢半無名。書生事業期千載。得喪從來未易評。

今年立冬後菊方盛開小飲

胡床移就菊花畦。飲具酸寒手自攜。野實似丹仍似漆。村醪如蜜復如齏。傳芳卮解烹羊脚。破戒猶慚擘蟹臍。一醉又驅黃犢出。冬晴正要飽耕犁。

行飯暮歸

宿疾去如掃。出門芒屨輕。菊叢寒蝶鬧。楓葉夕陽明。結陣看鴉集。銜衣喜犬迎。踟躕搔白首。詩句入經營。

晝眠

困睫瞢騰老孝先。麗氈布被早霜天。珥貂碧落應無分。且向人間作睡仙。

睡覺聞兒子讀書

夢回聞汝讀書聲。如聽簫韶奏九成。且要沉酣向文史。未須辛苦慕功名。人人本性初何欠。字字微言要力行。老病自憐難預此。夜窗常負短燈檠。

余得木杖於秦望山中。今三十年矣。隴蜀萬里，未嘗相捨。戲賦長句贈之。

提攜到處覺身輕，楚澤秦關不計程。只道維摩無侍者，誰知上座是同行。青鞵白拂真相稱，湘竹谿藤誤得名。珍重從今常倚壁，住菴吾欲過浮生。

步至近村

藥物扶持疾漸平，布裘絮帽出柴荆。荒堤經雨多牛跡，村舍無人有碓聲。數蝶弄香寒菊晚，萬鴉回陣夕楓明。老翁隨意閑成句，不似劉侯要取名。

五鼓不得眠起酌一盃復就枕

栖冷雞聲咽，窗深燭焰明。流年容易過，華髮等閑生。濁挹連醅酒，香搓帶葉橙。殘骸付螻蟻，汗簡更須名。

醉倒歌

曩時對酒不敢飲，側睨旁觀皆貝錦。狂言欲發畏客傳，一笑未成憂禍稔。如今醉倒官道邊，插花不怕顛狂甚。行人喚起更崑昂，牧豎扶歸猶踈蹠。始知人生元自樂，誤計作官常懷懍。秋毫得喪何足論，萬古興亡一酣枕。

冬夜

新醅引睡睡味濃，有如猩唇薦駝峯。屏深氈煖衾稠重，鼻端雷起驚兒童。床頭蘭缸綴玉蟲，雙瓶湯熟爐正紅。夢回起坐夜未中，憑几困睫猶膏膏。霜風凋盡玉井桐，月落翠霧淒房櫳。一盃墨菜蠻奴供，莊周蝴蝶兩俱空。

默坐

巧說安能敵拙修，焚香默坐一窗幽。煌煌炎火常下照，浩浩黃河方逆流。氣住神仙端可學，心虛造物本同遊。絕知此事不相負，荆棘剪除梨栗秋。

日暮

浙浙風吹葉，淒淒雨作泥。鵲寒猶遶樹，雞晚自歸栖。老病心知有，榮枯理本齊。端居嫌太嬾，拾瓦傍蔬畦。

遣興

勛業如今莫繫懷，開單日日學僧齋。譏深只有天堪問，憂極渾無地可埋。看鏡已成雙白鬢，登山猶費幾青鞵。晚來詩興誰能那，雀噪空園葉擁堆。

泛舟

去去泛輕舸，飄然興自豪。葉凋山寺出，溪瘦石橋高。草徑牛羊下，煙村鶴鶴號。還家一盃酒，未畏暮風饒。夜讀范至能攬轡錄言中原父老見使者多揮涕感其事作絕句

公卿有黨排宗澤，帷幄無人用岳飛。遺老不應知此恨，亦逢漢節解沾衣。

初冬掃東山之麓置數石於喬松巨竹間以眺西山甚自適也  
護霜天氣半晴陰，小嶺蒼寒蘚徑深。翠靄欲成孤鳳舞，青松先作老龍吟。漁歌浦口生高興，騎吹邊頭負壯心。兒報東村蚤梅發，杖藜與汝共幽尋。

南堂脊記乃已三十年偶讀之悵然有感

一住三山三十載。交親漸覺眼前稀。長松鬱鬱偃高蓋。新竹森森添舊圍。沙徑雨餘留鳥迹。柴門日落鎖煙扉。放翁正倚蒲團穩。遼海從渠萬事非。

# 陸放翁集

劍南詩稿

卷第二十六

醉臥松下短歌

披鹿裘。枕白石。醉臥松陰當月夕。寒藤天矯學草書。天風蕭森入詩律。忽然夢上百尺顛。綠毛邈迤巢雲仙。相攜大笑咸陽市。俯仰塵世三千年。

霜草

入冬已兩旬。澤國霜始實。可憐青青草。一夕生意盡。嗟予蒲柳姿。去日若飛隼。草衰有復榮。我髮寧再鬢。微官雖置散。束帶終自憫。漸退用婦言。千載付一哂。白樂天詩曰。猶被妻兒教。漸退莫求致。仕且分司。

冬夜

百錢買菅蓆。錦茵亦何加。疋布縫麕裘。安用狐腋奢。昨者南山僧。松肪寄一車。可以照讀書。堅坐待朝霞。願影爲發笑。山童雙髻丫。一掬琴高魚。聊用薦夜茶。

村東

村西行藥到村東。沙路溪流曲折通。莫問梅花開早晚。杖藜到處即春風。

小園

新作小溪園。牽藤進縛門。釣船橫北渚。樵路接東村。靜坐依林樾。慵眠傍竹根。還家日已夕。棲雀鬧黃昏。

書適

老翁垂七十。其實似童兒。山果啼呼覓。鄉儻喜笑隨。羣嬉累瓦塔。獨立照盆池。更挾殘書讀。渾如上學時。

又

家食身無役。耆年力未衰。寓歡那待酒。隨意或成詩。窮達元非我。冤親竟是誰。惟嗟見事晚。枉卻鬢邊絲。

狂夫

狂夫與世本難諧。醉傲王侯亦壯哉。奕奕方收巖際電。酣酣已起枕間雷。回天力在人終歎。入月星來敵自排。千載鬼雄皆國士。直令窮死未須哀。

白髮

白髮今年一倍增。閉門養此老無能。牛羊被野霜天晚。禾稼連雲歲事登。未午春炊餘脫粟。乍寒包裹有籠繒。自憐未廢詩書業。父子蓬窗共一燈。

檢舊詩偶見在蜀日江濱池醉歸之篇悵然有感

江濱池頭爛醉歸。青旗日晚插城扉。正馳玉勒衝紅雨。又挾金丸伺翠衣。老境漸侵歡意盡。舊遊欲說故人稀。憑高三歎君知否。倦鷁無風亦退飛。

十一月四日風雨大作

風卷江湖雨闌村。四山聲作海濤翻。溪柴火軟蠻氈暖。我與狸奴不出門。

又

僵臥孤村不自哀，尙思爲國戍輪臺。夜闌臥聽風吹雨，鐵馬冰河入夢來。

冬日觀漁獵者

人閑漁獵各相從，南陌東阡處處逢。繡羽觸機餘耿介，錦鱗出網尙噉喙。傍觀扶杖常移日，就買還家足御冬。更待風霜都過盡，卻從春野看春農。

雨晴

山川炳煥似關國，風雨退收如解嚴。老子眞成無一事，抱孫負日坐茆簷。

病起

少年射虎南山下，惡馬強弓看似無。老病卽今那可說，出門十步要人扶。

奉祠

明窗松石供琴薦，小鼎山泉煮藥苗。乞得奉祠還自愧，猶將名姓到中朝。

假寐見海山異甚作小詩記之

海如黛色深，浪作雪點濺。數峰黃金山，巉絕出水面。此非想與因，了了目中見。何時眞往遊，浮世付掣電。

松下縱筆

自掃松陰寄醉眠，龍吟虎嘯滿霜天。卻思初到人間世，似是唐堯丙子年。

又

老不能閑莫笑予。五千言豈世間書。青松折取當麈尾。爲子試談天地初。

又

種玉餐芝術不傳。金丹下手更茫然。陶公妙訣吾曾受。但聽松風自得仙。

又

髯龍天矯欲飛去。百尺蒼藤羅絡之。應笑此翁才不進。故將老氣起吾詩。

拜勅口號

黃紙如鴉字。今朝下九天。身居鏡湖曲。銜帶武夷仙。日絕絲毫事。年請百萬錢。祠俸錢粟絮。帛歲計千緡。有畸恭惟優老政。千古照青編。

又

扶病中庭拜。君恩抵海深。頓增新祿格。暫拂舊朝簪。心欲先營酒。兒言且賸琴。人生奉祠貴。喜色動山林。  
僕以官視大卿監俸給皆增於昔。尤爲忝竊也。

閑居

土鐺茶七椀。瓦甌稷三升。兀兀能言石。騰騰有髮僧。淨巾裁白氎。拄杖采紅藤。尙喜冬來健。逢山得遍登。  
十一月十八日蒙恩再領冲佑鄰里來賀謝以長句

綠章封事徹虛皇。黃紙除書降野堂。海上春常探先到。壺中日已不勝長。冰銜再署仙班貴。鶴料重支玉粒香。便掛朝冠亦良易。金銅茶籠本相忘。  
往時嘗使閩者。例餽茶三年。今不講已久。余蓋未嘗露及也。



題老學菴壁

此生生計愈蕭然，架竹苫茆只數椽。萬卷古今消永日，一窗昏曉送流年。太平民樂無愁歎，衰老形枯少睡眠。喚得南村跛童子，煎茶掃地亦隨緣。

冬晴日得閑遊偶作

不用清歌素與蠻，閑愁已似解連環。閏年春近梅差早，澤國風和雪尙慳。詩思長橋寒驢上，碁聲流水古松間。賤天公事君知否，正乞柴荆到死閑。

示元禮

燕居侍立出扶行，見汝成童我眼明。但使鄉閭稱善士，布衣未必媿公卿。

書巢冬夜待旦

掃葉擁堦寒犬行，編茆護柵老雞鳴。風霜漸逼歲時晚，形影相依燈火明。史策千年媿豪傑，關河萬里愴功名。固應死抱無窮恨，老病何由更請纓。

醉後莊門望西南諸山

身是咸陽舊酒徒，龍鍾猶復泥村酤。百年略似夢長短，一醉且隨家有無。登覽未應慚脚力，功名正爾歎頭顱。夕陽又凭闌干立，誰畫三山岸幘圖。

著書

平生著書汗馬牛，一事不施今白頭。河洛未清非我責，山林高臥復何求。愚公可笑金堆屋，老子唯須糟

築丘華表無人識，歸鶴煙波底處有馴鷗。

探梅

我遊東村衝暮煙，斷橋流水鳴濺濺。欲尋梅花作一笑，數枝忽到拄杖邊。高標元合著山澤，絕豔豈復施丹鉛。定知曾授餐玉法，不爾恐是凌波仙。錦江詩忽萬里，蓬山把酒今三年。相逢風味宛如昨，人生何者非前緣。頗思取醉極清賞，杖頭幸有百許錢。但判插破烏紗帽，莫記吹落黃金船。

歲暮風雨

驕風起海滄，浩蕩東北來。鐵騎掠陣過，秋濤觸山回。老夫北窗下，坐守寒爐灰。處世困憂患，萬事學低摧。便欲滅燈睡，門閉不敢開。並海固多風，汝孱良可哀。念昔少年日，從戎何壯哉。獨騎洮河馬，涉渭夜銜枚。

又

一冬少雨雪，人意常昏昏。夜半有奇事，雨聲卷江村。陸子真老農，破屋依頽垣。扶持衰病身，收召譴逐魂。手烹牆陰齋，美若乳下豚。聽雨取一醉，不厭村酒渾。眼昏燈生暈，衣弊蝨可捫。父子幸相守，萬事何足論。自夏秋匱甚，慨然有感。

萬卷縱橫眼欲枯，老猶閉戶誦唐虞。故人誰復訪生死，鄰父幸能通有無。雲子翻匙新稻飯，天吳拆繡舊衣襦。時平得掩松根骨，也勝王孫泣路隅。

題四仙像

反虜鯨鯢世共讎，漢公勛業過伊周。市門灑淚塵埃裏，誰與朝廷植委裘。  
梅福

又

世上年光東逝波。咸陽銅狄幾摩挲。神仙不死成何事。只向秋風感慨多。蘇子剛

又

曾看四嶽薦虞繅。閱歲三千一瞬間。歸臥青山孤絕處。白驢常伴白雲閑。張果

又

蓮花峯下張超谷。此老何曾有死生。聞道風清月明夜。至今鼻息亂松聲。陳搏

自責

窮途敢恃舌猶存。小築城西十里村。未掛衣冠慙士節。免輸薪粢荷君恩。文章跌宕忘繩墨。學問荒唐失本原。仕宦一生成底事。子孫世世記吾言。

自解

四十頭顱已可知。殘年至此復何爲。著書不直一盃水。看鏡空添千縷絲。達宦獨驕儒作戲。後生速化吏爲師。有冠當掛無餘說。但恨衰翁見事遲。

午睡起消搖園中因登山麓薄暮乃歸

老病攻百骸。微纏困束縛。頽然一熟睡。如獲萬金藥。窗明竹影亂。林暖鳥聲樂。灰深香欲上。火活湯正作。毫甌羞茗荈。銅洗供盥濯。整巾出庭戶。曳杖歷巖壑。遙岑見木杪。細水鬪籬脚。踟躕遂忘歸。清嘯送日落。

羣兒

野行遇羣兒呼笑連蹙忙。共爲小浮圖。嶙峋當道旁。蜺殼以注燈。椀足以焚香。須臾一闕散。無益亦何傷。古來富貴人。峨冠登廟堂。謀謨一悖謬。縣宇失太康。坐令安業民。血喋而屍僵。傳呼一朝寵。遺患日月長。均爲兒戲爾。禍機孰深藏。我作羣兒詩。持用砭世盲。

久疾灼艾小愈晚出門外

老境侵凌病滿軀。火攻下策得枝梧。沽來村酒初判醉。吐去山童不遣扶。霜重木凋鴉可數。溪清魚見鶴相呼。興闌卻掩齋扉臥。閑看青燈照藥爐。

夙興弄筆偶書

憂患熏心少睡眠。雞號窗白一欣然。道旁歲晚貂裘弊。燈下書成鐵硯穿。杜老慣聽兒索飯。鄭公何啻客無氈。春風不解嫌貧病。尙擬花前醉放顛。

縱筆

山合水將窮。真宜著放翁。醉嫌天地迤。老覺歲時公。偃蹇松逃世。翩仙鶴駕風。舊交零落盡。一笑與誰同。

冬晴閑步東村由故塘還舍作

故園三徑可婆娑。遇興遵塗負杖歌。霜重天寒山色淡。草枯野曠獵徒多。解刀尙可謀黃犢。揮帖無由致白鵝。自計長閑何所恨。一生心事在煙波。

紅藤拄杖獨相羊。路遶東村小嶺傍。水落枯萍黏蟹椀。鄉人植竹以取蟹。謂之曰椀。雲開寒日上魚梁。洛陽二頃言良是。光範三書計本狂。歷盡危機識天意。要令閑健返耕桑。

十二月八日步至西村

臘月風和意已春。時因散策過吾鄰。草煙漠漠柴門裏。牛迹重重野水濱。多病所須唯藥物。差科未動是閑人。今朝佛粥更相餽。更覺江村節物新。

夜聞湖中漁歌

夢回一燈翳復明。臥聞湖上漁歌聲。嗚嗚乍低忽更起。嫋嫋欲斷還微縈。初隨缺月墮煙浦。已和殘角吹江城。悲傷似擊漸離筑。忠憤如撫桓伊箏。放臣萬里憂國淚。戍客白首懷鄉情。峽猿失侶方獨宿。沙雁垂翅猶遐征。巴巫竹枝短亭晚。瀟湘欸乃孤舟橫。世間此恨故相似。使我百感何由平。

忽得京書有感

白髮蒼顏七十翁。朽株枯木略相同。如山儲藥難醫拙。齊斗堆金不換窮。昨夢已拋空劫外。殘年全付醉眠中。故人苦未知心事。一紙空煩寄斷鴻。

晚步門外書觸目

數椽茆屋鏡湖傍。喬木蒼煙一徑長。酒賤過門多醉叟。天寒棲畝有餘糧。歌呼草市知人樂。簫鼓叢祠喜歲穰。只道老來詩思盡。未妨擊壤頌時康。

親舊書來多問近況以詩答之

耐辱推顏百不能。居然老病住菴僧。流年速似一彈指。更事多於三折肱。庭樹影中聞夜汲。隣機聲裏對寒燈。沈詩任筆俱忘盡。酒戶新來卻少增。

開書篋見韓无咎書有感

老覺人間萬事非。幽棲幸已脫塵鞿。殘年得飽不啻足。舊友半空誰與歸。開眼不妨成一夢。翦翎何至羨羣飛。龍圖老子今安在。把卷燈前淚滿衣。

夜大雪歌

朔風吹雪飛萬里。三更蔽蔽鳴窗紙。初疑天女下散花。復恐麻姑行擲米。異哉凍硯已生冰。信矣重衾如潑水。山中臥澗松竹折。庭前蔽地烏鳶死。昨日之煖殊昏昏。桃李欲坼春滿園。陰陽錯繆世或有。物窮則變古所言。雖云明年幸一麥。凍餒溝壑知誰存。嗚呼今夕之雪未足論。所憂明日巖嶂高寒門。

寄宇文成州

成州太守比何如。夢裏依然把臂初。復起卿常用卿法。長閑吾實愛吾廬。五湖風雨孤舟夜。萬里關山一紙書。正使兩翁長隔闊。子孫它日莫相疎。

示子聿

我鑽故紙似癡蠅。汝復孳孳不少懲。父子更兼師友分。夜深常共短檠燈。

雪

平郊漫漫覺天低。況復寒雲結慘悽。老子方驚飛蛺蝶。羣兒已說聚狻猊。中宵鳶墮頻摧木。徹旦雞瘖重壓棲。只待新晴梅塢去。青鞵未怯踏春泥。

夜坐

耿耿殘燈夜未央。負牆閑對篆盤香。風號東北河冰合。月落西南竹影長。孤鶻欲棲頻繞樹。寒龜無息穩  
墮床。頽然坐睡那知曉。推戶朝曦已滿廊。

春雨

午夜聽春雨發生。端及期。世憂殊未艾。天意固難知。士節承平日。人材南渡時。後生聞見狹。撫枕歎吾衰。  
夢與數客劇飲。或請賦詩。予已大醉。縱筆書一絕覺而錄之。

高談雄辯憑陵酒。豪竹哀絲蹴蹋春。占斷名園排日醉。不教虛作太平人。

世事

世事說來猶可厭。宦情夢裏亦應無。山林已結三生願。朝市誰非九折途。醉舞盃盤無藉在。狂吟風月不  
枝梧。何人今擅丹青藝。爲畫蘇門長嘯圖。

二子

兩檀夢後少真儒。毀譽徒勞豈識渠。孟子無功如管仲。揚雄有賦似相如。敬王事業知誰繼。準易工夫故  
不疎。孤學背時空絕歎。白頭窮巷抱遺書。

謝郭希呂送石洞酒

從事今朝真到齊。春和盎盎卻秋淒。色如夷甫玉麈尾。價敵茂陵金甕醅。瑞露頗疑名太過。橐泉猶恨韻  
差低。山園雪後梅花動。一榼常須手自攜。瑞露桂盃酒得名甚盛。橐泉岐下酒自昔名冠關中。而失之太  
動。

飲酒

六十四民安在哉。千八百國俱煙埃。世人一瀉寄巨海。對酒不醉吁可哀。平生清狂今白首。芒屨布裘稱野叟。晨興窗几網蛛絲。石洞書來餉名酒。看月直到無月時。尋花直到花片飛。醉中往往花壓帽。鄰里聚看湖邊歸。先生兩耳不須洗。利名不到先生耳。狂歌起舞君勿嘲。青山白雲終醉死。

無題

金鞭朱彈憶春遊。萬里橋東罨畫樓。夢倩曉風吹不去。書憑春雁寄無由。鏡中顏鬢今如此。幙下朋儔好在。不篋有吳牋。三萬箇。擬將細字寫新愁。

雨雪兼句有賦

冬溫思雨雪。稍久已復厭。祁寒人怨咨。千載語猶驗。人心自無常。天命本不僭。積陰勢已極。浮雲會當斂。山花紅酣酣。谿水綠澗澗。短篷倘可具。與子東入剡。

北窗睡起

違物離人不計年。萬金難買北窗眠。高懷元在羲皇上。大事已明空劫前。樵路細盤雲外嶺。釣筒倒插水中天。此時消息君知否。千載巢由未足賢。

立春

紹熙又見四番春。春日春盤節物新。獨酌三盃愁對影。例添一歲老催人。菊芽冒土如爭出。柳色搖村已漸勻。身是蘭亭山下客。未容逸少擅清真。



曉枕

殘漏寥寥急，明星磊磊高。一從安枕臥，無復攬衣勞。熨斗生晨火，熏籠覆緇袍。一盃山藥酒，紅日滿亭臯。

落梅

雪虐風饕愈凜然，花中氣節最高堅。過時自合飄零去，恥向東君更乞憐。

又

醉折殘梅一兩枝，不妨桃李自逢時。向來冰雪凝嚴地，力斡春回竟是誰。

閑居無客所與度，日筆硯紙墨而已。戲作長句。

水複山重客到稀，文房四士獨相依。黃金那得與齊價，白首自應同告歸。韞玉面凹觀墨聚，浣花理膩覺豪飛。韞玉，潛硯名。浣花，蜀牋名。興闌卻欲燒香睡，閑聽松聲書掩扉。

壬子除夕

前村後村燎火明，東家西家爆竹聲。老逢新正幸強健，卻視徂歲何崢嶸。兒時祝身願事主，談笑可使中原清。豈知一出踐憂患，斂縮豈復希功名。雪霜滿鬢覺死近，節物到眼空歎驚。蠶官社公正暖熱，春盤儺鼓爭施行。蓬門車馬所不至，山僧野叟相逢迎。嗚呼吾曹見事晚，古俗實在蚩蚩氓。茆簷一笑語兒子，明當滿舉屠蘇觥。

癸丑正月二日

朱顏不老畫中人，綠酒追歡夢裏身。堪笑三山衰病叟，閉門寂寂過新春。

又

菊叢抽綠滿枯菱。繞舍梅花已遍開。須信今春春事早。江鄉開歲有奔雷。

避世行

君渴未嘗飲鳩羽。君飢未嘗食鳥喙。惟其知之審。取捨不待議。有眼看青天。對客實少味。有口啖松柏。火食太多事。作官蓄妻孥。陷窳安所避。刀鋸與鼎鑊。孰匪君自致。欲求人迹不到處。忘形麋鹿與俱逝。杳杳白雲青嶂間。千歲巢居常避世。

稽山農余作避世行以爲不可常也復作此篇

華胥氏之國。可以卜吾居。無懷氏之民。可以爲吾友。眼如巖電不看人。腹似鷓夷惟貯酒。周公禮樂寂不傳。司馬兵法亡亦久。賴有神農之學存。至今扶犁近可師。野叟粗繒大布以禦冬。黃梁黑黍身自舂。園畦剪韭勝肉美。社瓮撥醅如粥醲。安得天下常年豐。老死不見傳邊烽。利名畫斷莫挂口。子孫世作稽山農。

牧牛兒

南村牧牛兒。赤脚踏牛立。衣穿江風冷。笠敗山雨急。長陂望若遠。隘巷忽相及。兒歸牛入欄。煙火茆簷溼。讀書未終卷。而睡有感。

暮年緣一嬾。百事俱棄置。今遂嬾到書。把卷輒坐睡。其餘嬾則已。感此獨歔歔。念昔少壯時。日夜痛磨礪。誓言死爲期。身在敢暴棄。寧知未死前。殆欲負此志。顏回稱好學。揚雄乃識字。勉哉慕前修。自畫聖所諱。

早春新晴

柳弄春柔拂小潭。山橫霽色卷浮嵐。飛揚旛脚擲東北。零落梅花餘二三。村店疎燈新賣酒。神祠疊鼓正祈蠶。幽人睡起東園去。芹茁萱芽又滿籃。

枕上聞禽聲

屏掩輕寒酒半消。斷香殘夢兩無悽。開年春意遽如許。破曉一聲娑餅焦。

感舊

憶從南鄭入成都。氣俗豪華海內無。故苑燕開車載酒。名姬舞罷斗量珠。浣花江路青螭舫。槎柳毬場白雪駒。回首壯遊真昨夢。一竿風月老南湖。

夜雨

澤國寒多雨。畸人夜少眠。不緣醒作病。只合醉終年。庭草已爭茁。園梅空自憐。重雲不難挾。無劍倚青天。

又

寒雨連三夕。幽居只數椽。家貧經過節。身老怯增年。日月悲歌裏。關山淚眼邊。梅花自開落。歎息爲誰妍。

又

人日春猶淺。雞晨夜向闌。殘缸燈暈小。單枕雨聲寒。難補皇天漏。空思后土乾。山家尊酒薄。懷抱若爲寬。

初晴野步

入市路三叉。綠山港半斜。疎籬帶殘雪。幽竇瀉湍沙。好鳥晴相語。芳蘭暖欲芽。病餘無脚力。隨處憩人家。

明日復雨排悶

湖上孤村冷欲冰。更堪衰與病相乘。夢回點滴簷間雨。心折青燐帳外燈。雖有數椽常似客。僅存一肉未成僧。披衣偶取南華讀。打破愁城喜不勝。

又

此老在家如出家。蒲團趺坐讀南華。溼雲不散雁呼伴。幽室無聲燈墜花。心法先當破窠窟。世緣最忌養萌芽。行年七十方知悔。萬事無涯生有涯。

小室

小室僅容膝。焚香觀昨非。出門寧有礙。知我正須希。霜橘爭棊樂。仙壺賣藥歸。平生釣竿手。不解叩黃扉。

浮世

浮世如流水。滔滔日夜東。百年均夢寐。萬古一虛空。青鳥來雲外。銅駝臥棘中。相逢惟痛飲。令我憶無功。

紅梅

苧蘿山下越谿女。戲作長安時世粧。白白朱朱雖小異。斷知不是百花香。

又

雪裏溪頭已占春。小園又試晚粧新。放翁老去風情在。惱得梅花醉似人。

湖上

今朝雨初晴。湖上好天色。落梅紛可藉。桑柳亦已拆。老夫病良已。並水散輕策。冉冉春物新。忽忽衰髮白。四方豈不樂。懶惰畏遠客。惟當勤買酒。東城復南陌。

晴甫一日復大風雨連日不止遺懷

書劍當年隘九州。白頭歸臥一窗幽。染成草色春猶淺。老盡梅花雨未休。得句已無前輩賞。開編時與古人遊。山房小甕今朝熟。不恨尊前自獻酬。

癸丑上元三夕皆大雨雪

雨雪連三日。孤城冷欲冰。泥深唯響屐。風惡更吹燈。空惱追歡客。何關在定僧。一盃嘗鼓煎。寒影對峨嵋。

寓歎

人生各自有窮通。世事寧論拙與工。裹馬革心空許國。不龜手藥卻成功。早朝玉勒千門雪。夜坐蓬窗萬壑風。借得奇書且勤讀。小兒能續地爐紅。子坦以新昌木炭二百斤來。

幽興

雨後梅花無復在。老來酒盞頓成疎。身如海燕不逢社。家似瓜牛僅有廬。短髮垂肩懶中散。深居謝客病相如。從今何以消長日。剩種芭蕉學草書。

緗梅

疎影橫斜事已非。小園日暮鎖芳菲。素綃應怯東風思。故著重重淺色衣。

又

香似海沉黃似酒。不禁風雪最遲開。放翁欲作梅花譜。蠟屐搗笻日日來。

又

陸放翁集 劍南詩稿卷二十六

紅梅眼看風吹盡。更有細梅亦已無。天與色香天自愛。不教一點上蜂鬚。

一八

(二二二〇)

# 陸放翁集

劍南詩稿

卷第二十七

僧廬

僧廬土木塗金碧。四出徵求如羽檄。富商豪更多厚積。宜其棄金如瓦礫。貧民妻子半菽食。一飢轉作溝中瘠。賦斂鞭笞縣庭赤。持以與僧亦不惜。古者養民如養兒。勸相農事憂其飢。露臺百金止不爲。尙媿七月周公詩。流俗紛紛豈知此。熟視創殘謂當爾。傑屋大像無時止。安得疲民免飢死。

春日

節節足足雀噪檐。朱朱白白花窺簾。坐旁設酒隨時飲。床上堆書信手拈。寓世無求猶役役。杜門不病亦厭厭。春濃日永有佳處。睡味著人如蜜甜。

春遊

鏡湖春遊甲吳越。鶯花如海城南陌。十里笙歌聲不絕。不待清明寒食節。青絲玉瓶挈新釀。細柳穿魚初出浪。花外金羈絡雪駒。橋邊翠幙圍螭舫。怕雨愁陰人未知。時時微雨卻相宜。養花天色君須記。正在輕雲嫩靄時。

懷昔

昔遇高皇帝，華纓接俊遊。年光一彈指，世事幾浮漚。故國但青嶂，羈臣今白頭。平生笑李廣，癡絕望封侯。  
記夢

夢不出心境，曠然成遠遊。花殘杜城醉，木落華山秋。戰血磨長劍，塵痕洗故裘。那知覺來處，身臥五湖舟。  
春陰

老境三年病，新春十日陰。孤舟鏡湖客，萬里玉關心。出岫雲多態，呼風鳥獨吟。讀書惟恐盡，傾酒卻愁深。  
睡起行至閬外有賦

窗黑停書課，屏深養病眸。雨聲工破睡，酒力不禁愁。兀兀披衣起，昏昏曳杖遊。柴荆晚未閉，隔水數歸牛。  
早春

舊學樊遲稼，新通汜勝書。不成籌國論，且復愛吾廬。  
又

具牛將犢行，野雉挾雌鳴。農事不可緩，閑人亦勸耕。  
又

近陂牛渾白，遠浦鴨頭青。一櫂悠然去，東風吹酒醒。  
又

西村一抹煙，柳弱小桃妍。要識春風處，先生拄杖前。



少日沉迷汗簡青。如今毀譽兩冥冥。書生弄筆如何信。只合花前醉不醒。

又

驅使難憑赤丁子。傳呼底用蒼頭兒。世間如夢身如寄。春去花空欲泥誰。

又

牽經引禮人誰聽。是古非今世共憎。何似對花傾綠酒。自歌一曲醉騰騰。

贈劉改之秀才

君居古荊州。醉膽天宇小。尙不拜龐公。况肯依劉表。胸中九淵蛟。龍蟠筆底六月冰。雪寒有時大叫脫。烏帽不怕酒盃如海寬。放翁七十病欲死。相逢尙能刮眼看。李廣不生楚漢間。封侯萬戶宜其難。

蓬門

莫笑蓬門雀可羅。老農正要養天和。穿林裊裊孫登嘯。叩角嗚嗚寧戚歌。睡美到明三展轉。飮甘捧腹一摩挲。床頭更聽糟床注。造物私吾亦已多。

龍鍾

龍鍾一老寄荒村。鼎食山棲久已分。平日氣吞雲夢澤。暮年緣在武夷君。搶榆敢羨垂天翼。倚市從嗤刺繡文。幸有筆床茶竈在。孤舟更入剡谿雲。

送佛照光老赴徑山

大覺住育王。拗折拄杖強到底。佛照住育王。挑得鉢囊隨詔起。從來宗門話。只要句不死。說同說異菴外。

人若是吾宗寧有此。日日風雨今日晴。萬里春光入帝城。傳宣江上走中使。開堂座下羅公卿。御香滿室雲共布。法音浩浩潮收聲。報恩一句作麼道。常遣山林見太平。

春社有感

顛顛前朝白髮郎。祠庭賦祿玷恩光。寸心未與年俱老。萬事惟憑酒暫忘。穿仗兩曾觀揖遜。扶犁獨幸返耕桑。著年凋落還堪歎。社飲推排冠一鄉。三山百家之聚年莫余先者。

春社

桑眼初開麥正青。勃姑聲裏雨冥冥。今朝有喜君知否。到處人家醉不醒。

又

社肉如林社酒濃。鄉鄰羅拜祝年豐。太平氣象吾能說。盡在萼萼社鼓中。

又

柴門西畔枕陂塘。社雨新添一尺強。臺省諸公方袞袞。故應分喜到耕桑。

又

太平處處是優場。社日兒童喜欲狂。且看參軍喚蒼鶻。京都新禁舞齋郎。

村夜

寂寂山村夜。悠然醉倚門。月昏天有暈。風軟水無痕。迹爲遭讒遠。身由不仕尊。敢嗟車馬絕。同社自雞豚。

山園遣興

輸通告糴走比鄰。恤患分災累故人。安得此身無一事。林中數筍過殘春。

次韻陳機宜見贈

邂逅今年得若人。儵然不染庾公塵。思幽屈子歌山鬼。語妙陳王賦洛神。初接笑談忘老億。熟觀風度愛清真。花時飛盡頻行樂。莫學衰翁睡過春。

野意

隄長逾十里。村小只三家。山客弛樵擔。溪翁鳴釣車。花深迷蝶夢。雨急散蜂衙。衰疾新年減。青鞵上若耶。

戒殺

物生天地間。同此一太虛。林林各自植。但坐形骸拘。日夜相殘殺。曾不置斯須。皮毛備裘褐。膏血資甘腴。雞鶩羊彘輩。尙食稗與芻。飛潛何預汝。禍乃及禽魚。豺虎之害人。亦爲飢所驅。汝顧不自省。何暇議彼歟。又於人類中。各私六尺軀。方其忿怒時。流血視若無。我欲反其源。默觀受氣初。挺刃之所加。慘若在我膚。朝飯一鬴豆。暮飯一盃蔬。捫腹茹簞下。陶然歡有餘。

余年四十六入峽。忽復二十三年感懷賦長句

當年弔古巴東峽。雪灑扁舟見早梅。宋玉宅邊新酒美。巫山廟下暮猿哀。樵柯爛盡棋方劇。客飯炊成夢未回。已把癡頑敵憂患。不勞團扇念寒灰。劉夢得團扇歌曰。當時初入君懷袖。豈念寒爐有死灰。

山行

七十衰翁短鬢斑。藥瓢藤杖伴清閑。平生惡路羊腸阪。晚歲羸軀飯顆山。一寸塔餘青靄外。數聲鐘下翠

微問往來處處皆奇絕。莫道先生興盡還。

雨中排悶

一春苦沈陰。未省見桃李。已逢暗寒食。更值雨甲子。重雲失南山。寸步困泥滓。籜龍已齷齪。一飽差可喜。杜敬叔寓僧舍開軒松下以虛瀨名之來求詩

君不見洛陽八節灘。未至一舍聞驚湍。生綃六幅誰所畫。入眼能令三伏寒。又不見桐廬七里瀨。濺雪跳珠舞澎湃。羊裘老子去千年。絕世孤風凜如在。杜陵之孫今勝流。飄然不必事遠遊。結茆古寺聽松吹。坐擅洛水桐江秋。放翁百念俱已矣。獨有好奇心未死。約君少待秋月明。抱琴來宿寫灘聲。

贈徑山鈺書記

徑山老將無勳敵。百萬魔軍俱掃迹。座下何人策雋功。籌略縱橫鈺記室。鈺公聲名滿吳會。惟有放翁最先識。奕奕揮毫王粲詩。翩翩插羽陳琳檄。風雷東海起伏龍。縹緗園丘薦蒼壁。徑山入門第一義。萬口譁言真稱職。我謂鈺公豈止此。徑山鉢袋渠能得。一枝白拂倘付之。會見青天飛霹靂。

五月一日作

處處稻分秧。家家麥上場。敢悲身老大。獨幸歲豐穰。酪美朱櫻熟。菰青角黍香。愴然一竹几。飽受北窗涼。春夏之交衰病相仍過芒種始健戲作

藥裏關心百不知。可憐筆硯鎖蛛絲。倒壺猶有暮春酒。開卷遂無初夏詩。戶外逢人驚隔閭。燈前顧影歎支離。癡頑未伏常愁臥。鼓缶長謠樂聖時。

自嗟

青蔬半畝老生涯。霜鬢蕭蕭只自嗟。助業蹉跎空許國。文詞淺俗不名家。殘骸皆作麒麟楨。舊友仍非處士牙。收得平生釣竿手。長安西日更須遮。

枕上述夢五月十二日雞鳴時作

江湖送老一漁舟。清夢猶成塞上遊。生馬駒馳鐵驪腕。古鏡歌奏錦衣禱。玉關雪急傳烽火。青海雲開見戍樓。白首不候非所恨。啾啾床簀死堪羞。

雨中排悶

潤入盆山綠葉稠。倦攤書帙小窗幽。浮雲不卷時時雨。薄酒無功日日愁。積潦漲來妨躡屐。好山遮盡罷登樓。青秧搖蕩湖堤決。一飽前知未易謀。

小軒夏夜涼甚偶得長句呈杜叔高秀才

遙夜簾櫳已借秋。闌干星斗挂檐頭。鵲翻清影移枝宿。螢弄孤光拂簾流。榻上琴書紛枕藉。髮根風露冷颼颼。故人莫笑幽居陋。此夕真從造物遊。

憶昔

憶昔西征日。飛騰尙少年。軍書插鳥羽。戍壘候狼煙。渭水秋風夜。岐山曉雪天。金鞮馳叱撥。繡袂舞嬋娟。但恨功名晚。寧知老病纏。虎頭空有相。麟閣竟無緣。壯士埋巴峽。孤身臥海壩。安西九千里。孫武十三篇。裘歎蘇秦弊。鞭憂祖逖先。何時聞詔下。遣將入幽燕。

夏日晚興

高掛虛窗對綠池。鳥啼聲歇柳陰移。含風珍簾閑眠處。疊雪輕衫新浴時。泉冷甘瓜開碧玉。手香素藕寫  
一作雪。長絲。夕陽四面漁歌起。又赴鄰翁把釣期。

老翁

老翁垂七十。不復歎頭顱。浩蕩新漁艇。凋零舊酒徒。嚴徐元袞袞。管葛亦區區。獨有欣然處。登山未用扶。

困甚戲書

官如枝頭乾。不受雨露恩。身如水上浮。泛泛寧有根。刈茆以苦屋。縛柴以爲門。故人分祿米。鄰父餉魚飧。前門吏徵租。後門質襦幘。不敢謀歲月。且復支朝昏。雨餘幽花拆。亦可侑清尊。吾生信已乎。終老此山村。

歲晚

日月忽其逝。吾生猶幾何。不從屠狗醉。即和飯牛歌。斧鉞稽天討。金繒約虜和。無情恨荆棘。歲晚暗銅駝。

戲詠山陰風物

萬里秦吳稅駕遲。還鄉已歎鬢成絲。城邊綠樹山陰道。水際朱扉夏禹祠。項里楊梅鹽可徹。太白梁園吟  
云。玉盤楊梅爲君設。吳鹽如花皎白雪。不知楊梅酸者乃薦以鹽。佳品未嘗用也。湘湖蓴菜鼓偏宜。蓴菜  
最宜鹽。鼓所謂未下鹽鼓者。言下鹽鼓則非羊酪可敵。蓋盛言蓴羹之美爾。圖經草草常堪恨。好事它年  
采此詩。

老健

才智不足狂有餘。此身老健更誰如。爾牢尚可決乾肉。目瞭未妨觀細書。不怪模稜噓了了。但驚紆臂勸徐徐。曉看瓜壘初牽蔓。一笑呼兒勿廢鉏。

六月晦日作

長夏忽云過。徂年行且休。川原方渴雨。草木已驚秋。露蔓晨猶滋。風蟬暮更遒。明窗對清鏡。世事判悠悠。

喜雨

雷車隆隆南山陽。電光煜煜北斗傍。急雨橫斜生土香。草木蘇醒起仆僵。芭蕉抽心鳳尾長。薜荔引蔓龍鱗蒼。葛幘竹簟夜更涼。超然真欲無羲皇。常年七月蚊殷廊。今夕肅肅疑飛霜。水車罷踏屣斗藏。家家買酒歌時康。

門外納涼

玄雲障落日。早得數刻涼。寒泉灑門前。浴罷倚胡床。蟬聲晚愈壯。藕花凋更香。嘯詠忽已久。野色來蒼蒼。新月淡無輝。大星森有芒。水鳥亦歸宿。飛鳴掠橫塘。人生各有時。何至終身忙。撫髀三太息。墜露溼衣裳。贈蘇趙叟兄弟。

君家真德門。才傑生衰衰。託契則甚深。所恨相識晚。攜文數過我。每讀必三反。譬如天廐駒。真是渥洼產。閉門萬卷讀。更要極源本。才難聖所歎。期子敢不遠。

癸丑七夕

風露中庭十丈寬。天河仰視白漫漫。難尋仙客乘槎路。且伴吾兒乞巧盤。秋早時聞桐葉墜。夜涼已怯絳

衣單民無餘力年多惡。退士私憂實萬端。

共語

喬嶽成塵巨海枯。欲求共語一人無。黃金已作飛煙去。癡漢終身守藥爐。

書歎

少年志欲掃胡塵。至老寧知不少伸。覽鏡已悲身潦倒。橫戈空覺膽輪囷。生無飽叔能知己。死有要離與卜鄰。西望不須揩病眼。長安冠劍幾番新。

秋曉倚闌

雲罇纖纖玉一鉤。小庭風露更清柔。老來朋舊凋零盡。獨倚闌干特地愁。

癸丑七月二十七夜夢遊華嶽廟

驛樹秋風急。關城暮角悲。平生忠憤意。來拜華山祠。

又

牲碑僞正朔。祠祝虜衣冠。神亦豈堪此。出門山雨寒。

僕頃在征西大幕登高望關輔樂之每冀王師拓定得卜居焉暇日記此意以示子孫

八月殘暑退。秋聲滿庭樹。豈無四方志。衰病迫霜露。遼東黃頭奴。稔惡天震怒。南北會當一。老我悲不遇。子孫勉西遷。俗厚吾所慕。約已收孤嫠。教子立門戶。黍稷暗阡陌。鶉雉足匕箸。永爲河渭民。勿憚關山路。

讀陶詩



我詩慕淵明，恨不造其微。退歸亦已晚，飲酒或庶幾。雨餘鉏瓜壟，月下坐釣磯。千載無斯人，吾將誰與歸。

秋夜感舊十二韻

冷螢綴蓬根，忽復照高樹。年光逝不留，百感集遲暮。往者秦蜀間，慷慨事征戍。猿啼鬼迷店，馬嘶飛石舖。鬼迷店在大散關下，飛石舖在小益道中，常有崩石。危嶺高入雲，朽棧劣容步。天近星宿大，江惡蛟鼉怒。意氣頗自奇，性命那復顧。最懷清渭上，衝雪夜掠渡。封侯細事爾，所冀垂竹素。兜鍪竟何成，豈獨儒冠誤。當時妄校尉，旗纛今照路。浩歌遂成章，聊慰老不遇。

幽居

海濱結茆新，退藏常畏人。已侵垂老境，尚愛不貲身。丹灶長生藥，巢居上古民。秋來有奇事，鷗鷺日相親。

醉題

勿笑山翁病滿軀，胸中俠氣未全無。雙瞳遇醉猶如電，五木隨呼盡作盧。代北胡兒富羊馬，江南奇士出菰蘆。何由親奉平戎詔，蹴踏關中建帝都。

雨涼小飲戲作

孤村小院雨輪涼，團扇流塵篔避床。蛩思感秋吟壞壁，螢光乘暗遶高梁。巾箱字細成褫爛，醴醢盃深斷送狂。坐睡覺來人已散，簾櫳時度玉簪香。玉簪花名。

題齋壁

迹是滄浪客，家居欒嵒村。秋菰莖羹滑，社酒帶醅渾。助業知難遂，文章不更論。惟餘此身在，分付與乾坤。

書憤

山河自古有乖分，京洛腥羶實未聞。劇盜曾從宗父命，遺民猶望岳家軍。上天悔禍終平虜，公道何人肯散羣。白首自知疎報國，尙憑精意祝爐熏。宗澤守東都巨盜來歸百萬號宗爺岳家軍蓋紹興初語。

秋興

秋風又滿會稽城，有客飄然萬事輕。久向林間得佳趣，不知身外有浮名。蒲萄雨足初全紫，烏柏霜前已半頽。欲把一盃終覺嬾，老來懷抱爲誰傾。

雨夜排悶

羸病愁燈影，羈懷怯雨聲。新秋忽已半，垂老若爲情。金印兒嬉事，青編身後名。何如破窗下，袖手送餘生。

又

村巷時時雨，江城夜夜砧。沉憂羈客夢，孤憤遠臣心。身病常須藥，囊空未贖琴。明朝鏡中髮，飽受雪霜侵。

秋日出遊戲作

箬帽蓑衣自道宜，不論晴雨著無時。半醒半醉人爭看，是聖是凡誰得知。

又

薄雲韜日未成雨，野水齧沙爭赴溪。書冊嬾看聊作伴，酒壺不飲亦常攜。

雨中夕食戲作

高秋滴堦雨作泥，黃昏爭林雀欲棲。臨窗一飯頗簡快，半升脫粟澆黃齏。

又

粗飢寒菹到手空。屬壓也與八珍同。家人見慣渾閑事。笑殺新來兩鬢童。

又

粃粒微紅愧食珍。蔣芽初白喜嘗新。摩挲使腹無憂責。我是人間得計人。

自警

墮髮滿晨梳。荒畦入晚鉏。涼生團扇厄。病退短筇踈。聖道功殊淺。塵緣習未除。青燈幸如故。勉近讀殘書。

寄方瞳胡先生

形槁神彌王。心虛腦自凝。平生一酒榼。萬里兩行縈。安枕存玄牝。齋居養絳陵。他年喬嶽下。正晝看飛騰。

古仙人飛升皆在五嶽名山。故人少見者。

雨夕焚香

芭蕉葉上雨催涼。蟋蟀聲中夜漸長。繙十二經真太漫。與君共此一爐香。

秋雨初霽徒倚門外有作

三十餘年此結廬。客來不用笑迂疎。前身已預蘭亭會。老眼曾窺禹穴書。浮盞社醅香出屋。登場秋稼穗盈車。蕭蕭蓬鬢雖衰矣。追逐鄉鄰尙有餘。

雨中作

野外偏於看雨宜。映空渡水細如絲。川雲借潤支琴石。澗水分流洗藥池。未肯高眠成老態。卻緣危坐得

新詩悠然更助鄰丁喜。漸近收蕎下麥時。

贈老雞

峨峨赤幘先羣輩。喔喔長鳴蓋四郊。意氣雖雄無處用。風霜從我老衡茆。

又

場中啄粟樹頭棲。三唱明星出尚低。關路元無孟嘗客。吳兒莫議會稽雞。

秋晚閑步鄰曲以予近嘗臥病皆欣然迎勞

放翁病起出門行。績女窺籬牧豎迎。酒似粥釀知社到。麩如盤大喜秋成。歸來早覺人情好。對此彌將世事輕。紅樹青山只如昨。長安拜免幾公卿。

雨夜

歲晚茆茨劣自容。齒搖將脫髮將童。心遊萬里關河外。身臥一窗風雨中。醫不可招惟忍病。書猶能讀足忘窮。夜闌睡覺蛩聲裏。時見燈花落碎紅。

醉臥道傍

爛醉今朝臥道傍。鄉閭共爲護牛羊。高懷那遣羣兒覺。至理真能萬事忘。喚起瘦軀猶覓峨。扶歸困睫更芒洋。凍蠶快嚼茆簷下。拍手從人笑老狂。

枕上聞急雨

枕上雨聲如許奇。殘荷叢竹共催詩。喚回二十三年夢。燈火雲安驛裏時。

又

酒病羈愁一洗空。長歌高枕雨聲中。傳聞谿港深三尺。明日扁舟處處通。港澗久不通舟楫。兩日雨殊可喜也。

得趙若川書因寄

澤居路絕人不到。晨起忽傳雙鯉魚。儲淚一升悲世事。減愁三尺看君書。龍墀對策言傷直。山邑迎親計未疎。老病閉門誰省錄。因風時肯問何如。

夢至洛中觀牡丹繁麗溢目覺而有賦

兩京初駕小羊車。顛顛江湖歲月除。老去已忘天下事。夢中猶看洛陽花。妖魂豔骨千年在。朱彈金鞭一笑譁。寄語氍毹莫癡絕。祈連還汝舊風沙。

閑居對食書媿

遊宦無功坐免歸。誰令盤筋極甘肥。錦鱗差尾魚登俎。繡羽駢頭雉觸機。桑落滿壺春盎盎。雨前轉磴雪霏霏。殘年何地酬君賜。自古羈臣厭蕨薇。

又

老病家居幸歲穰。味兼南北餼枯腸。滿脾蜜熟餽饒美。下棧羊肥餽飴香。鱖刺河魴初出水。迷離穴兔正迎霜。山僧一鉢無餘念。應笑先生爲口忙。

秋夜獨酌

壯志隨年減。羈愁與夜長。月高寒暈淡。花坼露叢香。仕畏讒銷骨。歸判酒腐腸。青燈寫孤影。相勸盡餘觴。

風雲交作戲題

雲脚如龍爪。空中挾雨來。何關風伯事。欲到卻吹回。

自嘲

歲月推遷萬事非。放翁可笑白頭癡。此生竟出古人下。有志尙如年少時。僻學固應知者少。長歌莫問和子誰。自嘲自解君毋怪。老大從人百不宜。

書室

客來莫笑席塵凝。靜處工夫卻少增。黑蟻常繙魯壁簡。瘦蛟時落越溪藤。尙能豪健如霜鶻。未遽衰殘學凍蠅。更喜論文有兒子。夜窗相對短檠燈。

數日秋氣已深清坐無酒戲題長句

漸近重陽天氣嘉。數椽茆竹淡生涯。山童擁篲掃黃葉。鄰女傍籬牧碧花。避俗要生輪四角。出門何啻路三叉。晚窗酒盡無多歎。試問前村好事家。

五更起坐

世間醉夢過浮生。誰肯披衣坐五更。煜煜心光回自照。昏昏踵息浩無聲。古人得意捐糟粕。癡子何知墮化城。七十老翁須努力。鄰雞纔唱又窗明。

谿上雜言

谿上之丘吾可以休。谿中之舟吾可以遊。一裘雖弊可度風雪虐。一簞雖薄未有旦夕憂。媿於此心鼎食其敢飽。負其所學蟬冕增吾羞。古人誰謂不可見。黃卷猶能覩生面。百穀薿薿知稷功。九州茫茫開禹甸。巍巍成功亦何有。治亂但如翻覆手。逢時皆可致唐虞。比身管樂寧非苟。樹桑釀酒蕃雞豚。是中端有王業存。一朝遇合得施設。千載始知吾道尊。

厭事

厭事使微疾。貪眠幸早寒。人雖笑疏嬾。天實閔衰殘。韋布何曾賤。茆茨本自寬。黃花插烏帽。一醉有餘歡。

方池

莫笑方池小。清泉數斛寬。照花紅錦爛。洗研黑蛟蟠。日取供茶鼎。時來擲釣竿。秋風過欄角。也解作微瀾。

矣

癸丑重九登山亭追懷頃在興元常以是日獵中梁山下樂甚慨然賦詩予於是生六十有九年矣

生年六十九重陽轍遍秦吳歲月長。南鄭從戍嗟尙壯。中梁縱獵最難忘。離披雉拂雕鞍墮。獨徠狐穿古冢藏。夢斷酒醒今萬里。亦逢佳節重悲傷。





# 陸放翁集

劍南詩稿

卷第二十八

感懷

老病與世絕。屏迹三家村。我居一何陋。舉手屋可捫。客至不能迎。堅坐度朝昏。一窗修竹下。超然傲羲軒。外物自變遷。內景常默存。黃流不注海。浩浩朝崑崙。妙道本自得。至言初不煩。功成出緒餘。猶足康黎元。

又

卜居鏡湖上。一菴環翠屏。竹林藏谿澗。嶺路蟠青冥。蹇騰立奇石。嶄絕瞻危亭。車馬雖掃迹。猿鳥與忘形。我行半九洲。蹋盡芒屨青。豈知雪滿鬢。于茲敞雲扃。丹砂收箭鏃。茯苓斲人形。遼天渺歸鶴。一瞬三千齡。

又

平生喜栽花。賴以娛寂寞。小園財一畝。粲粲萬跗萼。典衣買紫桂。輟食致紅藥。阡眠香草茂。掩苒煙柳弱。踏雨探花開。障風畏花落。雖慚童心在。終勝塵事縛。今日疾稍間。天氣亦清廓。啼鳥寒不歸。可以侑吾酌。

又

殘年迫衰謝。嬰疾歸鄉枌。諸賢渡江初。總角幸有聞。才非楚倚相。亦能讀典墳。夫豈或使之。後死與斯文。世儒鑿戶牖。道術將瓜分。孤陋守一說。百氏殆可焚。後來豈無人。鼻聖誰揮斤。巍巍貞觀治。房魏出河汾。

出遊

采藥今朝偶出遊。溪邊小立喚漁舟。未須著句悲搖落。嫩日和風不似秋。

又

朝行躡屨穿幽谷。暮返褰裳涉亂流。提起短筇成一笑。每煩上座爲分憂。

讀杜詩偶成

一念寧容事物侵。天魔元自是知音。拾遺大欠修行力。小吏相輕尙動心。

秋夜卽事

烏宿牛歸戶欲扃。燈前老子影伶俜。溼雲不散初聞雁。深竹微明尙有螢。一卷舊書開蠹簡。半升濁酒倒餘瓶。乘閑欲擬歸來作。小草斜行滿曲屏。

物有可歎者因戲作數語以識之

雞棲及我未掩扉。犬雖遠出暮自歸。司晨警夜職交舉。簸糠棄粒報亦微。查查雙鵲更媿汝。庭樹夜宿常相依。豈憐主人老寂寞。暖熱蓬戶不忍違。養鷗甚恩健卽去。養鷹雖久飽亦飛。嗟哉物性厚薄異。使我隱几空歎歎。

老懷

身見高皇再造初。名場流輩略無餘。舊書科斗纔存字。薄業蝸牛僅有廬。迂士豈堪新貴使。少年自與老人疎。荒園寂寂堆霜葉。抱瓮何妨日灌蔬。

對酒

古今共有死，長短無百年。方其欲瞑時，如困得熟眠。世以生時心，妄度死者情。疑其不忍去，一笑可絕纒。區區計生死，不如持一觴。一觴澆不平，萬事俱可忘。待酒忘萬事，猶是役於酒。醉醒不到處，天魔自奔走。東村散步有懷張漢州。

晚寒自東村步歸  
扶杖村東路，秋來始此回。寒鴉盤陣起，野菊臥枝開。憂國丹心折，懷人雪鬢催。房湖八千里，那得尺書來。

排悶  
夕陽下平野，落葉滿荒街。村店賣麪麪，人家燒豆豉。溪風透布褐，草露溼芒屨。骨相元如此，何由與世諧。

又  
丈夫結髮志功名，大事真當以死爭。我昔駐車籌筆驛，孔明千載尚如生。

又  
曾攜一劍遠從戎，秦趙關河顧盼中。老去功名無復夢，凌煙分付黑頭公。

又  
四十從軍渭水邊，功名無命氣猶全。白頭爛醉東吳市，自拔長刀割髻肩。

又  
西寨山前吹笛聲，曲終已過雒陽城。君能洗盡世間念，何處樓臺無月明。

萬里風中寄斷蓬。古來虛死幾英雄。拔山力與回天勢。不滿先生一笑中。

又

風霜九月冷颼颼。湖海飄然一布裘。親見宓羲初畫卦。轉頭三十萬春秋。

初寒病中有感

楚水楓林霜露新。白頭一叟正吟呻。牛衣未起王章疾。馬磨何傷許靖貧。治道本來存簡冊。神州誰與靜煙塵。新亭對泣猶稀見。況覓夷吾一輩人。

放歌行

君不見汾陽富貴近古無。二十四考書中書。又不見慈明起自布衣中。九十五日至三公。人生窮達各有命。拂衣徑去猶差勝。不推焚死終不悔。梁鴻寄食吾何病。安用隨牒東復西。獻諛耐辱希階梯。初無公論判涇渭。使徒新貴矜雲泥。稽山一老貧無食。衣破履穿面黧黑。誰知快意舉世無。南山之南北山北。

山頭石

秋風萬木實。春雨百草生。造物初何心。時至自枯榮。惟有山頭石。歲月浩莫測。不知四時運。常帶太古色。老翁一生居此山。脚力欲盡猶躋攀。時時撫石三歎息。安得此身如爾頑。

有客

有客隱華山。學道忘歲月。靈苗生絕壁。光景中夜發。斲根食之盡。倏爾換金骨。通籍虎豹關。日預通明謁。綠章奏封事。誤字坐責罰。後身幸不忘。去日苦飄忽。白首三入朝。未省及黔突。方逃申公鉗。已取卞和削。

福微不盈皆。罪衆幾擢髮。上天豈憐之。寸步使屢蹶。拔其利欲根。還之山水窟。洗心謝宿愆。世事等胡粵。

幽居

窮老苦畏事。雅意在丘壑。結茆鏡湖上。卒歲安寂寞。有門常嬾開。壁間挂雙屨。猶恨未遠人。靜夜聞城角。

又

來客無僮奴。剝啄自叩戶。主人亦蕭然。茗飲不能具。清言正絕倒。日暮亟散去。更欲盡所懷。衣薄畏霜露。

又

山園手栽花。日夜數花時。花開亦已落。一歡自無期。勸君強自娛。勿作兒女悲。春風染柳條。不染君鬢絲。

又

種菜三四畦。畜豚七八個。永言給賓祭。且復課慵惰。霜清黃犢健。土潤小雨過。冬耕不可失。努力勿安臥。

又

放翁家山陰。其貧蓋一國。骨相異虎頭。祠祿真雞肋。有米薪未具。坐待至曛黑。躬耕豈所難。一飽非爾力。

野興

身似孤鴻鑿羽翰。悲鳴飲啄住江干。酒闌客思多新感。病起衰顏失故丹。倦枕忽聞中夜雨。疎砧又報一年寒。幽窗晤語無來客。空倚詩情強自寬。

又

老去癡頑百不能。非醒非醉日騰騰。敲門惟有徵租吏。好事元無送米僧。舊俗不還誰復念。古書雖在漸

難憑平生意氣今如此。惆悵西窗半夜燈。

又

殘水涓涓入野塘。菊花猶放數枝黃。悶思野步便晴日。病怯冬溫喜薄霜。湯餅鬻成新兔美。膾齋擣罷綠橙香。人間富貴知何得。商略山林卻味長。

又

水作黠紋微起伏。天如卯色半陰晴。偶來竹下揩頤坐。卻向藤陰曳杖行。西埭人喧荻船過。東村燈上緯車鳴。幽居應接真無暇。莫訝經年嬾入城。

買油

習氣年來掃未平。夢回猶喜讀書聲。冬裘不贖渾閑事。且爲吾兒續短檠。

繫舟

繫舟江浦待潮平。歎息無人共月明。歷盡世間多少事。飄然依舊老書生。

又

地曠月明鋪素練。霜寒河淺拂輕綃。手扶萬里天壇杖。夜過前村禹會橋。

初冬至近村

南國霜常晚。初冬葉始紅。曠懷牛屋下。美睡雨聲中。沮水憶浮馬。西鄙軍行溪過澗。皆浮而濟。嶓山思射熊。何由效唐將。八十下遼東。

古築城曲

築城聲酸嘶。漢月傍城低。白骨若不掩。高與長城齊。

又

長城高際天。三十萬人守。一日詔書來。扶蘇先授首。

又

百丈築城身。千步掘城壕。咸陽三月火。始悔此徒勞。

又

嶧山訪秦碑。斷裂無完筆。惟有築城詞。哀怨如當日。

山園

山泉引派漲清池。野蔓移根絡短籬。藝果極知非老事。接花聊復效兒嬉。提壺言語開顏聽。斲木衣襦緩步窺。莫笑題詩還滿紙。小園幽事要君知。

將軍行

將軍入奏平燕策。持笏榻前親指畫。天山熱海在目中。下殿卽日名烜赫。馳出都門雪初霽。直過黃河冰未坼。繡旗方掠桑乾渡。羽檄已入金臺陌。勇士如鷹健欲飛。虜王似兔何勞搦。戎服押俘獻廟社。正衙第賞頒詔册。端門賜酺天下慶。御觴尙恨滄溟迤。從來文吏喜相輕。聊遣濡毫書竹帛。

古別離

孤城窮巷秋寂寂。美人停梭夜歎息。空國露溼荆棘枝。荒蹊月照狐狸迹。憶君去時兒在腹。走如黃犢爺未識。紫姑吉語元無據。况憑瓦兆占歸日。嫁來不省出門前。魂夢何因識酒泉。粉黛磨鏡不忍照。女子盛時無十年。

寄子虞

吾兒適淮壖。送之梅市橋。三年安得過。思汝雙鬢凋。今年當代歸。秋色已蕭蕭。迎汝不憚遠。夢泝錢塘潮。人事不可料。邑民挽歸橈。郡牧部使者。交章聞之朝。增秩復使留。此事久寂寥。念汝未育子。大女方垂髫。小女聞學行。想像扶牀嬌。汝少知讀易。外物莫能搖。但願早舉孫。不必七葉貂。歸來郎罷前。相從樂簞瓢。

泛舟自中堰入湖

水縮沙洲出。霜清木葉丹。鷺羣橫澹靄。鴉陣報初寒。冷落人情見。衰遲世念闌。惟留一句子。村舍話團圞。

夜歸舟中作

意薄楊脩喚小兒。孤舟自笑髮成絲。放開癡腹無非夢。拈起幽懷總是詩。霜下忽驚桐葉盡。灘生更覺水聲奇。餘年那恨驅黃犢。除卻爲農百不宜。

蓬萊閣聞大風

天風搖蕩萬松聲。卷海頽山得我驚。觸灑瀕堆秋起柂。塵臯闌下夜還營。荷戈老氣縱橫在。看劍新詩欸唾成。興盡卻尋湖上路。醉看月墮斗杓傾。

小出塞曲



全師出雁塞。百戰運龍韜。金絡洮州馬。珠裝夏國刀。度沙風破肉。攻壘雪平壕。明日受降處。甲齊熊耳高。

冬日園中作

園荒闕掃除。籬敗且枝梧。久旱池萍死。新霜野蔓枯。寒燼殊未議。濁酒卻時酤。飛動郊原興。飢鷹待指呼。

登山亭

新得天台古澗藤。強扶衰疾蹋峻嶒。登高臨遠雖多感。歎老嗟卑卻未曾。紙上是非難盡信。人間禍福有相乘。早知等是枯魚肆。乞水何須望斗升。

拄杖歌

道人四壁空無有。一炷清香閑袖手。牀邊獨有拄杖子。疾病相扶真我友。禪房按膝秋聽雨。野店敲門暮除酒。畏途九折歷欲盡。世上誰如君耐久。老矣更踏千山雲。何可一日無此君。歸來燈前夜欲半。露柱說法君應聞。

冬晴

吳中霜雪晚。初冬正佳時。丹楓未辭林。黃菊猶殘枝。鳴雁過長空。纖鱗泳清池。氣和未重裘。臨水照鬚眉。悠然據石坐。亦復出門嬉。野老荷鋤至。一笑成幽期。

冬夕

犬吠驚飄葉。禽喧換宿枝。墮空霜蕭蕭。垂地斗離離。野叟讀書罷。高城吹角悲。功名渾錯料。老病卻如期。

又

不寐起中夕披衣增慨慷。千金空市骨。三沐竟剝腸。世事誰能識。吾生安用長。布裘茆屋底。死去亦芬芳。

十月十五夜對月

離海月盈丈。寒光萬里明。衆星斂欲盡。一鏡獨徐行。重露滴松鬣。高風吹鶴聲。老來殊畏冷。不盡倚闌情。

久疾

久疾無時已。殘年莫更論。流離魂未返。窮困舌空存。耕墾關心事。祠官荷主恩。但愁垂老眼。不見定中原。

又

殘年仍臥疾。窗戶夜愔愔。一日且復過。久生非所欽。暗塵侵藥笥。微月伴衣砧。萬里懷良友。前盟可得尋。

又

幽屏元無事。沉緜自鮮歡。脛長猶可截。冠挂豈容彈。擣藥香塵細。尋書蜜炬殘。晚來差覺健。風小月庭寬。

舍北望牛頭山。山有延勝寺。先太傅書堂在焉。六年前嘗泛小江往遊。寺焚於陸寇。書堂無復存

矣

太傅讀書處。秋風曾問途。江如青弋險。山似白鹽孤。山形絕類夔府之白鹽。但差卑小耳。路盡還登嶺。林

開忽見湖。草堂無復識。流涕想規模。

十月十九日大風作寒閉戶竟日

霜風捲地起。落葉擁蝸廬。終日澹無事。一窗寬有餘。坐多知力耗。食少覺心虛。懶惰無新句。松聲忽起予。

浪迹天台一夢中。距今四十五秋風。勝遊回首似昨日。衰病侵人成老翁。聖寺參差石橋外。仙蓬縹緲玉  
霄東。因君又動青鞵興。目斷千峯翠倚空。

村居

衰病汗朝著。恩寬得免歸。寵能心自信。不恨世相違。草市寒沽酒。江城夜擣衣。是中堪送老。高枕謝招麾。

又

自笑觸藩羝。人嘲失旦雞。囊慳衣任短。山冷屋使低。宦拙讒銷骨。言狂悔噬臍。自今焚筆研。有手但扶犁。

十日下午暄甚戲作小詩

老怯霜風盡日眠。素屏紙帳擁蠻氈。爲君小試回春手。便似暄妍二月天。

霜天雜興

楓葉全丹。榭葉黃。江城殘角伴斜陽。琴書自足閑中樂。天地能容醉後狂。老死山林初不憾。夢遊河渭獨  
難忘。穀城黃石今安在。取履猶思效子房。

又

萬鼓風聲吼屋邊。老人裘袴旋裝綿。晨梳墮髮知衰甚。夜枕聞雞尙慨然。身後文章空飽蠹。眼前交舊半  
沉泉。飯蔬飲水平生慣。恥向天公更乞憐。

又

少學愚公一味愚。暮年仍似病相如。閑吟寄友惟生紙。草具留僧只野蔬。雨澀溪流殊未足。霜高木葉已

無餘潭州丞相憐衰疾。細字時收尺素書。

連日風雨寒甚夜。忽大風明日遂晴。

萬里浮雲一掃空。碧天無際日曛曛。歡聲四起春風裏。恰似祥符景德中。

懷昔

昔者成梁益。寢飯鞍馬間。一日歲欲暮。揚鞭臨散關。增冰塞渭水。飛雪暗岐山。悵望釣璜公。英概如可還。挺劍刺乳虎。血濺貂裘殷。至今傳軍中。尙媿壯士顏。豈知墮老境。槁木蒙霜菅。澤國氣候晚。仲冬雪猶慳。曩事空夢想。擁褐自笑孱。胡星未實地。大弓何時彎。

寄題王俊卿看山堂

廣文風度絕清真。一代論交不數人。車馬到門常謝病。北山雖遠卻相親。

又

閉戶終年嬾出遊。北山山色可消愁。何時一掃胡塵盡。更約同吟太華秋。

絕歎

老屋環青嶂。衰翁臥白頭。殘書且遮眼。簞酒不澆愁。世故真難料。吾生愈覺浮。餘年更須惜。幸得返山丘。

風雨

風雨連三日。衰翁不下堂。弄書聊自適。與世已相忘。坼栗經霜飽。搓橙帶露香。地爐供小飲。亦足慰淒涼。

晚過鄰曲

陽狂跌宕送年華。信步來尋野老家。淺瀨水清逢立鷺。橫林葉盡數栖鴉。書生一飽依耕耒。壯士孤愁入戍笳。王績但思酣美釀。葛洪不復問丹砂。

莫仲謙挽詞

懷器潛山澤。逢時起薜蘿。星辰占寶劍。雷雨化龍梭。禹穴書雖富。浯溪石未磨。門閭更須築。有子繼三科。

病起

一病輒經旬。幾病能不死。誠知迫頽年。暫健亦自喜。半窗風竹影。晴景極清美。讀書雖益嬾。尙可日百紙。引鏡整角巾。病思真一洗。悠然度朝晡。萬事如覆水。

晚興

一聲天邊斷雁哀。數蕊籬外蚤梅開。幽人耐冷倚門久。送月墮湖歸去來。

贈粉鼻畜貓名也。

連夕狸奴磔鼠頻。怒髯噴血護殘囷。問渠何似朱門裏。日飽魚膾睡錦茵。

與兒輩論李杜韓柳文章偶成

吏部儀曹體不同。拾遺供奉各家風。未言看到無同處。看得同時已有功。

夢至小益

夢覺空山淚漬衿。西遊歲月苦駸駸。葭萌古路緣雲壁。桔栢浮梁暗櫟林。坐上新聲猶蜀伎。道傍逆旅已秦音。荷戈意氣渾如昨。自笑摧頽負壯心。

懷紹興間往還諸公

早歲從諸傑，森然盡國華。辭工出月脇，筆健拔鯨牙。道在窮何憾，年徂生有涯。湖山元不改，老淚溼風沙。

磨衲道衣

久脫朝衣學道裝，溪雲野鶴作身章。何時九轉丹砂熟，卻插金貂侍紫皇。

溪上作

落日溪邊杖白頭，破裘不補冷飈飈。懸愁酷信紙上語，老病猶先天下憂。末俗陵遲稀獨立，斯文崩壞欲橫流。紹興人物嗟誰在，空記當年接俊遊。

又

傴僂溪頭白髮翁，暮年心事一枝筇。山銜落日青橫野，鴉起平沙黑蔽空。天下可憂非一事，書生無地效孤忠。東山七月猶關念，未忍沉浮酒醜中。

小憩

徐行散腰膂，小憩奮精神。休養觀書眼，調娛宴坐身。青氈我家舊，紅粟太倉陳。溫飽無餘事，寒龜息自勻。

癸丑十一月下旬溫燠如春晦日忽大風作雪

今年一冬晴日多，草木萌甲風氣和。百錢布被未議贖，老翁曝背兒行歌。否儕小人慮不遠，積雪苦寒來豈晚。青天方行三尺烏，不料黑雲高巖巖。明朝雪惡凍復餓，兒啼頰皴翁噤臥。九重巍巍那得知，閤門催班百官賀。

占城樓竹拄杖

參雲氣壓葛陂龍。跨海來扶笠澤翁。八十尙思行脚在。與君處處現神通。

西城

市步羣鷺散。關門夕照明。河流倒橋影。雪野聚鳥聲。繁杵聞深巷。寒煙下廢城。匆匆船盡發。爭趁早潮平。

東城

墟落斂暮煙。林梢偃新月。河橋燈漸鬧。柳岸船猶發。薄酒吹欲無。佇立搔短髮。誰知七十翁。歲晚念裘褐。

斯道

斯道有顯晦。所憂非賤貧。乾坤均一氣。夷狄亦吾人。朋黨消廷論。鉏耰洗戰塵。清時更何事。處處是堯民。

病起山居口有幽事戲作

靈府超然外物輕。靜中談笑卻三彭。晴窗風竹參差影。霜樹山禽格磔聲。客出異苗咨藥品。僧攜奇篆乞書評。幽居亦未全無事。更用人間有姓名。

又

鶴骨龜腸欲不禁。扶衰初喜罷呻吟。盆山冰釋書窗暖。藥竈香濃道院深。筆健乍臨新獲帖。手生重理舊傳琴。閉門局促還堪恨。雲海何時豁此心。

蝸廬

蝸廬四壁空。也過百年中。封火朝供爨。蘆綿夕禦風。不憎窮有祟。自以放名翁。但恨村醪薄。衰顏只暫紅。

冬夜讀書有感

一指頭禪用不窮。一刀七藥去凌空。汗牛充棟成何事。堪笑迂儒錯用功。

又

胸中十萬宿貔貅。早纛黃旗志未酬。莫笑蓬窗白頭客。時來談笑取幽州。

十二月九日枕上作

臥聽百舌語簾櫳。已是新春不是冬。堪歎老來如許病。正令無病亦無惊。

記夢

黃河衰衰抱潼關。蒼翠中條接華山。城郭丘墟人盡老。藥爐依舊白雲間。

又

西巖老宿雪垂肩。白石爲糧四百年。喜我未忘山下路。慙慙握手一欣然。

又

三髻山童喜欲顛。下山迎我拜溪邊。松陰拂罷蒼苔石。接竹穿雲理舊泉。

鏡湖女

湖中居人事舟楫。家家以舟作生業。女兒粧面花樣紅。小繖翻翻亂荷葉。日暮歸來月色新。菱歌縹緲泛煙津。到家更約西鄰女。明日湖橋看賽神。



